



A 17. C  
M. B. S.  
355/B

~~with Supplement~~

~~Box 177~~

ARTIS











Digitized by the Internet Archive  
in 2018 with funding from  
Wellcome Library





ARTIS MEDICÆ  
PRINCIPES.

---

TOMUS I.

---





ARTIS MEDICÆ  
PRINCIPES,

HIPPOCRATES, ARETÆUS;  
ALEXANDER, AURELIANUS,  
CELSUS, RHAZIS.

*RECENSUIT, PRÆFATUS EST*  
ALBERTUS DE HALLER.

---

TOMUS I.

---





LAUSANNÆ;

Sumptibus FRANC. GRASSET & SOCIOR.

---

M. D. CC. LXIX.







HUNC THESAURUM  
ARTIS MEDICÆ PRINCIPUM  
VIRO EXIMIO  
**JOHAN. SENAC**  
IN HAC ARTE  
PENE DIVINA PRÆCELLENTI  
UNI  
EX ARTIS PRINCIPIBUS  
**REGIS CHRISTIANISSIMI**  
**ARCHIATRORUM COMITI**  
ET  
**CONSILIARIO ORDINARIO**  
AQUIS MINERAL. TOTIUS REGNI  
PRÆPOSITO.  
ACADD. REG. PARIS. ET LONDIN.  
SOCIO  
INGENIO DOCTRINA OPERIBUS FAMA  
INLUSTR

VOVET DICAT CONSECRAT

FRANCISCUS GRASSET.





## PRÆFATIO EDITORUM.

**M**edicis veteribus morborum cognitio potius major fuit, quam nuperis; eorum signa. & præfagia nunquam accuratius, quam a Græcis artis parentibus tradita sunt. Nam etiam post elapsa viginti secula nemo solertiam HIPPOCRATIS aut contempsit, aut superavit. Si quisquam nuperorum medicamentorum usu eo SENE superior fuit, nemo certe in morborum historia eum æquavit, si communis peritorum sensus audiri potest.

Quare non inutilem putavi meum fore laborem, si veterum medicorum usum discen-  
tibus faciliorem redderem. Ante ducentos  
annos HENRICUS STEPHANUS in unum  
quasi corpus colligere tentavit, quæ præter  
GALENUM & HIPPOCRATEM utiliora



scripta ad nos pervenissent ; sed voluntati docti typographi consilium periti medici defuit. Præter HIPPOCRATIS enim scripta, AURELIANUM hic desideras ; MARCELLO & SEXTO , vanissimis medicorum, lubentius careres.

Nobis id consilium est, ut ea conjuncta reddamus, quæ vere utilia sunt, bonæque frugis plena, ut in paucis voluminibus bibliotheca selecta veterum medicorum habeatur. Minorem formam illi ampliori prætulimus, quæ sæpe absterreat juniores, & omnino aliquanto minus facile legatur. Volumina ex ordine dabimus, ab ipso retro HIPPOCRATE ad RHAZEM usque : ita tamen ut præter bona opera nullum lectori obtrudamus.

Meliores editiones reddemus, & versiones accuratiores : Græco enim sermone hoc seculo frustra offerremus, quæ nemo legeret, adeo linguarum elegantissimarum amor deferbuit.

HIPPOCRATES agmen ducet, & ætate major & meritis. Ejus viri genuina opera primo volumine dabimus, altero ea, quæ passim DIVO SENI tribuuntur. Nam etsi non sunt HIPPOCRATIS, sunt tamen an-

tiq̃uiffimi auctoris, quos CATO CENSORIUS legerit, tamquam HIPPOCRATIS.

GALENUM nondum promittimus, cujus vasta volumina vel sola bibliotheca sunt.

Sed ARETÆUM, medicorum græcorum eloquentiffimum dabimus post HIPPOCRATEM, deinde ALEXANDRUM TRALLIANUM, clinicorum Græcorum præstantiffimum, fi fuperftitiofa aliqua excufaveris. CELSUS, AURELIANUS, & RHAZIS libri melioris notæ iftos fequentur. Romanus ille vel ob folam dictionis puritatem non debet a medicis negligi, AURELIANUS vi practica ftili barbariem redimit, RHAZEI multa bona funt, optima, quæ fcripfit de variolis.

Si noftrum ftudium publice placebit, addemus his principibus, fex volumina non fuperaturis, alios quofdam veterum.

ORIBASII & AETII compilationes quidem non averemus recudere: erueremus vero ex utroque medicos antiquos, qui inter aliena additamenta fepeliuntur. ARCHIGENEM, RUFUM, LEONIDEM, ANTILLUM extricare, & in unum continuum opus fparfa cujufque fragmenta reftituere, labor



quidem non mediocris erit, sed neque inutilis. Sunt etiam in GALENI vasta mole fragmenta bene multa, quæ veteres illos medicos reddant integriores, sunt in Arabibus.

Quæ propria habebunt ORIBASIUS, AETIUS & PAULUS, ultimo loco ponentur, nisi maluerint rerum periti his compilatoribus carere, in quibus parum omnino boni fucci sit.

Non abutemur ultra patientia emptorum. Neque tamen recusaremus novum laborem, feligere de nuperis medicis veros clinicos, & in unam bibliothecam conjungere, non multos futuros.

SYDENHAMUS certe, & HUXHAMUS & TORTUS non erunt Græcorum indecori sodales, & qui absque præjudicio legerit utrosque, nobiscum quidem fatebitur, TISSOTI popularem librum posterorum gratitudinem fuisse meritum, si græce exstaret.

Selectum auctorum, & præfationes necessarias recepi, typographi vero studiose curabunt, ut editio minime vitiosa sit.

Emendationes nullas recepi, & receptas editiones secutus sum, ut passim tamen ali-

qua obscuriora, aut minus respondentia Græcis, tacite correxerim. Plura præstare neque ætas mea admittit, neque labores, potissimum ad curam rei publicæ, & alienissima a litteris humanioribus studia pertinentes, quibus me non sinunt me subtrahere munerum officia, aut amor patriæ. Criticas præfationes olim scripseram, dum H I P P O C R A T E M legebam, & in titulos dissectum totum meis collectaneis inferebam. Nihil ergo hic mihi sumo, præter consilium seligendorum ex veteribus, qui laude practica præstant reliquis.




---

## TABULA TOMI PRIMI.

1 HIPPOCRATES DE AERIBUS, AQUIS ET LOCIS.	pag. 1
2 DE NATURA HOMINIS.	33
3 DE LOCIS IN HOMINE.	51
4 DE HUMORIBUS.	89
5 DE ALIMENTO.	102
6 DE MORBIS POPULARIBUS. Lib. I.	110
7 DE IISDEM Lib. III.	138
8 PROGNOSTICON.	166
9 PRÆDICTIONUM. Lib. II.	193
10 DE VICTUS RATIONE IN MOR- BIS ACUTIS. Libri IV.	228
11 DE FRACTURIS.	282
12 DE ARTICULIS.	326
13 MOCHLICUS.	408
14 DE CAPITIS VULNERIBUS.	430
15 DE OFFICINA CHIRURGI.	449
16 DE APHORISMOR. SECTION. VII.	460

HIPPO-





# HIPPOCRATIS

D E

## AERIBUS, AQUIS ET LOCIS

### L I B E R.

A D L I B R U M.

## DE AERIBUS, AQUIS ET LOCIS

### P R Æ F A T I O.

*A*B omni tempore pro genere habitus est, passim, a veteribus, & ab ARISTOPHANIS etiam SCHOLIASTE citatus, a GALENO tribus commentariis, sed brevibus illustratus. Dictio gravis, & quæ principem medicum deceat: ratiocinium firmum.

Ea potissimum docet, quæ corpora humana ab aquis, ventis, annis, temporibus & regionibus patiuntur. Et primum de urbium ad ventos expositione, & ejus effectis, quæ quidem ad Græciam pertinent. Inde de aquis. Non perinde omnibus corporibus easdem aquas convenire. Aquam per conge-

Princ. Art. Med. Tom. I.

A

*lationem leviozem fieri. De calculi vesicæ ex limo adusto generatione. Urethra femina brevior. De morbis anni ætates sequentibus. De relatione denique regionum ad incolarum temperamenta, mores & morbos.*

*Liceat ad aliqua tamen advertisse, quæ a magno viro profecta, non videntur ex satis numerosis experimentis nata esse, ut illos perpetuos morborum morumque cum ventis consensus. Sed etiam aquas ex petrosis improbat, quæ omnium sunt optime, & eas præfert, quæ ex terreis collibus nascuntur. Admiscet aliqua, ex fama eaque infida accepta, de Scythis nobilibus eviratis, quod vitium a bellicosa gente alienissimum est: de absongo remedio ejus mali, venarum pone aures resectione: de Amazonibus.*

---

## ARGUMENTUM LIBRI.

*Quas vires ambientis aëris, aquarum, & regionum ad naturam hominis immutandam, mores formandos, & affectus concitandos habeat.*

## SECTIO PRIMO.

### CAPUT I.

*Nonnulla quæ ad morborum dignotionem, & præ-sagationem summe conferunt.*

**M**edicinam quicumque vult recte consequi, hæc faciat oportet: primum quidem anni



tempora animadvertere, quid horum quodque possit efficere. Non enim quicquam habent simile; sed multum & ipsa a se ipsis, & in suis permutationibus dissentiunt. Deinde vero ventos tum calidos, tum frigidos, maxime quidem omnibus hominibus communes, ac deinceps eos, qui unicuique regioni sunt proprii. Oportet autem & aquarum facultates considerare, quemadmodum enim gustu ac pondere differunt: ita & facultates cujusque multum discrepat. Quare quum quis ad urbem sibi ignotam pervenerit, hunc ejus situm considerare oportet, quomodo & ad ventos, & ad Solis ortum jaceat. Non enim æquales vires habet, quæ ad septentrionem, & quæ ad austrum; neque quæ ad exorientem solem, & quæ ad occidentem sita est. Hæc autem quam optime animadvertenda sunt, & quales sint circum eam aquæ, num palustribus utantur ac mollibus; an duris & ex sublimi aut saxoso loco scaturientibus; & an falsis & concoctu difficilibus. Terra etiam inspicienda, nudane sit, & aquis careat, an densa & irrigua; & an cavo in loco sita sit, & suffocata; an vero sublimis & frigida. Hominum quoque victus ratio, quam maxime delectentur, inspicienda, an potatores, lurcones, & otio dediti; an exercitationibus & laboribus gaudeant; & non edaces sint, & a potu sibi temperent: & ex his singula considerare oportet. Hæc enim præcipue quidem omnia, aut certe plurima probe si quis noverit, quum ad urbem sibi ignotam pervenerit, eum neque morbi regioni familiares, neque communium, quæ sit natura, latere poterit; ut neque in morborum curatione hæsitare, neque aberrare possit (quæ contingere par est, si quis hæc prius provide non noverit.) Qui vero noverit, is cujusque temporis impendentis & anni statum

prædicet, & quoslibet morbos, tam æstate, quam hyeme urbem communiter invafuros; tum omnes proprios, qui cuique ex victus mutatione impendere debeant. Qui enim temporum mutationes, astrorumque ortus, & occasus, quo pacto horum quæque eveniant, observaverit, is utique futurum anni statum prævidere poterit. Hac ratione investigando, qui tempora prænoverit, is maxime cujusque naturam cognoverit, & plerumque sanitas illi succedet, minimumque in arte a recta via aberraverit. Quod si cui ista ad meteororum speculationem pertinere videantur, is si a sententia discesserit, facile intelliget ad artem medicam Astronomiam ipsam non minimum, sed plurimum potius; conferre; quippe quum una cum anni temporibus hominum ventriculi mutationem fubeant. Quonam autem pacto quæ diximus singula considerata & exploranda sint, luculenter exponam.

## C A P U T I I.

*De civitatum natura pro ratione situs & ventorum, quibus ipse perflantur.*

**Q**Uæ civitas ventis calidis est exposita, iis videlicet, qui inter brumalem solem orientem & occidentem perflant, & huic hi venti sunt peculiare; a septentrionalibus autem ventis protecta est; huic civitati copiosas aquas & subfalsas, easque sublimes, æstate quidem calidas, hyeme vero frigidas esse necesse est. Et urbes quidem, quæ soli & ventis probe sunt expositæ, & aquis probis utuntur, eæ quidem hujusmodi mutationes minus sentiunt; quæ vero aquis palustribus



ac lacustribus utuntur, neque probe ventis ac soli sunt expositæ, eæ magis. Ac siquidem æstas sicca fuerit, morbi celerius desinunt; sin vero pluviosa, diuturni sunt, phagedænasque ex quavis causa in ulceribus suboriri est consentaneum. Et homines, qui hanc incolunt civitatem, capita humida, & pituitosa habere par est, ventresque ipsorum cerebro perturbari pituita a capite defluente. Et ipsorum corpora, plurimum imbecilliora esse. Neque ad edendum, aut bibendum idoneos esse; nam qui capita debilia habent, haud strenui sunt potiores: crapula namque magis eos gravat. Morbi vero hi ipsis vernaculi sunt; primum quidem mulieres morbis, & fluxionibus obnoxiae sunt: deinde multæ ex morbo, non natura, sunt steriles, & frequenter abortiunt. Pueris vero superveniunt convulsiones, & anhelationes, quas puerilem affectum efficere, & sacrum esse existimant: viris autem intestinorum difficultates, & alvi profluvia, & febres querqueræ, & hybernæ diuturnæ, pustulæque multæ nocturnæ, & hæmorrhoides in sede. Pleuritides autem, & peripneumoniae, & febres ardentes, & quicunque morbi acuti censentur, haud crebro excitantur; non enim fieri potest, ut ubi alvi liquidæ sunt, ibi morbi invalescant. Lippitudines insuper oboriuntur humidæ, neque molestæ, neque diuturnæ: nisi ex temporum mutationibus morbus aliquis omnibus communis occupet. Ac ubi quinquagesimum annum transgressi fuerint, defluxiones ex capite superveniunt, quæ homines paralyticos faciunt, ubi caput der repente insolatum, aut frigore correptum fuerit. Hi quidem morbi sunt iis familiares: præterquam quod si quis universalis occupaverit morbus ex temporum anni mutatione, hujus etiam participes erunt. Quæcunque autem urbes iis ex



opposito sitæ sunt ad ventos frigidos, inter occasum solis æstivum, & orientem æstivum, ipsisque ii venti sunt patrii: ab austro vero, & calidis ventis sunt protectæ; de iis urbibus sic res se habet. Primum quidem aquæ tum duræ, tum frigidæ magnâ ex parte dulcescunt. Homines vero & robustos, ac siccos esse necesse est: & plerosque ventres inferiores duros, & siccos habere; superiores autem fluidiores: biliososque magis, quam pituitosos esse. Capita vero sana habent, & dura; & plerumque vasa ipsis rumpuntur. Morbi autem populares ipsis sunt, & pleuritides multæ, & qui censentur morbi acuti. Necesse autem est ita se habere, quum ventres eorum duri sint. Suppurati quoque multi fiunt ex quavis occasione: hujus autem rei causa est corporis distentio, ac vasorum durities. Siccitas enim, & aquæ frigiditas, vasorum rupturas efficere solent. Edaces autem tales naturas esse necesse est, & non multum bibaces: non enim fieri potest eos simul esse multum voraces, multumque bibaces. Lippitudines autem his oboriri per temporis intervalla necesse est; duras tamen, & vehementes adeo fieri, ut statim oculi rumpantur. Sanguinis item ex naribus eruptiones junioribus triginta annis vehementes æstate generantur. Morbi etiam sacri appellati: pauci quidem; verum vehementes (contingunt.) Hos vero longioris vitæ magis, quam alios homines esse par est; iisque ulcera citra inflammationem suboriri, neque exasperari. Moresque magis agrestes, quam benigni. Ac viris quidem hi morbi vernaculi sunt; præterquam si quis omnibus communis ex temporum mutatione accidat. Ex mulieribus autem, primum quidem multæ siccae & adstrictæ fiunt propter aquas, quæ sunt duræ, crudæ, & frigidæ; purgationes

enim mensium non contingunt idoneæ, sed paucæ, & pravæ: deinde difficulter pariunt, neque valde abortiunt. Quum vero pepererint, pueros nutrire non possunt. Lac enim ab aquarum durtie, cruditateque, extinguitur. Tabes etiam frequentes a partu contingunt; præ violentia enim ruptiones, ac divulsiones habent. Pueris autem hydropes in testibus fiunt, quamdiu parvi fuerint; qui deinde ætate procedente evanescent. Pubescunt autem sero in hac civitate: & de calidis quidem ventis, frigidisque, & urbibus ad hos sitis, hoc modo, velut ante dictum est, res habet. At quæ civitates ad ventos qui sunt inter æstivos ac hybernos solis exortus, sitæ sunt, & quæ his contrario modo se habent, de iis ita res est. Quæcunque quidem ad orientem Solem sitæ sunt, eas æquum est salubriores esse iis, quæ ad septentrionem conversæ sunt, & iis, quæ ad calidos ventos obversæ sunt, etiamsi stadium solum intersit. Primum enim moderatius se habent calor, & frigus: deinde aquas, quæ ad Solis ortus sunt, omnes limpidas esse necesse est, & odoratas, & molles, & amabiles in hac urbe fuboriri. Sol enim exsurgens, & illustrans eas castigat; matutinum enim tempus ubique occupat ipse aër, ut plurimum. Et hominum formæ bene coloratæ sunt, & floridæ magis, quam aliæ, nisi quis morbus prohibeat; & clara voce præditi sunt homines; & ad iram, & intelligentiam præstantiores sunt iis, qui siti sunt ad septentrionem; siquidem & reliqua, quæ in ea nascuntur, meliora sunt. Et civitas, quæ hoc modo sita est, veri maxime similis est, quod ad caloris frigorisque temperationem; & morbi quidem pauciores, & mitiores generantur, similesque sunt morbis, qui in civitatibus oriuntur ad ventos calidos conver-



sis. Et mulieres hic valde fecundæ sunt, & facile pariunt, & de his quidem ita se res habet. Quæcunque vero ad occasum sitæ, & a ventis ab oriente spirantibus obtectæ, tum calidis ventis leviter perflantur, tum frigidis ab ur̄sis ( seu septentrione ) necesse est, eas urbes situ morbosissimo esse præditas. Primum enim aquæ minime sunt limpida; causa vero est, quod matutinum tempus ut plurimum occupet nebulosus aer, qui aquæ immixtus, ejus splendorem obscurat: non enim Sol, nisi in altum evectus, splendet. Æstate autem, mane quidem auræ spirant frigida; & ros decedit; cæterum Sol ad ipsas occidens, homines quam maxime percoquit. Quare & homines decolores, ac infirmos esse par est, & omnibus prædictis morbis participare eos nihil prohibet. Gravi etiam voce præditos esse, & raucos, consentaneum ut plurimum propter aerem, qui est, impurus, istic, ac morbosus est. Neque enim ab aquilonibus valde expurgatur; non enim perseverant ii venti; qui vero perseverant, & ipsis incumbunt, aquosissimi sunt; quoniam tales sunt venti ab occidente perflantes. Similis autem est autumnino maxime situs hujus civitatis secundum diei mutationes, eo quod magnum intercedat discrimen inter matutinum tempus & vespertinum. De ventis quidem, qui commodi sint, & qui incommodi, ita se res habet.

---

### C A P U T III.

*De natura palustrium & lacustrium aquarum, & earum, quæ e fontibus scaturiunt.*

**C**Æterum de reliquis aquis commemorare volo, quæ morbosæ, & quæ saluberrimæ sint:

& quæ mala ab aquis fieri consentaneum sit, & quæ bona; plurimum enim conferunt ad sanitatem. Quæcunque igitur palustres sunt, & stabiles, & lacustres, eas necesse est æstate calidas esse, & crassas, & fætidas; quum enim non perfluant, & aqua pluvia nova semper accedat, & Sol eas exurat, necesse est, & decolores, & pravas, & biliosas esse. Hyeme vero glaciatas, & frigidas, & turbatas, tum a niye, tum a glacie, adeoque maxime pituitam gignere, & raucedines excitare. Bibentibus autem splenes semper esse magnos, plenos & compressos; & ventres duros, & tenues, & calidos. Humeros vero, & jugula, & faciem extenuari; in splenem enim carnes colliquefcunt, qua ratione graciles evadunt. Tales vero edaces, & siticulosos esse par est, ventresque tum superiores, tum inferiores siccissimos habere, ut medicamentis vehementioribus opus habeant: atque hoc vitium tum æstate, tum hyeme ipsis est consuetum. Ad hæc autem ipsis etiam hydropes plurimi maximeque lethales generantur; æstate enim dysenteriae multæ incidunt, & diarrhœæ, & quartanæ febres & diuturnæ. Hi autem morbi protracti, ejusmodi naturas ad hydropes deducunt, & perimunt: & hi quidem (morbi) ipsis æstate oriuntur. Hyeme vero junioribus quidem peripneumoniæ, & furores morbi; senioribus autem febres ardentes propter ventris duritiem. Mulieribus vero tumores oboriuntur, & pituita alba, & in ventre vix concipiunt, & difficulter pariunt fetus magnos, & tumidos; qui deinde in educatione contabescunt, ac deteriores evadunt: neque purgatio in mulieribus post partum commoda contingit. Pueris vero herniæ superveniunt; potissimum quidem & viris varices, & ulcera in tibiis. Proin-



deque ejusmodi naturæ longevæ esse non possunt; sed ante debitum tempus senescunt. Præterea vero mulieres conceptum se in utero habere putant, & quum partus instant, ventris moles evanescit: hoc autem contingit ob hydropem, cum eo uteri laborarint; & has quidem aquas existimo ad omnem rem perniciosas esse. Secundo vero loco, eas quarum fontes ex petris scaturiant (duras enim esse oportet) aut istic, ubi calidæ aquæ existunt, aut ferrum nascitur, aut aes, aut argentum, aut aurum, aut sulphur, aut alumen, aut bitumen, aut nitrum. Hæc enim omnia caloris vi generantur: non itaque ex ejusmodi terra bonæ aquæ nascuntur, sed duræ, atque æstuosæ, (quæque) difficile minguntur, & alvi egestionem contrariæ sunt. Optimæ vero sunt, quæcunque ex sublimibus locis, & terreis collibus fluunt: hæc enim & dulces sunt, & albæ, modicumque vinum ferre queunt. Hyeme vero calidæ sunt; æstate vero frigidæ; ita enim ex profundissimis fontibus scaturiunt. Maxime vero eas laudare oportet, quarum fluxus ad Solis exortus erumpunt, & maxime ad æstivos. Eas namque limpidiores, leves, ac boni odoris esse necesse est. Quæcunque vero sunt falsæ, & indomitæ, & duræ, non omni quidem ad bibendum bonæ sunt: aliquibus tamen naturis, & morbis tales aquæ in potu, quandoque commodæ sunt; de quibus statim dicam. Atque de his ita se res habet; quarum quidem fontes ad orientem spectant, hæc certe omnium optimæ sunt. Secundariæ vero, quæ inter æstivos solis exortus; & occasus emergunt; & magis, quæ ad exortus. Tertiæ vero, quæ inter occasus æstivos, & hybernos scaturiunt. Pessimæ vero, quæ ad austrum, & quæ inter hybernum Solis exortum,



& occasum: & hæ quidem ad australes partes valde pravæ sunt; ad boreales vero meliores. His autem hoc modo uti convenit: quicumque sanus est, & valet, nullum discrimen faciat, sed semper eam, quæ præsens est, bibat. Quicumque vero morbi causa vult commodissimam (aquam) bibere, is si ita fecerit, maxime sanitatem assequetur. Quorum quidem ventres duri sunt, & ad hoc, ut succendantur idonei; iis quidem dulcissimæ, & levissimæ, & limpidissimæ conferunt. Quorum vero molles (inferiores) ventres, & humidi, & pituitosi sunt, iis durissimæ, crudissimæ, sublalsæ conveniunt; sic enim resiccari maxime possunt. Quæcunque enim aquæ coctæ sunt optimæ, & facile liquecunt, eæ & ventrem maxime laxare, & eliquare possunt; quæ vero sunt indomitæ, & duræ, & maxime coctæ difficiles, eæ magis constringunt ventrem, & resiccant. At vero falluntur aliqui homines de aquis falsis propter imperitiam, propterea quod ad eas alvum solvere existimant falsa esse dejectionia; maxime enim contrariæ sunt alvi dejectioni: sunt enim crudæ, & coqui nequeunt. Quare venter ab ipsis magis adstringitur, quam eliquatur; & de fontanis quidem aquis sic res habet.

---

## CAPUT IV.

*De aquis pluvialibus, & e nive, aut glacie ortis.*

**D**E pluvialibus autem, & quæ a nive fiunt, quomodo se habeant, dicam. Quæ igitur pluviales sunt, levissimæ & dulcissimæ sunt,

& tenuissimæ, & limpidissimæ. Primum enim Sol quod tenuissimum & levissimum est in aqua, educit, & sursum rapit. Manifestum autem hoc mare facit; siquidem quod falsum est, isthuc relinquitur, ob crassitiem & gravitatem, & fit sal: quod autem tenuissimum est, Sol sursum rapit, ob levitatem. Sursum autem tale quid educit, non ex aquis solum lacustribus, sed etiam e mari, & ex omnibus, in quibus aliquid humoris inest: (inest autem omnibus in rebus.) Quin & ex ipsis hominibus tenuissimum, & levissimum humorem educit. Maximum vero huius rei indicium sumere licet, ubi homo in Sole ambulaverit, aut federit veste indutus, quascunque corporis partes Sol aspexerit, eæ non exundant: Sol enim, quicquid apparet sudoris, sursum rapit. Quod vero sub veste contegitur, aut sub alia re, sudorem emittit; per vim enim elicitur a Sole, & exprimitur sudor; servatur autem a tegumentis, ne disperdatur a Sole: quum vero in umbram venerit, totum corpus similiter sudore perfluit; non enim Sol amplius affulget. Propter hoc autem, ex aquis eæ citissime putrescunt: & odorem prævum habet aqua pluvialis, eo quod ex plurimis collecta est, ac permixta, ita ut celerrimi putrescat. Ad hæc vero; quum ejusmodi aquæ raptæ sunt, & in sublime evectæ circumferuntur, aërique permixtæ sunt, quod turbidum est in eis, ac tenebricosum excernitur, & secedit & fit aër, & nebula: quod vero tenuissimum, & levissimum, relinquitur, & dulcescit, dum a sole uritur ac coquitur. Quin & alia omnia, dum coquuntur, semper dulcia evadunt. Dum igitur dispersa, necdum collecta, fuerit, in sublime fertur. Ubi vero coacervata, ac simul derepente a ventis inter se contrariis in



se coacta, fuerit; tunc deorsum prorumpit, qua parte plurima collecta sit. Tunc enim hoc magis fieri par est, quum nebulas a vento stabilitatem non habente concitatas, ac impulsas decerpente repercutit ventus contrarius, & aliæ nubes; ac tunc quidem prior ipsius pars colligitur; quæ vero posterius sunt; insuper accedunt, & sic crassiores; & nigriores evadunt, magisque condensantur, ac pondere deorsum feruntur, & imbres oriuntur. Atque hæ quidem aquæ hac ratione, optimæ sunt: verum opus est, ut excoquantur; & excolentur; sin minus, odorem pravam habent; & raucitates, & vocis gravitatem, & tussis bibentibus adesse par est. Quæ vero ex nive, aut glacie fiunt, omnes prævæ: quum enim semel concreverint, non amplius in pristinam naturam restituuntur: sed quod quidem in ipsis & clarum, & leve, & dulce est, excernitur ac evanescit; quod vero turbidissimum & ponderosissimum, relinquitur. Id vero hoc modo noveris. Si enim volueris hyemis tempore vasculum aquæ certa mensura affusa, sub dio ponere, ut congeletur maxime; deinde postridie in locum calidum delatum sinere, quo maxime lique scat glacies; quumque soluta fuerit, iterum aquam metiaris; aquam multo pauciorē comperies: hoc signum est, a congelatione id, quod levissimum est, & tenuissimum, evanescere ac exiccari: non autem quod gravissimum & crassissimum est; id enim contingere non potest. Hac igitur ratione eas aquas censeo, quæ ex nive, & glacie fiunt, & quæ has sequuntur, ad res omnes esse pessimas. Atque de pluvialibus quidem aquis, & quæ ex nive, & glacie fiunt, sic se res habet.

## CAPUT V.

*De noxis ex pravarum aquarum potu prodeuntibus.*

**C**Alculo vero maxime laborant homines, & ex renum affectibus, & urinæ stillicidio, & coxendicum morbo corripuntur; & herniæ generantur, ubi aquas omnigenas bibunt, & de fluminibus magnis, in quæ flumina alia influunt; & de stagno, in quod rivuli multi, & omnis generis deveniunt: & qui aquis advectitiis ex longinquo allatis, non vero ex propinquo, utuntur. Non enim fieri potest alteram alteri aquam similem esse; sed aliæ quidem dulces sunt, aliæ salæ, & aluminosæ, aliæ ex calidis effluunt. Eæ vero simul permixtæ inter se dissident: & quæ valentissima est, semper vincit. Prævalet autem non semper eadem, sed alias alia. Sed & ex ventis huic quidem boreas præbet robur; illi vero Auster: & de reliquis eadem est ratio. Ex talibus igitur necesse est limum & arenam in vasis subsidere; & ab iis epotis morbi prædicti creantur: quod autem non omnibus, deinceps dicam. Quorum quidem alvus fluida, & sana est, & vesica non ardens, neque vero os vesicæ valde obstructum est; ii quidem facile urinam expellunt, & in vesica nihil colligitur. Quibus vero alvus fervida fuerit, necesse est & vesicam idem pati. Quum enim magis quam pro natura fuerit calefacta, inflammatur os ipsius. Quum vero hæc patitur, urinam non dimittit, sed in se ipsa concoquit, & adurit: & quod quidem in ea tenuissimum, secernitur; quodque purissimum, transit, & emingitur; quod vero crassissimum, & turbidif-



finum est, colligitur, & concrefcit: primo quidem minore copia; deinde vero majore. Dum enim volutatur ab urina, quicquid crassum collectum fuerit, ad se ipsum adaptat; sicque augetur, & in tofum durefcit: & quum mingit, ad vesicæ collum allabitur, ab urina impulsus, & urinæ emissionem impedit, vehementemque dolorem excitat. Quare pudenda confricant, & trahunt pueri calculosi: videtur enim ipsis causa mictionis eo loco esse. Signum autem, quod hoc ita se habeat, hoc est; quod qui calculo laborant, urinam limpidissimam reddant instar feri: quia id quod crassissimum, & turbidissimum est, isthic manet, & coalescit. Et sane plerique hoc modo lapidem contrahunt. Generatur etiam in pueris a lacte, si non salubre id fuerit, sed calidum valde, ac biliosum. Ventrem enim concalefacit, & vesicam; unde urina, dum adurit, hæc patitur. Ac dico melius esse pueris vinum quam aquosissimum dare; minus enim venas adurit, & resiccat. Mulieribus autem calculi non similiter contingunt: meatus enim vesicæ brevis est, & amplus; ita ut facile urina impellatur. Neque enim manu pudendum, ut masculi, fricant, neque contingunt urinarum meatum; ad pudenda enim perforatus est: maribus autem non perforatus; & quia meatus urinarii sunt ampli, ac etiam plus eæ mingunt, quam pueri. Et de his quidem sic res se habet, aut iis quam proxime accedit.



## CAPUT VI.

*De morbis tempestatum anni, & quæ tempestates  
pharmacis commoda.*

**D**E annis autem hoc, modo consideratione  
adhibita, quis discernat, qualisnam  
annus sit futurus, morbosusne, an salubris.  
Si enim secundum rationem fiant signa in  
astris, occidentibus ac orientibus; & in autum-  
no aquæ decidant, hyemsque sit moderata; &  
neque valde tepens, neque præter modum fri-  
gidà, & vere, & æstate tempestivæ aquæ eve-  
niant: sic sane saluberrimum esse annum con-  
sentaneum est. Si vero hyems quidem sicca sit,  
& aquilonaris, ver autem pluviosum, & aus-  
trale, necesse est æstatem febriculosam fieri, &  
lippitudines inducere. Quum enim æstus dere-  
pente supervenit, ac terra humida est a vernis  
imbribus & ab austro, necesse est æstum condu-  
plicatum esse, & a terra irrigua ac calida, & a  
sole adurente; quum ventres in hominibus non-  
dum constricti sint, neque cerebrum resiccatum.  
Non enim fieri potest, quum ver tale fuerit,  
quin & corpus & caro nimio humore diffluant;  
adeo ut febres acutissimæ in omnes irruant;  
maxime autem in pituitosos. Et difficultates in-  
testinorum par est fieri, & mulieribus, & viris  
humidioribus. Et siquidem sub canis exortum  
ingruat pluvia, ac tempestas, & Etesia spirave-  
rint, spes est cessationis, & autumnum salu-  
brem fore: sin minus, periculum est, ne & pueri  
& mulieres moriantur; minime vero senes; &  
ne qui superstitēs evaserint, in quartanas desi-  
nant, & ex quartanis in hydropes. Si vero  
hyems

hyems austrina fiat, & pluviosa, & tepens; ver autem boreale, & siccum, & frigidum: primum quidem mulieres, quæ utero gestant, & quibus ad ver partus instat, abortum facturas esse (verisimile est) quæ vero etiam pepererint, adeo imbecilles, ac morbosos pueros parituras, ita ut statim percant, aut tenues, & debiles, ac morbofi vivant: atque hæc quidem mulieribus. Reliquis vero dysenterias, & lippitudines siccas, & aliquibus defluxiones a capite in pulmones, Pituitosis igitur dysenterias fieri verisimile est; & mulieribus pituita a cerebro defluente propter naturæ humiditatem. Biliosis vero lippitudines siccas, propter carnis caliditatem, & siccitatem; valde autem senibus defluxiones propter raritatem, & eliquationem venarum; adeo ut aliqui quidem derepente intereant, aliqui vero resoluti, aut dextra, aut sinistra parte fiant. Quum enim hyems sit australis, & pluviosa, ac calida, & corpus non adstringatur, neque venæ; vere accedente boreali sicco, ac frigido, cerebrum quod una cum vere dissolvi, ac purgari a gravedine, & raucedine oportebat, tunc densatur, ac cogitur; proindeque derepente æstate accedente, & ardore, ac mutatione contingente, hi morbi incidunt: & intestinorum levitates, & hydropes fere reliquis morbis desinentibus superveniunt; quum non queant facile ventres resiccati. Si autem æstas pluviosa sit, & austrina, similisque sequatur autumnus, necesse est hyemem morbosam esse, & iis, qui pituita abundant, & qui quadragesimum annum excesserunt, febres ardentes fieri verisimile est: biliosis vero pleuritides, & peripneumonias. Si vero æstas sicca fuerit, & aquilonaris, sequens vero autumnus pluviosus, ac austrinus; capitis dolores sub hyemem fieri



par est, & cerebri corruptiones, ac præterea  
 raucedines, gravedines, & tusses, quibusdam  
 etiam tabes. Quod si borealis sit, neque sub  
 canem; neque sub arcturum pluviosus, pitui-  
 tosis natura confert, & maxime natura humidis,  
 & mulieribus. Biliosis autem infestissimum hoc  
 tempus est: valde enim exiccantur, superveniunt-  
 que eis lippitudines siccae, & febres acutæ, &  
 diurnæ, quibusdam etiam melancholiæ. Si-  
 quidem quod humidissimum, & aquosissimum  
 in bile est, resiccatur & consumitur: crassissi-  
 mum vero, & acerrimum relinquitur; quod in  
 sanguine eadem quoque ratione accidit; unde  
 hi morbi illis accidunt. Pituitosis autem hæc  
 omnia commoda sunt; exiccantur enim, & ad  
 hyemem superflua humiditate minime diffluentes,  
 sed resiccati perveniunt. (Si vero hyems bore-  
 alis sit, & sicca, ver autem austrinum, & plu-  
 viosum, æstate lippitudines fieri vehementes;  
 pueris vero, & mulieribus febres congruum est.)  
 Hæc igitur si quis mente concipiet & considera-  
 bit, is præcognoscet plurima omnino, quæ ex hu-  
 jusmodi mutationibus sint futura. Præcipue au-  
 tem observare oportet maximas anni temporum  
 mutationes, ut neque medicamentum purgans  
 libenter exhibeamus, neque uramus partes circa  
 ventrem, neque secemus, priusquam prætereant  
 dies decem, aut plures: ut plurimum autem  
 decem sufficient. At periculosissima sunt etiam  
 ambo solstitia, maxime vero æstivum; pericu-  
 losum etiam æquinoctium utrumque, magis vero  
 autumnale. Oportet autem, & astrorum exor-  
 tus considerare, præcipue Canis; deinde Arc-  
 turi, & Vergiliarum occasum. Morbi enim in  
 hisce maxime diebus judicantur, alique peri-  
 munt, alii vero desinunt; reliqui vero omnes

in aliam speciem, aliumque statum, transmutantur; & circa hæc quidem ita se habet.

---

## CAPUT VII.

*De Asia, maximeque Libye & Ægypti natura,  
ac eorum, qui illas incolunt regiones.*

**D**E Asia vero & Europa demonstrare volo, quantum inter se per omnia differant, & de gentium formis quid, distent, nihilque inter se simile habeant. De omnibus certe longa foret oratio; verum de præcipuis & plurimum inter se differentibus, ut se res habere, mihi videtur dicam. Asiam (autem) ab Europa plurimum differre dico secundum naturas; tum eorum omnium, quæ e terra producuntur, tum etiam hominum. Longe enim pulchriora uberioraque omnia in Asia gignuntur; regioque ipsa hac nostra mitior, & hominum mores humaniores & benigniores. Quorum quidem causa, est tempestatum anni temperatio; quum in medio solis exortu ad auroram sit exposita, a frigore & calore procul remota. Incrementum autem & moderationem omnium maxime præbet, quum nihil sit, quod violenter excedat, sed omnium sit æquabilis potestas. Neque tamen ubique per totam Asiam ad eundem modum hæc se habent; sed quæ quidem regio in medio caloris & frigoris sita est, ea certe feracissima est, & arboribus maxime confita, & maxime tepens, aquisque optime fruitur & cælestibus & ex terra provenientibus. Neque enim calore admodum exuritur; neque squaloribus & aquarum penuria resiccatur, neque frigore aduritur. Sed & humida, & irrigua tum ob



multos imbres, tum nives; multaque illic sua tempestitate nasci par est, quæ ex feminibus, quæque ex terræ plantis proveniunt, quorum fructibus homines fruuntur, & agrestibus domesticos facientes, & pro commoditate sua transplantantes. Pecora etiam ibi enutrita abundare vel maxime æquum est, crebriusque parere, & optime educari. Hominesque habitiores esse, ac specie pulcherrimos, & magnitudinis eximiæ, formaque & corporum proceritate non admodum inter se differre: & hanc regionem verisimile est, quam proximam esse natura, & moderatione anni temporibus. Virilis autem animus, ærumnarum & laborum tolerantia atque audacia, in hujusmodi naturis innasci nequit, neque si patrium, neque si externum fuerit: verum in ipsis libidinem dominari necesse est; ideoque multiplices in feris partus gignuntur. Atque de Ægyptiis ac Libycis ad hunc quidem modum se res habere videtur.

---

## C A P U T VIII.

*De cæteris regionibus Asiæ ab Oriente Sole ad Mæotidem paludem; ac de Macrocephalis, qui incolunt Phasin.*

**D**E his vero, qui sunt ad æstivi solis ortus dextra, ad Mæotidem usque paludem (quæ est Europæ atque Asiæ terminus) se res habet ad hunc modum. Hæ quidem gentes, quum propter anni tempestatum mutationes, tum ob regionis naturam, longe magis inter se differunt, quam quæ ante sunt enarratæ. Eadem namque terrarum ratio videtur, quæ & reliquorum homi-

num. Ubi namque anni tempora maximas & creberrimas mutationes faciunt, illic agrestis admodum, & maxime inæqualis regio est; montesque plurimos & densos, campos item & prata invenias. At ubi anni tempora non admodum variant, illic regio maxime æqualis est. Ad eundem vero modum se in hominibus habet, si quis animum advertat. Sunt enim quædam naturæ, montibus sylvosis, atque bene aquosis similes; quædam vero tenuibus & inaquosis; quædam etiam pratorum & paludum naturam referunt; quædam etiam ad planitie, nudæque & siccæ terræ naturam accedunt. Anni enim tempora, quæ formarum naturam variant, inter se differunt; quumque inter se diversa sint, varias & multiplices formas producunt. Ac eas quidem gentes, quæ parum inter se differunt, prætermittam. Quæ vero plurimum aut natura, aut institutis inter se discrepant, de his quemadmodum se habeant, dicam; primumque de Macrocephalis, quum his nulla alia gens capita similia habeat. Ac initio quidem institutum longitudinis capitis causa fuisse videtur. Nunc vero & natura etiam ad institutum accedit. Longissima enim habentes capita, generosissimos existimant. Hujusmodi autem est institutum. Quum primum editus est infans, caput ejus adhuc tenellum & molle manibus effingunt, & in longitudinem adolescere cogunt, vinculis & idoneis instrumentis adhibitis, quibus capitis rotunditas vitietur, & longitudo augeatur. Hoc institutum primum hujusmodi naturæ dedit initium: successu vero temporis in naturam abiit, ut proinde instituto nil amplius opus esset. Semen enim genitale ex omnibus corporis partibus provenit, ex sanis quidem sanum, & ex morbofis morbosum. Si igitur ex calvis calvi gi-



gnuntur, ex cæsiis cæsi, & ex distortis ut plurimum distorti, eademque in cæteris formis valet ratio; quid prohibet, cur non etiam ex Macrocephalo Macrocephalus gignatur? nunc autem similiter ut antea non nascuntur, obsolescente per hominum incuriam instituto. Ac de his quidem sic sentio. Jam vero de his, qui Phasim accollunt. Regio illa est palustris, calidaque, ac aquosa & densa: imbribusque copiosis & vehementibus fere semper perfunditur. Hominesque in paludibus vitam degunt, & domos ligneas & arundineas in aquis fabrefactas habent: raro urbes & emporia adeunt; verum navigiis ex ligno uno cavatis, sursum ac deorsum navigant: quum fossas aqueas habeant plurimas. Aquas enim bibunt calidas, stagnantesque, sole putrefactas, & imbribus auctas. Ipseque Phasis præ cæteris fluminibus maxime stagnans est, & lentissime decurrit; fructusque omnes, qui illic nascuntur, nullum incrementum accipiunt, effeminati sunt, & præ aquarum copia imperfecti: ideoque non maturescunt. Aer quoque multum caliginosus ab aquis sublatus hanc regionem occupat. His sane de causis Phasiani corporis formam a cæteris hominibus longe diversam habent. Proceritate enim magni, & corpulentia valde excedunt; neque articulus ullus, neque vena comparet; lutcoque sunt colore velut morbo regio detenti; quumque aere utantur minime puro, sed caliginoso & maxime humido, gravissimam præ aliis omnibus vocem edunt. Sunt etiam ad corporis exercitationem, natura segniores, annique tempestates, quod ad æstum aut frigus, non multum variant. Venti iis plurimi sunt austrini, potissimum unus ejus regionis peculiaris, qui interdum violentior, molestior & calidior spirat,



quem Cenchrona nominant. Boreas vero non admodum huc pervenit; quod si aliquando spiret, debilis tamen & valde lenis est.

---

## CAPUT IX.

*Cur Asiani timidi sint ac imbelles.*

**D**E natura quidem, ac differentia & formarum, qui Asiam & Europam incolunt, ita habet. Quod autem ad animi ignaviam & molliem attinet, cur Asiatici Europæis minus bellicosi sint, & moribus lenioribus, anni tempestates in causa sunt, quæ non magnas, tum ad calorem tum ad frigus, permutationes faciunt; verum similes permanent; unde neque mentis validæ perturbationes fiunt, neque corpus vehementer a suo statu dimovetur. Ex quibus iram exasperari, ac prudentiæ & caloris compotes fieri magis æquum est, quam si eodem semper statu permaneant. Mutationes enim inter omnia hominis mentem semper excitant, neque sinunt quiescere. Quas ob causas mihi Asiaticorum genus imbelles videtur, atque adhuc amplius propter leges. Multo enim maxima Asiæ pars regum imperio regitur. Ubi vero homines sui potestatem non habent, neque sui juris sunt, sed dominis subditi, ii rerum bellicarum nullam curam habent, sed ut ne bellicosi videantur. Neque enim æqualia pericula impendent. Hos siquidem pro dominis in militiam proficisci, & labores tolerare, mortemque oppetere necesse est, relictis domi liberis, uxore, ac reliquis amicis. Quod si probe ac viriliter se gesserint, inde dominis opes augentur & crescunt, ipsi pericula & cædes pro

fructu nanciscuntur. Deinde vero ab his hujusmodi hominum animos mansuescere necesse est, & propter inertiam bellicam, & propter otium; ita ut si quis etiam natura virilis sit & animosus, ejus animus a legibus invertatur. Cujus rei hoc magnum est indicium, quod quicumque in Asia Græci ac Barbari dominis minime sunt subditi, sed liberi, & sui laboris quæstum faciunt, ii omnium bellicosissimi sunt. Sibi enim ipsis pericula subeunt: & ut fortitudinis præmia reportant, ita ignaviæ poenas luunt. Asiaticos autem plurimum inter se differre, & hos quidem generosiores, illos vero degeneres esse comperies. Quorum quidem causa ad anni tempestatum mutationes, quemadmodum antea diximus, referenda est. Atque sic quidem de his, qui Asiam incolunt.

---

## CAPUT X.

*De Europa, ac primum de natura, moribus, victu, & forma Scytharum.*

**I**N Europa autem gens est Scythica, quæ Mæotim paludem incolit, & a reliquis gentibus plurimum differt, Sauromatæ appellantur. Eorum foeminae equitant, arcu utuntur, & ex equo jaculantur, & cum hostibus bellum gerunt, quamdiu virgines sunt; neque ante virginitatem deponunt, quam tres hostes interfecerint; neque prius cum viris congregiuntur, quam sacra Diis patrio more peregerint. Quod si qua sibi virum delegerit, equitatu soluta est, nisi communis expeditionis necessitas ingruat. Dextram autem mammam non habent: puellis enim adhuc infantibus, æreo instrumento, ad id fabricato &



candente, dextræ mammæ admoto, eam matres exurunt, ne incrementum accipiat, sed ad dextrum humerum & brachium omnis vis ac robur deferatur. De reliquis autem Scythis, quod forma inter se sint similes, & neutiquam aliis, eadem ratio, quæ de Ægyptiis habenda est, nisi quod hi calore, illi frigore urgentur. At vero solitudo Scythica appellata, in planitie sita est, & pratis abundat, nuda arboribus, & modice aquosa est. Magni enim fluvii aquam ex campis per rivos deducunt; in hac itaque Scythæ, Nomades dicti, degunt, quod domos nullas habeant; sed in curribus habitent, quorum vel minimi quatuor, reliqui sex rotis aguntur. Hi autem, compactis villis obducti, & ad instar domorum fabricati sunt, alii quidem simplici, alii etiam triplici tabulato; ipsique in angustum coarctati adversus aquam, nivem ac ventos. Currus trahunt, alios quidem duo boum paria sine cornibus, alios tria; namque hi præ frigore cornua non habent. His igitur in curribus mulieres degunt; ipsi vero viri in equis vehuntur: eos sequuntur pecorum greges, & boves, & equi; tandiuque uno in loco subsistunt; quoad ipsis pecoribus pabulum sufficit, quo deficiente, ad aliam regionem commigrant. Carnibus coctis vescuntur, & lacte equino in potu utuntur, & hippace, hoc est, caseo equino, victitant. Ac de eorum victus ratione & institutis hætenus quidem dictum est, simulque de anni temporibus, quodque Scythica gens forma multum a reliquis hominibus diversa est, sibi ipsi similis, non secus ac Ægyptii. Minime fecunda est ea gens, ipsaque regio minimas feras alit, & magnitudine, & numero. Sub ipsis enim Uris Riphæisque montibus, unde Boreas spirat, est posita; sol-



que quum ad extremam conversionem æstivam venerit, proxime accedit, & tunc quidem exiguo tempore calefacit: neque venti ex calidis locis spirantes, nisi rari ac debiles, huc admodum perveniunt; sed venti frigidi ab Urfis, nive, glacie, & multis aquis, perpetuo spirant, neque unquam montes deserunt; unde non nisi ægre habitari possunt. Aerque densus tota die campos occupat, ipsique in humidis locis degunt. Quare perpetua fere illis est hyems, æstas vero paucissimis diebus, neque his admodum magna. Planities enim illis sublimis est & nuda, neque montibus cincta, sed sub Urfis ibidem acclivis. Neque feræ illic magnæ, sed quæ sub terra abscondi possint, nascuntur. Hyems enim & terræ nuditas prohibet, quamquam & apricis & tectis locis caret. Nam neque magnæ, neque vehementes sunt anni temporum mutationes, sed similes & parum differentes; unde & formas inter se similes habent. Eodem etiam victu semper & amictu utuntur æstate ac hyeme, aëremque humidum & crassum attrahunt, & aquas ex nivibus & glacie bibunt; nullaque corporis exercitatione utuntur, quum vel corpus, vel animus, exerceri nequeat, ubi mutationes non sunt vehementes. Has ob causas eos habitu esse crasso & carnosio necesse est: articulis vero humidis & enervatis, & ventribus valde humidis; omnium tamen maxime inferiore alvo. In hac enim regione, natura, & tempestatum anni constitutione, alvus resiccare nequit; sed propter pinguedinem & carnis glabritiem, forma inter se sunt similes, tum mares maribus, tum feminæ feminis. Quum enim anni tempora similiter se habeant, nullæ corruptiones, neque vitia in feminis conformatione contingunt, nisi violento aliquo casu.

aut morbo id accidat. Eorum autem humiditatis magnum apponam argumentum. Scythas enim plerisque, ac præcipue Nomadas, humeris, brachiis, primis manuum juncturis, pectoribus, coxendicibus, & lumbis exustis esse comperies, nullam fane aliam ob causam, quam naturæ humiditatem & molliem. Nam neque arcus intendere, neque humero jaculum contorquere, ob humiditatem ac molliem possunt. Quum vero uruntur, ex articulis humoris copia resiccatur, eorumque corpora validiora, habitiora, & firmitioribus articulis redduntur; fluida vero sunt & lata, primum quidem quod fasciis non involvantur, quemadmodum fieri solet in Ægypto, neque vero id curant equitationis causa, ut ad equitandum meliores reddantur; deinde vero ob vitam sedentariam. Ex his namque mares, quoad equis vehi nequeunt, longo tempore in curribus sedent, parumque propter locorum transmutationes & peragrationes inambulant. At mulieres stupendum in modum habitu sunt corporis fluxo. Gens autem Scythica propter frigus fulvo est colore, quum ad eos sol vehemens non accedat; a frigore autem albedo exuritur, fitque fulva. Fecunda vero ejusmodi natura esse non potest. Neque enim viri multa coeundi cupiditate tenentur ob corporis humiditatem, ventrisque molliem, & frigiditatem; ex quibus viros quam minime venerem exercere posse par est: eo accedit, quod perpetua equitatione fracti; ad coitum imbecilles redduntur. Atque ex quidem in viris causæ sunt (infecunditatis;) in mulieribus vero, carnis pinguedo, & humiditas. Neque enim uteri genitale semen ad se rapere queunt. Neque eis ut decet menstrua purgatio, sed parcius & longiore tempore contingit; ipsumque uteri os



præ pinguedine concluditur, semenque genitale haud suscipit. Ipsæque nulla corporis exercitatione utuntur, & præpingues sunt, earumque ventres frigidi & molles: ex quibus necessario consequitur, non admodum fecundam esse Scytharum gentem. Cujus rei magnam conjecturam præbent famulæ, quæ quum virorum congressum non appetant, tamen propter exercitationem & carnis gracillitatem concipiunt.

---

## C A P U T X I.

*Cur multi Scytharum Eunuchi, ac ad coitum impotentes.*

**A**D hæc quoque plerique Scythæ eunuchi fiunt, & munia muliebria obeunt, ac velut mulieres factitant & loquuntur, vocanturque hi evirati. Ac regionis quidem incolæ causam Deo acceptam referunt, & hujusmodi homines reverentur & colunt, sibi quique timentes, ne quid tale contingat. At mea quidem sententia hi omnes affectus divini sunt, ut & reliqui omnes; nullusque altero divinior aut humanior est, sed divini omnes; quum horum quisque suam naturam habeat, neque quicquam citra naturam fiat: & quomodo hic affectus mihi contingere videatur, enarrabo. Ex equitatione eosprehendunt diuturnæ ex defluxione in articulos affectiones; nimirum quum semper pendeant ex equis eorum pedes. Deinde qui vehementer ægrotant, claudicant, iisque coxendices contrahuntur. Hac autem ratione sibi medentur: a principio morbi utramque venam post aures incidunt; quumque sanguis effluerit, præ imbecillitate somno corripiuntur & obdor-



miscunt; deinde aliqui quidem fani expergiscuntur, quidam vero minime. Ac mihi quidem videntur hac curatione se ipsos perdere. Juxta aures enim venæ sunt, quas si quis incidat, ii, quibus secantur, steriles fiunt. Has igitur venas mihi secare videntur. Postea vero ubi ad uxorem accedunt, neque cum iis rem habere possunt, primum nil suspicantur, sed quiescunt; quum autem bis, ter, aut sæpius id tentantes, nihil profecerint, Deum, in quem causam conferunt, se offendisse existimantes, muliebri stola amicti, suam ignaviam accusant, & cum mulieribus victitantes, earum opera tractant. Qua affectione tentantur opulentissimi quique Scythæ; minime vero infimi, sed generosissimi, & qui ad maximas opes per equitationem ascenderunt; pauperes autem, quia non equitant, minus. Cæterum oportebat, si hæc affectio cæteris divinator esset, ut non generosissimos & opulentissimos Scythas solos, sed omnes ex æquo invaderet; idque potius eos, qui paucas opes possident, neque honorem exhibent, si modo Dii hominum cultu gaudent, & pro eo his beneficia conferunt. Divites enim, quum opibus abundant, Diis sæpe sacra facere, & donaria offerre, eosque colere æquum est; pauperes vero minus, quum nihil habeant; qui etiam eos incusant, quod eis opes non suppeditent; ac proinde qui pauca possident, suorum scelerum pœnas luere, potius quam divites, videantur. Verum (quemadmodum jam ante dixi) hæc quidem divina sunt, perinde ut reliqua, & secundum naturam quæque accidunt. Et hic quidem morbus, ob eam quam dixi causam, Scythis contingit. Quin & in reliquis hominibus ad eundem se habet modum. Ubi enim plurimum & creberrime homines equitant, ibi

plurimi diuturnis in articulos defluxionibus, ischiadibus; & podagris corripiuntur, & ad veni-rem exercendam ineptissimi sunt. Hæc autem Scythis adfunt, & ob eas causas hominum ineptissimi ad coitum redduntur, tum etiam quod feminalia semper gestant, & in equis magnam temporis partem degunt, ut neque manu tractare pudenda liceat, ac præ frigore & lassitudine voluptatis & coitus obliviscantur, nilque aliud pensi habent, quam ut virilitate priventur. Hactenus itaque de Sytharum gente.

---

## CAPUT XII.

*De reliquorum Europæ populorum natura, pro tempestatum anni, regionum; & aquarum varietate.*

**A**T reliquum in Europa hominum genus, tum magnitudine, tum forma, inter se est dissimile, propter magnas & crebras, quæ fiunt, anni temporum mutationes. Habent enim calores vehementes, & hyemes acres, ac imbres multos, rursusque siccitatem diuturnam, & ventos multos, ex quibus multæ & omnis generis mutationes contingunt. Ex his par est aliam percipi generationem in feminis conformatione; neque ex eodem eandem esse, vel æstate vel hyeme; vel pluvioso; vel sicco tempore. Eaque de causa, ut existimo, Europæi magis quam Asiatici forma inter se variant, & per singulas urbes, magnitudine maxime inter se dissident. Plures enim corruptiones circa feminis concretionem contingunt, ubi crebræ fiunt anni temporum mutationes, quam si eadem sint & similes. Eadem



autem est de moribus ratio. Ferocia, asperitas, & audacia hujusmodi naturæ innascitur; frequentes enim mentis emotiones morum ferociam inducunt; lenitatem autem & comitatem evel-  
lunt. Quocirca eos, qui Europam incolunt, magnanimos magis, quam Asiaticos esse censeo. Rerum siquidem uno se habentium modo æqualitas socordiam ingenerat; mutatio vero, corpus & animum ad laborem excitat. Quinetiam socordia & quiete ignavia crescit; exercitatione vero & laboribus, magnanimitas. Hanc ob causam bellicosiores sunt, qui Europam incolunt; jam etiam propter leges, quoniam Regum imperio non parent, ut Asiatici. Qui enim regibus subjiuntur, eos timidissimos esse necesse est; & velut antea a nobis dictum est, servitute pressi animi, neque lubenter sese temere pro alieno imperio periculis objiciunt. Hi vero suis legibus viventes, sibi, non aliis, pericula subeunt, & magna animi alacritate volentes ad gravia quæque feruntur, quum pro re gesta victoriæ præmia sint accepturi; ita leges ad animi magnitudinem plurimum faciunt. De Europa igitur & Asia in universum sic se res habet. Sunt autem & in Europa gentes, tum magnitudine, tum forma, tum magnanimitate inter se differentes. Varietatis causæ eadem, quæ supra dictæ sunt, quasque jam manifestius aperiā. Quicunque regionem quidem montanam; asperam, altam, & aquis carentem incolunt, & anni temporum mutationes habent admodum differentes; illic (enim) hominum formas magnas esse par est, tum ad laborem, tum ad robur a natura optime esse comparatas, at agrestibus & ferinis moribus ejusmodi naturæ non parum sunt præditæ. At qui loca concava, herbosa & æstuosa (habitant,) qui-



que ventis calidis magis quam frigidis perflantur, & aquis utuntur calidis: hi magni quidem esse non possunt, neque recti & ventre substricto; in amplam vero corporis molem a natura producuntur, corpore sunt carnosum, & capillis nigris, colore potius nigro quam candido, & minus pituitosi quam biliosi. At animi robore & laborum tolerantia, non æque a natura valent, sed accedens vitæ institutum id efficere potest. Quod si flumina ea in regione sint, quæ stagnantes & pluvias aquas educant; ii incolumes degunt, ac nitidi. Sin vero nulla sint flumina, aquasque fontanas statarias & male olentes bibant, has ventri & lieni noxias esse necesse est. Qui vero regionem altam, planam, ventis perflatam & aquosam incolunt; ii corporis habitu sunt prægrandi, inter se similes, & erecti, & animo mansuetiore. At qui macra, & aquis carentia & nuda loca tenent, neque temperatas habent anni temporum mutationes; hac in regione homines duro & robusto corporis habitu esse par est, & colore flavo potius quam nigro, moribus & animi appetitionibus sibi nimis placentes superbos, & in concepta opinione permanentes. Ubi enim anni temporum mutationes, tum crebræ, tum plurimum inter se differunt; ibi, & formas, & mores, & naturas plurimum diversas comperias. Atque hæ quidem maximæ causæ sunt, cur naturæ permutentur; deinde etiam regio, in qua quis nutritur, & aquæ. Magna enim ex parte hominum formas, & mores regionis naturam imitari reperias. Ubi enim terra pinguis est, & mollis, & aquosa; aquæ vero valde sublimes, ita ut æstate sint calidæ, & hyeme frigidæ, quæque ad anni tempora probe habet: ibi homines carnosum sunt, articulis non discreti, humidi, labores

borea non ferentes, ac ut plurimum pravi animi. Quin etiam segnes sunt & somnolenti, & ad artes crassi, neque subtiles, neque acuti. At ubi regio nuda est, non murita (arboribus) & aspera, quæque hyeme prematur, & sole exuratur; ibi enim duros, robustos, articulis discretos, nervosos & hirsutos homines cernas: & qui ad aliquid agendum natura sunt industrii & vigilantes; quique mores & affectus habent superbos, & pertinaces, magisque feritatis quam lenitatis participes; eosque ad artes acutiores & solertiores, & ad res bellicas gerendas meliores deprehendas. Quin & reliqua omnia, quæ e terra producuntur, terræ ipsius naturam sequuntur. Atque maxime quidem contrariæ naturæ & formæ sic se habent: ex quibus conjectura ducta, si reliqua consideres, minime aberrabis.

---

## HIPPOCRATIS

DE

## NATURA HOMINIS LIBER.

---

### PRÆFATIO

*P*ars prior huius libri primæ classi a MERCURIALI accensetur, sæpe citata a GALENO & a veteribus.

Congeries equidem est rerum diversissimarum. Et primum de quatuor agit humoribus, qui alterne dominantur, & a medicamentis, cum aliquæ quasi optione, trahantur.

Princ. Art. Med. Tom. I.

C



*Inde de morborum epidemicorum origine, quam aeri potius, quam vite rationi tribuit, hætenus minus recte, cum ab eodem carnium salsarum victu sub diversissimo aere idem scorbutus nascatur. Sequuntur addititia aliena & inter ea mirifica illa quatuor venarum paria, quæ Chinesium libros sapiunt.*

*Redit ad alios morbos, & ad febres, earumque discrimina a variabile deducit, ut ea copia excelluerit, aut parcior fuerit: ut ab atra bile quartana sit.*

*Nolui paucas paginas separare a reliquo libello, & moneo adeo incipere cum n. 17. LINDE-  
NII.*

## ARGUMENTUM LIBRI.

*Usitatoria Medicis vocabuli naturæ significata; naturam hominis non ex uno, sed ex quatuor elementis, tum humoribus constitui; quid & quotuplex sit corpus tam partibus similaribus constans, quam organicum: & libri hujus germani Hippocratis propositum.*

### CAPUT I.

*Hominem non ex uno aliquo elementorum constare. Naturam humanam non recte cognoscere Philosophos, & multum circa hanc disceptari.*

**Q**UICUNQUE de natura humana ulterius, quam quod ejus ad Medicinam spectat, differentes, audire consuevit, huic certe ut



auscultet, minime est accommodata hæc oratio. Neque enim omnino aerem dico hominem esse, neque ignem, neque aquam, neque terram, neque aliud quidquam, quod minime appareat unum in homine esse, verum hæc volentibus dicere permitto. Qui vero talia proferunt, non mihi recte id adgnoscerere videntur; eadem enim sententia utuntur omnes: verum non eadem dicunt, sed sententiæ suæ epilogum eundem efficiunt. Ajunt enim unum quid esse, quodcumque est, & id ipsum unum esse, ac universum; nominibus autem non consentiunt. Eorum autem aliquis aerem esse hoc unum, & universum asserit; alius ignem, alius aquam, alius terram; tum unusquisque suæ orationi testimonia, & conjecturas addit, quæ nihili sunt. Quod etenim in eadem dicant, eos ipsa ignorare manifestum est; atque id ex eo maxime is cognoverit, qui ipsis disceptantibus interfuerit. Nam quum iidem viri inter se disceptant, iisdem auditoribus præsentibus, nunquam ter consequenter idem homo eodem in sermone superior evadit: sed modo hic vincit, modo ille, modo iste, cui potissimum lingua volubilis ad populum contigerit. Quanquam par est, qui recte se de rebus aliquid cognoscere profectetur, eum suam rationem perpetuo superiorem adferre, si quæ sunt (vera) agnoscit, recteque pronunciat. Verum mihi videntur ejusmodi homines seipsos in suarum rationum vocabulis præ inscitia evertere; adeoque Melissi sententiam erigere: sed de his hæc mihi dicta sufficiunt. At e Medicis nonnulli hominem solum sanguinem esse dicunt; alii bilem, hominem esse asserunt; quidam denique pituitam: atque hi omnes epilogum eundem faciunt. Unum enim esse (hominem) quid as-

firmant, quodcunque eorum quisque appellare voluerit; atque id unum existens, transmutare formam, & facultatem, quum a calido, tum frigido cogitur, fierique & dulce, & amarum, & album, & nigrum, & cujuscunque generis quid aliud; mihi vero neque hæc sic se habere videntur. Plurimi igitur talia quædam, & amplius his similia pronunciant. Ego autem dico, si unum esset homo, nequiquam doleret. Neque enim esset, quum unum existat, a quo doleret. Quod si etiam doleat, necesse est, & remedium, quod medetur, unum esse. Nunc vero plura; multa enim sunt in corpore insita, quæ quum a se mutuo præter naturam & calefiunt, & refrigerantur, & exsiccantur, & humectantur, morbos pariunt: quare multæ sunt morborum species, & multiplex quoque eorum curatio est. Ego vero censeo, qui hominem sanguinem solum, nihilque aliud esse asserit, ei monstrandum esse, ipsum neque formam transmutare, neque omnigenum fieri; vel saltem tempestatem anni aliquam, vel hominis ætatem, in qua sanguis solus in homine inesse appareat. Consentaneum namque est, unam quandam esse tempestatem, in qua ipsum per se unum esse appareat; eademque assero, tum de eo, qui pituitam esse (hominem) dicit, cum de eo, qui bilem asseverat. Enim vero quæcunque ego hominem esse dixerò, ea & lege, & natura, tum in juvene, cum in sene, tempore frigido æque ac calido semper similia inesse demonstrabo; indicia etiam proferens, & causas necessarias ostendam, per quas unumquodque in corpore augeatur, minuaturque.



## CAPUT II.

*Generationem neque ab uno, neque genere differentibus fieri. Singula principia homine moriente in suam naturam reverti. Humores in homine quatuor & sanitatis, & ægitudinis sunt cause.*

**P**rimum itaque generationem ipsius non ab uno fieri necesse est. Quomodo enim unum existens, aliquid aliud generarit, nisi alicui miscetur? Deinde, quæ miscentur, nisi ejusdem sint generis, eandemque facultatem habeant, neque generant, neque similia nobis efficiunt. Præterea nisi calidum cum frigido, & siccum cum humido moderate, & æquabiliter inter se habeant, sed alterum alteri, & robustius imbecilliori multum præpolleat, nulla generatio futura est. Quocirca, quomodo rationi consentaneum fuerit, ab uno aliquid generari, quum ne a pluribus quidem generetur, nisi probam inter se temperiem habere contigerit? Quum itaque ejusmodi sit natura cum reliquorum omnium, tum hominis; non unum esse hominem necesse est; sed unumquidque eorum, quæ ad generationem conferunt, talem in corpore facultatem, qualem contulit, obtinere. Rursus etiam necesse est intereunte homine unumquidque ad suam secedere naturam, humidum nimirum ad humidum, siccum ad siccum, calidum ad calidum, & frigidum ad frigidum. Talis autem tum animantium, cum cæterorum omnium est natura. Oriunturque similiter omnia occidunt. Eorum enim natura ex prædictis omnibus constat; & ut prædicta sunt (a nobis) in idipsum, ex quo constat



unumquidque, definit, proindeque eo secedit. Corpus autem hominis in se sanguinem, & pituitam, & bilem duplicem, videlicet flavam, ac nigram continet: & hæc sua ipsi natura est corporis, & per hæc dolet, & sanum est. Sanum quidem est maxime, quum hæc moderatum inter se, tum facultate, tum copia, temperamentum habuerint, idque præsertim, si permixta fuerint. Dolet autem, ubi horum quicquam vel parcius, vel copiosius fuerit: aut (etiam) in corpore separatum, nec reliquis omnibus contemperatum. Necesse namque est, quum quid horum secretum fuerit, & per se constiterit, non solum eum unde secessit locum morbo affici; sed & eum, ubi constiterit, & in quem ob exsuperantiam diffusum fuerit, dolore, ac labore vexari. Etenim cum quid horum copiosius extra corpus effusum fuerit; quam redundantia modus requirat, dolorifica evadit ipsa evacuatio. At si contra intro vacuationem, & translationem, ac ab aliis secretionem fecerit, duplicem sane dolorem (ut ex dictis patet) concitare necesse est, & unde secessit, & ubi exsuperat. Dixi sane quæcunque hominem esse affirmavero, ea me demonstraturum eadem semper esse & instituto, & natura. Dico etiamnum sanguinem esse, & pituitam, & bilem tum flavam, cum nigram; atque horum quidem nomina primum ex instituto distincta esse afferro, nullique ipsorum idem esse nomen inditum. Deinde species natura distinctas esse, nullamque pituitam similem esse sanguini, neque bili sanguinem, neque bilem pituitæ. Quo namque modo hæc inter se similia fuerint, quorum neque colores conspicientibus similes apparent, neque ad manus contactum similes esse videntur? neque enim calida consimiliter sunt, neque frigi-

da, neque sicca, neque humida. Quum itaque tantopere inter se tum forma, cum facultate differant, ea non unum esse necesse est; nisi ignis, & aqua unum & idem sint. At vero ex his noveris, quod non unum hæc omnia sint, sed suam quodque ipsorum & facultatem, & naturam obtineat. Si enim alicui homini medicamentum dederis, quod pituitam educat, pituitam tibi evomet; si medicamentum quoque dederis, quod bilem ducat, tibi bilis evometur; eadem quoque ratione atram bilem purgat medicamentum, si dederis, quod atram bilem ducat. Quod si ipsi aliquam corporis partem fauciaris, ita ut vulnus fiat, effluet ipsi sanguis; atque hæc tibi totam diem, noctemque tum hyeme, cum æstate usvenient, quamdiu spiritum homo ad se trahere, vicissimque reddere valebit; valebit autem quoad aliquo eorum, quæ cognata sunt privatus fuerit. Cognata vero sunt ea prædicta; quomodo enim non essent cognata? Primum quidem hæc omnia homo, quoad vita fruitur, semper in se manifeste continet; deinde ex homine natus est hæc omnia habente: postremo in homine nutritus est hæc continente omnia, quæ nunc ego assevero, ac demonstro. Qui vero unum esse hominem asserunt, hanc mihi sententiam tulisse videntur, quod quum intuerentur eos epotis medicamentis in nimis purgationibus interiisse, alios quidem bilem, nonnullos vero pituitam evomentes, horum unumquodque hominem esse existimarunt, in cujus purgatione ipsum intereuntem viderunt; & qui sanguinem esse hominem asserunt, eadem utuntur ratione. Quum enim homines jugulari, & e corpore sanguinem fluere conspiciunt, eum in homine animam esse existimant; hisque argumentis omnes inter dif-



ferendum utuntur. Quanquam primum quidem in immoderatis purgationibus sola evacuata bile nullus unquam mortuus est. Verum epoto medicamento, quod bilem ducat, primum sane aliquis bilem vomet, deinde pituitam, postea quoque præter bilem, atram bilem, idque per vim; sub mortem vero sanguinem etiam purum evomit. Eadem vero patiuntur & a medicamentis pituitam ducentibus. Primum enim pituitam vomunt, deinde bilem flavam, post hæc atram; intereuntes demum sanguinem purum, in eoque moriuntur. Quum enim medicamentum in corpus introierit, primum quidem quodcumque sibi ex omnibus, quæ in corpore insunt, secundum naturam maxime familiare fuerit, educit; deinde vero reliqua tum trahit, cum purgat. Quemadmodum, quæ (vel sponte) nascuntur, vel conferuntur, ubi terram subierint, eorum quodque trahit, quod suæ naturæ accommodatum in terra inest (inest autem & acidum, & dulce, & amarum, & falsum, & cujuscunque generis aliud.) Primum itaque ejus plurimum, quod natura sibi ipsi maxime familiare fuerit, ad se allicit; atque deinceps reliqua attrahit. Tale quiddam etiam medicamenta in corpore faciunt; quæcunque enim bilem educunt, primum meracissimam bilem purgant; deinde mixtam, & rursus medicamenta pituitam cientia primum purissimam pituitam educunt, postea etiam mixtam. Et in jugulatis primum quidem sanguis tum calidissimus, cum maxime ruber effluit; mox vero magis pituitosus, magisque biliosus profluit.



## CAPUT III.

*Pituitam hyeme in homine augeri, omniumque humorum frigidissimam esse: pituita hyeme repleri corpora.*

**A**Ugetur vero in homine pituita quidem hyeme; hæc enim ad hyemis naturam, eorum quæ corpori insunt, maxime accedit; frigidissima namque est. Hujus autem rei sunt indicia, pituitam esse frigidissimam; quod si pituitam, & bilem, & sanguinem tangere volueris, pituitam frigidissimam esse reperiēs: quæ quamvis sit lentissima, ac vi potissimum secundum atram bilem educatur, (quæcunque vero vi trahuntur, ea per violentiam coacta calidiora redduntur) nihilominus tamen supra hæc omnia, pituita suapte natura frigidissima esse conficitur. Quod autem hyeme corpus pituita repleatur, hisce noveris; quod per hyemem homines maxime pituitosa tum exspuunt, cum emungunt, tumores ipsis laxi, & albi per eam potissimum tempestatem, & reliqui morbi pituitosi oboriuntur. At vere adhuc quidem pituita in corpore valida manet, sed sanguis augetur. Nam, & frigora remittunt, & imbres succedunt; tuncque sanguis augetur, tum ex imbribus, cum ex diebus calidis. Nam secundum naturam ipsi hæc ex anni tempestate potissimum insunt; etenim id anni tempus humidum, & calidum est. Ex his vero noveris, quod homines vere & æstate potissimum dysenteriiis corripiantur, & ex naribus sanguis ipsis profluat, calidissimi, & maxime rubicundi sint. Æstate

vero sanguis adhuc viget, & bilis in corpore attollitur, & in autumnum protenditur. At autumnus modicus quidem sanguis generatur (contrarius enim ipsius naturæ autumnus est) bilis autem æstate, & autumnus corpus occupat; id quod hisce indiciis noveris, quod hac tempestate homines sua sponte bilem evomant, & medicamentorum potionibus magis biliosa purgentur. Id quoque ex febribus, & hominum coloribus patet. At pituita æstate seipsa longe imbecillior est. Contraria namque ipsius naturæ est hæc tempestatas; calida siquidem, & sicca est. At sanguis per autumnum paucissimus in homine gignitur; siccissimus siquidem est autumnus, & hominem jam refrigerare incipit. Atra autem bilis autumnus tum plurima, cum vehementissima est. Quum vero hyems ingruit, bilis refrigerescens pauca gignitur, & pituita rursus augetur, tum ab imbrium copia, cum a noctium longitudine. Hæc igitur omnia semper hominis habet corpus; verum pro temporis circumstantia, interdum quidem ipsa tum ex parte, cum ex natura seipsis singula ampliora, interdum vero minora redduntur. Ut enim universus annus omnium quidem & calidorum, & frigidorum, & siccorum, & humidorum est particeps (neque enim eorum quicquam, ne minimo quidem tempore, sine omnibus, quæ hoc in mundo sunt, consisteret; imo si unum quidpiam desit, omnia abolerentur; nam eadem necessitate, & constituta sunt, & invicem aluntur.) Ita etiam si quid ex his, quæ in homine sunt cognata, defecerit, is utique vivere nequeat. Ut autem in anno modo hyems maxime, interdum ver, interdum æstas, nonnunquam autumnus viget: sic quoque in homine,



modo quidem pituita invalescit, modo sanguis, interdum etiam bilis, primum quidem flava, deinde quæ atra vocatur. Cujus rei evidentissimum est testimonium, quod si eidem homini idem medicamentum quater in anno exhibere voles, hyeme quidem maxime pituitosa tibi evomet, vere autem valde humida, æstate admodum biliosa, & autumnino nigerrima.

---

## CAPUT IV.

*Morbos, qui hyeme ingravescent, æstate desinere. Medicum debere morbos curare secundum anni tempestatem. Morbis popularibus grassantibus, diæta non illico mutanda: utilis est locorum, in quibus morbi seviunt, mutatio.*

**Q**Um igitur hæc ita se habeant, quicumque morbi hyeme augeſcunt, eos ætate desinere necesse est; & qui ætate increſcunt, eos hyeme ceſſare, niſi certo dierum circuitu ſolvantur; dierum autem circuitus (quis ſit) alias ſum explicaturus. Quicumque autem morbi vere ſunt, eorum futurum diſceſſum autumnino expectare oportet: qui vero autumnales morbi ſunt, eorum diſceſſum vere fieri necesse est. At qui morbus eas anni tempeſtates ſuperaverit, hunc annum fore ſciendum eſt. Atque ita Medicum adverſus morbos inſtare oportet, prout unumquodque horum in corpore prævalet, ſecundum tempus, quod ſibi ipſi natura conveniens eſt.



*Hæc non germana Hippocratis esse, sed prave adjecta libro de natura hominis dicit Galenus.*

**N**Osse vero præterea oportet, quod quoscunque repletio parit morbos, sanat evacuatio: qui vero ab evacuatione oboriuntur, (eos) curat repletio. Atque qui ex (immoderato) labore fiunt, eos quies sanat: qui autem ab otio gignuntur morbi, labore tolluntur; omninoque nosse Medicum oportet, & morbis, & speciebus, & tempestatibus, & ætatibus obviam ire, contentaque solvere, & soluta contendere: sic enim maxime morbum sedayerit; atque curandi ratio, hoc ipsum mihi esse videtur. Morbi vero, partim quidem ex vivendi ratione, partim vero ex spiritu, quem vivendo trahimus, oriuntur. At utrorumque cognitionem ita facere oportet. Quum multi homines uno morbo eodem tempore corripuntur, in id, quod maxime commune est, quoque omnes utimur, potissimum rejicienda causa est; id autem est, quod inspirando trahimus. Quod enim vivendi cujusque nostrum ratio in causa non sit, jam liquido constat, quum morbus omnes consequenter attingat, & juvenes, & senes, & mulieres, & viros, perindeque temulentos, & abstemios; tam eos, qui maza, quam qui pane victitant: & eos, qui multis, quam qui paucis exercitationibus utuntur. Non igitur victus rationi assignanda causa est, quum cujusvis generis victu utentes homines, eodem modo corripuntur. Quum vero eodem tempore varia morborum genera vagantur, sua procul dubio cuique vivendi ratio in causa est, adhibendaque curatio; adversus morbi causam instando; quemadmodum alias etiam a nobis dictum est, & victus

rationem immutando; quandoquidem constat victus genus, quo quis utitur, aut ex toto, aut magna ex parte, aut in eorum aliquo, minime ei esse accommodatum. Quo cognito immutare, & adhibita in considerationem cujusque natura, ætate, forma, anni tempore, & morbi genere, & ad curationem aggredi oportet, nunc quidem detrahendo, nunc vero addendo; ita ut (quemadmodum jam dudum a me dictum est) ad singulas ætates, & anni tempora, & naturas, & morbos, contrariam tum medicamentorum, cum victus rationem adhibeas. At vero, ubi morbus aliquis populariter grassatus fuerit, non victus rationem in causa esse, sed quod spirando ducimus, manifestum est, ipsumque morbosam quandam excretionem plane obtinere. Eo igitur tempore his exhortationibus homines sunt admonendi, ut ne victus quidem rationem immutent, quum morbi causa minime existat. Provideant etiam, ut corpus quam minime intumescat, sitque attenuatissimum, tum cibos, cum potus, quibus uti consueverint, sensim demendo. Si quis enim subito victus rationem immutet, ne quid in corpore ex immutatione innovetur, periculum est. Sed solita victus ratio servanda est, ubi nihil quidem hominem lædere videtur; atque insuper, ut aeris quam minimum in corpus influat, isque ut maxime peregrinus sit, providendum, tum regionum loca, in quibus morbus consistit, quoad ejus fieri poterit, permutando, cum corpora extenuando. Ita enim minime multum ac frequentem spiritum homines ex necessitate attrahent. Morbi autem a robustissima corporis parte orti, gravissimi sunt. Etiam si, unde originem sumpserunt, isthic perstiterint, quum pars robustissima labo,



ret, corpus univcrsum laborare necesse est. Quod si ad imbecilliorcm aliquam ex parte robustissima devenerint, difficiles habent solutiones. Quicunque vero ab imbecillioribus partibus ad robustiores veniunt, facilius solvuntur, quod quæ influunt facile per vim expelluntur.

---

## CAPUT V.

*Venarum crassissimarum quatuor paria, earumque explicatio. Dorso ac coxendice dolente, quæ venæ secandæ. In lumborum ac testium dolore, quæ venæ sectio conveniat. Venæ sectio quum longissime a locis affectis fieri debet.*

**A**T venas crassissimas sic natura condidit. Quarum cum sint in corpore paria quatuor; ac unum quidem a capite retro per cervicem, parte exteriori ad utraque spinæ latera, atque inde in coxendices & crura pervadit; deinde per tibiaſ usque ad exteriores malleolos, & ad pedes pervenit. In dorsi itaque, & coxendicum doloribus ex poplitibus, & malleolis exterioribus venæ sectiones facere oportet. Alterum autem par venarum exordium ducit a capite juxta aures per cervicem (quæ jugulares vocantur) intro secundum spinam utraque ex parte ad lumbos, & in testes, & femora, & per poplites interiori ex parte, indeque per tibiaſ ad malleolos internos, atque ad pedes deferitur. Proinde in lumborum, & testium doloribus ex poplitibus, & malleolis interioribus venæ secandæ sunt. Tertium par venarum ex temporibus per cervicem sub scapulis, & inde ad pulmonem, defer-

tur: hæc quidem ex dextris ad sinistra, illa vero a sinistris ad dextra pervenit. Ac dextra quidem ex pulmone mammam subiens, & ad lienem, & renem tendit: quæ vero a sinistris ad dextra procedit, ex pulmone mammam subiens, & hepar, & renem petit. Utraque postremo in rectum intestinum definit. Quartum (venarum) par ab anteriore capitis parte, & oculis, sub cervicem, & claviculas definit, deinde vero per superiora in brachiorum flexus tendit, posteaque per cubitos ad primas manuum juncturas & digitos: a digitis rursus per cubitos, & superiores manuum partes in flexuras, & per superiorem brachiorum partem ad axillas, perque summos costas, hæc quidem ad lienem, altera vero ad jecur devenit, postea supra ventrem in pudendum utraque definit. Atque hæc quidem crassissimæ venæ ita sese habent. Sunt autem & ex ventriculo venæ per corpus multæ, ac variæ, per quas in corpus alimentum transmittitur. Quæ etiam a crassis venis, tum ab externis, cum ab internis, in ventriculum, & reliquum corpus deferunt, sibi que internæ externis, & externæ internis mutuo distribuunt. Eas igitur venæ sectiones hisce rationibus facere oportet. Studendum autem est (venarum) sectiones effici quam longissime a locis, in quibus dolores fieri, & sanguis colligi consuevit; sic enim tum mutatio minime magna derepente continget, tum etiam consuetudinem tollendo effeceris, ut ne amplius in eundem locum colligatur.



## CAPUT VI.

*De copioso puris sputo, urina purulenta, excrementis cruentis, velut in dysenteriis citra febrem.*

**Q**Uicumque pus copiosum citra febrem expunt, & quibuscunque absque dolore pus multum in urina subsidet, & quibuscunque alvi dejectiones, velut in dysenteriis, cruentæ ac diuturnæ sunt, ut in juvenibus quinque & triginta annorum, atque etiam grandioribus natu; his omnibus eadem ex causa morbi oboriuntur. Hos namque & labores tolerasse, & exercitationibus deditos, & cum juvenes essent operas exercuisse, necesse est. Postea vero solutos laboribus & molli carne, & multum a priore diversa, carnosos esse redditos, multumque dissidens corpus habere, ut quod prius cum eo fuit, quod nunc accrevit, minime consentiat. Quum igitur morbus aliquis sic affectos corripuerit, ii quidem tum confestim evadunt; sed postea a morbo temporis successu corpus liquatur, & per venas, qua parte amplissimæ esse solent, veluti sanies quædam fluit. Si igitur sanies ad inferiorem alvum impetu feratur, quale quid fere inest in corpore, tale etiam per dejectiones redditur; neque enim, cum via declivis sit, multo tempore in intestino subsistit. At quibus in pectus influxerit, ii purulenti fiunt; quod nimirum cum purgatio adclivis sit, & multo tempore immorans in pectore computrescat, & puri simile reddatur. Quibus vero in vesicam effunditur, ex loci calore incalescit, exalbescitque, & secernitur; quodque rarissimum est, supra innatat; crassissimum vero, quod sane pus appellatur, subsidet.

subsidet. At vero calculi pueris ob loci hujus, ac totius corporis calorem procreantur; sed viris ob corporis frigiditatem calculi non generantur. Nam probe nosse oportet primis diebus ipsum sui (comparatione) calidissimum esse; postremis vero frigidissimum. Quod vero augetur corpus, & ad robur procedit, id calidum esse, necesse est; at ubi marcescere corpus ceperit, & in ruinam præceps delabitur, frigidius evadit. Atque hac ratione, quo plurimum prioribus diebus increvit homo, eo calidior evadit; atque ultimis diebus quanto plurimum marcescit, tanto eum frigidior esse necesse est. Sic autem affecti sua sponte sanescunt; plurimi quidem, quo anni tempore colliquescere coeperint, quinto & quadragesimo die: qui autem hoc anni tempus superaverint, anno sponte convalescunt, nisi quid aliud hominem male habuerit. Qui vero morbi levi momento oriuntur, & quorum causæ cognitu sunt faciles, ii securissimi esse prædicantur; eorum autem curatio oppositis causæ morbi remediis molienda est; hic enim, quod morbum in corpore concitavit, facile solvitur. Quibus autem in urinis arenulæ, vel lapilli subsident, iis per initia tubercula ad crassam venam enascuntur, ac suppurant; postea vero, quum ea tubercula haud ita cito rumpantur, lapilli ex pure coalescunt; qui per venam cum urina in vesicam foras extruduntur. At quibuscunque urinæ quidem solum cruentæ sunt, iis in venis vitium est. Quibuscunque autem una cum urina crassa carunculæ parvæ capillorum speciem referentes, prodeunt, eas a renibus, & articulari morbo laborantibus prodire, nosse oportet. Quibus vero urina pura est, & alias, atque alias veluti furfuracea



quædam per summam urinam feruntur, iis vesica scabiosa est.

---

## CAPUT VII.

*Februum quatuor genera : de febre continente, quotidiana, tertiana, & quartana, earumque generatione.*

**P**Lurimæ febres a bile procreantur: earum autem species sunt quatuor, præter eas, quæ doloribus occultis succedunt. Earum autem nomina sunt: continens, quotidiana, tertiana, & quartana. Quæ itaque continens vocatur, ex plurima, & meracissima bile provenit, crisesque brevissimo tempore efficit: quum namque corpus nullo tempore perfrigeratur, & a multo calore incalescit, celeriter colliquescit. Quotidiana post continentem a plurima bile generatur, & præ ceteris celerrime discedit; at continente diuturnior est, tum quod a pauciore bile procreetur, tum quod in ea intermissionis quietem habeat corpus; at in continente nullo unquam tempore quiescit. Tertiana quidem quotidiana longior est, & a pauciore bile fit: & quo longiori in tertiana tempore quam in quotidiana corpus quiescit, eo diuturnior hæc febris est, quam quotidiana. At quartanæ in reliquis eandem rationem obtinent; sed tertianis tanto longiores sunt, quanto pauciores bilis, qua calidas concitatur, obtinent partem, tum quia in his corpus plus refrigeratur; iisque ab atra bile is cumulus accedit, ut nonnisi ægre depelli possint. Est namque omnium, qui in corpore (humano) insunt,

humorum viscosa maxime bilis atra, & quæ inter omnes facit quam maxime diuturnas moras. Quod autem quartanæ febres atræ bilis sint participes, ex eo quisque noverit: autumnus enim maxime homines a quartanis corripuntur, & in ea ætate, quæ est ab anno vigesimo quinto usque ad quadragimum quintum: tum etiam quod hæc ætas inter alias omnes atræ bili potissimum est obnoxia, & autumnale tempus omnium anni temporum maxime accommodatum est. Si qui vero extra hoc anni tempus, & eam ætatem quartana correpti fuerint, pro comperto habeas, hanc febrem, nisi quid aliud mali commiserit homo, minime diuturnam fore.

---

## HIPPOCRATIS DE LOCIS IN HOMINE LIBER.

---

### PRÆFATIO.

*Sequitur quidem classi suæ MECURIALIS adscribit, librorum, quos HIPPOCRATES scripserit quidem, non vero perpoliverit, idemque RUFUM adducit, qui omnino HIPPOCRATI tribuit, neque enim alium facile divinitimum auctorem vocat.*

*Misti est argumenti, & anatomica aliqua continet, ut oculi membranas & cerebri, & aliqua ad*



nares, partem angiologiæ capitis, venasque pulsantes temporum, quas sanguinem admittere negat, eoque loco oppositos quosdam sanguinis torrentes admittit. Venas illas (a) a cervicis tendinibus in testes penetrantes hic reperias, aliasque, & cavam venam, & venas ad malleolos, quæ incisæ hominem reddant infecundum, venamque brachii, quæ ob splenem secatur, & venarum mutuas anastomoses. De nervis aliqua, ubi videtur tendines cum nervis confundere. Aliqua ad ossium historiam, suturas, & universum sceleton. Mucosa articulorum non ignoravit. Fibras a ventriculo in vesicam decurrentes admittit. Fluxiones humorum de loco in locum, deque meatibus eo spectantibus. De morbis a fluxibus nascentibus: de eorum remediis. Ad oculorum mala, nullo ad eos ipsos pharmaco adposito; caput ad os usque secare jubet: venasque visum prementes, pulsantes, inter aurem & tempora consistentes exurere. Transit ad bilis varia genera, quibus etiam morbos pectoris impunit. Etiam suppuratos urit. Pleuritidis medela, Hippocratica, cum mulsa, & aceto. In hydrope carnem in collo tribus locis urit. In ischiadico morbo cucurbitulas adhibet. Ad splenes etiam magnos ustione utitur. De febrium causa, humore nempe stagnante, & ad locum minus resistantem se conjicien-

---

(a) Alia omnino est harum venarum historia ab ea, quæ exstat cum libro de ossium natura.

*te ; de earum curatione multa iterum, & posca: & de frigescentibus in ardore medicamentis, ut cucumere. Icterus, in quo sylvestri cucurbita album ducit: inde vinum dat. In angina venam secatur, album ciet. Tunc consilia ad cranii fracturas. Evacuationem inferam vomitu solvit. Consilium prudens, ignoto in morbo non dandum remedium vehemens. Mandragoram dat melancholicis & convulsis. Ut vena in quoque morbo urantur. De medica artis difficultate & contrariis indicationibus. Non posse ad certam artem reduci. Aliqua de classibus medicamentorum. Fortuna medicum non debere cedere, animose suadet. Posset esse HIPPOCRATIS, etsi nullum ordinem servat, methodus enim medendi a genuinis scriptis non dissidet: neque obscuritatem desideres: egregia multa, cum aliis alienis & difficulter explicandis mixta.*

---

## ARGUMENTUM LIBRI.

*De corporis partibus in genere quedam; de sensibus exterioribus; de venis plurima; de nervis, juncturis, articulis, aliisque partibus; de fluxionibus, febribus, ulceribus, aliisque morbis; ac de methodico auxiliorum plurimorum usu.*

## SECTIO PRIMA.

### CAPUT I.

*Corporis, circuli, ac morborum principium ac finis; morbis aridiora corpora magis obnoxia, mi-*



*nus humidiora ; proprium partis alicujus affectum , affectus per consensum , & secundarios excitare ; interseptum humorem fluxionum & morborum causam esse ; a primogenito morbo curationis principium ducendum ; partium cognatio , consensio : communicatio ; partis unius affectu , universum corpus affici.*

**P**Rincipium corporis mihi quidem nullum esse videtur , sed partes omnes peræque principium , omnesque finis. Descripto namque circulo , principium non invenitur : eademque ratio morborum in toto corpore. Quod enim siccus est , morbos suscipere , magisque laborare consuevit , humidum vero , minus. Morbus enim qui in sicco est , figitur , neque cessat ; qui vero in humido , diffluit , & alias aliam præcipue corporis partem occupat , & semper commutando quietem facit , celeriusque sedatur , quod non fixus sit. Unaquæque vero corporis pars altera alteri , quum hinc vel illinc proruperit , statim morbum facit ; venter capiti , & caput carnibus , ac ventri ; & reliquæ omnes eadem ratione , quemadmodum venter capiti , & caput carnibus ac ventri. Quum enim venter moderatam dejectionem non fecerit , & in eum (cibus) immittatur , assumptorum ciborum humore corpus irrigat ; ipse vero humor a ventre interseptus , confertim ad caput viam molitur : quumque ad caput pervenerit , a capitis vasis haud exceptus , fluit quocunque fors tulerit , & in capitis ambitum , & in cerebrum per os tenue , & partim quidem os subit , partim vero circum cerebrum per os tenue fertur. Quod si ad ventrem rursus quidem se contulerit , ventri morbum inducit ; si vero in aliam quampiam partem decubuerit , ei ipsi mor-

bum facit. Ita etiam reliquæ partes ut hæc, altera alteri morbum inducit. Atque sic optimum fuerit ægrotantium partium per eas, quæ morbos faciunt, curationem suscipere. Sic enim quam optime quis ægrotantis principio medebitur. Corpus autem ipsum sibi ipsi idem est, & ex eisdem constat; etsi vero non eodem modo se habent ejus partes parvæ & magnæ, itemque inferiores & superiores; siquis tamen interceptam corporis partem minimam male afficere velit, eam affectionem, qualiscunque tandem fuerit, totum corpus sentiet, propterea quod minima corporis pars eadem habet omnia, quæcunque & maxima. Ea-que minima pars quicquid tandem pertulerit, ad cognatas refert, unaquæque ad suam, sive bonum, sive malum id fuerit; ac propterea corpus ob minimæ partis cognationem tum dolet, tum oblectatur, quod in minima partes omnes insint, eæque ad ea, quæ sui sunt generis, singula transferunt, & omnia denunciant.

## CAPUT II.

*De auditu, odoratu, ac visu; eorumque organis, ac venis; de tribus oculorum membranis; & cerebri duabus; de venarum a capite distributione, & communicatione; de vena cavae distributione. Unde infecunditas, visionis extinctio, lesio, turbatio, sanguinis mictus.*

**A**T vero corporis natura principium sermonis in arte Medica. Primum qua parte audimus, perforatum est. Vacua namque in aurium circuitu nil aliud, præter strepitum & clamorem, inaudiunt; quidquid vero per membranam ad ce-



rebrum pervenerit, id aperte hac parte auditur; ac unicum foramen per membranam cerebrum circumvolventem est. In naribus quidem foramen nullum, sed laxum quiddam inest, velut spongia; eamque ob causam per longius intervallum audit, quam olfacit. Longe enim ab olfactu odor dispergitur: ad oculos etiam venulæ tenues ad visionem ex cerebro per ambientem membranam feruntur. Hæ autem venulæ purissimo de cerebro affluente humore visionem alunt, qui etiam in oculis apparet. Eædem venæ quoque, ubi resiccatae fuerint, visionem extinguunt. Membranæ vero tres sunt oculos ipsos custodientes, superna quidem, crassior; media vero tenuior; & tertia tenuis, quæ humorem conservat. Ex his superior quidem & crassissima, si læsa fuerit, morbum facit; media vero, ipsa etiam periculi plena est, & ubi rupta fuerit, foras veluti vesica prominet. Tertia tenuissima, omnino periculosa, quæ humorem conservat. Cerebri autem membranæ duæ sunt, altera superna quidem crassior, altera, quæ cerebrum contingit, tenuis, non amplius eadem, ubi vulnerata fuerit. Venæ autem ad verticem quidem per carnem permeant, ossi proximæ. Ex vertice vero, duæ quidem rectæ per carnem feruntur, qua parte supercilia clauduntur, & ad oculorum angulos desinunt. Una autem de vertice ad nares fertur, & in utramque narium cartilaginem scinditur. Aliæ duæ venæ juxta tempora feruntur, inter tempora & aures, quæ oculos premunt, semperque pulsant. Ex venis enim hæ solæ minime irrigant, sed abducitur ab ipsis sanguis. Qui vero avertitur, alteri influenti motum habet contrarium; & qui quidem avertitur, quum adscendere cupit; qui autem superne affluit, quum deorsum vult proce-

dere : hîc autem mutuo impulsu ac diffusione, & circumvolutione, venulis pulsum præbent. At visio ex cerebro humore nutritur; quum autem quid humoris a vênis acceperit, fluxione turbatur, neque in eo apparent (species,) sed obversari ipsi videntur interdum quidem velut avicularum imagines, interdum vero ut lentes nigræ; nihilque de cætero exacte re vera cernere potest. Aliæ duæ venæ, per medium aurium & reliquarum venarum, ad aures tendunt, iisque incumbunt. Aliæ duæ venæ ex ossis conjunctione, ad aures feruntur. Ex his autem, quæ ad inferiora corporis descendunt, duæ quidem venæ juxta cervicis tendines, & juxta vertebrae feruntur, ac in renes desinunt, eademque etiam ad testes permeant; quumque hæ male affectæ fuerint, homo sanguinem mejit. Aliæ duæ venæ a vertice ad humeros feruntur, & ex sane humerales vocantur. Aliæ duæ venæ a vertice juxta aures, per anteriorem cervicis partem, utrinque in cavani appellatam venam feruntur. At vena cava, velut gula quidem producitur; mediaque inter guttur & gulam genita, per septum transversum fertur, & per cor, & inter septum; ad inguina autem & femora intro scinditur, & divaricationes in cruribus facit, & in tibiae intus ad malleolos fertur. Eæ quum sectæ fuerint, hominem infecundum reddunt, quæ & in magnos digitos desinunt. Ex vena autem cava (propago) in manum sinistram deducitur; & subter lienem fertur, ad sinistri lateris inanitatem; unde lien per omentum emergit, & in thoracem desinit. Exoritur autem juxta septum transversum, & cum humerali committitur infra cubiti articulum, ipsaque lienis gratia secatur. Alia etiam ad dextram manum eodem modo a cava propagatur. Omnes



autem venæ communicant, & inter se mutuo confluunt. Aliæ siquidem sibi invicem committuntur; aliæ vero per venulas, quæ a venis distenduntur, & carnes nutriunt, ea parte inter se confluunt.

---

### C A P U T III.

*De nervorum natura, alimento, substantia, situ, colore, robore, morbis; de pluribus capitis suturis; de ossibus universi corporis ac partium; de ossium omnium articulis, articulorum affectibus, doloribus, muco, claudicatione; ac quot ossa, tot articulos, esse.*

**Q**Uicumque autem a venis morbus oritur, is levior est, quam qui a nervis. Diffluit enim una cum humore in venis contento, neque quiescit; venisque natura in humore & carnibus est. Nervi vero cum sicci sunt, tum cavitates non habent, & ossi adhærescunt, maximamque partem ab osse nutriuntur; nutriuntur vero & a carnibus, coloremque & robur inter os & carnem medium natura sortiti sunt; & humidiores quidem sunt ac carnosiores quam ossa; sicciores vero & magis ossei quam carnes. Quicumque autem morbus eos invaserit, eodem in loco firmatur & consistit, ac educere perarduum est. Præcipue vero ipsos invadunt distensiones, aliique morbi, a quibus tremor corpusprehendit, quique ipsi tremorem inducunt. Nervi autem articulos premunt, per totum corpus extenti; robusti autem maxime & semper crassissimi sunt in illis corporis partibus, in quibus paucissimæ carnes sunt; totumque quidem corpus nervis

plenum est. At circa faciem & caput non sunt nervi; sed fibræ nervis confimiles, inter os & carnem, tenuiores & solidiores; item nervi quidam cavi. Capita futuras habent, alias tres, alia quatuor. Quæ quidem quatuor habent, his sunt utrinque juxta aures, altera futura anteriore, altera posteriore capitis parte; sic quidem se habet (caput,) quod quatuor habet: quod vero tres, ad aures utrinque, & anteriore parte; at ut in eo quod quatuor habet, hac parte (posteriore) nulla futura enascitur. Qui plures futuras habent, hi capite salubriores degunt. Inter supercilia os intercedit, & maxillarum conjunctio in medio mento, & superiore parte ad caput est. Vertebrae hi quidem plures, hi vero pauciores habent. Quibus pauciores, his sunt duodeviginti, quarum aliæ quidem sursum ad caput, aliæ vero deorsum ad sedem tendunt. Costæ septem, partim quidem posteriore corporis parte ad vertebrae, partim vero anteriore in pectore, inter se committuntur. Claviculae articulos habent, alios quidem in medio pectore juxta guttur, eaque parte articulatæ sunt; alios vero ad humeros ad scapulas reclinatos, quæ (summæ) humeris semper adhærescunt. At scapulae ad membra articulis connectuntur, super os, quod in membro est, incumbentes. Nam ab hoc osse appendices duæ porriguntur, una quidem intrinsecus, altera extrinsecus: quæ ad scapulas, ossi coherentes, inferiore ex parte articulis conjunguntur; quæ vero sunt in cubiti flexu, infra quidem radio coarticulatæ sunt, juxta os natura sua cavum; paulum autem supra radium in cubiti gibbum; tum os, tum radius in eundem locum commissa, articulationem in cubiti (gibbo) efficiunt. Ad ulnam vero appendices protenduntur



valde tenues quatuor: duæ quidem sursum, duæ vero deorsum; & ad cubiti quidem gibbum duæ appendices adnatæ, superiore parte ex ossē exoriuntur. Hæ cum ossē cohærentes, ad ossis articulum, in cubiti gibbum articulo committuntur: quæ vero infra sitæ sunt, & intro reclinatæ, eæ utræque ad radium superne a membro procedentem concurrentes, interiore membri parte articulo committuntur, eæque inter se interiore cubiti parte commissæ, radium appellatum efficiunt. Infra vero ad manum, os articulum habet. Quum autem hac parte appendices teneræ sint, duæ quidem in articulum non exeunt, superior vero & inferior cum ossē ad manuum articulo committuntur. Manus autem multos habent articulos; quæ enim ossa inter se committuntur, omnia articulos faciunt. Digiti multos habent articulos, tres unusquisque: unum quidem sub ungue, inter unguem & condylum; alterum vero in ipso condylo, qua parte etiam digitos inflectunt; tertium, qua parte digitus e manu exoritur. In coxendicibus autem duo sunt articuli, acetabula appellata, & in hos femora inarticulata sunt. Ad femora duæ appendices porriguntur, altera quidem intus, altera foris; neutraque in articulum procedit, neque ex altera parte, sed ossi in ipso femore annexæ sunt. Femur autem superne, ubi in acetabulo immittitur, huiusmodi bicipitio bifidum est; in ea quidem bicipitii parte, quæ intro inclinata est, in summo adnatum est rotundum ac leve, quod in acetabulum ingreditur; altera vero pars minor, quæ in bifurculo protuberat, foras magis prominet, & & inferiore parte ad nates apparet, coxendixque vocatur. Ad genu autem femoris os hoc modo bifidum est. Huic vero bicipitio, os quod

tibia appellatur, velut in cardine adaptatur; supra adaptatum autem mola (seu patella) incumbit, quæ ad articulum, dum extenditur, humiditatem a carne descendere prohibet. Ad tibiam autem procedunt appendices duæ, quæ inferne quidem ad pedis malleolos desinunt; superne vero ad genu, non autem perveniunt ad articulum. Ad pedem vero tibia juxta malleolos articulum habet, aliunquæ infra malleolos. In pedibus etiam articuli multi, quemadmodum etiam in manibus sunt. Quot enim ossa, tot sunt articuli; & in pedum digitis pari numero & eodem se habent modo: multi quoque in corpore articuli parvi sunt, non simili tamen modo in omnibus sed aliis alii; hi autem, quos scripsimus, in omnibus similiter se habent; aliæ quinetiam sunt aliis venæ; vix tamen e fatu dignæ. Mucus omnibus a natura inest. qui quum purus fuerit, sani sunt articuli, ideoque facile moventur, quum sint inter se lubrici; oboritur autem labor & dolor, ubi vitiosa humiditas fluxerit. Imprimis quidem rigidus fit articulus: neque enim lubricus est, qui ex carne affluxit humor; deinde sua copia valde dispersus, neque a carne irrigatus, semper resiccatur: quumque eum ob eandem copiam articulus capere non possit, effluit; maleque concrefcens, nervos, quibus articulus colligatur, attollit, elaxat, & dissolvit. Quam quidem ob causam claudi fiunt, quum hoc magis fit, magis: quum minus, minus.

---

## CAPUT IV.

*Eduliorum ac potulentorum receptaculum, venter; serosi humoris, vesica. Fluxionum cause, fri-*



*gus exprimendo; calor, rarefaciendo carnes, & humorem attenuando; plenitudo, obstruendo; vacuitas, patefaciendo vias. Partes inferiores superioribus sicciores, ob pauciores venas.*

**A**T vero quæ eduntur ac bibuntur, in ventrem feruntur; ex ventre vero venæ in vesicam, qua parte humorem transmittit, extentæ sunt. Fluxiones autem contingunt: & perfrigorata valde carne, & percalefacta, & supertumefacta. Propter frigus fluxiones fiunt, quum capitis caro & venæ tensæ fuerint; hæ itaque, horrente carne, & in angustum coacta, & elidente, humorem exprimunt; simul etiam carnes ipsæ in angustum contractæ, vicissim exprimunt; & capilli, velut undique simul vehementer compressi, sursum eriguntur. Hinc quicquid expressum fuerit, quocunque fors tulerit, fluit. Fluit autem etiam ob calorem, quum carnes rarefactæ transitus præbuerint, humorque calefactus tenuior evaserit. Omnis enim humor calefactus, tenuior evadit, & quicquid cedit, fluit; potissimum autem ubi valde inflammatum fuerit, hanc ob causam fluit. Carnes admodum repletæ, quum capere nequeant, humor, qui contineri non potuit, effluit; fluit autem quocunque contigerit. Semel autem fluidis factis fluxionibus, diffluunt ad locum, quocunque contigerit, quoad fluxionis viæ ob attenuationem compressæ fuerint, cum corpus fuerit resiccatum. Quum enim corpus sibi ipsi communicet, quamcunque in partem humor inciderit, quum ex se siccum sit, eum suscipit ac trahit; neque vero ipsum deducere est difficile, quum corpus vacuum sit, minimeque præ attenuatione intumescat. Quum autem inferiores partes siccæ evaserint, superiores vero

humidæ (superiora enim vasa humidiora sunt; venæ enim plures sunt parte superiore quam inferiore, & capitis carnes minore indigent humore) tum sane sicca corporis pars humorem ex capite ducit; etenim meatus ducenti magis patent, quam ei, qui ducitur. Quum enim ipsi sicci sint, eum sibi lucrifaciunt; simulque humores natura deorsum ferri solent, vel si vis modica contingat.

---

## CAPUT V.

*De fluxionibus a capite septem: tribus conspicuis in aures, nares, & oculos; quatuor abditis, in thoracem, iisque frequentioribus, unde bilis, lassitudo, empyema, tabes; in spinalem medullam, unde cæca tabes; in vertebrae & carnes, unde hydrops; in articulos, unde arthritides, ischiades, & cedmata.*

**A**T fluxiones a capite septem sunt: quædam siquidem in nares; quædam in aures; quædam etiam in oculos: atque hæ a capite fluxiones oculis sunt conspicuæ. Ubi vero in thoracem ob frigus fluxerit, bilis fit. Magis autem in thoracem præ frigore fluit, propterea quod ad guttur facilis est fluxio, quum minime sit contectum. Eos vero, qui a frigore bile vexantur, lassitudo eam ob causam detinet, quia carnes bile affectæ minime quiescunt, sed concutuntur, concussæque laborant & lassantur, non secus ac ex via concussæ. Quinetiam, quum in thoracem fluxio decubuerit, suppurati & tabidi sunt; quum vero in medullam fluxio contigerit, tabes occulta oritur. Quum retro in vertebrae & carnes defluerit, hydrops suboritur; inde vero di-



gnosceret licet, nempe si anteriores partes siccae sunt, caput scilicet, nares & oculi; quin & oculis caligo accedit, qui & una cum reliquo corpore ex virore pallescunt, neque quicquam exspuitur, ne si multum quidem defluat; fluxio enim ista per medianam carnem posteriore parte delapsa, & ab anteriore averfa, anteriores (quidem) partes siccas facit, carnemque in posteriora irrigat, eamque magis quae interior est ad ventrem, quam quae exterior ad spinam. Eamque ob causam corpus exteriori parte magis quam interiore solidum est, & angustiores habet meatus; qui quum tenues sint, coarctantur; ipsique sibi ipsis mendentur, & hac fluxio ferri non potest. Intus autem cum latiores sunt, tum intermedia tenuiora habent; fluxio vero quum ab altioribus delabatur, & levia nata impedimenta, defluit, & carnes humore replet. Quin & humor a cibis eodem procedens corrumpitur, ipseque ex commixtione corruptus, & qui cum eo ex capite defluit, corpus nutriunt: plurimo vero humore carnes nutritae, & morbofo turgidae, aqua inter cutem replentur. Quod si modica fluxio fuerit, coxarium morbum, & diuturnam articulorum affectionem facit, si fluere cessaverit. Nam quum modicum sit, quod affluit, & undequaque a potentioribus partibus depulsum, ad articulos se recipit. Diuturni quoque articulorum affectus, & coxendicum morbi, iis, qui ab eiusmodi morbis convaluerunt, contingunt; quum, quod morbum facit, sanum evaserit, in carne vero quid remanserit; cui quum neque intro denuo, neque foras exitus pateat, sed in cute tuberculum creet, in ipso exitu confugit ad id, quod cedere potest, articulos nimirum; & aut eas articulo-  
articulorum

ticulorum affectiones diuturnas, aut coxendicum morbum parit.

---

## CAPUT VI.

*De manifestæ fluxionis in nares, aures, & oculos decumbentis, ac proinde coryzæ, otalgia, auris fistule, ophthalmie, scabiei pruriginosæ palpebrarum oculi, epiphoræ, & albuginis curatione, tum chirurgica per incisiones. & ignem; tum pharmaceutica per topica & cathartica.*

**Q**UOD si nares intumuerint, & pituita eaque concreta repleantur, ea ubi concreverit, aut fomentis, aut medicamentis attenuanda, minimeque avertenda est; etenim si averfa alio feratur, omnino fluxio majorem morbum efficiet. Quum vero ad aures fluxerit, primum dolorem parit; vi enim fertur; dolorem autem adfert, quoad fistula contracta fuerit: ubi autem fluere consueverit, non amplius dolorem excitat. At (vero) ei, quem dolor detinet, medicamentum natura calidum tepefactum, & metopio subactum infundendum, & pone cucurbitula admovenda, ad dextram, si sinistra auris doluerit; ad sinistram vero, si dextra, sed citra scarificationem, verum ut trahat tantum. Quod si per hæc dolor minime, sedetur, ea, quæ natura refrigerant, frigida infundito, & medicamentum, quod deorsum purget, propinato; sursum autem minime, quum vomitus nihil conferat, & in reliquo refrigerantibus utendum. Semperque modus, qui sanitatem non inducit, permutandus est; quod si deterius quidem malum reddiderit, ad contra-



rium confuge; si vero ad sanitatem vergat, nihil omnino ex his quæ adhibentur auferendum, neque aliud quicquam sejungendum aut apponendum. At ubi jam contracta fistula fuerit, multaue sanies purulenta & graveolens effluxerit, istud ita faciendum. Spongiam siccante quodam medicamento sicco imbutam, quam penitissime in aurem inde; & medicamentum purgans naribus adhibe, ut quod prius ad aures defluebat, in nares feratur, neque id, cum morbosum sit, ad caput rursus decedat. At vero quum ad oculos fluxio decubuerit, oculi inflammantur & tument. Sic affectus medicamento aut liquido, aut sicco asperso curandus est; quod si subito inflammationem concipiant, nihil omnino illine, sed aut validissimo asperso inferne abluito, vel alio quopiam alvum subducente medicamento attenuato, cautione adhibita ne vomitum provoces. Quod si velut lapilli decurrant, medicamentum, quod plurimam lacrymam cieat, illinito, & reliquum corpus humectum & tumidum reddito, quo oculi humidiores evadant, ac colluantur, ut concretam lacrymam decurrere facias. Quum autem paulatim in oculos fluxerit, pruritumque creaverit, sic affectum molli medicamento, quod siccare simulque modicam lacrymam ciere possit, illinito, naribusque medicamentum admoveto, aut singulis diebus, aut tertio quoque die eodem utens; sit autem medicamentum ejus generis, quod non plus quam acetabulum per nares educat; idque paulatim educat: quod vero oculis admovetur, id resiccare oportet, uti quod oculorum medicamentum resiccarit & interceperit, etiam per nares deducatur. At medicamenta caput purgantia, quæ quidem sunt valentia, a toto capite ducunt; quæ vero debilia, ab oculis: &

inde a vicinis naso partibus. Quod si muco inter os & carnem subsistente, ex carne & osse in oculos fluxio decumbat, ex eo cognosces, quod inde fluit. Fluxio in capite comprimitur, cedit, & ulcera in capite erumpunt, oculique illacrymantur, palpebræ non exulcerantur, neque mordet (fluxio,) neque oculorum aciem hebetat, sed (aeger) acutius cernit; siquidem fluxio minime falsa est, quum de cerebro non procedat, verum mucosa magis sit: sic affectus hac ratione curandus est. Caput medicamento non vehementi purgandum, & corpus tum cibus, tum medicamentis infra subducentibus attenuandum, quo attenuato corpore (fluxio) resiccet, aut per medicamentum naribus admotum avertatur: verum oculis nulum medicamentum admovendum est. Quod si ne sic quidem convalescat, caput ad os usque incidendum, non sublimibus, neque transversis sectionibus, sed eo usque secandum, dum ad os ipsum pertingas; at crebro incidendum, quo collectus humor citius emigret, per ulcera effluens, simulque crebræ sectiones carnem ossi adhærescere faciant. Sic medendum, si res huiusmodi successum sit habitura; sin minus hæc comoda fuerint, & non est elotus (oculus,) ita ut elotus acute cernere possit; semperque potius ab incumbente humore splendescens redditur, hominisque acies extinguatur. Quod si in visum ad humorem purum cruentus aliquis humor inciderit, huic pupilla intus in oculo minime rotunda ob eam causam apparet, quod in quacunque parte cruentus inest humor, ea non conspicitur; huic itaque quod cernitur, desinit rotundum esse, & ante oculos ei quædam obversari videntur, nihilque quicquam, re vera ut est,



cernit. Hujus venæ, quæ videndi aciem premunt, adurendæ sunt, quæ semper pulfant, & inter aurem & tempora natura sitæ sunt; easque ubi obturaveris, medicamenta, quæ humectant, oculis adhibe, lacrymamque quamplurimam educto, uti quod in oculis consistit & morbum facit, colluatur. Quod si rumpatur oculus, molibus & acerbis medicamentis utendum, ut constrictum ulcus in angustum coeat, cicatrixque tenuis fiat. Quum vero albugo fuerit, lacrymæ oculo conducunt.

---

## CAPUT VII.

*De fluxionis biliosæ a capite in thoracem decumbentis, & ab ea ortæ peripneumoniæ, pleuritidis, suppurati, tabis & tussis, etiam tabis a fluxione in spinam, ac icteri, ortu, causis, signis diagnosticis, & prognosticis.*

**A**T quum in thoracem fluxus ierit, bilisque fuerit, quod hinc manifestum est; dolor ile adficit, & claviculam ilium mollitudini e regione respondentem, & febris adest, linguaque superiore parte ex viridi pallefcit, & concreta excreantur. In hoc morbo periculum septimo aut nono die instat. Quum utraque latera doluerint, reliquaque similiter ut in priore malo se habuerint: hæc quidem peripneumonia est; illa vero pleuritis: hæc autem eam ob causam oriuntur. Quum e capite per guttur & arteriam asperam in pulmonem fluxio se tulerit, pulmo, quippe natura rarus & siccus, quicquid humoris potest, in se attrahit; & ubi influxerit, major redditur, & si quidem in totum fluxerit, ejusque fibræ majore

res redditæ utrumque latus attigerint, pulmonis-  
que inflammationem fecerint; quum vero alterum-  
tantum, pleuritis fit. Pulmonis inflammatio lon-  
ge periculosior est, & dolores ad laterum molli-  
tudinem & claviculas multo vehementiores ha-  
bet, linguaque longe est pallidior, fauces a flu-  
xione dolor occupat, vehemens lassitudo detinet,  
& anhelatio sexto aut septimo dieprehendit.  
Hunc nisi febris septimo die dimiserit, moritur,  
aut suffocatur, aut utrumque contingit; quod si  
nono die, duobus intermissis diebus, febris corri-  
piat, hic etiam ut plurimum aut moritur, aut  
suppuratus evadit: si vero duodecimo die, sup-  
puratus fit; si decimo quarto, convalescit. Et  
quicumque ex pulmonis inflammatione, aut pleu-  
ritide suppurati fiunt, minime moriuntur, sed  
convalescunt. Suppurati vero ut plurimum fiunt,  
quum fluxio ad eundem locum, velut in bilis  
fluxionibus, decubuerit: sed in bilis quidem flu-  
xionibus multum defluit, & ubi defluxit, seda-  
tur; suppuratis vero, tum minus defluit, tum  
minime sedatur. Suppurati etiam fiunt, quum  
minus exerceant, quam ad pulmonem defluat.  
Quod enim in pulmone consistit & defluit, in  
pus vertitur. Pus autem in pulmone & thorace  
consistens, ulcerat & putrefacit: & ubi ulcus  
factum fuerit, ab ulcerata parte, & ab eo, quod  
per sputum repurgatur, defluit; ac simul qui-  
dem caput concussum magis fluit, simulque ex  
ulcerato thorace & pulmone magis fluit, & ul-  
cera motu agitata refringuntur; ut etiamsi qui  
humor a capite defluit, cesset, is tamen, qui ab  
ipsis ulceribus procedit, morbum facere possit.  
Fit etiam ab ulcere suppuratus, & levior hic  
morbus est. Fit vero etiam extra pulmonem,  
potissimum quidem a ruptura, & ubi caro con-



tusa fuerit; hac enim parte pus colligitur, collectumque, si quis corpus concutiat, fluctuat, & strepitum facit: & hæc uestione curantur. At vero tabes fit, quum ad eundem (locum,) velut in suppurato, fluxio fertur per guttur & asperam arteriam, quæ pulmonem & guttur continent. Desluit autem in pulmonem frequenter & paulatim, nec copiosum in pulmone humorem facit; dum enim resiccatur quod desluit, & in gutture concrefcens, nimirum quum non eluitur, sed sensim influit ac detinetur, tussim concitat; & in aspera areria detentum quod influit, quum asperæ arteriæ angusta foramina habeant, angustiam spiritui affert, eamque spirandi difficultatem habere facit, ut eo velut deficiente, æger semper respirare desideret; quin etiam in pulmone, ceu non admodum humido, pruritus exoritur: quum vero multum a capite defluxerit, pruritus in pulmone non fit; etenim copiosum est, quod in ipsum desluit, & suppurati ex tabidis huiusmodi sunt, ubi humidius corpus factum fuerit; & ubi siccus fuerit, ex suppuratis tabidi. Suppurati hoc modo dignoscuntur. Lateris mollitudinem a principio dolor obsidet; quum vero jam pus collectum est, & dolor similiter vexat, & tussis suboritur, tum pus excrescitur, & anhelatio corripit; quod si nondum pus eruperit in lateris mollitudine, concutitur, ac velut in utre strepitum edit. At si horum nihil adfuerit, suppuratus tamen sit, ex his conjectare oportet. Multum anhelat, subraucum loquitur, pedes & genua intumescunt; magis vero ex ea lateris mollitudine in qua pus inest, thorax incurvatus est; & membrorum dissolutio fit, sudore etiam totum corpus perfunditur; æger interdum quidem sibi calidus, interdum etiam frigi-

dus videtur; unguis circumtensi sunt, & venter  
 incalescit. Atque ex his suppurati dignoscendi  
 sunt. Quum vero posteriore ex parte fluxio in  
 spinam decubuerit, huic tabes ejusmodi subori-  
 tur. Lumbos dolor occupat, & anteriores capi-  
 tis partes ipsi vacuæ esse videntur. Bili autem  
 hæc insunt periculosa; si in oculis regius morbus  
 oboriatur, si in unguibus livores suborti fue-  
 rint, si corpus ulcera habeat, partesque circa  
 ulcera lividæ fuerint; & quum sudor non toto  
 corpore, sed una aliqua tantum corporis parte  
 erumpit; & quum febre remanente, ex pallido  
 virescens exscreatur, aut si exscretio cesset, quum  
 adhuc in pulmone remanet ex pallido virescens.  
 Sic autem quum inest, quumque non inest, di-  
 gnoscendum. Quum inest, in faucibus respiran-  
 tis strepit, anhelatio item periculosa est, & sin-  
 gultus, febrisque discedit excreatione adhuc in  
 pulmone hærente, & debili jam ægro alvus deji-  
 cit. Hæc sunt pleuritidis, & peripneumonix  
 periculosa indicia.

## S E C T I O I I.

### C A P U T V I I I.

*De pleuritidis, peripneumonia, suppurati, tabis,  
 & octavae fluxionis per fauces in ventrem, cu-  
 ratione.*

**P**leuritidem sic oportet curare. Febris per se-  
 ptem dies haud sedanda; potu vero aut ac-  
 to mulso, aut aceto & aqua utendum: hæc au-  
 tem quam plurima offerenda, quo humectatio  
 fiat, eaque facta excreationem faciat; dolorque



medicamentis calefacientibus sedandus, & forbitione exhibendum quidquid excreationem molia-  
tur: & balneis etiam quarto die utendum, quin-  
to autem & sexto, oleo illinendum; septimo ve-  
ro lavandum, si febris non remittat, uti ex bal-  
neo sudor oboriatur: quinto insuper & sexto vā-  
lidissimis utendum excreationem promoventibus  
medicamentis, quo æger quam facillime septimum  
transigat diem. Quod si neque septimo die de-  
suerit, nono desinet, nisi aliud quiddam pericu-  
losum contingat. Postquam autem febris remi-  
serit, forbitiones quam debilissimæ offerantur.  
Quod si alvi fluor corpori, quod recens in mor-  
bum incidit, supervenerit, a potu auferendum  
erit; si postquam febris remiserit, triticeis for-  
bitionibus utitor. Eodemque modo pulmonis in-  
flammationem curato. Suppuratis, caput haud  
vehementibus medicamentis purgandum, sed sen-  
sim ad nares avertendum, cibusque simul ventrem  
subducentibus utendum. Et cum morbi princi-  
pium non amplius erit, sed fluxus divertitur,  
excreatio promovenda, & tussis excitanda, &  
tum medicamentis, quæ infunduntur, tum cibus  
utitor. Quum autem excreatio movenda est,  
pluribus etiam cibus, tum falsis, tum pinguibus,  
vinoque austero utendum est, & quum hoc mo-  
do habuerit, tussis excitanda. Tabidos quinetiam  
quoad reliqua (curabis), ad eundem modum,  
præterquam quod cibaria non multa simul exhi-  
benda, neque opsonia plura, quam cibaria fru-  
mentacea; & vino diluto inter cibos utendum,  
ne calefaciat, & corpori debili calorem exhibeat,  
& utraque simul eodem tempore calefaciant, &  
calore multam fluxionem inducant. Ubi vero  
per gulam in ventrem fluxio inciderit, infra pur-  
gatio, interdumque supra fit. Huic quidem si

dolor in ventre adfuerit, is primum medicamento aut succo subducendus; deinde medicamento corroborante utendum, cibis vero alvum subducentibus, quamdiu dolor detinuerit. At ubi dolor sedatus fuerit, cibis corroborantibus utendum. Eodem modo etiam ubi per multos dies purgatio detinuerit, curato. Quod si imbecillus fuerit, & præ imbecillitate ista offerri nequeant, primum quidem ptisanæ succo alvus per infusum eluenda; deinde ubi per hunc purgaris, adstringente aliquo utendum.

---

## CAPUT IX.

*De Hydropis, ischiadis, & tabis a fluxione capitis in posticas partes, etiam de splenis tumescentis, ac pueri hydropici, curatione.*

**Q**Uum autem in carnem posteriore parte juxta vertebrae illapsa fluxio hydropem excitarit, sic medendum. Cervicis caro, quæ in medio est venarum, tribus crustis inurenda; & ubi uulneris, constringenda, & quam tenuissimæ cicatrices inducendæ: & ubi viam intercluseris, medicamentum naribus admoveto, ut eo divertatur, & imbecillum rursus aliud, donec avertatur; ac anteriores quidem capitis partes calefacito, posteriores vero refrigerato, Est postquam partibus capitis anterioribus excalesfactus tibi videbitur. Cibos (vero) edat, qui maxime nutrant, & minime ventrem subducant, quo fluxionum meatus anteriore capitis parte quam maxime dilatentur. Posteaquam vero viam intercluseris, & influxionem averteris, siquid prius quam fluxionem curaveris, ad corpus pervenerit, hoc modo



medendum. Si quidem ad cutem magis secesserit, externis partibus fomentum admovebis; si vero intro ad ventrem, neque foris conspicuum sit, medicamentum propinabis, sin' utramque in partem, utrinque detrahes. Diligentia autem adhibenda est, ut proximum exitum facias, sive superne, sive inferne, sive alia quavis corporis parte exitus detur. Quum vero coxendicum morbus a fluxione oritur, cucurbitulam admove, & foras attrahere oportet, citra scarificationem, & calefacientia medicamenta propinando intus calefacere, ut exitus pateat tum extra ad cutem per cucurbitulæ tractionem, tum intra ad ventrem per caliditatem. Ubi namque (fluxioni) via interclusa fuerit, neque habuerit quo procedat, ad articulos progrediens, in id, quod cedit, defluit, & morbum coxendicum inducit, aut posteriorum (partium) tabem. Sic adfecto caput medicamento imbecillo purgandum, donec alio avertatur fluxio, & victus ratione, velut antea, utendum. Medicamentum autem potui exhibeto sursum purgans, & alvum inferiorem lacte infuso subluo; cætera fomentis curato. Quum lien ex febre magnus extiterit; sit autem quum corpus extenuatur: ex iisdem enim & corpus augefcit, & lien contabescit. Quum autem corpus extenuatur, & lien turgescit, una etiam cum corpore omentum extenuatum fuerit, omenti pinguedo colliquescit. Ubi vero partes istæ pinguedine vacuæ fuerint, & ex liene turgescente in omentum defluerit; omentum quum valde vicinum sit, & vasa vacua habeat, id excipit; atque ubi semel in corpore morbus exortus fuerit, ad id quod morbosum est vertitur, nisi quis recte curet; ita ut etiam si bene curetur, periculo non careat. Huic sic medendum. Me-

dicamenta, quibus aqua detrahatur, potui exhibenda, & cibi maxime nutrientes offerendi. Si vero neque sic levior fiat, inurendæ sunt crustæ quam tenuissimæ, & quam maxime in superficie, quo aquam emittere possis, in umbilici ambitu, & non supra umbilicum, singulisque diebus emittito. Quumque morbus periculosissimus sit, in his periclitari oportet: nam si tibi succederit, sanum efficies; sin vero frustratus fueris, nihil gravius, quam quod eventurum erat, perpetietur. At in puero hydropem sic curare oportet. Tumidæ & aquæ plenæ partes scalpello aperiendæ sunt, crebroque ac parum educendum est: a singulis igitur corporis partibus educendum, fomentisque utendum, & semper, quod apertum est, calefaciente medicamento illinendum.

---

## C A P U T X.

*De arida pleuritide citra fluxionem, ejusque curatione; ac de febris generatione & curatione.*

**P**leuritis sicca citra fluxionem oritur, quum ex coacta siti pulmo admodum resiccatus fuerit. Pulmo enim quum ficcus sit, ubi amplius quam pro natura resiccatus fuerit, gracilis evadit, & impotens redditus, ad latus præ impotentia inclinatur, latusque contingit, eoque contacto, quum humidum sit, ei adhærescit, & pleuritidem facit. Tunc vero & dolor ad latus & claviculam oboritur, & febris, & album exscreat. Hic multis potionibus curandus est & lavandus, eique medicamentum, quod dolorem sedet, exhibendum, aliaque quæ excreationem



faciunt. Hic intra septimum diem convalescit, neque morbus periculofus est, neque cibos exhibere oportet. At vero febres hanc ob causam oriuntur. Quum corpore immoderatus inflammato carnes intumuerint, pituita bilisque conclusæ conquieverint, nihil refrigeretur, neque exeat, neque moveatur, neque aliud quid subeat. Quum itaque lassitudo ( & febris, ) & repletio detinuerit, multa aqua lavandum, & liquido illinendum, & quam maxime calefaciendum, quo calor aperto corpore per sudorem exeat; hæcque deinceps bene tribus aut quatuor diebus facienda: quod si non sedetur, medicamentum, quod bilem educat, propinandum, & febris refrigeranda, priusquam in quartanam deveniat. Neque tamen donec corpus turgescit, medicamentum potui exhibendum: non enim hæc mala judicantur, nisi parum, nimirum corpore turgente; quum autem macilentum fuerit, propinandum, & expurgabitur. In febre cibus minime offerendus, neque sorbitionibus alvus subducenda; in potu exhibenda calida aqua, mulla, & acetum cum aqua: & hæc quam plurima propinanda. Si enim non frigidus potus ingressus fuerit, cum calidus sit, & maneat, ex ægro corpore detrahit, sive urinas deducat, sive sudorem eliciat. Undequaque autem apertum corpus, & respirans, ac motum, quod conducat, faciet. Quum vero attenuatum febris urat, manifestum est, quod non ob corporis tumorem febris detineat; &, si non cesset, nutrire, & tumidum reddere oportet; quod si ne sic quidem conducat, manifestum non oportuisse ( per oblatos cibos ) febrem inducere. Huic medicamentum absorbendum est, quod educat, qua parte magis febris detinet, sive superiore, sive inferiore: si supe-

riore quidem, supra; si inferiore, infra. Nihil vero minus convenit, quam debilibus ægris medicamenta vehementia præbere, sed eodem modo; aut sic tantum, robustis quidem vehemens; debilibus vero debile. Ardores autem potionibus & sorbitionibus, quemadmodum febrem refrigerante medicamento exolvere oportet, cammaro, aut alio quopiam id genus. Ac ubi ex refrigerante ad nauseam devenerit, calefacientibus postea utitor; quod si non cesset, refrigerantibus rursus utendum.

---

## CAPUT XI.

*Curatio icteri, ulceris ferini, & angine.*

**I**cterum sic curare oportet. Quum curandum susceperis, nutrito, & balneis, & pinguefacientibus, tum potibus, tum cibis, tribus aut quatuor diebus humectato. Ubi vero corpus humectatum fuerit, purgato, ipsumque exsiccato, pinguiaque confestim submoveto, & undique adhibito medicamento, si fieri possit, humiditatem educito; ad caput imbecillo purgatorio (utitor;) & quæ urinas ducant, propinato; eaque ante cibos eo tempore, quo turbatam humiditatem repurgaris, in potu præbe, ne post hoc tempus corpus nutriatur. Cum vero attenuatum fuerit, balneis etiam purgato; & cucumeris agrestis radice confusa in aquam coniecta, inde lavato. Medicamenta autem bilem educentia ne propinato, ne id corpus magis conturbet. Ubi vero siccum fuerit, quod conturbatum fuit, nutrito, nullo alvum subducente, aut urinas ciente medicamento, sed vino vinoso, & his, quæ rubi-



cundiores hominem reddant. Quod si viridis pallescens sit, rursus exhausto, neque ullo modo resiccato, ne viror defixus hæreat. Ulcus ferinum hanc ob causam corpus invadit. Postquam caro circumcirca inflammationem conceperit, & ulceris labra intumuerint, ulcusque humidum, & in ulcere sanies resiccata inerit, aut ulcus compactum fuerit; putris ab ulcere sanies defluens, a compacto ulcere foras ad carnem prodire prohibetur; caro autem suscipit, quum nimirum ex inflammatione elevata sit; quumque eo pervenerit subterfluens sanies, putrefacit & attollit. Hunc medicamentis humectando, ulcus ipsum illinere oportet; ut ex humectato ulcere foras fluxio, & non subter carnem, effluat; & quæ ad ulcus adfluunt, refrigerantibus medicamentis (illinenda) uti caro frigore condensata coeat, & minime diffracta rursus fluxionem immittat; quin & reliqua ulcera refrigerantibus oblinenda sunt, iisque humectantia adhibenda. Angina a sanguine oritur, quum sanguis in venis, quæ in collo sunt, concrevit. Sic affectus a venis, quæ in brachiis sunt, sanguis detrahendus est, simulque alvus subducenda, quo id, quod morbum exhibet, avellatur. Lingua quoque, quum magna ulcera habuerit, similiter tractanda. Morbi ab initio curandi sunt; qui a fluxionibus oriuntur, (in his) primum fluxiones sedandæ: qui vero ab alia causa, in his morbi principium sedandum, & curandum: deinde quod confluxit, si quidem copiosum est, educendum; sin vero modicum, victus ratione emendandam.

## CAPUT XII.

*De capitis fracturis ac fissuris, earumque per ferram aut terebram curatione. De lethalibus purgationibus, vulneribus, & ulcusculis. A purgatione laborantis curatio. Bilis eruptio difficile sedatur; vomitus sedat evacuationem.*

**C**apitis futuræ. Si os quidem fractum sit & contritum, periculo vacat, & hunc medicamentis humectantibus curare oportet; si vero fissum fuerit, & fissura intro procedat; periculi plenum est. Huic ferram adhibere oportet, ne sanies per ossis fissuram affluens meningem putrefaciât: nam, quum per angustum quidem subeat, nec tamen exeat, molestia afficit, hominemque ad insaniam adigit. Huic ferra adhibenda est, ut ampla ferratura facta, saniei exitus, neque solum ingressus pateat; & medicamentis, quæ humorem ad se attrahant, utendum, ac lavandum. Febricitanti caput ne purgato, ut ne ad insaniam agatur. Caput siquidem medicamenta purgantia calefaciunt, & sane ad febrilem calorem medicamenti calor accedens, insaniam excitat. Lethalia vulnera. Siquis quacunque ex causa male affectus bilem atram vomuerit, moritur, qui vulnus habet. Et qui evacuatione detentus, imbecillus ac extenuatus, si derepente siccus confidet, moritur. Quum febre detento ulcuscula in ambitu livida, imbecillus quum sit, eruperint, moritur. Quum cuippiam morbo detento, quum jam debilis fuerit, livores eruperint, lethale. Quum quis a medicamenti potu superægrotaverit, ac per superiora & inferiora ejecerit: vinum primo quidem dilutum, deinde meracum



frequenter sorbendum exhibeto, & sedabitur: medicamentum autem neque subducens, neque vomitum excitans (dato.) Si bilis sua sponte, aut deorsum, aut sursum proruperit, difficilius sedatur: quæ enim sponte fertur, vi corpori illata propellitur; si vero a medicamento effluat, a nulla re cognata cogitur. Quum evacuatum & vomentem curandum susceperis, vomitum ne sedato: vomitus siquidem evacuationem sedat, facilius autem postea vomitus sedabitur. Si vero imbecillus sit, qui hæc patitur, a vomitu medicamentum somnum concilians exhibeto. Sanguis quidem cum morbum facit, dolorem inducit; pituita vero, ut plurimum, gravitatem.

### C A P U T XIII.

*De morbi ignoti, ægri robusti & debilis, ulcerum, fluxionis, mærentium, & convulsionis curatione.*

**I**N morbis, quos quis minime cognoscit, medicamentum minime vehemens potui exhibendum. Si levior (æger) evadat, demonstrata via est, & extenuando curatio instituenda est; si vero minime levius, sed deterius habeat, contraria facienda: si extenuare minime conducat, tumidum reddere contulerit, crebroque permutabis, hoc consilio usus. Siquis in morbis robusto quidem ægro, debili vero morbo permutaturus est, tunc quidem audacter valentiore, quam morbus est, medicamento utendum; ut quamvis quod sanum est, una cum ægro educatur, nulla inde sit noxia: at ubi morbum valentio-  
torem, ægrum vero debilem nactus fueris, de-  
bilibus

bilibus medicamentis curatio instituenda est, quæ morbo superiora sint, ipsumque abducant, ægrum autem nihilo debiliorem efficiant. Gymnastice, & Medicina, contrariæ esse solent; Gymnastice namque nullis eget permutationibus; sed Medicina. Sano namque præsentem statum permutare nihil prodest, sed ægroto. Morbi quicunque ulcera sunt, & reliquo corpore supereminent, una cum medicamentis, etiam fame curandi sunt: fluxione ex capite manante, vomitus confert. Morbi vetusti difficilius quam recentes curantur; verum vetustos morbos primum recentes facere (oportet;) ulcus callosum factum, ubi quod durum est, medicamento putrefaciente expuleris; demum occludendum. Medicamenta, quæ tumefacere maxime solent, ea pura (ulcera) occludunt; quæ vero attenuant, ea purgant. Quod si quis, quæ nondum matura, occludat, corpus ægrotum nutrit, quod ulcus habuerit. Et, si quidem ulcus occludere ac implere opus sit, tumefacere juvat; quod si carnem in capite (producere) velis: cibus enim recreata caro, eam, quæ a medicamento computruit, propellit, ac naturæ auxiliatur; elatam vero in tumorem & levem, cibus extenuare oportet. Mœrore confectis & ægrotantibus, ac se strangulare volentibus, mandragoræ radicem manè propinato, minore tamen pondere, quam quod insaniam excitet. Convulsionem hoc modo curare oportet. Ex utraque lecti parte ignem succendito, & mandragoræ radicem propinato, minore, quam quod insaniam excitet, pondere, & ad posteriores tendines sacculos calidos admoveto. A convulsione si febris prehenderit, eodem die cessat, aut postero, aut etiam tertio. Ex ruptura febris non ultra tres quatuor dies prehendit: quod si prehen-



dat, ratus quis ex rupturâ ea detineri, ab alia quapiam causa corripitur; neque ea veluti ex ruptura tractanda. Quum homo distentis pedibus, aut manibus fuerit, insaniam sibi inducit.

---

#### CAPUT XIV.

*De ulatione venarum, ejusque faciendæ modo, ac usu; quæ sanguinem sistit, fluxionem avertit, & cephalæam curat.*

**V**ENAM autem sic inurere oportet, ut morbo, quocunque quis ægrotarit, conveniat. Si iniustus homo fuerit, fluat autem aliquid sanguinis, ut ne hoc ipsi periculofum sit, ambo hæc facere licet. Si inufferis, qua parte dolor est, cujus gratia urebatur, non coalescit; verum ad fluxum contulit: si enim perusta fuerit, minime effluit. Tunc enim utramque venæ extremum, qua parte perustum est, recurrit, simulque exarescit; quod siquid relictum fuerit ab ea parte, quæ relicta est, profluente fluxione, humectatur. At si sanguis ex vena effluit, eam obliquam perurito: quod si non cesset ad hæc, superiore & inferiore parte utrinque incidito, quo sanguinis fluxus avertatur, interceptum enim facilius est, quam confertum; medicamento sedare. In capitis dolore sanguinem ex venis detrahito: quod si non cesset, sed diuturnus sit, venas inurito, & convalescit; si vero caput purgaveris, magis affliges.

## CAPUT XV.

*Artem medicam longam esse ac difficilem, ob varium subiectum, diversos affectus, & medicamentorum effectus saepe contrarios.*

**M**edicina ut cito addiscatur, fieri nequit, propterea quod in ea firma aliqua doctrina tradi non potest; verbi gratia, qui uno modo, quem docent, scribere didicit, omnia novit; & qui sciunt omnes, eodem modo, ideo quod idem est, & eodem modo fit, & nunc & non nunc, neque contrario modo fieri potest, sed semper merito simile est, neque temporis occasione opus est. Ars vero Medica, & nunc, & paulo post, non idem facit, & erga eundem contraria facit, eaque sibi ipsis contraria. Primum alvum subducentia non semper hoc faciunt, eaque utrumque faciunt: neque fortassis sic se habent alvum subducentia, ut alvum sistentibus sint contraria. Alvo suppressa, ob vehementem suppressionem corpus tumidum redditur, pituita ad ventrem perveniente; sic suppressio alvi subductionem facit: ubi enim pituita ad ventrem pervenerit, evacuatio contingit. Hoc vero modo, quæ natura alvum subducunt, alvum remorantur, nisi certe alvum subducentia reddideris; exsolvatur autem id quod morbum facit & humectetur: postquam exsolutum fuerit, sanus evadit. Et sic quæ sistunt, subducentibus alvum remorantur, vicissimque alvum subducentia sistentibus. Eodem modo de rubicundis & pallidis: etenim pituitosa & tumefacientia pallidos & decolores reddunt, & attenuantia bene coloratos. Utriusque vero remedium est contrarium



contrario. Verbi gratia, quum intumuerit, qui pallidus est, exsolvitur, si attenuans aliquod medicamentum adhibitum fuerit; hicque tumentis attenuans profuit. Ex his autem quod aliquando utilitatem percepit, nunc ei qui profuit hic prodest, siquando ex attenuatione decolor, & ex viridi pallefcens fuerit. Si quis enim tumorem inducens medicamentum exhibuerit, pallor sedatur. Dolor etiam oritur ob frigus & ob calorem, & propter nimiam copiam, & propter paucitatem. Et in perfrigeratis quidem natura corporis partibus ad cutem ob nimium calorem dolor suboritur; & in calidis natura, ob frigus: & in siccis quidem natura, dum humectantur, & in humidis natura, dum resiccantur. Quum enim cujusque natura immutatur & corrumpitur, dolores fiunt, & sanantur dolores contrariis. Proprium id est cuique morbo. Natura calidis ob ipsum frigus male habentibus, calefaciens aliquid (adhibendum,) reliquaque eadem ratione. Alius modus hic est. Per similia morbus oritur, & per similia oblata ex morbis sanantur: veluti stranguriam, si non adsit, idem facit, & si adsit, idem sedat; tussisque eodem modo, ut & urinæ stillicidium, ab iisdem fit & sedatur. Alius itidem modus. (Febris orta ob tumefactionem ex pituita, interdum quidem ab iisdem fit, & sedatur,) interdum vero a contrariis facta est. Etenim interdum si quis calida lavare velit, & copiosum potum exhibere, sanus evadit; & propter tumefactionem exorta febris, oblatis tumorem inducentibus sanescit. Ac si quis medicamentum alvum subducens aut vomitum movens propinare velit, ad eundem modum ab iis quæ excitant sedatur, & a sedantibus excitatur. Etenim si quis homini vomenti

copiosam aquam potui exhibeat, una cum vomitu eluentur ea, quæ vomitus causa sunt: huic quidem per vomitum vomitus sedatur; illi vero per ea quæ sedant, quoniam ipsi per inferiora demittunt, quod intus vomitum facit: (sicque) utrisque contrariis modis homo convalescit. Et quidem si in omnibus hoc modo se haberet, constitutum quidem sic esset, hæc quidem contrariis curari, quæcunque sint, & quacunque ex causa fiant; illa vero similibus, quæcunque tandem sint, & a quacunque causa fiant. Hujus rei causa est corporis debilitas: corpus enim a cibis æqualibus æqualiter nutritur: a corpore vero cibi superantur. Ubi vero plus aut minus ingesserit, aut alia quædam mutatio facta fuerit, superatur corpus ab oblatis; superantur autem & cibi: & ubi superantur cibi, corpus vigere faciunt; iique simul corpus superant, ac statim contraria efficiunt. Calida lavari, dum quidem corpus calidam admotam superat, vegetum; si superatum fuerit, gracile reddit corpus. Et comessatio idem quod balneum efficit; hæc siquidem dum superantur, corporis vigorem faciunt; ubi vero superaverint, tum alvi dejectiones, tum varia vitia adferunt. Quum vero id, cui offertur, immutatur, id quod offertur, immutari necesse est. Immutatum enim corpus, quum evictum sit, parum est efficax, & ex quovis offensiones exhibet. Hoc autem efficiunt etiam ea, quæ alvum subducunt: & quæ vigorem afferunt, hæc corpus extenuatum reddunt; & reliqua omnia, quæ his contrario modo afficiuntur. At vero ars Medica brevem habet occasionem, & qui hoc novit, illud constitutum habet, & novit, quæ sint rerum species, & quæ non species, ad quas cognoscendas occasio est in Medicina;



nempe quod alvum subducentia fiant, & reliqua quod contrario modo se habeant, & quod maxime contraria, non sint maxime contraria. Occasio autem hæc est, cibos offerre ea copia, quam corpus superare valeat: quod si quis sic fecerit, cibum alvum subducentem oblatum, alvum subducere, & corpus tumefacientem tumefacere omnino necesse est. Si igitur cibos corpus superaverit, neque morbus, neque ex his, quæ offeruntur, contrarietas oritur; eaque est opportunitas, quam Medicus cognitam habere debet. Ubi vero opportunitatem prætergressus fuerit, contrarium accidit; & qui prius etiam supra modum cibum coquere poterant, vix nunc se incallescere sentiant: corpus enim, quamdiu id, quod offertur, superaverit, nutritur; ubi vero hanc opportunitatem prætergressum fuerit, contrarium contingit, siquidem attenuatur. Sed & reliqua omnia, quæ tumefaciunt, quoad ea corpus superaverit, prætereaque si opportune (exhibeantur,) etiam secundum suam naturam singula faciunt, & tumefacientia tumefaciunt: at ubi occasionem excefferint, contraria fiunt.

## C A P U T XVI.

*Quid medicamentum; ac de medicamentis blandis ac vehementibus, alvum subducentibus ac sistentibus, eorumque usu.*

**O**Mnia medicamenta sunt, quæ præsentem statum dimovent; vehementiora autem omnia immutant. Licet autem, si quidem velis, medicamento transmovere; sin minus velis, cibo. Ægrotanti vero omnia e præsentis statu di-

movere opem fert; nisi enim, quod morbum facit, dimoveris, augetur. In morbis debilibus medicamenta natura vehementia minime exhibere oportet, medicamentum ob paucitatem debile existimando; sed in valentibus natura, valentibus medicamentis utendum; debilibus vero non valentia medicamenta danda: neque medicamentum transmutandum est, sed singulis secundum suam naturam exhibendum; ita ut debilibus quidem, debilia natura medicamenta; valentibus vero morbis, valentia natura medicamenta exhibeantur. Morbi autem ea parte, cui proximi sunt, educendi, & parte, qua singulis proximus est exitus, eliciendi. Hæc alvum subducunt, quæcunque lubrica & incisiva sunt, & quæcunque in calidis attenuantur (venter enim calidus est) & reliqua, quæ falsa sunt, & quæ ex his plurimum habent: minime autem alvum subducunt; sed sistunt, quæcunque flatum creant (humida enim dum resiccantur, flatum pariunt) quæque adstringunt, & quæ calore concreescunt, & friabilia & sicca. Quæcunque autem foris extenuant, ea omnia intro assumpta tumefaciunt, eademque roborant, & tumorem inducunt; & quæ alvum subducentia extenuant, eadem calefaciunt: ad hæc vero etiam acida pituitosa sunt. Quæcunque autem ventrem refrigerant, eadem alvum subducunt, & quæ frigida sunt, & humida; quum vero alvum minime subducunt, calefaciunt. Frigefaciunt autem & calida in ventrem assumpta, & cito secessum faciunt: quæ vero alvum non movent, in ventre calida sunt. Ex his; quæ repletionem inducunt, maxime tumefaciunt; quæ vero plurima assumpta repletionem non faciunt, ea alvum dejiciunt.



## CAPUT XVII.

*Artem medendi certam & constantem esse, quam qui novit, eum fortuna non indigere, sed & cum fortuna, & citra fortunam, optime factorum & successu potiturum.*

**A**Rs sane Medica jam mihi tota inventa esse videtur: quæ sic comparata est, ut singulas & consuetudines, & occasiones doceat. Qui enim sic Medicinam novit, minime fortunam expectat, sed & citra fortunam, & cum fortuna, recte faciet. Constituta enim est tota Medicina, ejusque præceptiones, ex quibus constat, pulcherrimæ, fortuna minimum indigere videntur. Sui enim juris est fortuna; & nullius imperio paret, neque voto illam consequi datur. Scientia vero tum imperio subjacet, tum successu felix est, si quis ea instructus uti velit. Deinde qua in re Medicina fortunæ indiget? si namque explorata sint morborum medicamenta, quemadmodum reor, ea medicamenta, ut morbis sanitatem adferant, minime fortunam morantur, si modo medicamenta sint; quod si cum fortuna ea exhibere juvat, non magis medicamenta, quam non medicamenta, una cum fortuna morbis oblata sanitatem restituant. At quicumque fortunam ex Medicina, aut alia quapiam (arte) expellit, negatque eos, qui probe aliquid noverint, fortuna uti, is mihi contrarium sentire videtur; mihi enim soli hi vel successu potiri, vel eo frustrari videntur, qui recte quid, vel male facere noverunt. Est enim prospere succedere, recte facere; quod faciunt, qui sciunt: at vero successu frustrari est, quum quis, quod

minime sciat, id non recte faciat. Ignaro enim quomodo prospere succedere queat? quod siquid etiam prospere succedat, nequaquam commemorandum successum habebit; nam qui non recte facit, huic prospere succedere non poterit, quum reliqua, quæ sunt consentanea, non faciat.

---

# HIPPOCRATIS

## DE HUMORIBUS.

---

### PRÆFATIO

**G**ALENUS videtur pro genuinos habuisse, cum in eum commentarios scripserit, sive eum, quem nunc habemus, sive alium amissum. MERCURIALIS mavult ad secundam classem rejicere, cum veteres critici eum fere repudiaverint. Mihi videtur genuinus, ejusdem certe auctoris, qui librum de locis scripsit, cujus pituitam & bilem alterne superantes hic reperias: aliqua etiam habet, quæ in Epidemicorum, I. genuino certe opere, perinde leguntur, & aphorismos demum ad verbum repetitos. Deinde brevitatis est plus quam Hippocratica, ut sola nomina rerum absque ullo sermone legas. Incipit a theoria humorum, qui huc & illuc vergunt. Signa morborum brevissime recenset. Communes leges medicandi. Dies critici.



*Vis ætatum, anni, ventorum. Metastasis exempla, ex Epidemicis.*

---

## ARGUMENTUM LIBRI.

*Medica præcepta, tum de his, quæ circa ægrotantes molienda sunt, tum de his, quæ in morbis eveniunt; diversi morborum ortus pro variis cæli tempestatibus, & constitutionibus. Quomodo ex morbis temporum constitutiones prædicendæ: & quæ ex hæmorrhoidibus commoda.*

## CAPUT I.

*Congestiones humorum per commodas vias & conveniente tempore ducendas esse: easdem derivatione, revulsione, aliisque modis solvi.*

**C**OLOR humorum, nisi ad interna recesserint humores, velut (in cute) efflorescit. Ducendi quo vergunt per loca conferentia, his exceptis quorum maturationes e temporibus contingunt. Maturationes foras aut intro vergunt, aut alio quo oportet. Cautio, imperitia, experiendi difficultas, calvities, viscerum vacuitas; inferioribus repletio, superioribus nutritio, sursum inclinatio, deorsum inclinatio. Quæ sua sponte sursum ac deorsum feruntur, quæ juvant, ac lædunt. Cognata forma, regio, consuetudo, ætas, anni tempestas, morbi status, exsuperantia, defectus, quibus quantum deficit, aut non. Purgatio, evacuatio, remedia, declinatio, derivatio in caput, in latera, qua maxime tendit, aut revulsio in supernis deorsum; in infernis

furfum; aut exficcare, aut quibus inferiora, aut quibus inferiora, aut (quibus) eluitur, aut quibus lenietur. Ne humores effusi intro revellantur; fed ejectionum viæ ficcentur. Conturbatio, perfufio, ablutio, quibus ad fedem abfcedit, unde refolvitur, aut medicamentum noxium, aut ulcus, aut humor aliquis concretus, aut pufkulofa eruptio, aut flatus, aut cibi recrementum, animalculum, aut æftus, aut alius quidam affectus.

---

## CAPUT II.

*Medico, quæ confideranda; Celeritas in Medica arte; humorum inconfiantium confideratio; tor-  
men infra umbilicum.*

**C**Onfideranda hæc fponte definentia, an velut ab ardoribus excitatæ pufkulæ, in quibus qualia lædant, aut profint; figuræ, motus, elevatio, rurfum depreffio, fomnus, vigilia, anxietas, ofcitatatio, horror, ut quæ molienda, aut prohibenda prævertas. Inftitutio vomitionis, eorum quæ per inferiora subducuntur, aut fputi, muci, tullis, ructus, fingultus, flatus, urinæ, fternutamenti, lachrymarum, prurituum, vellitionum, contactuum, fitis, famis, repletionis, fomnorum, laborum, otii, corporis, mentis, difciplinæ, memoriæ, vocis, silentii. Mulieri hyftericæ purgationes, quæ fuperne prorumpunt, & tormina concitant, pingua, fyncera, fpumantia, calida, mordacia, æruginofa, varia, ramentofa, fæculenta, cruenta, flatus expertia, cruda, cocta, ficca; quæque undique circumfluunt, ferendi facilitas, ac difficultas, spec-



tanda est, priusquam periculum accedat, quæque sedare non oporteat. Maturatio, descensus eorum, quæ infra sunt, fluitatio eorum, quæ supra, & quæ ex uteris (feruntur) & in auribus fordes; emollitio, adapertio; vacuatio, calefactio, refrigeratio, intra, extra: horum quidem, illorum minime. Quum infra umbilicum, quæ torquent, fuerint, ea tarda ac mollia tormenta sunt, vice versa, contra.

---

### C A P U T III.

#### *Egestionum alvi consideratio.*

**Q**uæ per alvum secedunt, qua tendunt, spumæ expertia, cocta, cruda, frigida, fætida, sicca, humida, prave olentia. Quæ sitis prius non adfuit, neque æstus, neque alia causa, urina, nasi humectatio. Projectionem, & siccitatem, corporis molem in se non subsidentem, spiritum turbidum, hypochondium, extrema, oculos male affectos, (spectabis). Coloris mutatio, pulsus, frigus, palpitationes, cutis durities, nervorum, articulorum, vocis, mentis, figura voluntaria, pili, ungues, tolerandi facilitas, aut secus, & qualia oportet. Signa hæc sunt, odores corporis, oris, ejectionis alvi, auris, flatus, urinæ, ulceris, sudoris, sputi, naris, corpus falsum, aut sputum, aut nasus, aut lachrymæ, aut alii humores; omnino similia juvantia, lædenda. Insomnia qualia quis videat (spectanda) & in somnis quæ faciat; an acute audiat; & prompto animo obediat, an quæ commoda sunt, & ad salutem adferunt; an aliis fortiora, plura-

que sint commoda, quæ servant; an omnia omnibus sensibus sentiant, & ferant, ut odores, sermones, vestitus, figuras, atque hæc facile, quæ etiam sponte apparentia juvant. Et quum talia judicationem asserunt, ac tot, & talia, ut flatus & urina, qualis, quantaque & quando; quæ vero contraria sunt, ea avertere, iisque adversari oportet. Quæ propinqua, & communia sunt affectibus, ea prima & maxime vitantur. Constitutionem autem spectato ex iis, quæ prima incipiunt; quicquid tandem excernatur, ex urinis qualesnam sint, & quænam sit corporis concidentia, coloris immutatio, spiritus imminutio, & cæteræ cum his victus rationes. Id quidem sciendum, num quæ prodeunt sint similia, egestionem, urinæ per uteros, sputa per nares, oculi, sudor ex tuberculis, ex vulneribus, pustulis, quæ sua sponte, quæ per artem. Quod similia sunt inter se omnia, quæ judicant: & quæ juvant, & quæ lædunt, & quæ liberant, ut illa quidem effugiens avertat, hæc vero adsciscens adducat, & suscipiat. Aliaque etiam eodem modo in cute, extremis partibus, hypochondriis, articulis, oculis, ore, figuris, somnis, qualia judicent, & quando talia moliri oporteat. Ac præterea quoniam tales abscessus oriantur; quænam juvent, cibis, potionibus, odoribus, visu, auditu, cogitatione, secessibus, calefactione, frigefactione, humoribus, siccitatibus, humectando, siccando, unctionibus, illitionibus, cataplasmatibus, emplastris, insersionibus, tum vero iis, quæ imponuntur. Figuræ, defricatio, medela, labor, otium, somnus, vigiliæ, spiritibus superne, inferne, communibus, propriis, artificiosis; in accessionibus, neque præsentibus, neque futuris, neque pedum frigore; sed declinante morbo. In acces-



tionibus per circuitus repetentibus neque cibos dare, neque cogere oportet; sed ante iudicationes, de iis, quæ apponuntur, auferre. Quæ judicantur & iudicata sunt integre, neque movere, neque innovare, siue medicamentis, siue aliis irritamentis, sed sinere oportet. (Judicantia in melius, non statim apparere.) Concocta medicamentis aggredi, ac movere oportet, non cruda; neque in principiis, nisi turgeant; multa autem non turgent. Quæ ducere oportet, quo maxime vergunt, eo per loca convenientia ducenda sunt. Quæ prodeunt, haud multitudine æstimanda sunt; sed quandiu prodeant, qualia oportet, & æger facile ferat. Ubi vero virium debilitatem, aut animi defectionem inducere oportet; donec id effeceris, cuius causa hoc fit, alio vertere; aut siccare, aut humectare, aut revellere, si sufficere æger possit. Ex his conjiciendum, sicca quidem erunt calida; humida vero, frigida; quæ vero alvum subducunt, plerumque contraria. Hæc diebus imparibus sursum sunt, si & circuitus, & constitutio ex ipsis exacerbationibus talis sit; plurima autem paribus diebus sunt deorsum. Sic enim quæ sua sponte eveniunt, juvant, nisi circuitus in diebus paribus exacerbationes faciant; in hujusmodi autem paribus diebus sursum; imparibus, deorsum; tales autem pauci sunt; & tales etiam constitutiones difficilius judicantur. Quin etiam tempore ulterius progressa sic fieri necesse est, velut quæ ad decimum tertium, decimumque quartum diem; ac decimo quidem tertio, deorsum; decimoquarto vero, sursum; sic enim ad iudicationem confert; & quæ ad vigesimum; præter ea, quæ deorsum feruntur: multa autem purganda sunt, eaque non prope iudicationem, sed longius (ab ea.) In acutis

autem raro multa ducenda sunt; in delassatis vero, totum. Id febribus ad articulos, & maxillas maxime abscessus fiunt, in vicinia dolorum cujusque ad superiorem partem magis & in totum. Si vero morbus lentus fuerit, & deorsum feratur infra etiam abscessus fient: maxime autem pedes calidi infra significant; frigidi vero supra. Iis, qui e morbis convalescunt, si statim in manibus aut pedibus dolores oboriuntur, in his abscessus fiunt. Sed si qua pars ante morbum laborarit, ibi morbi sedes erit; ut accidit iis, qui Perinthis tussi, & angina laborarunt; tussis enim, non secus ac febres, abscessus excitant. Eadem quoque ratione contingit vel ab humoribus, vel corporis colliquatione, & animi. Humores igitur, quibus anni temporibus efflorescant, nosse oportet & quosnam in singulis morbos efficiant; & quasnam in unoquoque morbo affectiones pariant. Tum vero corpus reliquum spectandum est, ad quem morbum maxime natura vergat; & quidnam lien intumescens faciat: horum etiam quiddam natura facit; ac colores fere deteriores sunt, & corpora desiccant: & si quid aliud sit, in his te exercere oportet

---

#### C A P U T IV.

*Animi & corporis molestiæ. Serpens derepente conspectus pallorem cum virore inducit. Terra similis ventriculo.*

**A** Nimi intemperantia in cibis, potibus, somno, vigilia, aut propter amores quosdam, ut tellerarum, aut propter artes, aut propter



necessitates; laborum tolerantia, & quorumcun-  
 que, ordinata est, aut inordinata. Mutationes  
 ex quibus ad quænam fiant, considerandæ. Ex mori-  
 bus animi industria, aut quærens, aut meditans,  
 aut videns, aut loquens, aut quid aliud faciens; ve-  
 lut tristitiæ, iracundiæ, cupiditates. Quæ ex  
 casu accidunt animi molestiæ, aut aspectu,  
 aut auditu contractæ, ut etiam corpora afficiun-  
 tur, nam malis ad se ipsas attritis, dentes stu-  
 pescunt, juxta foveam ambulanti, crura tre-  
 munt, quum quis ea, quibus opus habet, ma-  
 nibus extollit, eæ tremunt; serpens derepente  
 conspectus, pallorem virescentem inducit. Timo-  
 res, sicut pudor, mœror, lætitia, ira, aliaque  
 ejusmodi sic respondent; unicuique autem pars  
 corporis ad actionem accommodata in his ob-  
 temperat; sudores, cordis palpitatio, & ejusmo-  
 ei facultates. Quæ extrinsecus, profunt aut no-  
 cent; unctio, perfusio, illitio, cataplasmatum  
 usus, lanarum deligatio & rerum earum, quæ  
 sunt hujusmodi. Ac internæ partes talibus obe-  
 diunt; ac non solum externæ iis, quæ intro as-  
 sumuntur, sed etiam quæ in lanis ab ovili suc-  
 cidis adhibentur; & quod a rege nomen duxit  
 cuminum videntibus, (vel) olfacientibus. Quæ  
 de capite ducunt, perturbationem adferunt,  
 sermones, vox, & talia. Mammæ, genitura,  
 uterus, signa in ætatibus, & in suffocationibus,  
 & tussibus, quæ ad testes perveniunt. Ut se ha-  
 bet terra in arboribus, ita in animantibus ven-  
 ter, alit, calefacit, ac refrigerat; refrigerat au-  
 tem dum evacuatur; calefacit, dum impletur,  
 ut terra stercoreata; (sicut autem terra) hyeme  
 calida est, ita etiam venter. Arbores corticem  
 tenuem siccum habent, intrinsecus vero carne  
 sicca, sanæ, imputres, diuturnæ; & ex animan-  
 tibus,

tibus, testudines, & quicquid est hujusmodi, ætatibus, temporibus, annis similia. Quæ vivunt non atteruntur, si melioribus moderate utantur; quemadmodum parva hydria recens transmittit, vetus facta retinet; sic ventriculus alimentum transmittit, & fæcem, veluti vasculum, retinet.

## CAPUT V.

*Morborum modi qui? Morbi temporibus pares; tempora, quæ morbos judicatu faciles pariant.*

**M**Odi morborum sunt hi; partim quidem congeniti sunt, quos interrogando licet cognoscere; partim a regione proficiscuntur (multis enim sunt regionibus familiares ac multi ipsos norunt) partim ex corpore, & victus ratione, & morbi constitutione, vel ab anni temporibus. Regiones autem ad anni tempora male affectæ, tales morbos pariunt, quale fuerit tempus, cui sunt similes, verbi gratia inæqualis calor aut frigus, si eodem die, quum talia fuerint, autumnales morbos in regione creabunt; hæcque ratio in cæteris tempestatibus servabitur: alii quidem ab odoribus cœnosis, aut palustribus, alii vero ab aquis, calculosi, lienosi; alii a ventis tum bonis, tum malis oriuntur. Quales vero futuri sunt anni temporis morbi, tales etiam ex his constitutiones erunt, si anni tempora tempestivam & ordine procedentem temperiem habuerint, morbos judicatu faciles faciunt; vernaculi vero temporum morbi indicant mutationes, & prout tempus variaverit, similes, aut dissimiles morbi erunt, qui eo tempore oriuntur. Si vero



similiter procedat, morbi quoque hujusmodi erunt, & ad talem modum deducuntur, qualis est morbus regius autumnalis; frigora enim ex caloribus, & calor ex frigore. Et si æstas biliosa fiat, & bilis aucta intus relicta sit, etiam aliquantulum lienosi fiunt. Quum igitur & ver ita processerit, vere etiam morbi regii nascentur; hic enim motus est secundum hanc speciem tempori anni proximus. At quum æstas fuerit veri similis; sudores in febribus, æque faciles, & non peracutæ, neque linguæ aridæ fient. Cum autem ver hybernium fuerit, & extremæ hyemis frigora senserit, hyberni etiam morbi, & tussēs, & peripneumonix, & anginx fiunt. Autumnus quoque si non in tempore, ac derepente hybernarit, non assidue tales morbos facit, propterea quod non in tempore incepit, sed inæqualiter fit; ideo etiam tempora judicatione carent, & instabilia fiunt; sicut & morbi si ante tempus erumpant, aut prius excernantur, aut intus relinquantur, recidivas enim quoque tempora faciunt, sicut & ejusmodi morbos pariunt. Itaque insuper considerandum est, quomodo affecta sint corpora, quum ab anni temporibus excipiuntur.

---

## C A P U T VI.

*Temporum inæqualitas morborum judicationem difficiliorem reddit; tempora etiam recidivas faciunt.*

**A**ustri auditum gravant, oculis caliginem inducunt, capitis gravitatem concitant, torporem faciunt, dissolvunt; quum hic ventus dominatur, talia in morbis patiuntur, ulcera mandentia os præsertim, pudenda aliasque partes

occupant. Si vero aquilo, tusses, faucium asperitates, alvi duriores, urinæ difficultates, horrores, laterum, pectorisque dolores: hoc autem vento dominante, tales morbos magis expectare oportet. Si magis invaluerit, siccitates febres consequuntur, itemque imbres, ex quibus utique redundantia inciderint; & quomodocunque sese habentia corpora, ex alio anni tempore (quid) susceperint, & quicumque tandem humor in corpore prævaluerit. Sed siccitates austrinae, quilonaresque sunt; differunt enim, & alia hoc modo; nam & hoc magnum est; alius enim alio tempore, atque in alia regione magnus est: ut æstas, bilem; ver, sanguinem parit; & alia tempora, ut singulorum fert natura. Mutationes potissimum morbos pariunt, præcipueque maximæ, & in anni temporibus magnæ mutationes, itemque in aliis; quædam sensim accessione facta sunt; atque hujusmodi tempora sunt securissima; sicut etiam diætæ, & frigus, & calor maxime progressu sensim facto; itemque ætates ita commutantur. Naturæ quod ad anni tempora attinet, aliæ ad æstatem, aliæ ad hyemem, bene aut male affectæ sunt; aliæ ad regiones, ætates, diætæ, & alias morborum constitutiones, aliæ ad alias bene aut male se habent; & ætates ad tempora, & regiones, & diætam, & morborum constitutiones. Atque in temporibus diætæ, cibi ac potus quales sint; nam hyemis vacationem habet ab actionibus; & quæ in corpus ingeruntur, ea matura, simpliciaque requirit; hoc enim etiam magnum est: autumnus laboribus est dicatus; insolatus habet crebros potus, cibos instabiles, vina, arborumque fructus.



## CAPUT VII.

*Morbos ex temporibus, & ex morbis aquas & ventos dijudicari. Aquæ inter cutem prænotio; colores pro temporum ratione variant.*

**Q**Uemadmodum autem ex anni temporibus morbos conjectare datur; ita quandoque etiam ex morbis aquas, & ventos, & siccitates, præfagire licet, velut aquilonares, & austrinas constitutiones; hoc enim ei integrum erit facere, qui probe, ac recte didicerit, unde hæc spectanda; veluti & lepræ quædam, & circa articulos dolores, ubi futuræ sunt aquæ, pruritum excitant, & alia hujusmodi. Et quæ pluvix aut tertio die, aut singulis diebus, aut per alios circuitus aut assiduæ contingunt. Et venti quidam per multos dies flant, & inter se oppositi spirant, alii per pauciores, & iidem per circuitum. Hæc autem habent cum temporum constitutionibus similitudinem, ejusmodi autem breviores. Si vero annus talis magna ex parte fuerit, qualem constitutionem fecerit, tales quoque morbi diutius erunt; ac si graviora fuerint, maximi quoque morbi sic erunt, & communissimi, & ad plurimum tempus. Ex primis aquis, ubi post multam siccitatem, futura aqua est, licet hydropes prædicere; & ubi talia parva signa in ventorum quiete & ( aeris ) mutatione apparuerint. Colligendum igitur, qui quidem morbi, quolibet aquis aut ventis de se significationem præbeant, neque negligendus est, & audiendus est, si quis norit, quod tali hyeme prægressa, tale ver aut æstas erit. Colores non sunt similes in anni

temporibus, neque in aquilonaribus, neque in austrinis constitutionibus, neque in ætatibus, neque cum sibi quispiam, neque alius cum alio collatus: considerandi autem colores sunt ex iis, quæ præsentia, quiescentiaque esse novimus; & ætates similes anni temporibus esse, & colore & modo.

---

## CAPUT VIII.

*Hæmorrhoidarii, quibus morbis non corripuntur.*

**Q**ui hæmorrhoides habent, ii neque pleuritide, neque pulmonis inflammatione, neque ulcere exedente, neque furunculis, neque tuberculis, fortassis vero neque lepra, ac fortassis neque vitiliginibus corripuntur. Intempestive tamen curati frequentibus ejusmodi morbis non multo post correpti sunt; iisque ita perniciosi. Et quicumque alii abscessus, ut fistulæ, aliorum medela sunt. Quæcunque suapte natura supervenientia sedant, ea cum prius sunt veluti impedimenta ab his liberant, sed quibuscum communicatio est. Suspecta loca, aut dolore, aut gravitate, aut ob aliud quiddam liberant, quum exceperint, sed quæ communicationem habent. Ob inclinationem non amplius sanguis prodit, sed juxta humoris cognationem talia exspuunt. Est interdum sanguinem detrahare iis, qui hujusmodi sunt; in aliis vero, ut in iis, non par est. Impedimentum certe in cruenta exspuentibus tempus anni, pleuritis, bilis. Quibus circa crissim juxta aures exorta tubercula minime suppurarint, iis subsidentibus, reversio fit: ac pro



recidivarum ratione dum reversione judicantur, rursus attolluntur ac permanent, quemadmodum febrium reversiones in simili circuitu, in his spes est ad articulos abscedere. Urina crassa, alba, qualis Archigenis erat, in febribus lassitudine obortis quarto die interdum prodit, abscessusque liberat: si præterea sanguis etiam e naribus abunde, copioseque fluat. Cui intestinum in dextra parte dolebat, & articulari affectu correptus erat, quietior fuit; quum autem hic sanatus fuit, magis doluit.

---

## HIPPOCRATIS

### DE ALIMENTO LIBER.

---

#### P R Æ F A T I O.

*M*ultum habet de brevitate & antithesibus Libri de humoribus. Brevitate Hippocraticam dictionem imitatur. MERCURIALIS pro genuino DIVI senis opere habet, etsi in secundam classem conjecit. Pro legitimo a GALENO habitus est, qui quatuor commentariis eum illustraverit, passimque ejus loca cum HIPPOCRATIS nomine citaverit; sed & alii pro genuino omnino opere habuerunt. Hic invenias locum, quem ad circuitum sanguinis transfulerunt, nimis libera interpretatione usi. Clarissimi vero loci ad perspirationem, ejusque ad sanitatem conservandam utilitate pertinent. Hic etiam locus est

*Radicatio venarum, hepar, arteriarum cor, per quas in omnia sanguis & spiritus meant ex quo loco deducas non esse antiquiorem librum ERASISTRATO, cujus theoriam contineat. De tempore, quo fetus figuretur. Brevis osteologia, nec vera. Iterum de venarum pulsatione: de spiritu, qui sit alimentum. Nihil habet diatetici.*

---

## ARGUMENTUM LIBRI.

*De alimentorum generibus, & facultatibus; ad quas devehantur partes; quæ facilius, & quæ difficilius transmutentur; quæ eorum principia; quæ, quibus alimenta; quæ, non.*

### CAPUT I.

*Alimenti species ac formæ: ejusdem effectus ac vis: de varietate succorum, nocentium æque atque non nocentium. Differentiæ morborum, eorundemque signa recensentur.*

**A**limentum & alimenti species unum, & multæ; unum quidem; quatenus genus unum: species vero, humiditate, & siccitate (finitur,) in hisque formæ, & quantitas inest, & ad quædam, & ad tanta (referuntur). Auget autem, & roborat, & carnem gignit, & assimilat, & dissimilia facit, quæ singulis insunt, pro cujusque natura, & primitus insita facultate. Assimilat autem pro viribus, cum id, quod supervenit, superat; id vero, quod prius inerat, superat. Evanidum autem fit: interdum quidem



prius tempore dissolutum, aut superappositum; quandoque vero posterius tempore dissolutum, aut superappositum. Destruit autem utrumque in tempore, & post tempus id, quod extrinsecus assidue superingestum est, & per multum temporis firmiter omnibus membris implicatum est. Et propriam quidem formam producit; priorem autem formam (commutat) est interdum, quum priores abolevit. Facultas autem alimenti pervenit, & ad os, & ad omnes ejus partes, & in nervum, & in venam, & in arteriam, & in musculum, & membranam, & carnem, & pinguedinem, & sanguinem, & pituitam, & medullam, & cerebrum, & spinalem medullam, & viscera, & omnes ipsorum partes: & protinus in calorem, & spiritum, & humorem. Alimenti (species hæ:) quod jam alit, alimentum propriæ, & quod nutrimento proximum est: & quod futurum est alimentum. Principium autem omnium unum, & finis omnium unus, & idem finis, & principium: & quæcunque particulatim in alimento probe, & male disponuntur; probe quidem quæ prædicta sunt; male vero, quæ his contrarium habent ordinem. Succi varii, & coloribus & facultatibus: & in noxam, & utilitatem, & ut neque lædant, neque juvent: & plenitudine, & exuperantia, & defectu, & complicatione; aliquorum quidem, aliquorum vero non: & omnium; quod ad calorem lædunt, & juvant; quod ad frigus lædunt, & juvant: quod ad facultatem lædunt, & juvant. Facultatis autem variæ naturæ sunt. Succi corrumpentes, & totum & partem, & foris & intus. Spontanei, ac minime spontanei; nobis quidem spontanei, causa vero minime spontanei. Causæ rursus aliæ quidem manifestæ, aliæ abditæ: & aliæ

quidem possibiles, aliæ impossibiles. Natura omnia omnibus sufficit. Ad hanc vero extrinsecus quidem cataplasma, illitus, inunctio, nuditas, & tegumentum totius, ac partis; calor, & frigus eadem ratione, & adstrictio, & ulceratio, morsus, & quod pinguefacit. Intrinsecus vero, & quædam prædictorum, & præterea causa abditæ, & parti, & toti, & alicui, & non alicui. Excretiones secundum naturam, ventris, urinarum, sudoris, sputi, muci, uteri, per hæmorrhoides, thymum, lepram, tuberculum, cancerum: e naribus, ex pulmone, ex ventre, ex sede, ex cole, secundum naturam, & præter naturam. Horum discrimina aliis alia ratione, alibi, & aliter. Una natura sunt hæc omnia, & non una; multæ naturæ sunt hæc omnia, & non una. Purgans medicamentum sursum, & deorsum; & neque sursum, neque deorsum. In alimento medicamentum purgans, optimum; in alimento medicamentum purgans, malum. Malum & optimum ad aliquid referuntur. Ulcus, crusta, sanguis, pus, sanies, lepra, furfur, ulcera capitis manantia, impetigo, vitiligo, maculæ solares, interdum lædunt, interdum juvant: interdum neque lædunt, neque juvant. Alimentum, non alimentum; nisi alere queat, nomine alimentum, re autem minime; re alimentum, nomine vero non item. Alimentum in pilos, & in ungues, & in extimam superficiem ab internis partibus pervenit. Ab externis partibus alimentum ab extrema superficie ad intima pervenit: confluxio una, conspiratio una. Consentientia omnia, ad universam quidem compagem, omnia: ad particularem vero, partes in unaquaque parte ad opus. Principium magnum in ultimam partem pervenit; ex ultima parte ad principium ma-



gnum pervenit. Una natura, esse & non esse. Morborum differentiae, in alimento, in spiritu, in calore, in sanguine, in pituita, in bile, in humoribus, in carne, in pinguedine, in vena, in arteria, in nervo, musculo, membrana, osse, cerebro, spinali medulla, ore, lingua, gula, ventriculo, intestinis, septo transverso, peritonæo, jecore, liene, renibus, vesica, utero, cute: hæc omnia tum sigillatim, tum per partes; magnitudo ipforum magna, & non magna. Signa: titillatio, dolor, ruptio, mens, sudor, urinarum sedimentum, quies, jactatio, visus, imaginationes, morbus regius, singultus, morbus comitialis, sanguis integer, somnus; & ex his, & ex aliis quæ secundum naturam sunt: & quæcunque ejusmodi cætera ad noxam, & utilitatem tendunt. Labores totius & partis, & magnitudinis signa; alterius quidem ad majus, alterius vero ad minus; & ex utrisque ad majus, & ex utrisque ad minus. Dulce, non dulce; dulce facultate, ut aqua; dulce gustu, ut mel. Signa utrorumque, ulcera, oculi, & gustus; & in his magis, & minus. Dulce ad aspectum, & in coloribus, & in aliis mixturis dulce magis, & minus.

---

## C A P U T I I.

*De perspiratione, aliisque speciebus alimenti; in quibus etiam de dispositione athletica, deque cibo juvenum, senumque.*

**C**ORPORIS raritas ad perspirationem, quibus amplius fertur, salubrius; quibus vero minus, insalubrius. Densitas corporis ad perspirationem, quibus minus aufertur, morbosum. Qui

probe perspirant, imbecilliores, & salubriores sunt, & facile reconvalescunt. Qui male perspirant, priusquam ægrotent, robustiores sunt: ubi vero in morbum inciderint, difficilius sanescunt. Hæc autem, & toti, & parti (attribuuntur.) Pulmo contrarium corpori alimentum trahit; reliqua vero omnia idem. Principium alimenti spiritus, nares, os, guttur, pulmo, reliquaque perspiratio. Principium alimenti, tum humidum siccum, os, gula, ventriculus: antiquius autem alimentum per hædromen, umbilicus. Radix venarum jecur; radix arteriarum, cor; ab his & sanguis, & spiritus in omnia aberrat, & calor per hæc meat. Facultas una, & non una; quæ hæc omnia & diversa gubernat. Alia quidem ad vitam totius, & partis; alia vero ad sensum totius, & partis. Lac alimentum (est iis,) quibus secundum naturam alimentum est; aliis vero minime. Alii autem sunt, quibus vinum alimentum est; alii quibus non: & carnes, & aliæ multæ species alimenti: & pro regione, & consuetudine. Aluntur sane quædam ad incrementum, & ut sint; quædam ut sint solum, uti senes; quædam vero supra hæc, etiam ad robur. Affectio athletica non est natura: habitus salubris melior in omnibus. Ardua res est, quantitas proba conjectura ad vires accommodata. Lac, & sanguis, alimenti sunt redundantia. Circuitus ad multa consoni, ad fœtum, ejusque alimentum. Rursus autem sursum tendit ad lac, & in alimentum, & ad infantem. Animantur quæ non sunt animalia; animantur animalia; animantur animalium partes. Naturæ omnium a nullo edoctæ sunt. Sanguis alienus, utilis; sanguis proprius, utilis; sanguis alienus, noxius: sanguis proprius, noxius. Humores proprii, no-



xii; humores alieni, noxii: humores alieni conferentes; humores proprii conferentes: consonum, dissonum est; dissonum, consonum est. Lac alienum, bonum; lac proprium, noxium; lac alienum noxium; lac proprium, utile. Cibus junioribus parum immutatus; senibus summe immutatus; ætate vigentibus, haud immutatus. Ad conformationem soles trigintaquinque; ad motum septuaginta; ad perfectionem ducenti decem. Alii vero tradunt, ad formam, quadraginta quinque. Ad motum, septuaginta sex. Ad exitum ducenti decem. Alii ad speciem quinquaginta. Ad primum saltum, centum. Ad perfectionem, trecenti. Alii ad distinctionem, quadraginta. Ad transitum, octoginta. Ad elapsum, ducenti quadraginta. Est autem & non est octimestris generatio; nascuntur autem in his, & plures, & pauciores: & ex toto, & ex parte: dicimus etiam plures pluribus, & pauciores paucioribus. Neque vero multo plures quam pauciores; at pauciores tot, & quæcunque alia his similia. /

---

### C A P U T III.

*Alimentum ossium, narium, maxillarum & hujusmodi: alimenti conversio.*

**O**ssium alimentum ex fractura: naso bis quinque; maxillæ vero, & claviculæ, & costis duplicia: cubito triplicia; tibiæ, & brachio quadruplicia: femori quintuplicia; & si quid in his plus, aut minus potest. Sanguis fluidus, & sanguis solidus; sanguis fluidus, nobilius: sanguis solidus, ignobilius. Ad aliquid omnia mala &

bona (referuntur.) Via sursum, deorsum, una. Facultas alimenti melior, quam moles. Moles alimenti melior, quam facultas, & in humidis & in siccis. Detrahit, & apponit idem: huic quidem detrahit: illi vero apponit idem. Venarum pulsationes & respiratio, pro ætate, consentiunt & dissentiunt: & morbi & sanitatis sunt indicia: magisque sanitatis quam morbi: & morbi magis, quam sanitatis: spiritus enim etiam alimentum est. Humidum alimentum facilius transmutatur, quam siccum: alimentum siccum facilius, quam humidum transmutatur. Quod difficile alteratur, difficile consumitur: quod facile apponitur, facile consumitur. Et quicumque celeri appositione indigent, iis humidum medicamentum ad resumendas vires optimum. Quicumque vero adhuc celeriore, per olfactum. Quibuscunque vero tardiore appositione opus est, solido cibo. Musculi solidiores difficilior reliquis colliquescent, excepto ossē & nervo. Quæ exercitata sunt ægre immutantur, ipsaque in suo genere seipsis, quam pro natura, valentiora sunt: ideo ipsa se ipsis ægrius colliquescent. Pus ex carne, purulentum ex sanguine, & ex reliquo humore. Pus ulceris alimentum; pus venæ & arteriæ alimentum; medulla ossis alimentum; ideo callo firmatur. Facultas omnia auget, & alit, & propagat. Humiditas alimenti vehiculum est.



---



---

HIPPOCRATIS COI

DE

## MORBIS POPULARIBUS

## LIBER I.

---

PRÆFATIO

*EX præcipuis & germanissimis operibus, HIPPOCRATIS nemine refragante, dignum opus sapiente viro, etsi solas Morborum historias fere absque medicina continet. Vis enim est in accurata descriptione morbi, in crisum adnotatione.*

*Continet tempestates trium annorum, quales in Taso fuerunt, indeque ortos epidemicos morborum Status, duorum annorum, in quorum altero febres recurrentes dominatæ sunt, ardentes in altero. Ad has febres pertinent plerique inter quatuordecim agrotos, quorum hic morbi recensentur, funesti plerique, ut tamen femina gravida ipsa, cum suo fetu, salva evaserit.*

## SECTIO PRIMA.

*Constitutio Temporis Prima.*

**I**N Thaso autumni tempore circa æquinoctium, & sub plejadas, aquæ multæ, assiduæ, molles velut in austrinis, hyems austrina, parvi venti

aquilonares, squalores, & omnino hyems quale ver fieri solet. Ver autem austrinum, frigidum, pluviae parvae. Aestas plerumque nubila, aquarum inopia. Etesiae parum, modice, sparsim spirarunt. Quum autem totus hic aeris status ad austrina vergeret, ac cum siccitatibus fieret, ante ver quidem ex priore statu, subcontrario, & aquilonio fiente, paucis obortae sunt febres ardentes, atque his omnino boni status, & paucis sanguis erupit, neque ex his moriebantur. Tubercula vero circa aurem alteram multis erant, plurimis ex utrisque, citra febrem erecte obambulantibus. Quibusdam vero etiam parum incalescebant. Extincta sunt omnibus absque nocumento. Neque cuiquam suppurarunt, quemadmodum ea, quae ex aliis causis sunt oborta. Erat autem natura ipsorum haec: laxa erant, magna, diffusa, non cum inflammatione, doloris exortia, omnibus obscure evanuerunt. Fiebant autem haec adolescentibus, juvenibus, in vigore constitutis, & ex his plurimis, qui circa palaestram, & gymnasia exercebantur. Mulieribus vero paucis fiebant. Plurimis vero tusses siccae, qui tussiebant, & nihil rejectabant, & voces non longe postea raucosae. Quibusdam vero etiam interposito tempore inflammationes cum dolore in altero testiculo, quibusdam in utroque. Et aliis quidem febres, aliis non. Haec autem plurimis laboriose fiebant. De caetero vero, quantum ad ea, quae in officina medica ad chirurgiam pertinentia sunt, sine morbo degebant. At vero ante aestatis initium, & per aetatem, ac hyemem multi ex his, qui longo jam tempore subcorrupti erant, tabidi decubuerunt. Nam & multis, qui ambigui erant, tunc tabes confirmata est. Quibusdam vero primum cepit. Et his natura ad



tabem vergebat. Moriebantur autem multi, & plurimi ex his. Et de his, qui decubuerunt, haud scio, an quis etiam modico tempore supervixerit. Moriebantur autem citius, quam tales morbi transigere solent. Nam alios & longiores, & cum febribus conjunctos facile ferebant, & non moriebantur. De quibus paulo post scribetur. Solus enim, & maximus ex his, qui tum vigeant, tabidus morbus multos occidit. Erant autem plurimis ipsorum affectiones hujusmodi: febres horridæ, continuæ, acutæ, in totum non intermittentes. Modus autem erat semitertianus, una die leviores, altera amplius exacerbescentes, & in summa acutiores increbescentes. Sudores vero semper, non per totum, frigiditas extremitatum multa, & quæ vix recalesceret. Alvi turbatæ, biliosæ, ex paucis, puris, tenuibus, mordacibus, frequenter ad exonerandos se surgebant. Urinæ tenues, & crudæ, & decolores, & paucæ; aut crassitudinem habentes, & subsidentiam parvam, non probe desidentes, sed cum cruda quædam, ac intempestiva subsidentia. Tussiebant autem, pauca, condensata, concocta paulatim vix educantes. Quibus vero violentissima accidissent, his neque modice concoctio aderat, sed cruda spueri perseverabant. Fauces autem plurimis horum ab initio, & perpetuo dolebant, ruborem habentes cum inflammatione, fluxiones parvæ, tenues, acres. Brevi colliquecebant, & affligebantur; omnes cibos perpetuo fastidientes, sitis exortes, & plerique circa mortem deliri. Et circa tabidos quidem hæc. Cæterum æstate jam, & autumnis febres multæ, continuæ, non violentæ, diu quidem ægrotantibus, non autem alias ita male habentibus oboriebantur. Plurimis alvi turbatæ, ita ut valde toleranter ferrent, & nihil

nihil memorabile lædebant. Urinæ item plurimis boni quidem coloris, & puræ. Verum tenues, & post tempus circa judicationem concoctæ. Tussiebant autem non valde, neque ea, quæ per tussim rejectantur, difficultatem exhibebant. Neque cibum fastidiebant, sed etiam valde licebat ipsi offerre. In summa subægrotabant tabidi, non tabido modo, febribus horridis parum insudantes, alias alii, ut qui erroneo modo exacerbarentur, febribus quidem in totum non intermittentibus, sed quæ juxta naturæ febris tertianæ morem exacerbarentur. Judicabantur autem, quibus inter hos brevissimæ essent circa vigesimum diem, plurimis circa quadragesimum. Multis circa octuagesimum. Quibusdam neque sic, sed vago modo, & circa judicationem deficiebant, horum autem plurimis febres rursus non multum tempus intermittentes reversæ sunt. Ex recidivis autem in iisdem circuitibus judicabantur. Multis vero ipsorum producebantur, ut sub hyemem ægrotarent. Ex omnibus porro in hac temporis constitutione descriptis, solis tabidis lethalia acciderunt. In aliis autem febribus non.

## S E C T I O II.

### *Constitutio Temporis Secunda.*

**I**N Thaso ante autumnum tempestates non tempestive, sed derepente in aquiloniis, & austrinis multis, humidæ, & præerumpentes. Hujusmodi vero durabant usque ad plejada, & sub plejade. Hyems autem aquilonia. Aquæ multæ, largæ, magnæ. Nives. Plerumque mixta aeris serenitas, & hæc quidem fiebant omnia, frigora



vero non admodum intempestiva. Jam vero post brumale solstitium, & quando favonius spirare incipit, posterior hyems magna erat, aquilonia multa. Nives, & aquæ assidue multæ, & cœlum procellosum, ac nubilosum. Hæc autem durabant, & non remittebant usque ad æquinoctium. Ver autem frigidum, aquilonium, aquosum, nubilum. Æstas non valde æstuosa fiebat. Ethesiæ assidue spirarunt. Mox circa arcturum in aquiloniis, aquæ valde multæ. Quum autem annus totus humidus, & frigidus, & aquilonius esset, per hyemem sano modo plerumque habebant. Ante ver autem multi quidem, & plurimi morbidi degebant. Primum igitur cœperunt lipituidines fluidæ, dolorosæ, humidæ, crudæ. Lemæ parvæ, & multis difficulter erumpentes, plurimis revertebantur, defecerunt sero ad autumnum. Æstate jam, & autumnno lienteria, & dysenteria, & tenesmi, & alvi profluvia ex biliosis, tenuibus multis, crudis, & mordacibus; quibusdam vero etiam aquosis. Multis autem & urinæ fluxiones cum dolore biliosæ, aquosæ, ramentosæ, purulentæ, cum stillicidio, non renales, sed his alia pro aliis. Vomitus pituitosi, biliosi, & ciborum crudorum rejectiones. Sudores. Omnibus undiquaque multa humiditas. Fiebant autem hæc multis erecte obambulantibus, non febrientibus. Multis item febrientibus, de quibus paulo post scribetur. In quibus autem omnia hæc præscripta apparebant cum dolore, tabidi fiebant. Jam vero autumnno, & sub hyemem febres continuæ, & quibusdam ipsorum paucis ardentes, diurnæ, nocturnæ, semitertianæ, tertianæ, exactæ, quartanæ, erroneæ. Singulæ vero prædictæ febres multis fiebant. At ardentes & paucissimis obortæ sunt, & ex ægrotis hi mi-

nimum laboraverunt. Neque enim sanguis erupit, nisi valde parum, & paucis. Neque delirabant, aliaque omnia tolerabilia erant. Judicabantur autem plurimis valde bono ordine, cum intermittentibus in septem, ac decem diebus. Neque mortuum aliquem tunc in febre ardente novi, neque phrenitim tunc cuique factam scio. At vero tertianæ plures quidem quam ardentes febres erant, ac graviores verum ordinate in his omnibus a prima accessione quatuor circuitus habebant, in septem autem perfecte judicabantur, neque ulli horum reversæ sunt. Quartanæ vero multæ quidem ab initio ex ordine quartanæ cœperunt. Quibusdam autem non paucis, ex aliis febribus, ac morbis abscessus ad quartanas fiebant, atque hos diu, quemadmodum solent, & adhuc diutius tenebant. Diurnæ vero quotidianæ, & nocturnæ, & erroneæ multæ multis, & multo tempore permanebant, & recte obambulantibus, & decumbentibus. Plurimos horum sub plejadas, & usque ad hyemem febres consequebantur. Multos convulsiones, magis autem pueros ab initio, & febriebant, & in febribus convulsiones fiebant, & erant hæc plerisque diuturna, verum innocua, nisi ad hæc etiam ex aliis omnibus pernicies adisset. At continuæ quidem in totum, & nihil intermittentes, exacerbantes autem omnibus ad naturæ tertianæ modum, una die sublevantes, & una exacerbantes, omnium, quæ tunc fiebant, violentissimæ erant, & longissimæ, ac cum maximis doloribus leniter auspicantes, & in totum semper auge-scentes, & in judicatoriis diebus exacerbantes, & in pejus procedentes, parum allevantes, & statim rursus ex intermissione violentius exacerbantes, in judicatoriis plerumque diebus pe-



jores fientes. Rigores vero omnibus quidem inordinate, & erroneo modo fiebant, paucissime autem, & minime his. Verum in aliis febribus majores. Sudores multi, his minimi, nihil allevantes, sed subcontrario modo damna inferentes. Frigiditas extremitatum his multa, & vix recalescens. Neque somni in totum, maxime vero hi etiam rursus soporosi. Ventres autem omnibus turbati, & mali, his autem longe pessimi. Urinæ vero plurimis horum aut tenues, & crudæ, & decolores, & post tempus parum concoctæ judicatorio modo. Aut crassitudinem quidem habentes, verum turbatæ, neque consistentes, neque subsidentes, neque concoctæ. Aut paucae, & crudæ, ac male, & subsidentes. Pessimæ autem hæc omnes. Et tussis quidem ad febres comitabantur. Verum non habeo, quod scribam, an detrimentum, aut utilitas tunc ex tussi contigerit. Diuturna igitur, & molesta, & valde inordinate, ac erroneo more, & citra judicationem, plurima horum perseverabant tum his, qui perniciose habebant, tum his, qui non. Si enim aliquos ipsorum paululum relinquerent, statim rursus revertebantur. Quibusdam vero paucis ipsorum judicabantur, quibus brevissime adessent, circa octuagesimam diem, & horum aliquibus reversa sunt, ut plurimi ipsorum per hyemem adhuc ægrotarint, plurimis autem citra judicationem defecerunt. Hæc vero pariter acciderunt & his, qui superstites manserunt, & qui non. Quum autem multa, & varia fieret judicationis impeditio ex morbis, maximum etiam, ac pessimum signum perpetuo comitabatur, quod plerique omnes cibos fastidirent, & ex his maxime hi, quibus etiam alia exitialia erant. Siticulosi vero non adeo intempestive in his febribus

erant. Quum vero tempus produceretur, & dolores essent multi, ac colliquatio mala, his abscessus succedebant, aut majores, quam ut ferre possent, aut minores, quam ut quicquam prodesse, sed statim recurrerent, & ad pejus courgerent. Erant autem, quæ his fiebant, hæc: dysenterix, tenesmi, lienterix, & alvi profluvia. Quibusdam etiam hydropes, partim cum his, & partim absque his. Quidquid autem ex his violenter accedebat, statim vires dejiciebat, aut rursus nihil proderat. Papulæ parvæ, & non pro dignitate rationis excretionis morborum, & statim rursus evanescentes. Aut juxta aures tumores, qui non solvebantur, & nullam de se significationem præbebant. Quibusdam in articulos, maxime vero in coxendicem, paucis judicatorio modo cessantes, & statim rursus ad habitum ab initio invalescentes. Moriebantur autem ex omnibus, & plurimi ex his pueri jam ablactati, & majores natu, octennes, ac decennes, & nondum puberes. Fiebant autem hæc his, non sine prius scriptis. Priora vero multis, sine his. Solum vero bonum, & maximum inter ea, quæ fiebant, signum, & quod plurimos in maximis periculis constitutos liberavit, quibus ad urinæ stillicidium convertebantur, & ad hoc abscessus fiebant. Accidit autem plerisque urinæ stillicidium, maxime his ætatibus. Fiebat & aliis multis, tum erecte obambulantibus, tum in morbis. Statim vero etiam magna quædam mutatio omnium his fiebat. Alvi enim, etiamsi humectæ essent, maligno modo mox sistebantur, cibosque omnes libenter sumebant. Et febres postea mites erant. Verum urinæ stillicidium his diuturnum, & laboriosum erat. Urinæ vero his erant multæ, crassæ, variæ, rubræ, purulentæ cum



dolore. Atqui hi omnes superstites manserunt, & nullum ex his mortuum novi. Quæcumque vero non periculosa sunt, concoctiones excrementorum omnes undiquaque tempestivas, aut bonas, & judicatorios abscessus considerare oportet. Concoctiones celeritatem judicationis, & securitatem sanitatis significant. Cruda vero, & inconcocta, & in malos abscessus conversa, aut judicationis sublationem, aut dolores, aut diurnitatem, aut mortem, aut eorundem recidivas. Quod vero ex his potissimum futurum sit, ex aliis considerandum est. Præterita dicito, præsentia cognoscito, futura prædicito. Hæc tractato. Exercito circa morbos duo, ut juves, aut non noceas. Ars ex tribus constat, morbo, ægroto, & medico artis ministro. Ægrotum cum medico adversari morbo oportet. Capitis, & colli dolores, ac gravitates cum dolore, cum febribus, & sine febribus, phreniticis quidem convulsiones. Sed & virofa vomunt, & quidam ex his subito moriuntur. In ardentibus autem, & aliis febribus, quibus colli dolor, & temporum gravitas. & caligo vertiginosa circa oculos, aut etiam præcordiorum distentio non cum dolore fit, his sanguis per nares erumpit. Quibus autem gravitates quidem totius capitis, oris autem ventriculi morsus adsunt, & nauseabundi sunt, hi biliosa, & pituitosa vomunt. Plerumque vero pueris in talibus afflictionibus convulsiones fiunt. Mulieribus autem tum eadem, tum ab uteris dolores. Senioribus autem, & quibus jam calor superatur, paraplegiæ vocatæ, leves siderationes, aut infantiæ, aut oculorum privationes.

*Constitutio Temporis Tertia.*

**I**N Thaso paulo ante arcturo, & sub arcturo, aquæ, multæ, magnæ, in aquiloniis. Circa æquinoctium autem, & usque ad plejadas, austrinæ pluvie paucæ, hyemis aquilonia, siccitates, frigidi venti, magnæ nives. Circa æquinoctium hyemes maximæ. Ver aquilonium, siccitates, pluvie paucæ frigidæ. Circa solstitium æstivum aquæ paucæ, magna frigora usque ad canem. Post canem usque ad arcturum æstas calida, æstus magni, non ex accessione augescentes, sed continui, ac violenti. Aqua non delapsa est. Etelise spirarunt. Circa arcturum pluvie austrinæ usque ad æquinoctium. In hac autem constitutione per hyemem quidem inceperunt resolutiones ex sideratione, & multos invaserunt, & quidem ex ipsis subito moriebantur. Nam hic morbus satis popularis erat. Cætera incolumes degebant. Ante ver autem ceperunt febres ardentes, & usque ad æquinoctium, & ad æstatem durabant. Quicumque igitur vere, & æstate ineunte statim ægrotare ceperunt, plurimi servabantur, pauci vero quidam moriebantur. In autumno jam & quum pluvie fierent, lethales erant, & plures peribant. Erant autem febrium ardentium affectiones. Quibus quidem bene, ac large sanguis per nares erupit, per hoc maxime servabantur, & nullum novi, qui in hac constitutione mortuus esset, si recte ipsi sanguis profluxisset. In Philisco enim, & Epaminone, ac Sileno quarta, ac quinta die parum de naribus stillavit, & moriebantur. Plerique igitur ægroti circa judicationem rigeabant, maxime hi, quibus sanguis non erupisset. Iidem vero etiam postea insuper riguerunt, & exfuda-



runt. Quibusdam morbus regius accidit sexta die. Verum his purgatio per vesicam, aut alvus exturbata profuit, aut larga sanguinis eruptio. Velut Heraclides, qui decumbebat apud Aristocydem, nam huic & ex naribus sanguis erupit, & alvus turbata est, & per vesicam purgatus est. Vigesima die judicatus est, non velut Phanagoræ servus, cui nihil tale factum est; & mortuus est. Sanguis autem plurimis erupit, maxime adolescentibus, & in vigore constitutis, & talium plerique perierunt, quibus sanguis non erupit. Senioribus vero ad morbum regium res devenit, aut alvi ipsis turbatae sunt, aut dysenterici facti sunt. Velut Bioni apud Silenum decumbenti contigit. Populariter grassabantur etiam dysenteriae per aetatem, & quibusdam, qui aegrotarunt, quibusque etiam sanguis erupit, ad dysenteriam transitus factus est, velut Eratonis filio, & Mylo, qui multa sanguinis eruptione facta, in dysentericum statum delapsi, superstites manserunt. Multis igitur maxime hic tumor redundavit. Nam & quibusdam circa judicationem sanguis non erupit, sed tubercula juxta aures excitata evanuerunt. Quae ubi evanuissent, juxta sinistri lateris mollitudinem, & ad summam coxam gravitas fuit. Quum autem dolores post judicationem fierent, & urinae tenues prodissent, parum sanguinis profundere ceperunt. Verum circa quartam, & vigesimam abscessus ad sanguinis eruptionem fiebant Antiphonti Critobuli filio, quae sedata est, & perfecte judicatus est circa quadagesimam. Mulieres porro multae quidem aegrotarunt, pauciores autem, quam viri, & pauciores etiam morfuæ sunt. Plurimae vero graviter ex partu laborarunt, & post partus insuper aegrotarunt, & haec maxime perierunt. Velut Telebuli

filia, quæ sexta a partu die mortua est. Plurimis itaque in febribus menses apparebant. Quibusdam vero ex naribus sanguis erupit, & virginibus multis id primum factum est. Quibusdam & ex naribus sanguis, & menses proruperunt. Velut Dætharsei filix virgini apparuerunt tunc primum, & sanguis largus e naribus fluxit. Neque ullam mortuam novi ex his, quibus aliquid horum probe factum esset. Quibus autem prægnantibus contigit ægrotare, omnes fetus perdiderunt, quas ego novi. Urinæ vero plurimis boni quidem coloris, verum tenues, & subsidentias modicas habentes excrementis tenuibus, ac biliosis. Multis autem aliis judicatis, ad dysenterias res devenit, velut Xenophani, & Critiæ. Urinæ aquosæ, multæ, puræ, tenues post judicationem, & subsidentia bona facta, & aliis probe judicatis. Mentionem faciam eorum, quibus factæ sunt, Bioni, qui apud Silenum decumbebat. Cratiæ, quæ apud Xenophanem. Aretonis filix, uxori Mnesistrati. Postea vero omnes hy dysenterici facti sunt. Quod urinas minxerunt aquosas, considerandum est. Circa arcturum autem multis undecima die judicatio facta est, & bis recidivæ non pro ratione fientes reversæ sunt. Erant autem soporosi circa tempus hoc, plures autem pueri, & hi omnium minime moriebantur. At vero circa æquinoctium, & usque ad plejadas, & sub hyemem comitabantur quidem febres ardentes; sed & phrenitici plurimi tunc fiebant, & plerique horum moriebantur, fiebant autem & per æstatem pauci. Quum igitur febres ardentes inciperent, significationem de se præbebant, quibus perniciēs immineret. Statim enim ab initio febris acuta, parum insuper rigeant, vigiles erant, siticulosi, anxii, parum exu-



dantes circa frontem, & claviculas, nullus per totum, multum delirabant, tumores, tristitiæ, extremitates subfrigidæ, pedes summi, & maxime manuum summæ partes. Exacerbationes in diebus paribus. Plurimis autem quarta die dolores maximi, & sudores plerumque subfrigidi, & extremitates non amplius recalescentes, sed lividæ, subfrigidæ, & neque sitiebant. Ad hæc urinæ his nigrae, paucæ, tenues, & alvi sistebantur, neque sanguis e naribus erupit ulli ex his, quibus hæc accidissent, sed parum stillavit. Neque ad recidivam ulli horum res devenit. Sed sexta die mortui sunt cum sudore. Phreniticis autem non omnia præscripta acciderunt. Judicabantur autem his plerumque die undecima, quibusdam vigesima. Quibus non statim ab initio phrenitis cepit circa tertiam, aut quartam diem, sed moderate habebant primo tempore, his circa septimam morbus ad acumen transit. Magna itaque erat morborum multitudo. Ex ægris autem maxime moriebantur adolescentes, juvenes, in vigore ætatis constituti, leves, subalbicante cute, rectos itemque nigros capillos habentes, & oculos nigros, & qui in quiete, & otio vixerant, & alta voce, aut gracili, aut aspera præditi, balbi, iracundi, & mulieres plurimæ ex hac specie moriebantur. At in hac constitutione ex quatuor signis maxime servabantur. Quibus videlicet sanguis e naribus probe erupisset. Aut urinæ multæ, & multam subsidentiam habentes per vesicam prodiissent. Aut per ventrem turbata, biliosa tempestive processissent. Aut qui dysenterici facti essent. Acciditque multis, ut non ex uno præscriptorum signorum judicarentur, sed per omnia percurrerent, & gravius quidem habere videbantur, conservabantur autem

omnes, quibus hæc accidissent. Mulieribus autem, & virginibus accidebant item præscripta signa omnia. Quibus autem, vel horum quippiam bene accideret, aut menses large apparent, per hæc servabantur, ac judicabantur, neque ullam interiisse novi, cui ex his aliquid accidisset. Philonis enim filix sanguis ex naribus large fluebat. Septima autem die intempestivius cœnavit, & mortua est. Quibus in febribus acutis, magis ardentibus, lachrymæ invitæ defluunt, his sanguinis a naribus eruptionem expectare oportet, si etiam alia perniciose non habeant. Nam his, qui male habent, non sanguinis eruptionem, sed mortem significat. Tubercula juxta aures in febrientibus cum dolore oborta, quibusdam febre judicatorio modo deficiente, neque sedantur, neque suppurantur; hæc biliosum alvi profluvium, aut dysenteria, aut crassarum urinarum subsidentia solvit. Velut Hermippo Clazomenio. Judicationes autem, ex quibus cognoscimus, aut similes sunt, aut dissimiles. Velut duo fratres, qui simul eadem hora ægrotare cœperunt. Decumbebant autem juxta theatrum Epigenis fratres. Horum seniori sexta die judicatio facta est, juniori vero septima. Recidiva facta est utrisque simul eadem hora. Intermisit dies quinque. Ex recidiva judicatio facta est utrisque simul in totum, die decima septima. Plurimis autem sexta die judicatio facta est, intermisit sex. Ex recidivis autem judicatio facta est quinta die. Quibusdam vero septima judicatus est morbus, & septem diebus intermisit. Ex recidiva vero judicatus est tertia. Quibusdam autem judicatus est quinta, intermisit septem, rediit per tres, intermisit unam, insuperque unam rursus occupavit. Aliquibus vero judicatus est



sexta, intermisit sex, rediit per tres, intermisit unam, & una judicatus est. Velut Evagonti Daipharsis filio. Quibusdam autem judicatus est sexta, intermisit septem, ex recidiva vero judicatus est quarta. Velut filia Aglaidæ. Plerique igitur ex his, qui ægrotarunt in hac constitutione, hoc modo ægrotarunt, & nullum novi ex his, qui superstites manserunt, cui non rediissent recidivæ secundum rationem fientes, & servati sunt omnes, quos ego novi, quibus hoc genus recidivæ factæ sunt. Neque ægrotantium hoc modo ullum aliquem novi, quem recidiva iterum repetiisset. Moriebantur autem in morbis his plurimi sexta die, velut Epaminondas, & Silenus, & Philiscus Antagoræ filius. Quibus autem tubercula juxta aures facta essent, his judicatio facta est vigesima die. Restincta autem, ac sedata sunt omnibus, & non suppurata sunt, sed ad vesicam conversa. Cratistonacti, qui apud Heracleum habitabat, & Scymni fullonis ancillæ suppuraverunt, & mortui sunt. Quibus autem judicatus est septima die, intermisit novem, reversus est morbus. Judicatus est ex recidiva quarta die. Quibus autem judicatus est septima die, intermisit sex, deinde rediit, & judicatus est septima, velut Phanocrito, qui decumbebat apud Gnathorem pictorem. Sub hyemem circa solstitium hybernum, & usque ad æquinoctium perseverabant quidem & febres ardentes, & phrenitides, & multi moriebantur. Judicationes tamen transmutatæ sunt, & judicatio facta est plurimis ab initio die quinta, intermisit quarta, recidiva facta est, ex recidiva vero judicatio facta est quinta die. In summa quatuordecim diebus. Sic autem facta est judicatio pueris plurimis, immo etiam senioribus. Quibusdam vero morbus judi-

cabatur die undecima, revertebatur decimaquarta, judicabatur perfecte vigesima. Si vero aliqui insuper riguissent circa vigesimam, his judicabatur quadragesima. Superriguerunt autem plurimi circa judicationem ab initio. Qui vero circa judicationem ab initio riguerunt, etiam in recidivis una cum judicatione riguerunt. Riguerunt autem paucissimi vere, æstate plures, autumnno adhuc plures, hyeme longe plurimi. At sanguinis eruptiones cessabant.

### SECTIONO III.

**M**Orbos dignoscimus, edocti ex communi omnium natura, & ex uniuscujusque propria, ex morbo, ex ægroto, ex his, quæ offeruntur, ex eo, qui offert. Ex his enim & breviores, & graviores redduntur, ex tota, ac partiali constitutione cælestium, & uniuscujusque regionis, ex victu, ex vitæ studiis, ex ætate cujusque, sermonibus, moribus, taciturnitate, cogitationibus, somnis, vigiliis, insomniis quibusdam, & quando, vellicationibus, pruritibus, lachrymis, exacerbationibus, secessibus, urinis, sputis, vomitibus, & quæ, ex quibus, in quos, successiones morborum, & qui abscessus ad perniciem, & ad judicationem. Sudor, rigor, frigiditas, tussis, sternutationes, singultus, spiritus, ructus, flatus silentes, strepentes, sanguinis eruptiones, hæmorrhoides, ex his autem, & quæ per hæc fiunt, considerandum. Febres quædam continuæ sunt, quædam interdium tenent, noctu intermittunt. Aut nocte tenent, die intermittunt. Semitertianæ, tertianæ, quartanæ, quintanæ, septi-



manæ, nonanæ. Sunt autem acutissimi, & maximi, ac gravissimi morbi, & maxime lethales, in continua febre. Securissima vero omnium, & facillima, ac longissima est quartana. Non enim solum ipsa a se ipsa talis est, sed etiam ab aliis magnis morbis liberat. At in semitertiana appellata contingit quidem & acutos morbos fieri, & est hæc præ cæteris maxime lethalis. Sed & tabidi, & quicumque ex aliis longis morbis ægrotant, ex hac maxime ægrotant. Nocturna non admodum lethalis est, verum longa. Diurna longior. Quibusdam autem & ad tabem vergit. Septimana longa est, verum non lethalis. Nonana adhuc longior, & non lethalis. Tertiana exacta cito judicatur, & non est lethalis. Quintana pessima omnium est. Nam & ante tabem, & jam tabidis superveniens, occidit. Sunt autem modi, & constitutiones, & exacerbationes singularum harum febrium æque continuarum, ac intermittentium. Velut verbi causa, continua quibusdam ab initio floret, & viget maxime, & ad deterius procedit. Circa judicationem vero, & una cum judicatione imminuitur. Quibusdam vero molliter incipit & submisce, augefcit autem & exacerbatur quotidie. Circa judicationem vero, & una cum judicatione acervatim elucet. Quibusdam leniter auspicata augefcit, & exacerbatur, & ubi aliquamdiu in vigore fuit, rursus remittit usque ad judicationem, & circa judicationem. Atque hæc contingere solent in omni febre, & in omni morbo. Oportet autem victus rationem ex horum consideratione offerre. Multa vero etiam alia signa his sunt cognata, de quibus partim scriptum est, partim scribetur. Ad quæ ratiocinari oportet, examinareque, ac considerare, cui horum acutus, ac lethalis sit morbus, aut a quo

superstes sit futurus, & cui offerendum sit, aut non, & quando, & quantum, & quid offerendum crit. Quæ vero paribus diebus exacerbantur, paribus judicantur. Quorum autem exacerbationes in imparibus fiunt, ea in imparibus judicantur. Est autem primus judicatorius, ex circuitibus diebus paribus judicantibus, quartus dies. Deinde sextus, decimus, decimusquartus, decimusoctavus, vigesimus, vigesimus quartus, vigesimus octavus, trigesimus, trigesimus quartus, quadragessimus, sexagesimus, octogessimus, & centesimus vigesimus. Ex circuitibus vero in imparibus diebus judicantibus, primus est dies tertius, deinde quintus, septimus, nonus, undecimus, decimus septimus, vigesimus primus, vigesimus septimus, & trigesimus primus. At vero nosse expedit, si aliter judicatio fiat, extra præscriptos dies recidivas fore significat, & fuerit sane perniciofa. Oportet autem animadvertere nosse, in his temporibus judicationes futuras esse ad salutem, aut perniciem, aut inclinationes ad melius, aut deterius. Erroneæ porro febres & quartanæ, & quintanæ, & septimanæ, & nonanæ in quibus circuitibus judicentur, considerandum est.

*Ægroti Quatuordecim. Primus.*

Philiscus prope muros habitabat, decubuit. Primo die febris acuta, sudavit, noctem laboriosam habuit. Secundo die omnia exacerbata sunt. Vesperī ab infuso per clysterem adhibito, bene habuit, noctem quietam. Tertio mane, & usque ad meridiem visus est a febre liber esse. Ad vespēram febris acuta cum sudore, siticulosus erat, lingua resiccabatur, nigra minxit, noctem mo-



lestam habuit, non dormivit, omnino deliravit. Quarto omnia exacerbata sunt, urinæ nigræ, nox tolerabilior, urinæ melioris coloris. Quinto circa meridiem parum de naribus stillavit non mixtum. Urinæ variæ, quæ habebant innatantia quædam rotunda, genituræ similia, dispersa non subsidebant. Subdita glande, flatuosa pauca prodierunt, noctem habuit laboriosam, somni parvi, sermones, deliramenta, extremitates undique frigidæ, & non amplius recalescentes, minxit nigra, dormivit parum, ad diem voce destitutus est, frigidum sudavit, extremitates lividæ. Circa meridiem sexta die mortuus est. Huic spiritus ad finem usque velut revocanti, rarus, & magnus. Splen elevatus est orbiculari gibbositate. Sudores frigidi perpetuo. Exacerbationes diebus paribus.

*Ægrotus II.*

Silenus habitabat in Platamone, prope filios Evalcidis. Hunc ex lassitudinibus, & potationibus, ac exercitiis intempestivis febris corripuit. Cepit autem ægrotare ex lumbis, & caput gravitas tenebat, & colli distentio erat. Ab alvo prima die biliosa, mera, spumosa, abunde colorata, multa prodierunt. Urinæ nigræ nigram subsidentiam habentes, siticulosus, lingua resicata, nocte nihil dormivit. Secunda die febris acuta, secessus plures, tenuiores, spumosi. Urinæ nigræ, nox molesta, parum deliravit. Tertia omnia exacerbata sunt, præcordii distentio utrinque oblonga ad umbilicum submollis. Secessus tenues, subnigri. Urinæ turbatæ, subnigræ. Nocte nihil dormivit, sermones multi, risus, cantus, continere se non potuit. Quarta per eadem

dem. Quinta secessus meri, biliosi, leves, pingues. Urinæ tenues, pellucidæ, parum resipiscebant. Sexta circa caput parum sudavit, extremitates frigidæ, lividæ. Jactatio multa, ab alvo nihil prodiit. Urinæ suppressæ sunt, febris acuta. Septima die voce destitutus est, extremitates non amplius recalescebant, nihil minxit. Octava sudavit frigidum per totum sudorem, papulæ cum sudore rubræ, rotundæ, parvæ, velut vari permanebant, non abscedebant. Ab alvo vero cum parva irritatione, stercora tenuia velut inconcocta, multa prodibant cum dolore. Urinam reddebat cum dolore mordacem. Extremitates parum recalescebant. Somni tenues, soporosi. Vox intercepta. Urinæ tenues, pellucidæ. Nona per eadem. Decima potum non suscipiebat. Soporosus erat, somni autem tenues. Ab alvo similia. Minxit acervatim subcrallum, depositum subsidens, subsidentia crassæ farinæ similis, alba. Extremitates rursus frigidæ. Undecima mortuus est. Ab initio huic, & ad finem usque spiritus magnus, rarus, præcordii palpitatione assidua. Ætas erat circa annos viginti.

*Ægrotus I I I.*

Herophonti febris acuta. Ab alvo pauca ab initio velut in tenesmo. Postea vero tenuia prodibant, biliosa, frequentiora. Somni non aderant. Urinæ nigre, tenues. Quinta mane furditas. Exacerbata sunt omnia. Splen elevatus est. Præcordii dilatatio. Ab alvo pauca, nigra prodierunt, deliravit. Sexta delirabat, ad noctem sudor, frigiditas, delirus permanebat. Septima perfrigerabatur. Siticulosus. delirabat, noctu resipiscebant, obdormivit. Octava febricitavit, splen



minuebatur, intelligebat omnia; doluit juxta inguen, tumor primum e directo splenis. Deinde dolebat utraque tibias; nox tolerabilis. Urinæ coloris melioris parvam subsidentiam habebant. Nona sudavit, judicatus est morbus, intermisit. Quinta reversus est. Statim autem splen elevatus est, febris acuta, surditas rursus. Post recidivam tertia die splen minuebatur, surditas minor erat, crura dolebant, noctu sudavit. Judicatus est die septima decima. Neque deliravit in recidiva.

*Ægrotus I V.*

In Thaso Philini uxorem, quæ filiam pepere-  
rat, quum purgatio secundum naturam facta  
esset, & alias leviter degeret, decima quarta a par-  
tu die febris vehemens corripuit cum rigore. Ab  
initio vero cor dolebat, & circa præcordium dex-  
terum, muliebrium partium dolores, purgatio  
cessavit. Ubi vero glandem subdidisset, hæc qui-  
dem leviora facta sunt. Capitis autem, colli, &  
lumborum dolores permanebant, somni non ade-  
rant. Extremitates frigida. Siticulosa erat, al-  
vus combusta, pauca egerebat. Urinæ tenues ab  
initio, decolores. Sexta die ad noctem multum  
deliravit, & rursus resipiscebat. Septima siticu-  
losa, secessus biliosi, abunde colorati. Octava  
superriguit, febris acuta, convulsiones multæ  
cum dolore, multum delirabat. Glande subdita  
exfurgebat, multa que cum fluxione biliosa prodi-  
bant. Somni non aderant. Nona convulsiones.  
Decima parum resipiscebat. Undecima dormivit,  
omnium recordata est. Statim autem rursus deli-  
ravit. Urinam autem reddebat cum convulsioni-  
bus, acervatam, multam, illis autem parum ad-

monentibus, crassam, albam, qualis est ex his, quæ subsiderunt, ubi multo tempore sita fuerint conturbata, non subsidebat, color, & crassitudo talis, qualis est in urinis jumentorum. Talia mingebat, quæ & ego vidi. Circa decimum quartum diem palpitationes per totum corpus, sermones multi, parum resipiscebat. Verum itatim rursus delirabat. Circa decimum septimum voce voce destituebatur. Vigesima mortua est.

*Ægrotus V.*

Epicratis uxorem, quæ decumbebat apud Archegetem, partui jam propinquam, rigor fortiter corripuit, non incaluit, velut dicebant. Et postridie eadem erant. Tertia die peperit filiam, & alia omnia juxta rationem venerunt. Postridie a partu febris acuta eam invasit, cordis dolor, & muliebrium partium. Ubi vero glandem subdidisset, hæc quidem leviora facta sunt. Capitis autem, & colli, ac lumborum dolor. Somni non aderant. Ab alvo modica biliosa, tenuia, pura prodibant. Urinæ tenues, subnigræ. Sexta die, a qua febris ipsam corripuit, ad noctem deliravit. Septima omnia exacerbata sunt, vigilans deliravit, siticulosa, fecellus omnes biliosi abunde colorati. Octava superriguit, plus dormivit. Nona per eadem. Decima crura laboriose dolebat. Cordis dolor rursus, capitis gravitas, non deliravit, magis dormivit, alvus restitit. Undecima sudavit, minxit melius colorata, multam subsidentiam habentia, levius degebat. Decima quarta superriguit, febris acuta. Decima quinta vomuit biliosa, flava, fatis multa. Sudavit sine febre. Ad noctem febris acuta. Urinæ crassæ subsidentiam albam habentes. Decima sexta ad noc-



tem exacerbata est, & cum molestia non dormivit, deliravit. Decima octava siticulosa, lingua combusta est, non dormivit, multum deliravit, crura dolebat. Circa vigesimam mane parum riguit, soporosa, quiete dormivit, vomuit biliosa, pauca, nigra. Ad noctem surditas. Circa vigesimam primam lateris sinistri gravitas, per totum cum dolore, parum insuper tussit. Urinæ crassæ, turbatæ, subrubræ, quæ depositæ non subsidebant, cætera leviora, non sine febre. Statim ab initio fauces dolebat, rubor aderat, columella revulsa, fluxio acris, mordax, falsa, perpetuo perseverabat. Circa vigesimam septimam febris libera, in urinis subsidencia, latus dolebat. Circa primam & trigessimam febris corripiebat, alvus ex biliosis turbata est. Quadragesima die vomuit pauca, biliosa. Judicata est perfecte libera a febris die octogesima.

*Ægrotus V I.*

Cleanactiden, qui supra Heracleum decumbebat, febris corripuit erroneo modo. Dolebat autem caput ab initio, & latus sinistrum, & aliarum partium dolores aderant lassatorum modo; febres exacerbabantur alias aliter inordinate. Sudores quandoque, quandoque non. Exacerbationes ut plurimum in judicatoriis diebus magis accedebant. Circa vigesimam quartam summas manus dolebat. Vomuit biliosa, flava, satis multa. Paulo post autem æruginosa. Ab omnibus allevatus est. Circa trigessimam sanguis ex utrisque naribus erumpere cœpit, atque hoc erroneo modo paulatim usque ad judicationem. Non autem fastidiebat cibum, neque siticulosus erat per totum tempus, neque insomnis. Urinæ tenues,

non decolores. Circa quadragessimam minxit subrubra, subsidentiam multam valde rubram habentia, allevatus est, post hæc autem urinæ varie quandoque subsidentiam habebant, quandoque non. Sexagesima urinis subsidentia multa, & alba, & levis. Remiserunt omnia, febres intermittebant. Urinæ tenues quidem, verum boni coloris. Septuagesima a febre liber permansit diebus decem. Octogesima riguit, febris acuta corripuit, multum sudavit. Urinis subsidentia rubra, levis, perfecte judicatus est.

*Ægrotus V I I.*

Metonem febris vehemens corripuit, lumborum gravitas dolorosa. Postridie ubi aquam bibisset fatis multam, ab alvo probe prodiit. Tertia capitis gravitas. Seccessus tenues, biliosi, subrubri. Quarta omnia exacerbata sunt. Fluebat a dextra nare bis sanguis modicus. Noctem moleste tulit. Seccessus similes tertiæ diei. Urinæ subnigræ, habebant quiddam in medio innatans, subnigrum, divulsum, non subsidebant. Quinta effluxit ex sinistra nare sanguis largus, merus. Sudavit, judicatus est. Post judicationem insomnis delirabat. Urinæ tenues, subnigræ. Capitis lotionibus usus est, dormivit, resipiscebat. Huic recidiva facta non est. Sed sanguis erupit sæpe etiam post judicationem.

*Ægrotus V I I I.*

Erafinum, qui habitabat circa Bootæ torrentem, febris vehemens corripuit post cœnam, nocte turbatus fuit, diem primam quiete, noctem laboriose transegit. Secunda omnia exacer-



bata sunt, ad noctem deliravit. Tertia dolorose, multum deliravit. Quarta molestissime, ad noctem nihil dormivit. Insomnia, & ratiocinationes, deinde pejora, & magna, & periculosa, timor, molestia. Quinta mane resipiscebat, ac intelligebat omnia. Verum ad meridiem, multum insaniit, continere se non potuit. Extremitates frigidæ sublividæ. Urinæ inconcoctæ. Circa solis occasum mortuus est. Huic febres perpetuo cum sudore, præcordia sublimia, distentio cum dolore. Urinæ nigræ habentes quædam in medio suspensa innatantia, rotunda, non subsidebant. Ab alvo stercora prodibant. Sitis perpetuo non valde. Convulsiones multæ cum sudore circa mortem.

*Ægrotus IX.*

Critoni in Thaso erecte obambulanti, pedis dolor fortis a magno digito cœpit. Decubuit eadem die, horridus, anxius, parum subcalescens, nocte desipuit. Secunda die tumor laxus per totum pedem, & circa malleolum subrubens cum distentione. Pustulæ nigræ, febris acuta, insaniit. Ab alvo vero mera, biliosa, fatis multa prodibant. Mortuus est altera ab initio die.

*Ægrotus X.*

Clazomenium, qui ad Phrynichidæ puteum decumbebat, febris vehemens corripuit. Dolebat autem caput, collum, lumbos ab initio. Statim autem surditas. Somni non aderant. Febris acuta invasit. Præcordium elevabatur cum tumore. Distentio non valde, lingua sicca. Quarta ad noctem desipuit. Quinta laboriose omnia exacer-

bata sunt. Circa undecimam parum remiserunt. Ab alvo vero ab initio, & usque ad decimam quartam tenuia multa aquei coloris prodibant. Toleranter ea, quæ ad secessum pertinent, ferebat. Postea alvus restitit. Urinæ perpetuo tenues quidem, verum boni coloris, & multa in medio suspensa habebant divulsa, non subsidebant. Circa decimam sextam minxit paulo crassiora, habebant subsidentiam parvam, paululum allevantur, resipiscebat magis. Decima septima rursus tenuia. Circa utrasque aures tubercula extiterunt cum dolore. Somni non aderant, delirabat. Circa crura dolebat. Vigesima a febre liber judicatus est, non sudavit, omnia intelligebat. Circa vigesimam septimam coxæ dextræ dolor fortis, cito quievit. Tubercula vero juxta aures neque sedata sunt, neque suppurata, verum dolebant. Circa trigesimam primam profluvium alvi ex multis aquosis, cum ejusmodi, quæ in dysenteria prodire solent. Urinas crassas mingebat. Tubercula circa aures sedata sunt. Circa quadragessimum oculum dextrum dolebat, obscurius videbat. Restitutus est.

*Ægrotus X I.*

Dromeadæ uxorem, quæ filiam pepererat, & aliis omnibus secundum rationem factis, secunda die rigor corripuit, febris acuta. Cepit autem prima die dolere circa præcordia fastidiosa, ac nauseabunda, horrida, anxia, & sequentibus non dormivit. Spiritus rarus, magnus, statim revulsus. Altera a rigore die, stercora ab alvo bene prodibant. Urinæ crassæ, albæ, turbatæ, qualis fit ex his, quæ subsiderunt, ubi multo tempore sita, fuerit conturbata, non subside-



bant, nocte non dormivit. Tertia circa meridiem superriguit. Febris acuta. Urinæ similes, præcordii dolor, fastidiosa, ac nauseabunda, nox molesta, non dormivit. Sudavit per totum subfrigida. Statim autem rursus recalefacta est. Quarta die sub præcordia parum allevata est. Capitis gravitas cum dolore, in soporem incidit, parum de naribus stillavit, lingua sicca, siticulosa. Urinæ tenues, oleosæ, parum dormivit. Quinta siticulosa, fastidiosa. Urinæ similes, nihil ab alvo. Circa meridiem multum deliravit, & statim rursus parum resipiscebat: exurgens in soporem incidit, frigiditas parva, nocte dormivit, deliravit. Sexta mane superriguit. Statim autem recalefacta est. Sudavit per noctem. Extremitates frigidaë, deliravit. Spiritus magnus, rarus. Paulo post convulsiones a capite ceperunt. Statim mortua est.

### *Ægrotus XII.*

Homo quidam calefactus cœnavit, & bibit amplius. Vomuit omnia noctu, febris acuta. Præcordii dextri dolor. Inflammatio submollis ex interna parte, noctem moleste tulit. Urinæ ab initio rubræ, crassæ, depositæ non subsidebant. Lingua sicca, non valde siticulosus. Quarta febris acuta. Dolores omnium. Quinta minxit leve, oleosum, multum, febris acuta. Sexta vesperti multum deliravit. Nec nocte dormivit. Septima omnia exacerbata sunt. Urinæ similes, sermones multi, continere se non potuit. Ab alvo cum irritatione prodierunt liquida turbata, cum lumbricis. Nox laboriosa. Mane riguit, febris acuta. Sudavit calidum. A febre liber esse visus est, non multum dormivit. A somno frigiditas, sputatio. Vesperti multum deliravit. Paulo post

vomuit nigra, pauca, biliosa. Nona frigiditas, multum delirabat, non dormivit. Decima crura dolebat. Omnia exacerbata sunt, deliravit. Undecima mortuus est.

*Ægrotus X I I I.*

Mulierem, quæ decumbebat in littore, trimestri foetu gravidam febris vehemens corripuit, statimque lumbos dolere cœpit. Tertia dolor colli, capitis juxta claviculam, & manum dextram. Statim lingua voce destituta est, dextra manus resoluta est cum convulsione, velut his, qui aliqua siderantur parte, contingere solet. Delirabat penitus, noctem moleste tulit, non dormivit, alvus turbata est, ex biliosis, meris, paucis. Quarta die lingua voce soluta est. Convulsiones eorundem, dolores omnium permanebant. Juxta præcordia tumor cum dolore, non dormiebat, penitus delirabat, alvus turbata. Urinæ tenues, non boni coloris. Quinta febris acuta, præcordii dolor, plane delirabat, secessus biliosi, ad noctem sudavit, a febre libera. Sexta resipiscebat. Ab omnibus allevata est. Verum circa sinistram claviculam dolor permanebat, siticulosa. Urinæ tenues, non dormivit. Septima tremor, in soporem incidit, parum deliravit, dolores juxta claviculam, & sinistrum brachium permanferunt. Reliqua allevata sunt. Omnia intelligebat. Tres dies a febre libera mansit. Undecima reversa est, superriguit, febris vehemens corripuit. Circa decimam quartam vomuit biliosa, flava, fatis multa, sudavit. A febre libera judicata est.



*Ægrotus X I V.*

Melidiæ, quæ decumbebat juxta Junonis templum, capitis, & colli, & pectoris dolor fortis cepit. Statim autem febris acuta corripuit. Menses pauci apparebant. Dolores omnium horum continui. Sexta die soporosa, anxia, horrida, rubor in maxilla, parum deliravit. Septima sudavit, febris dimisit. Dolores permanebant. Rediit, somni pauci. Urinæ perpetuo boni coloris, verum tenues. Secessus tenues, biliosi, mordaces, valde pauci, nigri, graveolentes prodibant. In urinis subsidentia alba, levis. Sudavit. Judicata est perfecte undecima die.

---



---

# HIPPOCRATIS COI

*D E*

## MORBIS POPULARIBUS

### LIBER III.

---

#### P R Æ F A T I O.

*E*Jusdem cum primo pretii est, modique, & continuus utique cum posteriori Statu, ad quem duodecim priores ægroti manifesto pertinent. Alter hujus libri status pestilentialis est: non quod vera pestis carbonaria aut bubonacea hic describatur, sed quod omnium morborum eo tempore grassantium summa fuerit malignitas, etiam tussis ang-

*ne, febris. Neque inter sedecim hujus status agrotos ullus est, qui veræ pestis symptomata passus sit, etsi gangraenæ febribus frequenter supervenisse videtur, ut etiam integri artus delaberentur.*

## SECTIO PRIMA.

### *Ægrotus I.*

**P**YTHION, qui habitabat juxta telluris templum. Cepit tremor a manibus prima die, febris acuta, delirium. Secunda omnia exacerbata sunt. Tertia eadem. Quarta ab alvo pauca, mera, biliosa prodierunt. Quinta omnia exacerbata sunt, tremores perseverabant, somni tænuēs, alvus resistit. Sexta sputa varia, subrubra. Septima os distractum est. Octava omnia exacerbata sunt. Tremores perseverabant. Urinæ ab initio quidem, & usque ad octavam tænuēs, decolores, in medio pendens nubilosum quiddam habebant. Decima sudavit. Sputa aliquantulum matura, judicatus est, & urinæ subtenuēs circa judicationem. Post judicationem vero, quadraginta diebus postea suppuratio circa sedem, & abscessus factus est cum urinæ stillicidio. P. M. V. Q. S. hoc est, probabile multitudine urinæ quadragesima sanatum.

### *Ægrotus I I.*

Hermocratem, qui ad novum murum decumbebat, febris vehemens corripuit. Cepit autem dolere caput, lumbos. Præcordii distentio molli-ter. Lingua ab initio adusta est. Surditas statim, somni non aderant. Siticulosus non valde. Uri-



næ crassæ rubræ, depositæ non subsidebant. Ab alvo vero non pauca combusta prodibant. Quinta minxit urinas tenues, habebant quid in medio pendens, non subsidebant, Ad noctem mente motus est. Sexta morbo regio correptus est, omnia exacerbata sunt, non resipiscebat. Septima molesta fuit. Urinæ tenues similes, similiter etiam sequentibus diebus. Circa undecimam omnia visa sunt allevata esse. Sopor cepit. Urinæ crassæ, subrubræ, infra tenues, non subsidebant. Placide resipiscebat. Decima quarta a febre liber, non sudavit, dormivit, intelligebat omnia. Urinæ consimiles. Circa decimam septimam rediit, calefactus est, sequentibus diebus febris acuta. Urinæ tenues. Rursus autem vigesima die judicatus est, a febre liber, non sudavit. Cibum fastidiebat per totum tempus, resipiscebat, loqui non poterat, lingua arida, non sitiebat, dormiebat soporofus. Circa vigesimam quartam calefactus est, alvus lubrica multis tenuibus fluens, & sequentibus diebus febris acuta, lingua combusta est. Septima & vigesima mortuus est. Huic surditas perpetuo perseverabat. Urinæ crassæ, & rubræ non subsidentes. Aut tenues decolores, & in medio quid pendens habentes, gustare autem non poterat. P. S. S. V. S. M. hoc est, probabile secessibus suppressis vigesima septima mortuum.

*Ægrotus I I I.*

Qui in Dealcis horto decumbebat, capitis gravitatem, & tempus dextrum dolorosum habebat multo tempore. Cum occasione vero febris corripuit, decubuit. Secunda die ex sinistra nare modicus merus sanguis fluxit. Ab alvo stercora

probe prodierunt. Urinæ tenues, variæ, in medio pendens quiddam habentes minutim dispersum, velut farinæ crassioris, & genituræ similes. Tertia febris acuta. Secessus nigri, tenues, spumosi, subsidentia secessibus livida, somno graviore aliquantulum premebatur, moleste surgebat. Urinis subsidentia livida, subviscosa. Quarta vomuit biliosa, flava, pauca, paulo post æruginosa. De sinistra nare modicus merus sanguis fluxit. Secessus similes. Urinæ similes, sudavit circa caput, & claviculam, splen elevatus est, femoris dolor e directo. Præcordii dextri distentio submollis, nocte non dormivit, parum mente motus est. Quinta secessus plures, nigri, spumosi, subsidentia secessibus nigra, nocte non dormivit, mente motus est. Sexta die secessus nigri, pingues, viscosi, graveolentes, dormivit, intelligebat magis. Septima lingua sicca, siticulofus, non dormivit, mente motus est. Urinæ tenues, non boni coloris. Octava secessus nigri, pauci, compacti, dormivit, intelligebat, siticulofus non valde. Nona riguit, febris acuta, sudavit, frigiditas, mente motus est, dextro oculo distortus est, lingua arida, siticulofus, infomnis. Decima circa eadem. Undecima intelligebat per totum omnia, a febre liber, sudavit, urinæ tenues circa judicationem. Duobus diebus a febre liber fuit, decima quarta rediit. Statim autem nocte non dormivit, penitus mente motus est. Decima quinta urina turbata, qualis ex his, quæ subsiderunt, fit, quum fuerint agitata, febris acuta, penitus mente motus est, non dormivit, genua, & tibias dolorosa habebat, ab alvo, subdita glande, stercora nigra prodierunt. Decima sexta urinæ tenues, habebant quid in medio vehens, nubilosum, mente motus est. Decima sep-



tima mane extremitates frigidaë, contegebatur, febris acuta, sudavit per totum, allevatus est, intelligebat magis, non a febre liber, siticulosus. Vomuit biliosa, flava, pauca. Ab alvo stercora prodierunt paulo post nigra, pauca, tenuia. Urinæ tenues, non boni coloris. Decima octava non resipiscebat, soporosus. Decima nona per eadem. Vigesima dormivit; omnia intelligebat, sudavit, a febre liber, non sitiebat. Vigesima prima parum mente motus est, paululum sitiebat, præcordii dolor, & circa umbilicum palpitatio perpetua. Vigesima quarta urinæ subsidentia, intelligebat omnia. Vigesima septima coxæ dextræ dolor. Utinæ tenues, & subsidentiam habebant, in reliquis commodissime habebat. Circa vigesimam nonam oculi dextri dolor. Urinæ tenues. Quadragesima egeffit pituitosa, alba, aliquanto plura, multum sudavit per totum, perfecte iudicatus est.

## S E C T I O   I I .

### *Ægrotus I V.*

**I**N Thaso Philistes caput multo tempore dolebat, & quandoque etiam aliquanto graviore somno pressus decubuit. Quum autem ex potationibus febres continuæ obortæ essent, dolor exacerbatus est. Nocte excalesfactus est primum. Prima die vomuit biliosa, pauca, flava primum, postea vero plus æruginosa. Ab alvo autem stercora prodibant, noctem habuit molestam. Secunda die surditas, febris acuta, præcordium dextrum distentum est, declinavit ad internas partes. Urinæ tenues, pellucidæ, habebant quidam in medio pendens genituræ simile. Parum

insanivit circa meridiem. Tertiam diem moleſtam habuit. Quarta convulſiones, exacerbata ſunt omnia. Quinta mane mortuus eſt.

*Ægrotus V.*

Chæriõnem, qui decumbebat apud Demænetum, ex potu febris corripuit. Statim autem capitis gravitas doloroſa, non dormivit, alvus turbata ex tenuibus bilioſis. Tertia die febris acuta, capitis tremor, maxime autem labii inferni, paulo poſt rigor, convulſiones, penitus mente motus eſt. Noctem moleſte tulit. Quarta per quietem, parum dormivit, parum deliravit. Quinta laborioſe omnia exacerbata ſunt, delirium, noctem moleſte tulit, non dormivit. Sexta per eadem. Septima ſuperriguit, febris acuta, ſudavit per totum, judicatus eſt. Huic perpetuo ab alvo ſeceſſus bilioſi, pauci, meri. Urinæ tenues boni coloris, in medio nubiloſum quiddam pendens habentes. Circa octavam minxit urinas melioris coloris, habentes ſubſidentiam albam, paucam, reſipiſcebat, febris intermiſit. Nona rediit. Circa decimam quartam febris acuta, ſudavit. Decima ſexta vomuit bilioſa, flava, ſatis multa. Decima ſeptima ſuperriguit, febris acuta, ſudavit, a febre liber, judicatus eſt. Urinæ poſt recidivam, & judicationem, melioris coloris, ſubſidentiam habentes. Neque mente motus eſt in recidiva. Decima octava parum caleſcebat, inſuper ſitiebat. Urinæ tenues, quod in medio pendeat, nubiloſum erat, parum mente motus eſt. Circa decimam nonam a febre liber, collum doloroſum habebat. Urinis ſubſidentia, perfecte judicatus eſt vigesima. P. M. B. V. V. S. hoc eſt, probabile multitudine bilioſarum urinarum vigesima ſanatum.



*Ægrotus V I.*

Euryanactis filiam virginem febris corripuit. Erat autem sine siti perpetuo, nihil ad gustandum admittebat. Ab alvo pauca prodibant. Urinæ tenues, paucæ, non boni coloris. Incipiente autem febre circa sedem dolebat. Sexta die a febre libera, non sudavit, judicata est. Quod vero circa sedem erat, parum suppuratum est, erupit una cum judicatione. Post judicationem septima die riguit, parum incaluit, sudavit. Post judicationem octava die, riguit non multum. Postea vero extremitates frigidae semper. Circa decimam post factum sudorem, mente mota est, & rursus brevi resipiscebat. Dicebant autem ex gustato botro ipsam hæc pati. Die vero una intermissa, rursus duodecima multum delirabat, alvus turbata est ex biliosis, paucis, meris, tenuibus, mordacibus, frequenter surgebat. Die septima ab ea, qua mente mota fuit, mortua est. Hæc incipiente morbo fauces dolebat, & perpetuo ruborem habebat, & gurgulio revulsus, fluxiones multæ, parvæ, tenues, acres. Tussiebat, maturum nihil educebat. Omnes cibos per totum tempus fastidiebat, neque ullum aliquem appetivit, sine siti erat, neque quicquam memorabile bibit. Tacens nihil loquebatur. Tristitia desperata rursus corripiebat. Erat autem & innata quædam tabes.

*Ægrotus V I I.*

Anginosa illa, quæ apud Britonem erat, primum a lingua cepit. Vox non clara, lingua rubra resiccata fuit. Prima die horrida, incaluit. Tertia rigor, febris acuta, tumor subru-  
ber,

ber, durus colli, & pectoris ex utraque parte, extremitates frigidae, lividae. Spiritus sublimis, potus per nares fundebatur, deglutire non poterat, alvi secessus, & urinae suppressa erant. Quarta omnia exacerbatum sunt. Mortua est anginosa. P. S. S. Q. M. hoc est, probabile secessibus suppressis quinta mortuam.

*Ægrotus V I I I.*

Adolescentem, qui decumbebat in mendacium foro, febris corripuit ex lassitudinibus, & laboribus, ac cursibus insolitis. Prima die alvus turbata ex biliosis, tenuibus, multis. Urinae tenues subnigrae, non dormivit, siticulofus. Secunda omnia exacerbatum sunt. Secellus plures, intempestiviores, non dormivit. Mens turbata, parum sudavit. Tertia moleste habuit, siticulofus, anxius, multa jactatio, desperatio, mente motus est. Extremitates lividae, ac frigidae, praecordii intensio submollis utrinque. Quarta non dormivit. Malum in pejus procedebat. Septima mortuus est. Ætate circa vigesimum annum erat. P. N. S. M. hoc est, probabile novationibus septima mortuum.

*Ægrotus I X.*

Quae apud Tisamenium decumbebat, mulier, ei volvulosa moleste procedebant. Vomitus multi, potum continere non poterat. Dolores circa praecordia. Et in infernis partibus juxta ventrem dolores, tormina continua, non siticulosa, incalcescebat. Extremitates frigidae perpetuo, anxia, insomnis. Urinae paucae, tenues, secessus crudi, tenues, pauci, prodesse non amplius, quicquam poterat. Mortua est.



*Ægrotus X.*

Mulierem ex his, quæ apud Pantimedem degebant, ex abortu infantis prima die febris corripuit. Lingua arida, siticulosa, anxia, infomnis. Alvus turbata ex tenuibus, multis, crudis. Secunda die superriguit, febris acuta, ab alvo prodire multa, non dormivit. Tertia die dolores majores. Quarta mente mota est. Septima mortua est. Alvus semper lubrica, ex secessibus multis, tenuibus, crudis. Urinæ paucæ, tenues, febris ardens.

*Ægrotus XI.*

Alteram ex abortu circa quintum mensem febris corripuit. Ab initio soporosa erat, & rursus infomnis, lumborum dolor, capitis gravitas. Secunda alvus turbata est paucis, tenuibus, meracis primum. Tertia plura, deteriora, nocte non dormivit. Quarta mente mota est. Timores, tristitiæ, dexter oculus distortus est, sudavit circa caput sudorem modicum, frigidum, extremitates frigidaë. Quinta omnia exacerbata sunt, multum delirabat, & rursus brevi resipiscebat. Sitis, infomnis. Ab alvo multa, intempestiva, perpetuo prodibant. Urinæ paucæ, tenues, subnigræ. Extremitates frigidaë, sublividaë. Sexta per eadem. Septima mortua est phrenitide.

*Ægrotus XII.*

Mulierem, quæ decumbebat in mendacium foro, primum tunc enixam dolorose masculum, febris corripuit. Statim ab initio siticulosa, anxia, cor dolebat, lingua arida, venter turbatus.

est tenuibus, paucis, non dormivit. Secunda die parum riguit, febris acuta, parum circa caput sudavit frigidum. Tertia laboriose ab alvo cruda, tenuia, multa prodierunt. Quarta riguit. Omnia exacerbata sunt. Insomnis. Quintam laboriose tulit. Sexta per eadem. Ab alvo prodierunt liquida, multa. Septima riguit, febris acuta, sitis multa, jactatio. Circa vespeream frigidum sudorem per totum sudavit, frigiditas, extremitates frigidae non amplius recalescebant, & rursus ad noctem riguit. Extremæ partes non recalescebant, non dormivit, parum mente mota est, & rursus brevi resipuit. Octava circa meridiem recalescens est. Siticulosa, soporosa, fastidiosa, ac nauseabunda. Vomuit biliosa, pauca, subflava. Noctem moleste tulit, non dormivit. Urinam minxit multam, acervatam, infusa. Nona remiserunt omnia, soporosa. Ad vespeream parum riguit. Vomuit pauca, biliosa. Decima rigor, febris exacerbata est, nihil dormivit. Mane multam urinam subsidentiam habentem minxit, extremitates recalescens sunt. Undecima vomuit virosa, biliosa. Non ita longe postea supperriguit, & rursus extremitates frigidae. Ad vespeream sudor, rigor. Vomuit multum, noctem laboriose traxit. Duodecima vomuit multa, nigra, graveolentia, singultus multus, sitis laboriosa. Decima tertia nigra, graveolentia, multa vomuit, rigor. Circa meridiem voce destituta. Decima quarta sanguis per nares. Mortua est. Huic perpetuo alvus lubrica, horrida. Ætas circa annum decimum septimum.



## S E C T I O   I I I .

*Constitutio Temporis Pestilens.*

**A**Nnus austrinus, pluvius. Venti perpetuo quiescentes. Quum squallores fuissent superioribus temporibus ad annum, in austrinis circa arcturum aquæ multæ. Autumnus umbrosus, nubilus, aquarum copia. Hyems austrina, humida, mollis. Post solstitium longe postea, prope æquinoctium seræ hyemes. Et jam circa æquinoctium aquilonares venti nivosi non multo tempore. Ver rursus austrinum, sine ventis. Aquæ multæ perpetuo usque ad canem. Æstas serena, calida, æstus magni. Etesiae parum dispersum spirarunt. Rursus circa arcturum in aquilonaribus aquæ multæ. Quum autem esset annus austrinus, humidus, & mollis, per hyemem quidem sani degebant, exceptis tabidis, de quibus scribetur. Ante ver autem simul cum fientibus frigoribus, sacri ignes multi, quibusdam cum occasione, quibusdam non, atque hi maligni multos peremerunt. Multi fauces doluerunt. Voces vitiatæ, febres ardentes, phrenitici, ora ulcere fervido affecta, in pudendis tubercula. Lippitudines. Carbunculi. Alvi turbatæ. Ciborum fastidia. Aliqui siticulosi, aliqui non. Urinæ turbatæ, multæ, malæ. Diu soporosi, & rursus infomnes. Multæ judicationes penitus interceptæ. Quædam ægre fientes. Hydropes, tabidi multi. Atque hi quidem erant populares morbi. In singulis autem relatis speciebus ægroti, & moriebantur multi. Acciderunt autem singulis horum hoc modo. Multis equidem ignis sacer cum occasione, ex vulgaribus, & valde parvis vulnusculis, in toto corpore, maxime sexagena-

riis, circa caput, si vel parum neglecta essent. Multis vero etiam in ipsa curatione inflammationes magnæ fiebant, & facer ignis multus, brevi, undique depascebatur. Plurimis igitur ipsorum abscessus ad suppurationes contigerunt, carniū, & nervorum, ac ossium elapsus magni. Erat autem & fluxio collecta non puri similis. Sed alia quædam putredo, & fluxio multa, ac varia. Quibus igitur circa caput horum quid fieri contigit, his glabrics totius capitis, ac menti fiebat, & ossium denudationes, ac elapsus, & multæ fluxiones, & hæc in febribus, & sine febribus. Erant autem hæc horrenda magis, quam mala. Quibus enim ad suppurationem talium maturatio pervenit, horum plerique servabantur. Quibus vero inflammatio quidem, & ignis facer discessit, talem autem nullum abscessum fecit, horum multi perierunt. Similiter autem & si alicubi in alia corporis parte horum quid oberraret, hæc acciderunt. Multis enim brachium, & totus cubitus defluxit. Quibusdam vero hæc affligebant latera, aut anteriorem, aut posteriorem aliquam partem. Quibusdam autem totum femur, vel tibiæ denudabantur, & totus pes. Erat autem ex talibus omnium gravissimum, ubi circa pubem, & pudenda accidisset, & circa ulcera quidem, & cum occasione, hujuscemodi erant. Multis autem in febribus, & ante febrem, & ex febribus ignes sacri inciderunt, & qui quidem horum abscessum fecissent per suppurationem, aut per alvum turbatio quædam tempestiva, aut urinarum bonarum excretio contigisset, per hæc solvebantur. Quibus autem nihil horum accidisset, verum obscure disparuisset, hi lethales erant. Plerumque igitur plurimis accidit facer ignis vere, consequebantur autem & per æstatem, & sub



autumnū. Multa vero turbatio quibusdam, & circa fauces tubercula, & linguæ inflammationes, & abscessus circa dentes. Vocesque multis significationem de se præbebant, quod essent viatæ, ac impeditæ, & involutæ, primum quidem, tabidis incipientibus, immo etiam ardenti febre correptis, & phreniticis. Ceperunt igitur febres ardentes ante ver; itemque phrenitis, post facta frigora; & plurimi tunc ægrotarunt. Acuta vero, & lethalia symptomata his aderant. Erat autem constitutio febrium ardentium hoc modo. Ab initio soporosi, anxii, horridi, febris acuta, non valde siticulosi, non deliri. De naribus parum stillavit. Exacerbationes plerisque diebus paribus. Circa exacerbationes oblivio, exolutio, & vocis privatio. Extremitates manuum, ac pedum semper his frigidiores, præsertim circa exacerbationes, & rursus tarde, ac non bene recalescebant, rursusque & intelligebant, & loquebantur. Detinebat etiam ipsos sopor continuus, non somniculosus. Aut vigiliæ cum doloribus, plurimis horum alvi turbulentæ, secessibus crudis, tenuibus, multis. Urinæ multæ, tenues, nihil neque judicatorii, neque boni habentes. Nec vero aliud aliquod judicatorium ita habentibus, fiebat. Neque enim sanguis bene erumpebat, neque alius aliquis abscessus judicatorius fiebat. Moriebaturque unusquisque, prout contingit erroneo modo, plerumque circa judicationes. Quidam vero diu voce privati. Multi sudantes, & his quidem, qui perniciose habebant, hæc accidebant. Consimilia vero etiam phreniticis. Sine siti autem hi erant. Neque quisquam phreniticus insanivit, velut ex aliis, sed alia quadam mala, ac lenta in somnum delatione graviter peribant. Erant insuper etiam aliæ febres, de qui-

bus scribetur. Ora multis ulcere fervido affecta, ulcerosa. Fluxiones circa pudenda multæ, ulcerationes. Tubercula foris, intus, circa inguina. Lippitudines humidæ, longæ, diuturnæ, cum doloribus. Eruptiones palpebrarum foris, intus, multorum oculos corrumpentes, quas ficus vocant. Erumpebant etiam in aliis ulceribus multa, & in pudendis. Carbunculi per æstatem multi, & aliæ, quæ seps vocantur, pustulæ magnæ. Herpetes multis magni. At vero circa alvum multis multa, & nociva acciderunt. Primum quidem tenebrini multis dolorose, plurimis autem pueris, & omnibus, qui erant ante pubertatem, & plurimi horum peribant. Lienterici multi, dysenterici, neque hi valde dolorose. Secæssus autem biliosi, & pingues, & tenues, & aquosi. Et multis quidem ipse morbus ad hoc decubuit, & sine febribus, & in febribus, cum doloribus, tormina, & volvuli maligni, multorum, quæ in corpore erant, & suppressa erant, exitus, & exeuntia progressa dolores non solventia, & his, quæ offerebantur, difficulter cedentia. Nam purgationes plurimos amplius lædebant. Ex his autem, qui sic habebant, multi quidem cito peribant. Multi vero longius vitam degebant, & in summa omnes, & qui longis morbis ægrotabant, & qui ex acutis, maxime ex his, quæ per alvum secedebant, mortui sunt. Omnes enim alvus sustulit. Cibum autem fastidiebant omnes ob cunctos præscriptos morbos, in quos sane ego incidi. Multi vero, & maxime hi ipsi, & qui tales erant, sed & alii, perniciose habebant, & siticulosi alii erant, alii non. Ex his, qui febribus, aliisque laborabant, nullus siticulosus intempestive. Sed licebat circa potum victus rationem constituere, prout velles. Urinæ autem pro-



deuntes multæ quidem erant, non pro potus ingesti ratione, sed multum excedentes. Verum multa quædam malitia urinarum ejectarum erat. Neque enim crassitudinem, neque concoctiones, neque purgationes bonas habebant. Nam in multis morbis purgationes per vesicam fientes, bonæ sunt. Significabant autem plurimis colliquationem, & turbationem, & dolores, & nullam judicationem. Soporosi vero maxime phrenetici, & febre ardente laborantes erant. Sed & in aliis morbis omnibus maximis, qui cum febre fiebant. In totum autem plurimos aut gravis sopor comitabatur, aut parvos, ac tenues somnos habebant. Multa præterea alia febrium genera populariter grassata sunt, tertianarum, nocturnarum, continuarum, longarum, erronearum, anxiarum, inconstantium. Omnes autem hæc cum multa turbatione fiebant. Nam alvi plurimis turbatæ, horrores, sudores non judicatorii, & urinæ velut præscriptum est. Atquæ hæc plerisque horum longa erant. Neque enim abscessus his fientes judicabant, velut in aliis. Et omnia quidem omnibus difficulter judicabantur, & nullæ judicationes fiebant, & diuturnæ, maxime vero his; paucis autem horum judicatio circa octogesimum diem fiebat. Plurimis, prout contigit, defecerunt. Moriebantur autem horum pauci ex hydrope erecte obambulantes. Multos vero etiam in aliis morbis tumores infestabant, maxime vero tabidos. Maxima autem, & gravissima erat tabes, & plures occidit. Nam multi per hyemem incipientes, partim decumbebant, partim erecte obambulabant. Ante ver autem plerique ex decumbentibus moriebantur. Aliorum vero tussis nihil defecerunt. Verum æstate remisierunt. At sub autumnum omnes decubuerunt, & multi

mortui sunt, plurimi vero horum diu ægrotaverunt. Cepit igitur plurimis horum derepente ex his afflictio, frequentes horrores erant, sæpe febres continuæ, acutæ, sudores intempestivi, multi, frigidi perpetuo. Multa frigiditas, & vix rursus recalescebant. Alvi varie adstrictæ, & rursus brevi humescentes. Et quæ circa pulmonem erant omnia, infra distribuebantur. Multitudo urinarum non bonarum, colliquationes malæ. Tusses autem aderant quidem perpetuo multæ, & multa educentes matura, ac liquida, non autem valde cum doloribus. Sed etsi aliquantulum dolerent, valde tamen leniter omnibus purgatio a pulmone fiebat, fauces non valde mordaces, neque falsugines quicquam infestabant. Viscosa tamen, & alba, & liquida, ac spumosa multa de capite descendebant. Magnum autem malum, & hos, & alios comitabatur ciborum fastidium, velut præscriptum est. Nam neque potum cum cibo libentes sumebant, sed valde sine siti degebant. Gravitas corporis. Soporosi. Plurimis ipsorum tumor, & ad hydropem deveniebant. Horridi, deliri circa mortem. Forma tabidorum erat levis, subalbida, lentis colorem referens, subrubra, rava. Pituïta alba referti. Scapulas alarum modo eminentes habentes, & mulieres sic. Atræ bilis item forma, & sub sanguinea, febres ardentes, & phrenitides, ac dysenteria hos tentabant. Tenesmi juvenibus pituitosis, longa alvi profluvia, acresque secessus, & pingues, biliosis. Erat autem omnibus præscriptis gravissimum quidem ver, & multos occidit. Æstas autem facillima, & paucissimi perierunt. Autumno vero, & sub plejades rursus multi moriebantur quartanarii.



*Ægroti sedecim. Primus.*

In Thaso Parium quemdam, qui decumbebat supra Artemisii ædes, febris corripuit acuta, ab initio continua, ardens, siticulosa. Principio soporosus, & rursus infomnis. Alvus turbata in principio. Urinæ albæ. Sexta die minxit urinam oleosam, mente motus est. Septima exacerbata sunt omnia, nihil dormivit. Sed & urinæ similes, & mens turbata. Ab alvo vero biliosa, pinguis prodierunt. Deinde octava parum de naribus stillavit. Vomuit virosa pauca, parum dormivit. Nona per eadem. Decima omnia remiserunt. Undecima sudavit, non per totum. Circumfrigit quidem, verum brevi rursus incaluit. Duodecima febris acuta. Secessus biliosi, tenues, multi. In urinis quiddam in medio vehebatur, mente motus est. Decima septima laboriose transmissa est. Neque enim somni, neque febris augescebat. Vigesima sudavit per totum, infomnis, secessus biliosi, cibum fastidians, soporosus. Vigesima quarta recidiva facta est. Trigesima quarta a febre liber. Alvus non suppressa est. Et rursus incaluit. Quadragesima a febre liber. Alvus non suppressa est. Et rursus incaluit. Quadragesima a febre liber, alvus non multo tempore suppressa fuit. Cibum fastidians, parum rursus febricitavit, & semper erroneo modo, partim sine febre, partim non. Nam etsi reliquisset, & allevata esset, rursus revertebatur. Eduliis quoque, multis, & vitiosis utebatur. Somni mali circa recidivas, mente motus est. Urinas crassitudinem quidem habentes tunc mingebat, verum turbatas, & pravas, & alvus jam adstricta erat, & rursus soluta. Febriculæ continuæ, secessus multi, tenues. Centesima vigesima die mor-

tuus est. Huic alvus assidue a prima die lubrica erat ex biliosis, liquidis, multis aut adstricta ex fervidis, ac crudis. Urinæ vero perpetuo malæ. Sopores plerumque cum doloribus. Insomnis, cibum fastidians, febris ardens continenter.

*Ægrotus I I.*

In Thaso decumbentem apud frigidam, a partu ubi filiam peperisset, & purgatio facta non esset, febris acuta, horrida, tertia die corripuit. Multo autem tempore ante partum febriculosa erat, decumbens, cibum fastidians. Postquam autem riguisset, febres continuæ, acutæ, horridæ. Octava multum mente mota est, & sequentibus diebus, & brevi rursus resipiscebatur. Alvus turbata ex multis tenuibus, aquosis, bile permixtis. Sine siti erant. Undecima resipiscebatur, verum soporosa erat. Urinæ multæ, tenues, & nigræ, insomnis. Vigesima parum circumfrigit, & brevi rursus incaluit, parum deliravit, insomnis. Alvi secessus iidem. Urinæ aquosæ, multæ. Vigesima septima a febre libera, alvus adstricta est. Non multo tempore postea coxæ dextræ dolor fortis multo tempore. Febres rursus comitabantur, & urinæ aquosæ. Quadragesima dolores circa coxam allevati sunt. Tussis autem assiduæ, humidæ, multæ, alvus substitit. Cibum fastidians. Urinæ in iisdem, febres autem in totum quidem non deficientes, erroneo vero modo exacerbantes, partim ita, partim non ita. Sexagesima tussis quidem obscure defecerunt. Neque enim aliqua sputorum concoctio fiebat, neque alius consuetus abscessus. Maxilla vero ex dextris divulsa est, ægra soporosa, rursus delirabat, & brevi resipiscebatur. Cæterum a cibis



aversum animum habebat, & maxilla quidem ad locum suum rediit. Alvus autem biliosa, pauca egeffit, febricitavit acutius, horrida, & sequentibus diebus voce destituta est, & rursus resipiscibat, ac loquebatur. Octogesima mortua est. Urinæ huic perpetuo erant nigræ, & tenues, & aquosæ, & sopor comitabatur. Cibum averfans, tristis, infomnis. Iræ, molestiæ, mens melancholica.

*Ægrotus I I I.*

In Thaso Pythionem, qui supra Herculeum templum decumbebat, ex laboribus, & lassitudinibus, & neglecta victus ratione rigor magnus, & febris acuta corripuit. Lingua arida, siticulofus, biliosus, non dormivit. Urinæ subnigræ, quod in medio ipsarum pendebat, sublime erat. Secunda die circa meridiem frigiditas extremarum partium, & magis circa manus, & caput, loquela, & voce destitutus. Brevispirus ad multum tempus, rursus incaluit. Sitis. Nox quieta. Sudavit parum circa caput. Tertia dies quieta. Vespero vero sub solis occasu parum friguit. Turbatio nocte dolorose, nihil dormivit. Ab alvo pauca compacta stercorea prodierunt. Quarta mane quietus. Circa vesperam omnia exacerbata sunt. Frigiditas, loquela, & voce destitutus, in deterius, recalesfactus est post tempus. Urinas minxit nigras, in medio quid pendens habentes. Nocte quiete dormivit. Quinta visus est allevatus esse. Verum juxta alvum gravitas cum dolore, siticulofus. Noctem laboriose tulit. Sexta mane quietus. Vespero dolores majores, exacerbatus est. Vespero clystere adhibito, ab alvo probe egeffit. Nocte dormivit. Septima die anxius,

submoleste ferebat. Urinam minxit oleosam, noctu turbatio multa, delirabat, nihil dormiebat. Octava mane parum dormivit. Mox autem frigiditas. Vocis interceptio. Spiritus tenuis imminutus. Vesperis rursus excalesfactus est, mente motus est. Jam autem ad diem parum allevatus est. Secessus meri, pauci, biliosi. Nona soporofusus, anxius, quum excitaretur, non valde siticulofusus. Circa solis occasus moleste ferebat, delirabat, noctem malam habuit. Decima mane voce destitutus, frigiditas multa, febris acuta, sudor multus, mortuus est. Dolores huic in diebus paribus.

*Ægrotus I V.*

Phreniticus prima die decumbens vomuit æruginosa, multa, tenuia. Febris horrida, sudor multus, continuus, per totum. Capitis, & colli gravitas cum dolore. Urinæ tenues, in medio ipsarum pendentia, parva, divulsa, non sudavit. Ab alvo stercora acervatim egressit, multum mente motus est, nihil dormivit. Secunda mane voce destitutus, febris acuta, sudavit, non intermisit. Palpitationes per totum corpus. Nocte convulsiones. Tertia exacerbata sunt omnia. Quarta mortuus est.

*Ægrotus V.*

In Larissa calvus, femur dextrum doluit de repente: ex his, quæ offerebantur, nihil proderat. Prima die febris acuta, ardens, quiete tenebat, dolores autem consequebantur. Secunda femoris quidem remisierunt dolores, febris autem acuta est, submoleste ferebat, non dormie-



bat, extremitates frigidae. Urinarum non bonarum copia prodibat. Tertia femoris dolor quievit. Mentis emotio, & turbatio, & multa jactatio. Quarta circa meridiem mortuus est celerissime, & acutissime.

*Ægrotus V I.*

In Abderis Periclem morbus corripuit acutus, continuus, cum dolore. Sitis multa, anxietas, potum continere non poterat. Erat autem sublie-nosus, & capite gravatus. Primo die sanguis ex sinistra nare erupit, multa tamen febris augescēbat. Urinam minxit multam, turbatam, albam, deposita non subsidebat. Secunda omnia exacerbata sunt. Urinæ tamen crassæ quidem erant, verum magis subsidebant, & anxietas levata est, dormivit. Tertia febris emollita est. Urinarum copia, quæ concoctæ multam subsidentiam habebant. Nox quieta. Quarta circa meridiem, multum calidum sudorem per totum exclusit. A febre liber, judicatus est, non rediit, morbus acutus.

*Ægrotus V I I.*

In Abderis virginem, quæ decumbebat in facra via, febris ardens corripuit. Erat autem stitulosa, & infomnis. Menses autem primum ipsi descendebant. Sexta anxietas multa, rubor, horrida, mœsta. Septima per eadem. Urinæ tenues quidem, verum boni coloris. Venter non vexabatur. Octava surditas, febris acuta, infomnis, anxia, horrida, intelligebat. Urinæ similes. Nona per eadem, itemque sequentibus sic surditas perseverabat. Decima quarta mens turbata, febris

remisit. Decima septima sanguis per nares fluxit multus. Surditas parum remisit, & sequentibus anxietas, surditas aderat, & delira erat. Vigesima pedum dolor, surditas, delirium intermisit, sanguis paucus per nares erupit, sudavit, a febre libera. Vigesima quarta febris rediit, surditas rursus, pedum dolor permansit, mentis emotio. Vigesima septima sudavit multum, a febre libera. Surditas defecit, pedum dolor restabat. De cætero perfecte judicata est.

*Ægrotus VIII.*

In Abderis Anaxionem, qui decumbebat ad Thracias portas, febris acuta corripuit, lateris dextri dolor assiduus. Siccam tussim habebat, neque exspuebat primis diebus. Siticulosus. Insomnis. Urinæ boni coloris, multæ, tenues. Sexta delirus. Ad calefactoria nihil remisit. Septima dolorose agebat. Nam & febris augescebat, & dolores non remittebant, & tussēs vexabant, difficulterque spirabat. Octava cubitum secui, effluebat sanguis multus, velut debebat. Remiserunt quidem dolores, tussēs tamen siccæ comitabantur. Undecima remiserunt, febres, parum circa caput sudavit. Tussēs adhuc, & quæ a pulmone prodibant, liquidiora erant. Decima septima incepit pauca, matura spueri, allevatus est. Vigesima sudavit, a febre liber, post judicationem allevatus est. Erat autem siticulosus, & a pulmone prodeuntium purgationes non bonæ. Vigesima septima febris rediit. Tussit, eduxit matura multa. Urinis subsidentia multa, alba. Sine siti erat, bene spirans. Trigesima quarta sudavit per totum, a febre liber, penitus judicatus est.



*Ægrotus IX.*

In Abderis Heropythus erecte obambulans caput dolebat. Non multo autem tempore postea decubuit, habitabat prope superiorem viam, febris ipsum corripuit ardens, acuta. Vomitus ab initio, multorum bilioforum, siticulofus, multa molestia. Urinæ tenues, nigræ, id, quod in medio ipsarum pendeat, sublime erat aliquando, quandoque non, noctem dolorose transegit. Febris alias aliter exacerbescebat, plerumque inordinate. Circa decimam quartam surditas, febres augescebant. Urinæ per eadem. Vigesima multum mente motus est, itemque sequentibus. Quadragesima multus sanguis ex naribus erupit, & magis intelligebat. Surditas aderat quidem, sed minor, febres remiserunt. Sequentibus diebus sanguis erumpebat frequenter, & paulatim. Circa sexagesimam sanguinis eruptiones cessarunt. Coxæ autem dextræ dolor fortis, & febres augescebant. Non longo tempore postea dolores omnium infernarum partium. Contigitque aut febres esse majores, & surditatem multam, aut hæc quidem remittere, & leviora fieri, infernarum autem partium circa coxas dolores esse majores. Jam vero circa octogesimam omnia remiserunt. Nihil tamen defecit. Urinæ enim boni coloris, & plures subsidentias habentes prodibant, & deliria minora erant. Circa centesimam alvus multis biliosis turbata est, & tempore non modico multa talia prodibant, & rursus dysenterica cum dolore. Reliquorum vero quies erat. In summa & febres defecerunt, & surditas cessavit. In centesima vigesima perfecte judicatus est. Febris ardens.

*Ægrotus X.*

*Ægrotus X.*

In Abderis Nicodemum ex venere, & potu febris corripuit. Initio autem erat anxius, & cordis dolore vexabatur, siticulofus; lingua combusta fuit. Urinæ tenues, nigræ. Secunda febris exacerbata est, horridus, anxius, non dormivit. Vomuit biliosa, flava. Urinæ similes. Nox quies, dormivit. Tertia die remiserunt omnia, & quies erat. Circa solis occasus rursus moleste ferebat, noctem laboriose tulit. Quarta rigor, febris multa; dolores omnium. Urinæ tenues, & quid in medio ipsarum pendens. Sexta mente multum motus est. Septima quies. Octava alia remiserunt omnia. Decima, & sequentibus diebus aderant quidem dolores, verum omnes minores. Exacerbationes autem, & dolores huic ad finem usque in diebus paribus magis erant. Vigesima minxit urinam albam, quæ crassitudinem habebat, & deposita non subsidebat. Sudavit multum; visus est sibi a febre liber esse. Vespero vero rursus incaluit, & dolores iidem; horror, sitis, parum mente motus est. Vigesima quarta multam urinam albam, multam subsidentiam habentem minxit. Sudorem multum calidum per totum exsudavit, a febre liber, judicatus est.

*Ægrotus XI.*

In Thaso mulier morosa, ex mœrore cum occasione, erecte obambulans, insomnis facta est, & cibi fastidians, & erat siticulosa, & anxiosa, habitabat autem prope Pyladæ ædes in Leio. Prima die sub initium noctis timores, sermones multi, tristitia, febricula tenuis. Mane convul-



siones multæ. Quum autem intermisissent convulsiones illæ multæ, delirabat, turpia loquebatur. Dolores multi, magni, continui. Secunda per eadem, nihil dormiebat, febris acutior. Tertia convulsiones defecerunt. Sopor autem & in somnum graviolem delatio aderat, & rursus vigiliæ, exsiliit, continere se non potuit, multum deliravit, febris acuta. Ad hanc noctem multum sudorem calidum per totum corpus exclusit, a febre libera, dormivit. Penitus resipuit, judicata est. Circa tertiam autem diem urinæ nigrae, tenues, quod in medio ipsarum pendebat aliquandiu rotundum, non subsidebat. Circa judicationem menses multi prodierunt.

*Ægrotus XII.*

In Larissa virginem febris corripuit ardens, acuta, insomnis, siticulosa, lingua fuliginosa, arida. Urinæ boni quidem coloris, sed tenues. Secunda die laboriose degebat, non dormivit. Tertia ab alvo multa prodierunt aquosa, cum virore pallida, itidemque sequentibus diebus prodierunt ejusmodi tolerabiliter. Quarta urinam egressit tenuem, paucam, habebat in medio pendens illud sublime, non subsidebat, mente mota est ad noctem. Sexta per nares sanguis multus large fluxit, quumque inhorruisset, sudorem multum calidum per totum effudit, a febre libera, judicata est. In febribus autem, & jam judicatæ menses tunc primum prodierunt. Erat enim virgo. Perpetuo vero anxia erat, horrida, faciei rubor, oculorum dolor, capitis gravitas. Huic febris non rediit, sed judicata est. Dolores diebus paribus.

*Ægrotus XIII.*

Apollonius in Abderis erecte titubans obambulabat multo tempore. Erat autem magnis visceribus præditus, & circa hepar dolor multo tempore familiaris ipsum comitabatur, & sane tunc etiam morbo regio tenebatur, flatuosus, coloris subalbi. Quum autem edisset, ac bibisset intempestivius carnem bubulam, incaluit parum primum, decubuit. Lacte vero usus cocto, & crudo, multo, caprino, ac ovillo, & victu malo, oranium læsiones magnæ sequutæ sunt. Nam & febres exacerbatae sunt, & alvus nihil memorabile de ingestis egressit. Urinae tenues, & paucae prodibant. Somni non aderant, inflatio mala, sitis multa, soporosa, præcordii dextri elevatio cum dolore, extremitates undique subfrigidae, parum delirabat. Oblivio omnium, quæ loquebatur, mente movebatur. Circa decimam quartam, ex qua quum riguisset, incaluit, decubuit, & insaniit, clamor, turbatio, sermones multi, & rursus quies, & tunc sopor accessit, postea vero alvus turbata, multis, biliosis, meris, crudis. Urinae nigrae, paucae, tenues. Multa molestia. Secessus varie habebant. Aut enim nigri, & pauci, ac æruginosi erant, aut pingues, crudi, & mordaces. Per tempora vero videbatur etiam lactosa egerere. Circa vigesimam quartam lenitas erat, & reliqua quidem in iisdem perseverabant, parum autem resipiscebant, ex quo vero decubuit, nullius meminit. Rursus autem brevi desipiebat. Omnia in pejus procedebant. Circa trigesimam febris acuta. Secessus multi, tenues, delirus, extremitates frigidae, voce destitutus. Trigesima quarta mortuus est. Huic perpetuo, ex quo ego novi, alvus



turbata. Urinæ tenues, nigræ, soporofus, infomnis, extremitates frigidaë, delirus perpetuo, phreniticus.

*Ægrotus X I V.*

In Cyzico mulierem, quæ gemellas filias magna difficultate peperit, & non valde purgata est, primum invasit febris horrida, acuta. Capitis, & colli gravitas cum dolore. Infomnis ab initio, taciturna, ac tetrica, & non obsecundans. Urinæ tenues, & decolores, siticulosa, anxia, plerumque alvus erroneo modo turbata, & rursus adstricta. Sexta ad noctem multum delirabat, nihil dormivit. Circa undecimam insaniit, & rursus resipuit. Urinæ nigræ, tenues. Et rursus tempore interposito oleosæ. Et alvus multis tenuibus turbata. Decima quarta convulsiones multæ, extremæ partes frigidaë, nihil amplius intelligibat, Urinæ suppressæ sunt, decima sexta voce destituta est, decima septima mortua est. Phrenitis.

*Ægrotus X V.*

In Thaso Dealcis uxorem, quæ decumbebat in Leio, febris horrida, acuta, ex mœrore corripuit. Ab initio contegebatur, & ad finem perpetuo, semper tacita manibus palpabat, vellebat, scalpebat, pilos legebat. Lachrymæ, & rursus risus, non dormiebat, ab alvo irritationes, nihil prodibat, parum commonita bibebat. Urinæ paucæ, tenues. Febres ad manum tenues, extremarum partium frigiditas. Nona multum delirabat. Et rursus sedata est, tacita. Decima quarta spiritus rarus, magnus, per tempus. Et

rursus brevispira, decima septima ab alvo irritatio turbulenta, postea vero ipsi potus percurrerant, neque consistebant, omnino nihil sentiebat. Cutis aridæ circumtensio. Vigesima sermones multi, rursus sedata est, voce destituta, brevispira. Vigesima prima mortua. Huic perpetuo ad finem usque erat spiritus rarus, magnus. Omnino nihil sentiebat, semper contegebatur. Aut sermones multi, aut tacita perpetuo. Phrenitis.

*Ægrotus XVI.*

Adolescens in Melibœa, ex potationibus, & venere, multo tempore calefactus decubuit. Horridus autem, & anxius erat, insomnis, & non siticulosus. Ab alvo prima die stercora multa prodibant cum multa defluxione, & sequentibus multa aquosa cum virore pallida prodibant. Urinæ tenues, paucæ, decolores. Spiritus rarus, magnus, per tempus. Præcordii intentio submollis, oblonga ex utriusque. Cordis palpitatio perpetuo continua. Urinam minxit oleosam, decima sensim mente motus est, moderatusque erat, ac quietus. Cutis arida, & circumdistenta. Secessus multi, & tenues, aut biliosi, & pingues. Decima quarta omnia exacerbata sunt, mente motus est, multum deliravit. Vigesima insanit, jactatio, nihil mingeat, paucos potus continebat. Vigesima quarta mortuus est. Phrenitis.

Videtur porro mihi æstas illa, quæ tunc fuit, juxta rationem commoditatem attulisse. Nam æstivos morbos hyems succedens solvit. Et hyemales æstas succedens transmutat. Quamquam ipsa in se ipsa quæ tunc erat æstas, non stabilis erat, sed dere-



pente calida, & austrina, & sine ventis. Attamen ad aliam tempestatem transmutata profuit. Magnam vero artis partem esse arbitror, etiam de his, quæ scripta sunt recte, posse considerationem facere, ac judicare. Qui enim hoc novit, & his utitur, non videtur mihi in arte multum falli posse. Oportet autem exacte perdiscere unamquamque temporum constitutionem, & ipsum morbum. Et quid boni communis sit in constitutione, aut in morbo, & quid mali communis sit in statu, aut morbo, & qui morbus longus sit, & lethalis, & qui longus, & non perniciosus ad vitam, & qui acutus, ac lethalis, & qui acutus, & superesse sinens. Ex his enim ordinem dierum judicatoriorum considerandi, ac prædicendi facultas datur. Et harum rerum gnaros scire contingit, quibus, & quando, & quomodo victum præscribere oportet.

---

## H I P P O C R A T I S

### PROGNOSTICON.

---

#### P R Æ F A T I O.

*E*X maxime genuinis summi viri operibus. Continet enim signa morborum bona malaque, ex omnibus signorum fontibus sumpta, secundum naturalem ordinem digesta, quod etiam in HIPPOCRATE rarum est. Prima signa ex vultu sumit, ore,

labiisque & oculis: inde ex decumbendi modo: tunc ex ulceribus, jectigatione, manuum gestu, respiratione: ex sudore & præcordiis: ex tumore præcordiorum, & ventris. Inde de suppuratione agit: tunc signa in hydrope ex morbo acuto nato: de viribus ægri, unguibus, calore, frigore, corpore levi, gravi. De somno: de egestionibus per alvum. De urina. De vomitu. De sputo. De empyemate ex morbo acuto. De abscessu ad aures. De paraphrenitide. De vesicæ inflammatione. De februm exitu in universum. De capitis & aurium acutis doloribus. De faucibus exulceratis & angina. De uvulæ tumore. De februm in abscessus exitu. Præsagia vomitus & hæmorrhagiæ narium, & convulsionum.

Sub finem operis confirmat HIPPOCRATES, hæc signa necessario teneri debere, ut fida prognosis superflui posset. In omni vero regione bona esse, quæ in Græcia bona sunt, mala, quæ in ea mala, & in ipsa Scythia medicum horum gnarum posse prædicare. Etiam in iis morbis eadem prognostica valere, quos non nominaverit, qui iisdem tamen diebus judicantur. Epidemias & temporum constitutiones jubet observare. Solum fere pulsus negligit.

---

## ARGUMENTUM LIBRI.

Prænotionum utilitas, & ducta ab ægrotantium vultu, decubitu, gestu, respiratione, urinis,



*sputis, aliisque excrementis, & accidentibus prognostica.*

## SECTIO PRIMA.

### CAPUT I.

*Præfagiendi duplex utilitas; morbi omnes sanari non possunt. Affectionum naturæ, quantum corporis vires excedunt, Medico noscendæ, tum etiam si quid divini in morbis inest.*

**M**EDICUM providendi studio incumbere, optimum esse mihi videtur. Prænoscens enim, atque prædicens apud ægrotos & præsentia, & præterita, & futura, & quæcunque ægri prætermittunt, exponens, res utique ægrotantium magis intelligere credetur; adeo ut sese homines medico committere audeant. Curationem autem optime instituet, qui ex præsentibus affectibus futuros præviderit. Sanos etenim omnes ægrotos efficere nemo potest. Id enim foret præstantius, quam futura prænoscere. Quum vero homines intereant, alii quidem vi morbi, priusquam medicum arceßant, correpti, alii vero etiam vocato medico repente deficient: hi quidem unum diem viventes; illi vero paulo plus temporis, priusquam medicus adversus singulos morbos arte resistat. Debet utique medicus morborum ejusmodi naturas cognoscere, quantum corporum vires exsuperent; simulque, & si quid in morbis divinum insit, hujus providentiam ediscere. Debet autem differentias morborum assidue in vulgus grassantium cito animadvertere, nec temporis statum ignorare. Sic enim eum omnes merito admirabuntur, & medicus optimus censebitur. Namque & eos, qui servari possunt, multo etiam melius servare poterit,

longe ante singulorum curationem præmeditatus, & morituros ac salvandos prænoscéns, atque prænuncians, vacabit crimine.

---

## C A P U T II.

*Faciei & speciatim oculorum notæ in morbis acutis. Signa ab oculorum subapparitionibus in somnis, a labiis, & decubitu.*

**C**onsiderare autem oportet hoc modo in morbis acutis; primum quidem ægri faciem, si sanorum similis sit, maxime vero sui ipsius: ita enim optima erit. Summe autem contraria simili, pessima est. Erit autem talis, nasus acutus, oculi cavi, tempora collapsa, aures frigidae & contractæ, & imis partibus inversæ, & cutis circa frontem dura, intenta, & arida existens, & color totius faciei ex viridi pallidus, aut niger aut lividus, aut plumbeus. Si nullo in principio morbi talis fuerit facies, & modo possibile fuerit aliis signis conjectari: interrogare oportet, num vigilaverit homo, aut venter vehementer solutus fuerit, aut fames ipsum oppresserit. Et si quidem aliquid horum confessus fuerit, minus malum esse existimabit. Judicantur autem hæc intra diem & noctem, si ob causas hujusmodi facies talis fuerit. Si tamen nihil horum esse dixerit, neque in prædicto tempore constiterit, nosse oportet hoc signum lethale esse. Si tamen morbo vetustiore triduo exsistente, aut quatruiduo, talis fuerit facies, interrogare oportet de his, de quibus supra præcepi, & alia signa considerare, quæ in tota facie, & in corpore & in oculis sunt. Si namque lumen refu-



giant aut sine voluntate illachrymentur, aut pervertantur, aut alter altero minor fuerit, aut quæ in his alba esse debent, rubescant, atque in iisdem venulæ lividæ, vel nigræ sint, aut fordes appareant circa oculos, aut etiam assidue mobiles, tumidi, vel admodum cavi facti, aut squalentes & obscuri fuerint, (aut supercilia curva aut rigida, aut vehementer maculosa, & vultus lividus, & adspectu terribilis, dentesque lividi fiant) aut color totius faciei immutatus fuerit: hæc omnia mala & perniciofa esse existimandum est. Sed & ipsas oculorum subapparitiones per somnos in hunc modum considerare oportet. Si namque aliquid ex albo subapparuerit, non commissis palpebris, non ob ventris fluxum, aut medicamenti potionem, vel non sic dormire assueto, malum signum est, & admodum exitiale. Si vero palpebræ, aut labra, aut nares una cum alicujus alius signi accessione pervertantur, aut corrugentur, aut livescant: nosse oportet morti proximum esse. Lethale etiam est, si labia resoluta, & pendentia, & frigida, albicantia fuerint. Jacentem autem oportet inveniri ægrotum a medico super latus dextrum, aut sinistrum, manibus, cervice ac cruribus parum inflexis, & universum corpus molliter jacens. Sic enim plurimi sanorum decumbunt. Optimi autem sunt decubitus, qui sanorum decubitibus similes sunt. Supinum vero jacere, & manibus, & cervice cruribusque porrectis, minus bonum est. Si vero etiam præceps fiat, & de lecto delabatur ad pedes, magis horrendum. Si vero inveniatur nudos habens pedes, ubi non fuerint admodum calidi, & manus, & collum ac crura inæqualiter disjecta ac nuda, malum est. Anxietatem enim significat. Lethale

autem est etiam ore hianti assidue dormire. Pariter & crura supini jacentis vehementer inflexa, disjunctaque esse.

---

## C A P U T III.

*In ventrem decumbere & erectum sedere, quando malum? a dentium stridore in febribus notæ, ab ulcere, a manuum gesticulatione, a spiratione. Prenotio a sudoribus, causæ sudorum, præcordium quale bonum, malumve.*

**P** Ronum vero in ventrem cubare, si modo per sanitatem non adfueverit, delirium, aut partium ad ventrem attinentium dolorem designat. Quod si, dum morbus viget, ægrotus velit residere, hoc in omnibus acutis morbis malum; in pulmonis vero pessimum est. Stridere autem dentibus in febribus, nisi quis a puero consueverit, insaniam, & mortem portendit. Sed quantum quidem ab utroque periculi immineat, prædicendum. Si vero etiam delirans hoc agat, id jam valde perniciosum est. Nec vero ignorandum, an ulcere, vel ante morbum, vel in ipso morbo nato laboret. Nam si homo moriturus est, lividum, & siccum, aut pallidum & siccum ante mortem evadet. Cæterum de manuum gestibus hæc nosse oportet. Quoties in acuta febre, aut pulmonis inflammatione, aut infania, aut capitis dolore, ægrum videris manus ante faciem adtollere, & quasi muscas inani opera venari, & festucas carpere, atque floccos a vestibulis, vel ab adjuncto pariete, si qua minuta eminent, evellere ea omnia mala esse, & mortifera censendum. Porro autem spiritus fre-



quens quidem dolorem, aut partis alicujus supra septum transversum inflammationem significat. Magnus vero, & longo tempore inspiratus, delirium nunciat. Quod si vero frigidus naribus, & ore exspiretur, id jam valde perniciosum est. Spirandi vero facilitatem existimare oportet, valde magnam vim ad salutem habere, in omnibus acutis morbis, quibus conjuncta febris est, quique diebus quadraginta judicantur. Sudores in omnibus acutis morbis optimi sunt, quum & diebus criticis proveniunt, & febrem prorsus auferunt. Boni quoque, qui toto corpore manant, faciuntque ut homo facilius ferat morbum. Qui vero nihil eorum effecerint, haudquaquam commodi videntur. Pessimis autem sunt frigidi, & qui circa caput tantum, & faciem, & cervicem oriuntur. Isti enim cum febre quidem acuta mortem, cum mitiori vero morbi longitudinem denunciant. Similiter, & qui in toto corpore eodem, quo & in capite, modo proveniunt. At qui milii instar prodeunt, quique solo in collo emergunt, mali sunt. Boni vero, qui guttatim stillant, & vaporem tollunt. Cæterum universalem sudorum rationem novisse oportet. Fiunt enim aliqui propter corporum exsolutionem, alii vero propter inflammationis vehementiam solent excitari. Optimum vero est, si hypochondria sine ullo sensu doloris æqualiter mollia in utraque parte sint. Sin autem phlegmone laborent, aut dolorem adferant, aut tensa sint, aut dextrum a sinistro varium, aut sinistrum a dextro, & inæquale, hæc omnia vitare oportet. Quod si in præcordiis pulsus insit, perturbationis, vel delirii indicium est. Verum oculos eorum intueri

oportet. Si enim pupillæ sæpe moveantur , expectanda infania.

---

## C A P U T IV.

*Tumorum in præcordiis , & in ventre prænotio , eorumdem diuturnorum suppurationes , quæ optimæ , quæ pessimæ. Item quod optimum est pus , quod deterrimum.*

**A**T vero tumor in hypochondrio durus , & dolorificus , pessimum est , si totum hypochondrium occuparit. Sin autem alteram tantum partem pervaserit , periculi minus habet in sinistra. Verum tumores ejusmodi per initia quidem nati mortem brevi futuram significant. Si vero febris vigesimum diem superet , nec tumor interea confidat , in suppurationem vertitur. Accidit autem his , in primo circuitu , etiam sanguinis e naribus profluvium , & plurimum confert. Interrogare vero oportet , an capite doleant , aut hebetes sentiant oculos ; si quid enim eorum adsit , illuc fertur. Verum potius in junioribus , qui trigesimum quintum annum agunt , sanguinis profluvium expectandum. Tumores vero molles , & doloris expertes , quique digito , dum premuntur , cedunt , multo tardius judicantur , suntque minus quam illi , perniciosi. Quod si febris ultra sexagesimum diem detineat , & tumor interim non resideat , in suppurationem vertendum esse indicium est , nec eum quidem modo , sed illum similiter , qui in reliquo ventre constiterit. Itaque qui tumores dolorem cient , & duri magnique sunt , mortis periculum haud longe abesse significant. Qui



vero molles sunt, & expertes doloris, & digito compressi cedunt, illis diuturniores sunt. Qui vero ventrem occupant tumores, non tam abscessus faciunt, quam qui in præcordiis. Minime vero omnium, qui sub umbilico sunt, in suppurationem vertuntur. Sed sanguinis profluvium e supernis partibus maxime expectare oportet. Omnium autem tumorum, qui diutius istis in partibus manserint, suppurationes contemplari oportet. Porro suppurationes, quæ ab ipsis procedunt, expendere oportet hoc modo. Quæ foras quidem abscedunt, tum quæ parvæ sunt, & permultum prominent, atque in acutum attolluntur, optimæ sunt. Magnæ vero, & latæ, nec in acutum fastigiatae, pessimæ. Quæ vero interiorius rumpuntur, optimæ quidem illæ sunt, quibus cum externo spatio non communicatio est. Sunt autem eæ contractæ, & doloris expertes, totaque loci facies exterior concolor apparet. Est autem pus optimum, quod album, æquale, leveque est, & minime fætidum; quod autem e contrario se habet, deterrimum est.

## SECTION II.

### CAPUT V.

*Aquæ inter cutem ex morbis acutis omnes male: duplex earundem genesis, & hujus utriusque signa. Prognostica in dictis hydropibus periculosa & salutaria.*

**H**YDROPEs ex acutis morbis omnes mali; neque enim febrem solvunt, & cum dolore sunt vehementi, ac lethales. Incipiunt ar-

tem plurimi ab ilibus, & lumbis; quidam vero a jecore. Quibus ergo ab ilibus & lumbis principia fiunt, iis pedes tument, & diarrhœæ diuturnæ detinent, quæ neque dolores ex ilibus ac lumbis obortos solvunt, neque ventrem molliunt. Quibus vero ab hepate hydropes fiunt, tussis, & tussendi cupiditas ipsis innascitur, nihilque effatu dignum exspuunt, ac pedes tument, venterque non deiecit, nisi & dura & ad necessitatem, & circa ventrem tumores prodeunt, qui partim ad dextram, partim ad sinistram partem tum consistunt, tum desinunt. Quod si caput, & manus pedesque frigeant, ventre & lateribus calentibus, malum. Optimum vero totum corpus calidum, & molle æqualiter esse. Oportet autem eum, qui laborat, facile converti, & in adsurgendo levem esse. Sin autem tum reliquum corpus, tum manus, pedesque graves esse videantur, majus periculum est. Mors confestim expectanda vero est, si præter gravitatem ungues digitique lividi evaserint. Pedes autem, digitique penitus nigri minus perniciosi sunt lividis. Sed & alia signa considerare convenit. Nam si æger malum leviter ferre videatur, atque signum aliquod salubre præterea se ostendet, morbum in abscessum versum iri spes est, ex quo homo quidem incolumis evadet, partes autem corporis, quæ nigredinem contraxere, decident. Testes, & pudenda retracta, vehementes dolores & mortis periculum significant.

---

## C A P U T VI.

*Somni apud ægros, qui boni, qui deteriores: non dormire neque noctu, neque interdiu cur pessi-*



*mun. De ejectionum modo, qualitate, quantitate, & tempore, & quando has inspissari oportet, & quales.*

**Q**Uod autem somnum adtinet eodem modo, quo per naturam consuevimus, interdium quidem vigilandum, noctu vero dormiendum. Quod si contra fiat, malum est. Verum minus incommodi adtulerit, qui matutino tempore ad tertiam diei partem, deterior autem, qui ab eo tempore invadit. Pessimum autem, si neque noctu, neque interdium dormiat: vel enim a dolore, laboreque vigilia oritur, aut delirii futuri nota est. Alvi excrementum optimum est, si molle, concretum, dejiciatur, eodem fere tempore, quo secunda valetudine adfuevit, modoque conveniens his, quæ adsumuntur. Talis enim dejectio inferiorem ventrem valere ostendit. Verum si alvi excrementum liquidum est, id nec stridere, nec crebro, paulatim, excerni expedit. Fessus enim homo ex continua exfurrectione succumbens infomnis fit; si vero affatim sæpe dejiciat, defectus animi periculum est. Sed oportet pro adsumptorum copia, aut bis, aut ter interdium dejicere, & noctu semel. Sed mane plurimum, ut naturalis homini consuetudo est. Crassiores autem fieri dejectionem oportet procedente ad crisin morbo. Sit etiam subfulva, neque admodum graveolens.

---

## C A P U T VII.

*Lumbricos quando commodum est egerere: ventris habitus, qui probus. Dejectionum malarum, & magis lethaliū, prout & variarum signa. De flatu sine sono prodeunte: de precordiorum doloribus & tumoribus, quos murmur in iisdem abortum solvit.*

**S**ed & lumbricos teretes morbo iudicium subeunte, una cum excrementis prodire, utile fuerit. In omni autem morbo ventrem mollem esse & proba mole donatum oportet. At valde aquosum, aut album, aut ex viridi pallidum, aut vehementer rubrum, aut spumans deicere, mala hæc omnia. Sed malum quoque est, & exiguum & glutinosum, & album, & subpallidum, & leve. His autem alvi excrementis magis lethalia fuerint nigra, aut pinguis, aut livida, aut æruginosa, aut fetida. Ubi vero varia excrementa rejiciuntur, longioris quidem morbi notæ sunt, nec tamen minus habent periculi. Sunt autem ea strigmentosa, & biliosa (& sanguinea) & porracea, & nigra, modo simul inter se mixta, modo per vices prodeuntia. Optimum autem est flatum absque sono & crepitu exire; sed cum tamen præstat cum sono prodire, quam ibi revolvitur. Et sic quidem prodiens hominem vel dolore affligi, vel delirare arguit, nisi ipse fortassis de industria crepitum emittat. Dolores, tumoresque præcordiorum, qui recentes sunt, & sine inflammatione, sonus in præcordiis excitatus dissolvit, magisque, si cum stercore, & urina, & flatu excessit; sin autem ipse non excesserit, at prodeit tamen ad inferiores partes evolutus.

## C A P U T VIII.

*Urinarum in morbis consideratio, & ex illis prognosticon: Pinguedinis urine supernatantis, & nubecularum in eadem apparentium dijudicatio. Vomitus, qui bonus, qui malus.*

**O**ptima autem urina est, in qua per totum morbi curriculum donec ipse iudicatus sit,  
*Princip. Art. Med. Tom. I. M*



subsidet album, leve & æquale. Securitatem enim, & brevitatem morbi pollicetur. Si vero intermittat & modo liquida, & pura est, modo habet quædam subsidentia alba, atque levia, morbus longior erit, & minus securus. At si fuerit & urina subrubra & sedimentum ejus simile subrubrum & leve, hæc quidem diuturnior priore fit, sed admodum salutaris. Malum vero si urinarum sedimenta tanquam farinam crassiore repræsentent, pejus autem si quasi bracteolas. Tenuia quoque, atque alba, sunt admodum vitiosa; omnium autem pessimum, si quod subsidet, furfuraceum est. Nubes vero, quæ in urinis efferuntur, albæ quidem bonæ, nigræ vero malæ sunt. Quoad autem urina fulva fuerit, & tenuis, crudum esse morbum significat. Si vero & morbus longus sit, & urina talis, periculum est, ne sufficere homo non possit, quoad concocta sit urina. At magis lethales sunt urinæ fætidx, & aquosæ, & nigræ, & crassæ. Sunt autem viris quidem & mulieribus urinæ nigræ deterrimæ; pueris vero aquosæ. Qui urinas tennes & crudas meiunt multo tempore, si reliqua signa salutaria sint, his abscessum ad loca infra septum transversum expectare oportet. Quin pinguedines supra innatantes araneosæ, improbandæ; colliquationis enim signa sunt. Spectare autem oportet urinarum nubeculas sursumne, an deorsum, ferantur, & quales hæc habeant colores; & quæ deorsum cum iis, qui dicti sunt, coloribus feruntur, eas esse bonas censere, ac laudare; quæ vero sursum cum dictis coloribus, eas pravas esse, talesque improbare decet. Ne vero te fallat, si vesica aliquo morbo laborans hujusmodi urinas reddat; non enim totius corporis, sed ipsius per se indicium est. Vomitus autem utilissimus bile & pituita quam maxime permix-

tus, neque admodum crassus, neque multus vomatur. Sinceriores enim deteriores sunt. Si vero quod vomitur porraceum, aut lividum, aut nigrum fuerit, quisquis horum colorum fuerit, cum malum esse existimare oportet. Si vero omnes idem homo colores vomat, id admodum exitiale jam est. Celerrimam autem mortem prodit vomitio livida, si graviter oleat. Omnes autem subputridi, fædique odores in omni vomitu mali sunt.

---

## C A P U T IX.

*Prænotiones in morbis pulmones exedentibus ex sputo, gravedine, & sternutamento. Suppurationis ex doloribus pectoris & pulmonum futura signa, tum suppurationum admodum perniciosarum & lethaliū, tum etiam earum, quæ cum signis aliis salutaribus conjuncta sunt.*

**A**T sputum in omnibus pulmonis & laterum doloribus, celeriter ac facile exspui oportet; & valde commixtum sputo flavum apparere. Si namque multo post doloris initium flavum exspuatur, aut fulvum, aut quod multam tussim excitet, neque valde commixtum, deterius est. Flavum enim si sincerum fuerit, periculosum; album autem, & viscidum, & rotundum, non bonum. Malum autem & quod pallidum admodum, & quod spumosum est. At si adeo sincerum fuerit, ut & nigrum appareat, hoc illis deterius est. Malum quoque si nihil expurgetur, neque projiciat pulmo, sed plenus in gutture ferveat. In omnibus autem morbis, qui pulmonem exercent, malum est gravedines, atque sternutamenta præ-



cessisse, & consequi. In aliis vero maxime exitalibus morbis, sternutamenta utilia sunt. Sputum vero flavum mixtum cum paucò sanguine, in peripneumonicis, si inter initia edatur, salutare est, & valde confert; si vero septimo die, vel etiam ferius procedat, securitatis minus est. Omnia autem sputa mala sunt, quæ dolorem non sedant; pessima vero nigra, ut descriptum est; omnium autem, quum exscreantur, optima, quæ dolorem sedant. Quicumque vero dolores ex his locis neque per sputorum expurgationes, neque per fæcum alvi dejectionem, neque per venæ sectiones, & victus rationes, & purgationes sedantur; eos suppurationem concitatuos esse sciendum est. Quæcunque purulenta etiamnum bilioso quidem existente sputo suppurant, admodum exitiosa, sive biliosum illud sputum separatim, sive cum pure exsccuatur. Maxime vero si ab hoc sputo septimo aut vetustiore prodeunte morbi die, suppuratio procedere cœperit. Qui vero talia spuit, ne decimo quarto die moriatur, metus est, nisi quid boni ipsi accesserit. Sunt autem hæc bona, morbum ipsum non difficulter ferre, ex facili spirare, dolorem sedatum esse, facile exscreare, corpus æqualiter molle, & calidum esse videri, sitis nulla, urinæ, dejectiones, somni, sudores quales a nobis dicti sunt; singula nosse oportet, cum superveniunt, bona esse. Hæc enim omnia si supervenerint, non morietur homo. Quod si alia quidem ex his apparent, alia autem non; is quartum decimum diem non evadet, quin intra illum pereundum sit.

## C A P U T X.

*Qui ex suppuratis nono aut undecimo die pereant. Aliæ suppurationes, quomodo rumpantur, earumque principia, quibus notis observanda. Item latus in suppuratis obsessum, & ipsi suppurati quoque.*

**M**Ala vero his contraria sunt: si morbum non facile sustinet, si spiritus magnus, & frequens est, si dolor non desinit, si sputum difficulter edit, si valde sitit, si corpus a calore inæqualiter adfectum est, si ventre & lateribus vehementer calentibus, frons, manus pedesque refrixerunt, si urinæ, & dejectiones, & somni, & sudores, quales descripsimus, provenerint; hæc omnia mala esse sciendum est. Nam si aliquod ex his cum sputo se obtenderit, certa mors est nono, vel undecimo die, priusquam æger ad decimum quartum perveniat. Ista igitur ratio conjecturæ debet esse in hoc sputo, quod admodum mortiferum est, nec ad diem decimum quartum perducit ægrotantem; atque bona malaque signa, quæ superveniunt, reputantem, ex ipsis præfagire oportet: sic enim verissime præfagias. At aliæ suppurationes rumpuntur, plurimæ vigesimo die, aliæ trigesimo, aliæ quadragesimo, aliæ ad sexaginta dies perveniunt. Spectare autem oportet principium suppurationis, & numerare ab eo die, quo primum homo febricitavit, aut si rigor primum ipsumprehendit, aut si pro dolore gravitatem sibi factam esse dixerit, in eo quo doleret loco. Hæc enim per initia fiunt suppurationum. Ex his igitur temporibus ruptionem oportet expectare suppurationum ad prædicta tempora fore.



Si vero suppuratio duntaxat fuerit in altero latere, tum vertere, tum ediscere ad hæc convenit, num dolor aliquis alterum latus detineat, & an alterum altero sit calidius; & ægro in latus sanum decumbente, interrogare ipsum, si quod ei pondus desuper impendere videatur. Sic enim hoc fuerit, in altero latere suppuratio est, in quo pondus adfuerit. At purulentos omnes hisce signis cognoscere oportet. Primum quidem si febris non dimittit, verum interdiu tenuis detinet, noctu vero major, & multi sudores oboriuntur, tussisque, & tussendi cupiditas ipsis inest, & nihil effatu dignum exspuunt, oculique cavi fiunt, malas rubores obsident, & ungues quidem manuum adunci evadunt, digiti vero summi maxime incalescunt, & in pedibus tumores fiunt, & cibos non appetunt, & pustulæ per totum corpus nascuntur.

## C A P U T X I.

*Suppurationum diuturnarum ac brevium signa, earumque celerioris aut tardioris ruptionis. Ex suppuratis, qui maxime superstites, qui intereunt, qui multo tempore superstites. Abscessus circa aures & ad crura peripneumonicis fiunt; boni & mali; nascentium signa: subsidentes, & recurrentes periculosi, quidam senioribus, quidam junioribus magis fatales.*

**Q**Uæcunque igitur diuturnæ sunt suppurationes ista habent signa, & iis admodum fidentum est, quæ vero breves sunt, his signis deprehendere oportet, siquid eorum appareat,

qualia & iis, quæ inter initia fiunt; simul autem & si aliquanto difficilius spiret homo. At ex his, quæ celerius aut tardius rumpuntur, his signis cognoscere oportet; si dolor quidem per initia oriatur, & spirandi difficultas, ac tussis, & sputatio perseverans ad vigesimum diem obsideat, expectare ruptionem vel etiamnum prius oportet, si vero quietior sit dolor, & pro hujus ratione cetera omnia, istis expectare ruptionem posterius. Præterea vero dolorem & spirandi difficultatem, & sputationem ante puris eruptionem oboriri necesse est. Superfunt autem ex his potissimum, quos febris eodem post ruptionem die dimiserit, & qui cibos celeriter appetant, & siti liberati sint; & venter tum exigua, tum compacta dejiciat, & pus album, & leve, & ejusdem coloris sit, & a pituita liberum, & citra dolorem, & tussim vehementem expurgetur. Sic quidem optime & celerrime liberantur; sin minus, hi, quibus proxima his contigerint. Intereunt vero quos & febris eodem die non dimiserit, sed quum videtur dimisisse, iterum recalescens appareat, & sitim quidem habuerint, cibos vero non appetiverint, & alvus liquida fuerit, pusque ex viridi pallidum & lividum exspuerint, aut pituitosum, aut spumofum. Si hæc omnia contigerint, intereunt. At quibus ex his quædam evenerint, quædam non; ipforum quidam intereunt, quidem etiam multo post tempore superstites evadunt. Verum ex omnibus signis, quæ adsuut, tum in his, tum in aliis omnibus, conjecturam facere oportet. Quibuscunque ex pulmonis morbis abscessus ad aures fiunt, & ad inferiores partes suppurant, (& rumpuntur) fistulamque gignunt; hi superstites evadunt. Ista vero hunc in modum con-



sideranda sunt. Si febris detineat, neque dolor sedatus sit, neque sputum ex ratione procedat, neque biliosæ alvi dejectiones, neque solutu faciles, neque sinceræ fiant, neque urina admodum multa, & crassa, & copiosum habens sedimentum; suffragantur autem evasuro reliqua omnia signa salutaria; his oportet tales abscessus futuros sperare. At oboriuntur abscessus hi quidem ad inferiores regiones, quibus circa hypochondria inflammationis aliquid adfuerit; illi vero ad superiores, quibus hypochondrium molle, & doloris expers permanferit; & quum difficultas spirandi aliquamdiu facta, citra aliam evidentem causam quieverit. At abscessus, qui ad crura fiunt peripneumoniacis, tum vehementibus, tum periculosis, omnes sane utiles sunt. Optimi vero, qui quum sputum in mutatione jam est, fiunt. Si namque & tumor & dolor suboritur, ac sputum pro flavo purulentum sit, ac foras prodeat; ita securissime & homo superstes evadet, & abscessus citra dolorem celerrime sedabitur. At si sputum non probe excernatur, neque urina bonum sedimentum habere videatur; periculum est, ne articulus claudicet, aut multum molestiæ faceffat. Si vero evanescant abscessus, & intro recurrant sputo non prodeunte, & febre obsidente, grave est; periculum enim est, ne deliret, & intereat homo. At suppuratorum ex peripneumoniacis quidem morbis, seniores magis intereunt, ex cæteris autem suppurationibus juniores potius moriuntur.

## C A P U T XII.

*Prognosis lumbos & infernas partes cum febre vexantium dolorum, atque septum transversum adtingentium. Ex suppuratis vli, qui salventur, qui pereant: inflammata vesicæ signa, tum salutaria, tum exitialia. Ætas, quam hic morbus potissimum attingit.*

**A**T qui cum febre fiunt dolores circa lumbos & inferiores partes, si septum transversum adtingant, inferiora relinquentes, exitiales sunt admodum. Adhibere igitur animum oportet cæteris signis, ut si quod aliorum signorum pravum appareat, omni spe destituitur homo. Quicumque vero suppuratorum uruntur, quibus purum quidem pus sit, & album, nec fætidum, ii servantur; at quibus subcruentum, & cœnosum, pereunt. Si vero irruente ad septum transversum morbo alia signa non prava superveniant, suppuratum hunc fore multa spes. At vesicæ & duræ & dolentes, graves omnino ac exitiales; sed exitiosissimæ, quæcumque cum febre continua sunt. Etenim qui ab ipsis vesicis dolores prodeunt interimere sufficiunt, & alvi in talibus ab eo tempore nihil nisi durum, ac coactum excernunt. Solvit autem urina purulenta micta, album & læve habens sedimentum. Si vero neque cum urina quicquam dolor remiserit, neque vesica mollescat, & febris continua sit, ne in primis morbi circuitibus æger intereat, metus est. Hic autem modus potissimum adtingit septennes pueros, donec ad decimum quintum annum pervenerint.



## S E C T I O   I I I .

## C A P U T   X I I I .

*De Crisibus febrium placidissimarum & malignissimarum : illarum insultu integris diebus haud numerabili & quare. De Periodis criticis : de difficili per initia diuturnorum morborum notione ; quando eorum animadversio facienda ? exemplum a quartanis.*

**F**EBRES diebus numero iisdem judicantur, ex quibus homines tum servantur, tum etiam intereunt. Nam & mitissimæ febres, & quæ in securissimis incedunt signis, die quarto, aut ante desinunt ; maxime vero malignæ & quæ cum gravissimis fiunt signis, quarto, vel prius interficiunt. Primus itaque earum insultus sic desinit ; secundus ad septimum perducitur ; tertius autem ad undecimum ; quartus ad decimum quartum ; quintus ad decimum septimum ; sextus ad vigesimum. Hi ergo insultus ex acutissimis morbis per quatuor ad viginti ex additione, ad vigesimum terminantur. Neque ; vero horum quicquam in integris diebus exacte numerari potest. Neque enim annus, neque menses integris diebus numerari solent. Postea vero eadem ratione juxta eandem additionem, primus circuitus est quatuor & triginta dierum ; secundus quadraginta dierum ; tertius sexaginta dierum. At per horum initia difficilius est eos prænosceré, qui intra longissimum tempus judicari debeant, similia namque sunt eorum principia. Verum a primo die animadvertendum est, & prout singuli quaternarii adduntur, considerandum ; nec latebit quo se

versurus sit morbus. Quartanarum quoque conditio eundem servat ordinem.

---

## C A P U T XIV.

*De morbis cognitu facilioribus, & quando hi maxime differunt, exemplum a puerperis. Capitis dolores, qui perniciosi, aut hæmorrhagia e naribus, aut abscessus in iisdem futuri. Ecquis auris dolor sit gravissimus, & quosnam celeriter interimat, quosve superfuturos spes sit?*

**Q**Ui vero brevissimo tempore judicandi sunt, facilius prænoscentur; maxime namque ab initio inter se dissident. Qui enim superfuturi sunt, facile spirant, & dolore vacant, noctuque dormiunt, aliaque securissima habent signa. Qui vero pereunt, difficile spirant, delirant, vigilant, aliaque signa habent pessima. His igitur sic contingentibus, conjectare oportet, tum ex tempore, tum ex unaquaque additione, morbis ad crissim procedentibus. Ad eundem vero modum etiam mulieribus crises a partu contingunt. Capitis autem dolores & vehementes & continui cum febre, si quod certe lethaliū signorum præterea accesserit, exitiosum admodum. Si vero sine ejusmodi signis, dolor vigesimum diem superet, & febris detineat, sanguinis e naribus eruptionem, aut alium quendam abscessum ad inferas partes expectare oportet. Verum quoad dolor recens fuerit, eodem modo sanguinis ex naribus eruptionem, aut suppurationem expectare convenit; cum alias, tum si dolor circa tempora & frontem fuerit. Magis autem expectanda est sanguinis quidem eruptio junioribus quinque &



triginta annis ; at senioribus suppuratio. Auris dolor acutus cum febre continua & vehementi, gravis. Periculum enim est hominem delirare, ac interire. Proinde quum hic modus minime tutus sit, cito mentem advertere oportet etiam omnibus aliis signis, a primo statim die. Intereunt autem ex hoc morbo, juniores quidem homines septimo die, aut etiam citius ; seniores vero multo tardius. Nam & febres & deliria minus eis superveniunt ; auresque ob eam causam suppuratio præoccupat. Verum his quidem ætatibus evenientes morbi reversiones plurimos enecant. Juniores vero, priusquam auris suppurarit, intereunt. Quum quidem pus album ex aure fluxerit, juniorem superfuturum spes est, si quidem & aliud quoddam ei bonum supervenerit.

---

## CAPUT XV.

*Faucium cum febre exulceratarum prognosis, ut & diversarum anginae specierum, gurgulionum periculosa operatio, quando instituenda : febrium recidivæ, quibus exspectandæ. Abscessus aut quartane qualibus in febribus & cui ætati succedant, & quo tempore.*

**F**Auces autem exulceratæ cum febre, grave ; sed si quod aliud etiam signum fuerit ex his, quæ ante prava esse judicata sunt, hominem in periculo versari prædicendum. Anginae gravissimæ quidem sunt, & celerrime interimunt, quæcunque neque in faucibus, neque in collo quicquam conspicuum faciunt ; plurimum vero dolorem exhibent, & erecta cervice spirandi necessi-

tatem; hæ namque & eodem die, & secundo, & tertio, & quarto strangulant. Quæcunque vero in cæteris quidem similiter dolorem exhibent, tument autem & in faucibus rubores excitant, admodum exitiales; prioribus tamen diuturniores, si ingens rubor fuerit. Quibuscunque vero fauces & cervix simul rubuerint, hæ anginæ diuturniores sunt, & ex ipsis maxime evadunt, si & cervix & pectus ruborem habeat; neque intro erysipelas recurrat. Si vero neque diebus criticis evanescat erysipelas, neque tuberculum ad exteriorem partem conversum sit, neque pus extus fiat, facileque ac sine dolore habere videatur, mortem significat, aut ruboris reversionem. At securius est tumorem & ruborem quam maxime foras verti; Quod si ad pulmonem vertatur, & dementiam parit, & ex his nonnulli suppurati plerumque fiunt. Gurguliones vero periculose inciduntur, & scarificantur, & uruntur, quandiu rubri & magni fuerint; his enim inflammationes, & sanguinis eruptiones eveniunt. Sed hos aliis machinamentis eo tempore extenuare conandum est. Ubi vero separatim jam fuerit id totum, quod sane uvam vocant, & summa quidem gurgulionis pars & major, & rotunda, superior autem tenuior extiterit, per id tempus manum admoveere tutum est. Præstat autem & alvo subducta, hac uti chirurgia, si & tempus sinat, & non suffocetur æger. Quibus autem febres cessant, neque apparentibus solutionis signis, neque in diebus criticis, iis recidiva exspectanda est. Quæcunque vero febris longior fiat affecto ad salutem homine, neque dolore detinente ob inflammationem aliquam, neque ob ullam aliam evidentem causam; huic abscessus cum tumore & dolore ad articulum ali-



quem, maximeque in inferioribus partibus expectandus est. Magis autem oboriuntur, & breviori tempore hujusmodi abscessus, annis triginta junioribus. Adtendendum vero in his statim ad abscessus signa est, si viginti dies febris detinens superet. Senioribus autem minus contingunt, quum febris diuturnior est. Hujusmodi autem abscessus expectandus est, quum febris continua est; in quartanam vero cessuram, si & intermiserit, & erratico modo prehenderit, & hoc modo se habens ad autumnum accesserit. Quemadmodum autem junioribus triginta annis abscessus fiunt; ita quartanæ magis his, qui triginta sunt annorum, & senioribus. Scire autem convenit abscessus hyeme magis contingere, tardiusque cessare, & minus intro recurrere.

---

## C A P U T XVI.

*De signis vomitiones spontaneas & hæmorrhagias narium in febribus futuras indicantibus.*

**Q**Uicumque vero in febre non lethali dixerit caput sibi dolere, aut etiam præ oculis tenebrosum quiddam obversari, si etiam oris ventriculi morsus accesserit, ei biliosa vomitio aderit. Si vero etiam rigor accesserit, & inferiores hypochondrii partes frigidas habuerit, adhuc citius vomitio aderit. At, si quid sub id tempus biberit, aut ediderit, id perquam celeriter evomet. Quibus autem horum inceperit dolor primo die fieri, ii quarto die premuntur maxime, & quinto; at septimo liberantur. Quin eorum plerique tertio die dolore incipiunt, jactantur autem ma-

xime quinto, verum nono, aut undecimo liberantur. Qui vero quinto die dolere ceperit, & reliqua pro ratione prioribus respondeant, ad decimum quartum diem judicatur morbus. Ista autem viris quidem & mulieribus, in tertianis præcipue contingunt; junioribus vero eveniunt quidem & in his, verum magis & in peradsiduis febribus, & in legitimis tertianis. At quibus per hujusmodi febrem caput dolet, ac pro tenebris ante oculos apparentibus visus hebetudo contingit, vibrantesque splendores obversantur, & pro oris ventriculi morfu in hypochondrio ad dextram vel ad sinistram partem aliquid contenditur, neque cum dolore, neque cum inflammatione; iis sane pro vomitu sanguinem e naribus fluxurum expectandum est. Magis vero & hic juvenibus sanguinis eruptionem expectare oportet; at trigessimum annum agentibus, aut etiam senioribus minus; sed his vomitiones expectandæ.

---

## C A P U T X V I I.

*De signis convulsiones puerorum præcedentibus: recte prænoscere volenti, quæ ediscere & judicare convenit. Morborum populariter grassantium impetus, & temporis constitutiones. Medico prænotationem adhibituro, quæ cognoscenda.*

**A**T vero pueris convulsiones accidunt, si febris acuta fuerit, & venter non dejiciat, & vigilant, & perterreantur, & ejulent, & colorem immutent, & ex viridi pallidum, aut lividum, aut rubrum induant. Hæc autem puerulis quidem recens natis ad septimum usque



annum promptissime eveniunt. Adultiores autem pueri & viri non jam per febres convulsionibusprehenduntur, nisi vehementissimorum ac pessimorum signorum, quæ phrenitidi oboriuntur, quoddam accesserit. Morituros autem & superfuturos tum pueros, tum alios ex omnibus signis conjicies, prout in singulis singula descripta sunt. Hæc autem dico & de morbis acutis & cæteris, quæ ex his oriuntur. Oportet autem, qui recte præcogniturus, superstites futuros, & morituros, & quibus plures dies, & quibus pauciores permanfurus est morbus, eum signa omnia ediscentem, ac eorum vires inter se conferentem discernere, (quemadmodum præscriptum est) cum cæteris, tum etiam de sputis & urinis, ubi una pus & bilis tussi ejiciuntur. Quin etiam morborum semper in vulgus grassantium impetus, cito animo concipere, nec tempestatis constitutionem ignorare oportet. Probe sane nosse oportet de certis indiciis, ac cæteris signis, nec ignorare quod quovis anno, & quavis anni tempestate, & mala malum, & bona bonum denuncient. Quandoquidem & in Libya, & in Delo, & in Scythia prius scripta signa vera esse comprobantur. Probe itaque sciendum est, quod in his regionibus longe plura his adsequi haud arduum sit, si quis ea cognitione complexus recte tum judicare, tum recte ratione colligere sciat. At nullius morbi nomen, quod hic scriptum non sit, expetendum est. Omnia enim, quæ in prædictis temporibus judicantur, iisdem signis cognosces.

---

# HIPPOCRATIS

## PRÆDICTIONUM

### LIBER II.

---

#### P R Æ F A T I O.

*A* priori libro longe istum removeo, genuinum magni viri fetum, ut ex gravitate, & modestia, ex methodo & continua observationum serie facile intelligas. Initium sumit a vanitate prædictionum quorundam sui ævi medicorum. Inde de prædictione in sanis ex egestis, ex respiratione. De morbis agit; hydrope, phthisi, empyis, podagricis, morbo sacro, ulceribus, vulneribus in genere, & sigillatim capitis, cubiti, medullæ dorsalis. De angina sanguinea: de oculorum morbis: de dysenteria, lieenteria, diarrhæa; de conceptionis facilitate & difficultate; de cephalalgia: de chlorosi: de nyctalopia: de hæmorrhagia narium: de magno liene, qui morbus ad scorbutum proxime accedit: de doloribus ischiadicis, lepra, lichene, leucis. Utique præcipuos cujusque morbi eventus cum suis signis dat. Nullo modo putem priorem prædictorum librum ad eandem genuinorum scriptorum classem referri posse.



## ARGUMENTUM LIBRI.

*Præfatus veterum prædicendi modos, tum magni ad artem momenti esse futurorum in morbis prædictiones, ac signa tum bona, tum prava sigillatim conscribit.*

## SECTIO PRIMA.

### CAPUT I.

*Varii veterum prædicendi modi; quales Hippocratis prædictiones; delirii ex diæta cognitio, & ex hæmorrhoidibus prædictiones, in quibus prudentia adhibenda.*

**P**RÆDICTIONES Medicorum enunciantur permultæ, tum præclaræ, tum admirandæ, quales ego quidem neque ipse prædixi, neque alium, qui prædiceret, audivi. Ex ipsis vero quædam sunt hujusmodi. Hominem videri perniciose affectum esse tum Medico ejus curam habenti, tum cæteris; ingressum vero alium Medicum dixisse, hunc hominem non periturum, verum oculis captum iri. Et ad alium, qui prorsus male affectus existimabatur, ingressum prædixisse, hominem quidem evasurum esse, verum manum mancam habiturum. Et alii cuidam, qui superstes fore non putabatur, pronunciasse ipsum quidem sanum fore; at pedum digitos denigratos putrefactione corruptum iri. Atque alia hujusmodi prædicta in tali specie narrantur. Alius autem prædictionis modus est, e mentibus & negotia tractantibus prædicere; aliis quidem mortem, aliis vero insaniam, aliis alios morbos, & ad hæc

omnia etiam, quæ prioribus temporibus facta sunt, vaticinari, ac omnia vera narrare. Alia præterea prædictionum forma dicitur, athletas; eosque, qui propter morbos sese exercent, & laboribus fatigant, cognoscere, siquid aut circa cibum deliquerint, aut quid alienum ederint; aut potu pleniores usi fuerint, aut deambulationem intermiserint, aut res Venereas exercuerint. Horum omnium nihil eos latet, ne vel si pusillum quid fuerit, in quo homo non paruerit, id exacte cognoscant. Hi omnes narrantur prædictionum modi. Ego vero talia quidem non vaticinabor; verum signa scribo, quibus & sanos futuros homines, & morituros conjectare oportet; eosque brevi tempore, aut longiore, sanos futuros, aut perituros. Scriptum est autem a me & de abscessibus, quomodo singulos considerare conveniat. Arbitror autem & eos, qui de claudicationibus prædixerunt, aliisque ejusmodi, confirmato jam morbo; prædixisse; & quum jam manifestum esset, quod abscessus non esset recursum; si modo intelligentiam habuerint; multo sane magis; quam priusquam abscessus fieri inciperet. Existimo quoque & alia prædicta fuisse magis humano more, quam refertur (quæ videlicet ementibus, & vendentibus prædicta fuisse feruntur) mortes, & morbos, & insanias. Atque hæc mihi videntur talia facta esse; & nulla videtur esse difficultas prædicendi ei, qui circa talia studium, ac curam adhibere velit. Primum etenim hydropicos; & tabidos quis non cognoverit? Deinde deliraturi non diu latere possunt, si quis noverit; quibus hic morbus cognatus est, aut prius aliquando insaniverunt. Si enim hi homines ebriosi fuerint, aut carnes voraverint; aut vigila-verint, aut in frigore, aut calore incon-



fideate versati fuerint, multus timor est ex tali victus ratione ipsos deliratuos esse. Et eos, qui hæmorrhoides habent, si quis hieme multo potu uti viderit, & bono colore præditos, de his prædicere licet, quod ad ver multa spes sit sanguinis eruptionis, & ut decolores, & aquosi sub æstatem fiant. Verum prædicere decet eum, qui hæc cuncta didicerit, si quis in talibus studiis palmam ferre expetat. Licet enim ex scriptis prædicere, & mortem, & insaniam, & bonum habitum. Possem autem referre & alia multa hujusmodi; sed quæ facillima cognitu sunt, visum est mihi scribere. Suadeo autem, ut quam prudentissime agant, tum in reliqua arte, tum in hujusmodi prædictionibus, probe memores, quod si cui successerit prædictio, is apud ægrotum intelligentia præditum in admiratione erit. Si vero quis aberrarit, præterquam, quod odio habebitur, fortasse etiam insaniisse videbitur. Quapropter præcipio, ut tum alias omnes; tum has prædictiones prudenter instituant; quanquam sane & audiam, & videam, neque judicare recte homines ea, quæ dicuntur, ac fiunt in arte, neque narrare.

## CAPUT II.

*Incertam de exercitatis prædictionem dari; errata in morbis facile cognosci; uberiore potu, ac cibo usos, non autem morborum, & ægrotantium mores certis signis deprehendi.*

**D**E his autem, qui exercentur, ac laboribus se fatigant, eas assertiones, quas afferunt hi, qui ipsas proferunt, neque esse puto, neque si quis existimet, prohibeo, quo minus putet; a

nullo enim signo neque bono neque malo, læduntur suspensiones, cui signo fide habita quis sciat, an recte pronunciatum sit, an secus; alioqui per me licet, ut si quis velit, credat; non enim ego impedimento sum. Arbitror autem, si quid veri ab ipsis dicatur; aut iis, qui de his, qui exercentur, adseverant; aut illis, qui prius scripti sunt, primum quidem hunc, qui cognovit ex signis conjectasse; deinde vero ambigue, & humano more prædixisse; simulque eos, qui id narrant, prodigiosius, quam factum fuit, recensere; nam neque in morbis facile est errata cognoscere, etiam si decumbant homines, & victu parum nutriente utantur; ut non adeo multa intueri opus sit eum, qui hæc considerandi curam suscepit. Alii enim bibunt solum, alii ad hoc, quod bibunt, aut sorbitionem, aut cibum optimum adsumunt. Necessè igitur est eos, qui uberiore potu usi sunt, difficilius spirare, & plus urinae reddere; eos vero, qui sorbitionem, aut cibum largiorem sumpserunt, magis & sitire, & febrire. Si vero quis utroque, & potu, & cibo, immodice usus fuerit; præter febrem, & spirandi difficultatem, etiam ventrem circumtentum, & maiorem habebit. Licet porro & hæc, & alia omnia experimentis optime explorare, quæ & habemus, & omnibus recte utimur. Primum equidem & intelligentia, & oculis cognoscere facile est, hominem in eodem loco decumbentem, & exacta victus ratione utentem, si non paruerit, quam obambulantem, aut multa edentem. Deinde, qui manibus contrectavit ventrem, ac venas, minus falli potest, quam qui non contrectavit. Et nares in febrientibus quidem & multa, & bene significant; odores enim multum inter se differunt. At vero in sanis, &



recto victu utentibus, haud scio, quare vel in hoc experimento faciendo uti possim. Postea audiendo vocem, & spiritum auribus cognoscere datur, quæ in sanis non similiter sunt manifesta, sed qualiter etiam antea. Quod (si non) etiam mores morborum, ac ægrotorum didicerit Medicus, haud quidquam prædicere oportet; non enim difficilius spirabit homo, morbo adhuc errante, & corripietur acutiore febre, & venter intentus erit. Quare propter hæc non tutum est prædicere, priusquam ad statum pervenerit morbus; verum post hoc tempus, quicquid præter rationem acciderit, dicere oportet. Manifesta vero sunt mala, quæ propter ægri inobedientiam fiunt; nam & spirandi difficultates, & alia hujusmodi post tridie sedabuntur; si ob errata fiunt. Si igitur quis hanc judicationem considerans prædixerit, non delinquet. Atque ego quidem hunc considerandi modum nunc consulo, tum de his, qui domi manent, tum de iis, qui exercentur, itemque de aliis omnibus, qualia errata committant. At exactam illam narrantes rationem & odio, & derideo. Quum enim parum non obtemperarint homines, haud scio, quomodo id deprehendere possim. Si vero majora fuerint errata, quem in modum considerare oporteat, scribam.

---

### C A P U T I I I.

*Quomodo, quando, quæ, quibus sensibus homines, eorumque errores in cibo, potu, exercitio, ac Venere spectare deceat.*

**O**portet autem primum hominem, in quo quis per inobedientiam commissa cognoscere volet, per totum diem intueri, & in eodem lo-

co, & eadem hora, sole præfertim recens orto; hoc enim tempore aliquantulum evacuatus fuerit, & adhuc jejunos est, & nullo labore fatigatus, præterquam matutinis deambulationibus, in quibus minimum delinquit; si sane, ubi de somno surrexit homo, ad deambulandum prodierit. Quare necesse est eum, qui iusta victus ratione utitur, hac hora maxime æqualiter adfectum esse, quod ad coloris, & totius corporis constitutionem spectat. Quapropter & is, qui hujus curam gerit, acutissimus fuerit & mente, & oculis, eo tempore. Contemplari præterea oportet hominis mentem, & mores, & corporis vires; alii enim alia facilius, aut difficilius imperata faciunt. Primum igitur is, cui inedia imperata est, si plura comederit, & biberit; per hæc manifestus fiet; & tumidius corpus ipsius apparebit, pleniusque, ac coloratius erit; si non excrementa alvi male ipsi processerint. Erit item animosior ad ferendum laborem. Considerandum etiam, an ructum edat, aut a flatibus urgeatur; hæc enim fieri solent his, qui ita affecti sunt, propter hoc erratum. Si vero, dum edere multa cogitur, & fortiter laborare, aut cibum non ederit, aut ebrius factus fuerit, aut a cœna larga non obambulaverit; hoc modo explorare oportet. Si quidem cœnam non sumpserit, solito autem more deambulaverit, jucundiores aspectum præ se feret, & vegetior, ac operosior in exercitiis erit. Verum alvi egestio modica, & compacta maxime in hoc fuerit. Si vero cœna sumpta non deambulaverit; ructum utique edet, & flatuosus fuerit, & plenitudo non minor apparebit, & inter laborandum magis, quam antea sudabit, & difficulter spirabit, ac gravis erit, & alvi secessus copiosiores, ac minus viscosi his, fuerint. Quod si neque ci-



bum consumpserit, neque deambulaverit, pigrior utique fuerit, ac tumidior. Si vero ebrius factus fuerit, sudabit magis, quam antea, & difficulter spirabit, & se ipso gravior erit, ac humidior; sed & lætior erit, si non ipsi caput doleat. Quod si uxore semel usus fuerit, vegetior utique erit, & magis solutus. Si vero sæpius rem peregerit; & durior evadet, & squalorem aliquem habebit, & decoloratior, ac magis lassatus erit.

---

#### C A P U T IV.

*Ex dejectionibus & urinis decumbentium errores in cibo, potu, exercitio, ac Venere commissos deprehendi.*

**P**orro dejectiones alvi contingere oportet his, qui laboribus exercentur, quamdiu parum ederint, ac parum potaverint, modicas, & duras, atque hoc quotidie. Si vero tertio quoque die, aut quarto, aut a longiore intervallo (non) prodierint; periculum est, ne aut febre, aut alvi profluvio corripiantur. Quæcunque vero dejectiones liquidiores sunt, quam ut in transitu conformentur, hæc sane omnes illis pejores sunt. At vero his, qui multum edunt, & multum laborant, egestionis transitum mollem, oportet esse siccum, & copiam ciborum ingestorum pro ratione laboris. Prodeunt autem ab æquali ciborum copia, his quidem, qui minimum laborant, plurimæ dejectiones, his vero, qui plurimum laborant, minimæ; parvæ vero, si sani fuerint, & iusta victus ratione utantur; nem ab his conjecturam facere oportet. Liquidiores autem dejectiones, & sine febribus contin-

gentes, & quæ septima die, aut citius judicantur, commodæ sunt; si semel una vice omnes fiant, & non revertantur. Si vero insuper febrierint homines, aut alvi profluvia redierint; si longa fuerint; penitus mala sunt, sive biliosa fuerint, sive pituitosa, sive cruda; & victus ratione propria, singula opus habent, itemque aliis alia medicamentis. Ceterum urinam juxta potionis copiam mingere oportet, & semper æqualem, & affatim effusam, & parvo momento crassiorem, quam id, quod epotum fuit. Si vero fuerit aquosa, & copiosior, quam pro eo, quod bibi imperatum est; significat hominem non obedire, sed copiosiore potu uti, aut non posse renutriri, quamdiu ita affectum fuerit lotium. Si vero paulatim stridat urina; aut medicamentis hominem opus habere significat, aut morbum aliquem circa vesicam habere. At sanguinem mingere, raro quidem, & sine febre, ac dolore, nihil mali significat, sed lassitudinum solutio fit. Si vero sæpius mingat, & aliquid ex his accesserit, malum est. Verum prædicere oportet, sive cum dolore mingatur, sive cum febre, fore, ut insuper pus mingat, atque ita dolores quiescant. Crassa vero urina albam subsidentiam habens, aut circa articulos dolorem aliquem, aut tumorem significat. Aliæ vero omnes subsidentiae in urinis eorum, qui exercentur, a morbis circa vesicam fiunt, id quod ipsi manifestum facient; cum doloribus enim erunt, & ægre ab illis quidem poterunt. Atque hæc quidem de his scribo, & hujusmodi alia dico. Ceterum ex his, qui exactam, ac certam prædictionum rationem prædicant, cum aliquibus ipse versatus sum, cum aliquorum vero filiis, ac discipulis rem contuli; quorundam vero scrip-



ta accepi. Quare cum probe sciam, quæ quisque ipsorum sentiret, nec usquam certam rationem compererim; hæc scribere adgressus sum.

---

## CAPUT V.

*De Hydrope sanabili, ac insanabili prædictiones.*

**A**T vero de hydropibus, & tabidis, & podagricis, & his, qui a morbo sacro appellato corripuntur, hæc dico; (&) ex aliqua quidem parte de omnibus idem. Nam qui hos morbos congenitos habet, is ægre ab ipsis liberari potest. Reliqua vero singulatim scribam. Eum, qui ab hydrope correptus est, & superstes est futurus, bonis visceribus præditum esse oportet, ita, ut natura se exferat, simulque facile concoquat, & facile spiret, sitque sine dolore, & totum corpus æqualiter tepidum habeat, & non circa extremas partes extenuatum; melius est autem, ut tumores potius habeat in extremis partibus. Optimum vero est, neutrum horum habere; nam molles, ac graciles esse convenit extremas partes, itemque ventrem ad contactum mollem. Tussim vero adesse non oportet, neque sitim, neque linguam resiccari, tum reliquo tempore, tum post somnos; id, quod maxime fieri solet. At cibos libenter accipere oportet, & ubi satis comedit, non affligi. Alvum vero ad medicamenta quidem celerem habere, reliquo autem tempore egere recrementum molle figuratum. Urinam autem in transitu, pro instituto victu, & vini mutationibus, apparere. Laborem vero facile ferre, nec defatigationem sentire. Ac optimum quidem est, hominem ita per

omnia dispositum esse, & sic securissime sanus fieri poterit; sin minus, plurima ex his habeat, nam spes erit, ut superstes evadat. Qui vero nihil horum habuerit, sed contraria; eum desperatum esse scito. Qui autem pauca horum habuerit, quæ bona esse dixi, si hydropes laboranti adsint; huic exigua spes superest. Cui vero multum sanguinis sursum, ac deorsum eruperit, & febris insuper accesserit, eum multa aqua repletum iri timor est; atque hic hydrops brevissimi temporis est, & ex quo paucissimi evadunt. Verum de hoc alteri prius significare oportet. At quibus magni tumores facti emarcescunt, ac rursus attolluntur, hi magis convalescunt, quam illi, qui ex sanguinis eruptione implentur. Verum fallunt hi hydropes ipsos ægros, faciuntque, ut ipsi a Medicis discedant, ac pereant.

---

## C A P U T V I.

*De tabe laborantibus, ac suppuratis, tum convalescentibus, tum interituris, predictiones.*

**D**E tabescentibus, quod ad sputum, ac tussim attinet, eadem dico, quæ de pectore suppuratis scripsi; oportet enim eum, qui bene sanus futurus est, facile sputum per tussim rejicere, & id esse album, & æquale, & ejusdem coloris, & sine pituita. Quod vero a capite defluxit, ad nares converti; febrem autem non invadere, ut ne a cœnis prohibeatur, neque sitiat. Venter autem egerat quotidie, & id, quod egerit, sit durum, copia pro ratione ciborum ingestorum; hominem vero quam minime



tenuem esse oportet. Pectus autem laudare convenit quadratum, & hirsutum, & ipsius cartilago parva sit, & valde carnosae; quicumque enim hæc omnia habuerit, maxime superstes erit; qui vero nihil horum habet, interitui proximus. Quicumque vero suppurati facti fuerint, dum juvenes sunt, ex humorum decubitu, aut fistula, aut alio quopiam hujuscemodi, aut ex abscessu recursum, hi non evadunt; nisi valde multa bona signa ipsis accesserint. Pereunt autem homines hi per autumnum. Sed & ex aliis longis morbis plerique hoc tempore maxime moriuntur. Ceterum ex aliis minime superstites manent, & virgines, & mulieres, quibus ex suppressis mensibus tabes oborta est. Si vero aliqua virgo, aut mulier evasura est, & aliorum signorum bonorum multa accedere oportet, & menses luculenter, & manifeste apparere; aut nulla spes est. Qui vero ex sanguinis eruptione, pectore suppurati fiunt, & viri, & mulieres, & virgines, non minus evadunt. Verum signis omnibus tum suppuratorum, tum tabescentium collectis, & superstitem futurum, & periturum prædicere oportet. Maxime vero evadunt ex sanguinis eruptione hi, quibus dolores sunt melancholici, & in dorso, & in pectore, & qui post eruptionem minus dolent; nam & tussis non valde insuper accedunt, & febres pleræque perseverant, sitim facile ferentes. At reversiones eruptionis sanguinis maxime fiunt his, si non abscessus sanguinolentissimi. Quibus autem in pectoribus dolores insunt, & tempore adtenuantur, & tussunt, ac difficulter spirant, neque febribus insuper corripientibus, neque suppurationibus succedentibus; eos interrogare oportet,

quum tussunt, & difficulter spirant, num & compactum quiddam, & modicum odorem habens, tussiendo rejiciant.

---

## CAPUT VII.

*De podagricis, & epilepticis convulituris, aut interituris prædictiones.*

**D**E podagricis hæc dico: Quicumque aut senes sunt, aut circa articulos callos tophaceos habent, aut ærumnose vivunt, ac siccam alvum habent, ni omnes sani fieri non possunt humana arte, quantum ego novi. Sanant quidem hos optime dysenteria, si successerint. Sed & aliæ eliquationes valde profunt, quæ ad infernas partes tendunt. Qui vero juvenis est, & circa articulos nondum tophaceos callos habet, & accurate vivit, & laboris amans est, & alvum habet vitæ instituto probe cedentem, hic sane Medicum intelligentia præditum nactus, sanus fieri poterit. Ex his porro, qui a sacro morbo corripuntur, difficillime quidem liberantur hi, quibus a puero contigit morbus, & simul ad virilem ætatem pervenit; deinde hi, quibus corpore in vigore ætatis constituto ortus est, (&) fuerit a viginti quinque annis usque ad annum quadragesimum quintum. Post hos autem, quibus ortus fuerit morbus, nullam significationem præbens, ex qua corporis parte initium sumat. At quibus ex capite initium capere videtur, aut a latere, aut a manu, aut pede, facilias curatur. Verum differunt etiam hæc morbi genera. Qui enim a capite initium sumunt, ex his gra-



viffimi funt; deinde qui a latere. Qui vero a manibus, ac pedibus, maxime fanari poffunt. Ceterum horum curam aggredi oportet Medicum, qui medendi modum novit, fi homines fuerint juvenes, & laboris amantes, nifi mens mali aliquid habuerit, aut quis adtonitus fuerit, nam hæ atrabiliarie mentis emotiones non funt conducibiles. Aliæ vero, quæ ad infernas partes convertuntur, bonæ funt; longe vero optimæ, & hic funt, quæ funt fanguinolentiffimæ. Quicunque vero fenes corripiti incipiunt, maxime moriuntur; & fi non pereant, celerrime per fe liberantur, a Medicis autem minime adjuvantur. At quibus pueris oculi repente diftorti fuerunt, aut majus quoddam malum perpeffi funt, aut tubercula fub cervicem oborta funt, aut lingua hæfitare ceperunt, aut tuffes ficcæ diuturnæ adhærent; aut ubi adoleverint, dolor contendit ad ventrem, neque conturbatur, aut in lateribus diftorfiones patiuntur, aut venas craffas circa ventrem varicofas, aut omentum defcendit, aut testis intumuit, aut manus tenuis, & impotens, aut pes, aut tibia tota clauda facta eft, citra aliam caufam; his omnibus sciendum eft, morbum ifta omnia præceffiffe. Et plurimi, qui pueros educant, fi interrogentur, fatebuntur; quosdam vero etiam res latet, negantque fe fcire, quicquam tale contigiffe.

---

## C A P U T V I I I.

*De ulceribus, ac tumoribus præter naturam curati  
facilibus, ac difficilibus, ac infanabilibus præ-  
dictiones.*

**Q**ui porro de ulceribus cognofcere volet, qualemque exitum fingula habitura funt, eum

primum hominum naturas perscrutari oportet, tum eas, quæ melius sunt ad ulcera; tum quæ deterius affectæ; deinde ætates nosse; in quibus singula ulcera curatu difficilia sunt. Loca item in corporibus perspecta habere; quantum alia ab aliis differunt. Sed & alia, quæ in singulis accedunt, tum bona, tum mala, nosse oportet; si quis enim omnia hæc noverit, is sane sciet etiam; qualis singulorum eventus futurus sit. Qui vero non noverit hæc; non posse poterit; quales exitus ulcerum futuri sint. Corporis autem naturæ bonæ sunt tales: leves & commodatæ; & bonis visceribus præditæ, & neque valde carnosæ, neque duræ; quod ad colorem vero, sit albus, aut niger, aut rubens; hæc enim omnia bona sunt, si pura sunt. Si vero ex pallido mixtus color fuerit, aut color ipse pallidus, aut lividus, pejus est. Naturæ vero, quæ præscriptis contrariæ sunt, eas deteriores esse scito. At vero, quod ad ætates adtinet; tubercula quidem suppurata sunt, & strumosa, hæc plurimos pueros occupant, & facillime ex ipsis liberantur. Adultioribus vero pueris, & adolescentibus, minus quidem oriuntur, verum difficilius ab ipsis liberantur. Viris autem talia quidem tubercula non valde fiunt; verum favi formidabiles, & canceri abditi, demersi, & ex pustulis noctu inquietantibus ulcera serpentina, donec sexaginta annos longe superaverint. Senibus autem nihil talium tuberculorum accidit, verum canceri, & occulti, & summas partes occupantes, & ad mortem comitantur. Ceterum ex locis subalares difficiliores curatu sunt, & laterum cavitates, ac femora; nam & humores in ipsis subsident, & recidivæ fiunt. Ex articulis periculo maxime obnoxii sunt pollices, & præsertim pedum. Quibus autem in



obliqua linguæ parte ulcus fit diuturnum ; animadvertendum ex dentibus, qui juxta sunt, num aliquis acutus sit.

---

## CAPUT IX.

*De vulneribus ratione partium, ac symptomatum febris, inflammationis, delirii, hæmorrhagiæ, doloris, dyspnææ magis, aut minus lethalibus: de depascentibus ulceribus lethalibus, putredinibus, herpetibus: de nervi ac ossis corruptione prædictiones.*

**V**ulnera magis lethalia sunt, quæ in venas crassas, & in collo, ac inguinibus infliguntur: deinde, quæ in cerebrum, & in hepar; postea, quæ in intestinum, & vesicam. Sunt autem hæc omnia perniciofa valde, non tamen ita, ut nemo ex his evadat, velut putatur; nam & loca, quæ hæc nomina habent, multum inter se differunt, & ipsi modi. Multum etiam differt corporis ipsius hominis constructio; aliquando enim neque febricitat, neque inflammatur fauciat. Aliquando etiam citra causam febricitat, & aliqua corporis pars omnino inflammatur. At quando is, qui ulcus habet, delirat, & facile fert vulnus; tunc vulnus aggredi oportet, velut pro medicinæ, & accedentium ratione, eventum habiturum; moriuntur enim homines ab omnis generis vulneribus. Multæ enim venæ sunt & tenues, & crassæ, quæ, si eo sponte sua ferri contingat, sanguinis profusione, interimunt; quas alia temporis occasione si quis pertundat, corporibus prodesse sentiat. Multa vero vulnera in locis

cis contemnendis, ac nulla re formidabilia esse videntur: in iis tanto dolore plaga cruciat, ut respirare nequeant (ægri). Alii vero præ vulneris dolore, quod sane grave nulla re erat, spiritum quidem duxerunt, verum delirarunt, & febrientes mortui sunt; quicumque enim aut corpus febricitans habent, aut mentem turbatam; talia patiuntur. Sed neque hæc admirari oportet, neque formidare, qui illud sciat, quod & animæ, & corpora hominum plurimum differant, & vim maximam habeant. Quæcunque igitur vulnera tempus nanciscuntur, aut corpus, & mentem huiusmodi, aut ita turgentem sanguinem, aut magnitudine tantâ fuerint, ut curatione sensuum integritas restitui nequeat homini ægrotanti; ab his quidem discedere oportet, qualiacunque tandem fuerint, diariis animi deliquiis exceptis; alia vero omnia adgredi, quæ recens sunt incussa, quo & febres effugiant homines, & sanguinis eruptiones, & depascentia ulcera; hi, qui evasuri sunt. Exactissime vero, & ad plurimum tempus eorum, quæ gravissima sunt, cura gerenda est; nam ita facere par est. At vero depascentia ulcera exitiosissima sunt, quorum putredines profundissimæ, & nigerrimæ, ac siccissimæ sunt. Pravæ etiam sunt, ac periculosæ, quæ nigram faniem remittunt. Albæ vero, ac mucosæ putredines, minus quidem occidunt, frequentius autem revertuntur, & diuturniores sunt. Herpetes autem minime omnium ulcerum, quæ depascendo proserpunt, periculosi sunt; verum maxime difficulter submoveri possunt, quemadmodum canceri occulti. In omnibus autem talibus febrem supervenire una die confert, & pus quam albissimum, ac crassissimum. Prodest & fideratio nervi, aut etiam ossis, aut etiam amborum;



tum in profundis, cum in nigris putredinibus; nam in fiderationibus pus multum fuit, & putredines solvit.

---

## SECTIO II.

### CAPUT X.

*De capitis vulneribus per se, ac ratione loci, situs, symptomatum, ac temporis, maxime lethalibus, ac securissimis: de inflammatione, & pure utilibus: de febre vulnerum symptomata lethali, non lethali.*

**P**orro ex capitis vulneribus exitiosissima sunt, quæ ad cerebrum pertingunt, velut etiam antea scriptum est. Gravia sunt & hujusmodi omnia, os magnum denudatum, os desidens, os diffractum. Si vero etiam osculum ulceris parvum fuerit, fissura vero ossis diu permanferit, periculosius est. Hæc autem omnia graviora fiunt, si & juxta futuram sunt, & quod ad loca, si in summo capitis sint. Ceterum in omnibus magni momenti vulneribus interrogare oportet, si adhuc recentes fuerint plagæ, aut etiam jactus fuerint, an conciderit homo, aut an in soporem altiore collapsus sit. Si enim horum quidpiam factum fuerit, ampliore custodia opus habet, nimirum quod cerebrum vulnus senserit; si vero non recens fauciatus fuerit, ad alia signa respicere oportet, ac consilium capere. Optimum quidem igitur est, neque febrile cum, qui ulcus in capite habet, neque sanguinem insuper ipsi erupisse, neque inflammationem, neque simul ullum aliquem dolorem accessisse; si vero quid

horum apparuerit, securissimum est, ut in principio fiat, & modico tempore permaneat. Conducit autem in doloribus etiam inflammationes ex ulceribus accedere; in sanguinis autem eruptionibus pus in venis apparere. Quæ vero in acutis morbis conferre febribus scripti, ea etiam in his fieri conducit, & eadem hic quoque bona esse adfero, contraria vero mala. At incipere febrem in capitis vulnere quarta die, aut septima, aut undecima; valde lethale est. Judicatur autem plerisque, si quidem quarta vulneris die febris inceperit, ad undecimam; si vero septima die febris inchoarit, ad decimam quartam aut decimam septimam; si vero undecimo febrile inceperit, ad vigesimam; quemadmodum in febribus descriptum est, quæ absque manifestis causis sunt. Ceterum in principiis febrium; siue delirium accesserit, siue alicujus membri sideratio, perituum hominem sciendum est, si non omnino aut ex optimis signis aliquod accedat, aut corporis vires adsint; verum considerabis modum, nam homini adhuc spes salutis est: sed claudum fieri articulum, in quem (malum) incubuit, necesse est, etiam si superstes maneat homo.

---

## C A P U T XI.

*De articulorum, nervorum, ac medullæ spinalis vulneribus prædictiones.*

**P**orro vulnera in articulis, quæ quidem magna sunt, si penitus abscissi nervi sunt, qui continebant, absque dubio claudos reddent. Si vero ambiguum fuerit de nervis, quomodo



se habeant, si quidem fuerit acutum telum, quod vulneravit, rectum vulnus melius est obliquo. Si vero grave, & retusum fuerit id, quod vulneravit, nihil refert; sed plagæ profunditatem, & alia signa considerare opus erit. Sunt autem hæc: pus si insuper accedat ad articulum, duriores fieri necesse est; si vero etiam tumores simul permanferint, hunc locum ad multum tempus durum esse necesse est; & quum sanum jam est ulcus, tumorem permanere necessarium est, simulque flecti, ac extendi, (tarde quæcunque, dum articulus incurvus est, curantur. Quibus vero etiam nervus casurus esse videtur, securius de claudicatione prædicere licet, tum alias, cum si inferiorum nervorum aliquis fuerit exolutus. Ex his autem cognoscēs nervum, qui excidet: pus album, & crassum, multo tempore defluit, doloresque, ac inflammationes circa articulum in principiis fiunt. Eadem hæc etiam fiunt, quum os casurum est. At vero dissectiones in cubitis, præsertim quæ sunt cum inflammatione, ad suppurationem perveniunt, ad sectionesque, ac unctiones. Medulla vero spinæ si ægrotarit, sive ex lapsu, sive ex alia aliqua causa, sive sua sponte, homo & cruribus imbecillis fit; ut neque, si tangatur, percipiat, & ventre, ac vesica, ut circa prima tempora, neque stercus, neque urinam egerat, nisi coacte. Quum autem vetustior factus fuerit morbus, non sentiente homine, & stercus prodit, & urina. Moritur autem postea, non multo interposito tempore.

## CAPUT XII.

*De faucibus sanguine impletis, de oculorum inflammationibus, lachrymis, sordibus, tumoribus, rupturis, lesionibus, cicatricibus, iubeculis, & caliginibus prædictiones.*

**Q**UOD si vero cuipiam fauces implentur sanguine sæpe singulis diebus, ac noctibus, cui neque caput antea doluit, & qui neque tussim habuit, neque vomuit, neque febre correptus fuit, neque dolorem habuit pectoris, nec dorsi, hujus inspiciendæ sunt nares, & fauces, utrum ulcus aliquod habere videatur in hoc loco, an hirudinem. Oculi porro lippientes optime sanescunt, si & lachryma, & fordes, & tumor simul fieri inceperint; si vero lachryma sordi fuerit permixta, & non valde calida, fordes autem alba fuerit, & mollis, & tumor lævis, & solutus: si ita hæc se habuerint, oculus conglutinabitur ad noctem, ut doloris expers sit, atque hoc modo res haud periculosa fuerit, ac minime diuturna. Si vero lachryma procedit multa, & calida, cum paucissima forde, ac parvo tumore, atque hoc ex altero oculo tantum, tunc diuturnum valde fit malum, verum non periculosum, & doloris expers est hoc onus; & judicationem in his maxime expectare oportet, primam quidem ad vigesimum diem; si vero hoc tempus superet, ad quadragesimum expectanda est: si vero neque in his diebus sedetur, in sexaginta judicatur. Per totum autem tempus hoc, fordes considerare oportet, an cum lachrymis misceatur, & alba; ac mollis fiat, maxime sub judicationis tempus; si enim desitura est, hæc fiant. At si utrique oculi hæc perpetiantur, in majori periculo sunt, ne ulcerentur; verum judica-



tio brevioris temporis erit. Sordes autem ficcae valde dolorosae sunt, sed cito judicantur, si non vulnus acceperit oculus; si vero tumor magnus fuerit, dolorisque expers, & ficcus, periculo vacat; si vero cum dolore fuerit, malus est, si ficcus sit, & periculum est, ne ulceretur oculus, ac (palpebrae) conglutinentur. Sed & gravis est tumor, si lachrymam conjunctam habeat, & dolorem; si enim lachryma prodit calida, ac falsa, periculum est, & pupillam exulcerari, & palpebras. Si vero tumor confederit, sed lachryma multo diutius effundatur, & sordes adsint, viris quidem palpebrarum everfionem praedicere oportet; mulieribus autem, & pueris exulcerationem, ac everfionem palpebrarum. At si sordes pallidae, aut lividae fuerint, & lachryma multa, at calida, & in capite ardor fuerit, & ex temporibus dolores in oculum decubuerint, & vigiliae his accesserint; necesse est ulcus in oculo factum esse, & timor est quoque, ne id rumpatur. Prodest autem febris accedens, aut dolor lumbis inhærens. Praedicere vero his futura oportet, ita ut respectus & ad tempus habeatur, & ad ea, quae ex oculo fluunt, & ad dolores, itemque vigilias. Postquam vero & oculum contueri datum fuerit, siquidem comperitus fuerit ruptus, & per rimam pupilla extiterit, malum est, & difficile, ut sedetur; si vero & putredo tali suberit, penitus inutilis oculus redditur. At vero alia ulcerum genera praedicere oportet, loca considerando, & putredines, & profunditates; necessarium enim est pro ulcerum vehementia cicatrices fieri. Quibus igitur rumpuntur oculi, & postea prominent, ut extra locum pupilla sit; his & tempore, & arte, opem ferre non datur, ut videant. Parvae vero pupil-

larum transmotiones sedari possunt, si nihil mali accesserit, & homo juvenis fuerit. At ulcerum cicatrices, quibus nihil aliud mali affuerit, omnes & a tempore, & ab arte juvari posse putandum est, maxime recentissimas, & in juvenum corporibus. Ceterum ex locis maxime pupillæ læduntur, si exulcerantur, deinde pars, quæ est supra supercilia, postea quidquid proximum his locis fuerit. Pupillæ vero glaucescentes, aut argenti speciem referentes, aut cærulæ, non bonæ sunt; his autem paulo meliores sunt, quæ aut minores apparent, aut ampliores, aut angulos habentes, sive ex manifestis causis tales factæ fuerint, sive sua sponte. Caligines, & nubeculæ, & cicatrices subalbicantes lævigantur, ac delentur; si non vulnus aliquod in eo loco accesserit, aut prius forte cicatricem habuerit ibidem, aut unguem pterygion dictum. Si vero splendicans cicatrix in nigra oculorum parte fiat, partem aliquam nigredinis dealbat, adeo, ut si multo tempore permaneat, & aspera, & crassa, etiam memoriam sui relinquat. Porro judicationes, quemadmodum in febribus scripsi, ita & hic se habent. Verum signa probe edoctum, differentias lippitudinum prædicere oportet, quum pessima signa accesserint, diuturnas lippitudines fore; velut de singulis præscriptum est; quum vero apparuerint optima signa, breves: tunc enim septima die desituras esse prædicendum est, aut prope hoc tempus, & alioqui securas esse putandum est. Recidivas autem expectare oportet his, quibus melius habere contingit, neque in diebus judicatoriis, neque signis bonis confectis. Omnium vero maxime urinæ statum in oculorum affectionibus considerare oportet; nam temporum occasiones præcipites sunt.



## CAPUT XIII.

*De dysenteriis, lienteris, aliisque levioribus alvi profluviis, ac ani procidentia, prædictiones.*

**D**Ysenterix si quidem cum febre invaserint, aut variis alvi egestionibus, aut cum hepatis inflammatione, aut præcordii, aut ventris, aut quæ cum dolore fuerint, aut cibos intercipiunt, sitimque inducunt; hæ omnes malæ sunt, & qui sane plurima horum malorum habuerit, citissime peribit; cui vero paucissima talium adfuerint, huic plurima spes est. Moriuntur autem ex hoc morbo maxime pueri quinquennes, & adultiores ad decimum usque annum, reliquæ vero ætates minus. At quæ dysenterix commodæ sunt, hæ mala hæc non inducunt; verum sanguine, & ramentis egestis, desiverunt septima die, aut decima quarta, aut vigesima, aut quadragesima, aut intra hæc tempora. Hujusmodi enim egestionem etiam eos, qui prius sunt in corporibus, morbos sanant, vetustiores quidem diuturniore tempore, recentiores autem in paucis diebus submovere possunt; nam & quæ uterum gestant, etiam ipsæ reservantur magis ad partum, & ex partu, & fetus conservant, sanguine, & ramentis egestis, etiam per multos menses; nisi dolor ipsis adfuerit, aut aliud quoddam malum signum ex his, quæ in dysenteriis fieri scripsi, accesserit. Si vero aliquod illorum apparuerit, & fetui perniciem significat, & prægnanti periculum, nisi post fetus effugium, & secundarum exolutionem, ipsa dysenteria eadem die, aut non multo post desinat. At lienterix quidem continuæ, & diuturnæ, & per omnem horam, cum

strepitu, & sine strepitu exturbatæ, & similiter noctu, ac interdiu incumbentes, & dejectione subeunte, aut valde cruda, aut nigra, & levi, ac graveolente, hæ omnes malæ sunt; nam & sitim inducunt, & potum non ad vesicam promovent, ut per urinam ejiciatur; & os exulcerant, & ruborem elatum in facie, ejusque cutis vitia omni colore distincto excitant. Simul autem & ventres contractos, & sordidos, ac rugosos reddunt; ex talibus autem homines impotentes fiunt ad cibum capiendum, ad deambulandum, ad faciendum alia, quæ facere debent, estque morbus hic gravissimus senioribus, vehemens est etiam viris, reliquis autem ætatibus multo minor. Quisquis autem neque in ætatibus his est, quas male tractari ab hoc morbo dixi, & paucissima ex signis habet, quæ mala esse scripsi, hic securissime constitutus est. Indiget vero curatione hic morbus, donec & urina pro ratione ejus, quod in potu acceptum est, procedat, & corpus ab ingestis cibis augmentum capiat, & a malis coloribus liberatum fuerit. At vero alia alvi profluvia, quæ sine febre sunt, & brevi tempore durant, & mitia sunt; aut enim eluta sedabuntur, aut sua sponte. Prædicere autem oportet excretionem subtus erumpentem desituram esse, quum tangenti ventrem manu nullus motus suberit, & in fine dejectionis flatus prodierit. Sedes autem procidunt, viris quidem, quos, ubi hæmorrhoidas habent, alvi profluvium corripit; pueris vero calculo laborantibus, & in dysenteriis longis, ac sinceris; senibus vero, quibus muci agglutinati insunt.



## C A P U T XIV.

*De mulieribus, quæ liberalius, aut parcius concipiunt: de conceptionis causis, ac obstaculis, ac de maris, aut femina conceptione; ac falsæ conceptionis signis prædictiones.*

**V** Erum de mulieribus, quæ magis, aut minus in utero concipere soleant, ita considerare oportet: primum quidem formas; parvæ enim ad conceptionem aptiores sunt majoribus, tenues crassis, albæ rubicundis, nigræ lividis. Quæ item venas conspicuas habent, meliores sunt, quam quibus non apparent; carnem autem uberiores habere, grandiori natu malum est; mammas vero turgidas, ac magnas, bonum; atque hæc quidem visui exposita sunt. Verum interrogare oportet etiam de menstruis purgationibus, an omnibus mensibus compareant, & an copia satis magna, & an boni coloris sint, & æquales singulis temporibus, & ratis mensium diebus, sic enim has fieri optimum est. Locum vero, in quo conceptio fit, quem sane uterum nominamus, sanum esse oportet, & siccum, ac mollem. Sit item neque retractus, neque pronus, neque os ipsius sit aversum, neque occlusum, neque diductum; fieri enim non potest, ut conceptio fiat, quodcunque tandem talium impedimentorum affuerit. Quæcunque igitur mulieres in utero concipere non possunt, verum pallidæ apparent, neque febre, neque visceribus id facientibus, hæc capite se dolere dicent, & menses sibi male, ac meracos prodire. Si autem pauci, aut longo tempore, ipsis sic affectis menses non comparuerint, uteri in his purgatione opus ha-

bent; quæcunque vero bene coloratæ sunt, & carnem multam, ac pinguem habent, & venu-  
 las latentes, & dolore carent, & menses his aut  
 omnino non apparent, aut modici, & mera-  
 ci prodeunt; hoc genus difficillimum est ad co-  
 gendum, ut concipiant. Si vero mensibus pro-  
 fluentibus inculpate, & mulier sic corpore affe-  
 cta fuerit, nec tamen conceperit; locus, in quo  
 est uterus, in causa est, ut fecunda fetu fieri  
 non possit; aut enim contractus est, aut didu-  
 ctus; nam & alia, quæ isthic sunt, cum dolo-  
 ribus, decolorationeque, ac colliquatione fiunt.  
 Quibus porro ulcus factum fuerit in utero, si-  
 ve ex partu, sive ex tuberculo, sive ex alia  
 quadam causa, his febres, & inguinum tumo-  
 res supervenire necesse est, & dolores in his lo-  
 cis. Si vero & puerperii purgamenta simul fue-  
 rint intercepta, hæc mala si adfuerint, omnino  
 vehementiora sunt, & diuturniora, & ad hæc  
 præcordiorum, ac capitis dolores; ulcere autem  
 facto, & sanato, locum hunc leviolem, ac du-  
 riorlem fieri necesse est, & minus conceptui ido-  
 neum; si vero solum in sinistra parte fiat ulcus,  
 & mulier in utero concipiat, sive dum adhuc  
 habet ulcus, sive ubi jam sana est, masculum  
 magis enixuram esse spes est; si vero in dextra  
 parte ulcus fiat, & mulier concipiat, femineum  
 magis fore fetum expectandum est. At si febres  
 corripiant concipere non potentem, & adtenua-  
 ta sit tussi muliercula, interrogare oportet, an  
 in utero ulcus aliquod habeat, aut aliud quid-  
 piam ex malis, de quibus scripsi; si enim in  
 hoc loco nihil mali subesse apparuerit, quod cau-  
 sa sit attenuationis, & cur concipere non possit,  
 sanguinem vomituram esse mulierem expectan-  
 dum est; menses autem tali necessario evanue-



runt. Si vero febris soluta fuerit a sanguinis eruptione, & menses comparuerint, in utero concipiet; si vero priusquam sanguis erumpat, alvus effusa fuerit pravam in modum, periculum est perituram esse mulierem, antequam sanguinem vomat. Quæcunque in utero se concepisse putant, & non conceperunt, & per multos menses falluntur, menstruis purgationibus non apparentibus, & ventres augeri, ac moveri vident, hæ & caput dolent, & collum, & præcordia, & in mammis lac ipsis non innascitur, nisi modicum quiddam, atque id aquosum. Postquam vero ventris tumor dissolutus fuerit, ac molles evaserint, eæ, nisi quid aliud obstet, concipient; nam hæc adfectio bona est ad mutationem in utero faciendam, ut post hoc tempus in utero concipiant. At his, quæ conceperunt, dolores hi non eveniunt, nisi familiares his fuerint & capitis dolores, & lac in mammis gignitur. At vero eas, quæ a diuturnis muliebribus fluoribus vexantur, interrogare oportet, an capite doleant, & lumbos & infernam ventris partem; interrogandæ sunt etiam de dentium stupore, & visus hebetudine, & aurium fonitu. Quæcunque autem, dum jejunæ sunt, subbiliosa vomunt per multos dies, quum neque uterum gestent, neque febricitent, eas interrogare oportet, an lumbricos rotundos simul vomant; si enim hoc non consententur, prædicendum est ipsis futurum esse. Evenit autem hic morbus maxime quidem mulieribus, deinde vero etiam virginibus, sed cæteris hominibus minus.

## CAPUT XV.

*De variis citra febrem doloribus, de gravedinibus, temporibus, pruriginibus, ac doloribus cum vertiginibus, prædictiones.*

**Q**uibuscumque vero sine febribus dolores fiunt, mortem quidem non inducunt, verum plerique diuturni sunt, & multas mutationes, ac recidivas habent. Genera hæc sunt: primum quidem ex capitis doloribus aliqui sunt leves, aliqui multo graviores. Utrosque vero hoc modo considerare oportet: quicumque hebetem visum habent, & rubor quidam ipsis fit in oculis, & pruritus frontem vexat, his sanguis sua sponte manans, & coacte, opitulatur; hoc genus simplex est. Quibus vero dolores circa caput, & frontem ex magnis ventis fiunt, & ex frigoribus, quum vehementer calefacti fuerint; eos gravedines potissimum quidem omnino liberant, profunt autem & sternutationes, & muci in naribus oborti, magis quidem sua sponte; sin minus, coacte. Gravedines autem fiunt in totum, adeo ut & tussés succedant: & sternutationes succedentes, si dolores non sedaverint; necesse est tubercula, & decolorationes his accedere. Quibus autem dolores sine manifestis causis fiunt, & diuturni, & in toto capite, sunt que ipsi & graciles, & debiles; his præsagendum est morbum longe graviores priore esse: si vero etiam ad collum, & ad dorsum dolor descendat, caput relinquens, & ad caput recurrat, adhuc gravior fit. Verum omnium horum gravissimus est, si ex capite ad collum, ac dorsum tendat; auxilia autem his ex abscessibus fore



expectandum est, aut ubi pus per tussim rejerint, aut hæmorrhoidas habent, aut pustulas in corporibus enatas; confert etiam caput furfures habens. Torpores vero, & prurigines pungentes, quibus per caput discurrant, aliquando per totum, aliquando per aliquam partem; sæpe vero & frigiditas aliqua ab ipsis sentiri putatur, velut per caput discurrere, hos interrogare oportet, an etiam ad summam linguam illa prurigo perveniat; si enim hoc fecerit, perfectus morbus fit, & difficilior curatu; verum absque hoc facilis est. Auxilium autem consequuntur ex abscessibus, veluti antea scriptum est, sed tamen abscessus minus in his succedunt, quam in illis; quoscunque vero una cum doloribus vertigines corripunt, malum ægre exsolubile, ac furiosum evadit; senibus autem maxime hoc genus accidit. At alii morbi circa caput, & viris, & mulieribus, cum securitate vehementissimi sunt, & diuturniores; accidunt autem & adolescentibus, & virginibus, in ea pubertatis ætate, & maxime circa mensium progressum. Mulieribus vero in capitis doloribus, alia quidem omnia accidunt, quæ & viris; verum pungentes illæ prurigines & affectiones atrabiliaris his minus, quam viris, si non menses penitus aboliti fuerint.

---

## C A P U T X V I.

*De pravis juvenum coloribus, cum virore pallidis, de nyctalopibus, & lienosis, prædictiones.*

**Q**Uibus juvenibus colores pravi sunt ad multum tempus, & continenter, non tamen

morbi regii modo ; hi siue viri sint , siue tæminæ , caput dolent , & lapides ac terram comedunt , & hæmorrhoidas habent : pallidi vero cum virore colores , qui diuturni sunt , & morbus regius vehemens non est , cætera quidem eadem facere solent ; verum pro lapidum , ac terræ esu , præcordia hos magis affligunt , quam alteros. Quicumque vero multo tempore pallidi apparent , & faciem tumidam habent , eos caput dolere sciendum est , aut circa viscera dolorem habere , aut in sede malum aliquod , in seipsis. Plurimis autem eorum , qui tales apparent , non unum aliquod horum malorum oritur ; sed plerumque multa , aut etiam omnia. Qui noctu vident , quos sane nyctalopas vocamus , hi morbo corripiuntur iuvenes , aut pueri , aut etiam adollescentes , & liberantur sua sponte , aliqui in quadraginta diebus , aliqui vero septimo mense ; quibusdam autem & per totum annum permanet. Quapropter de tempore coniectare oportet , ita ut & ad morbi robur , & ad ægri ætatem respicias : abscessus autem his profunt insuper apparentes , & ad infernas partes fluentes ; verum non admodum contingunt , propter iuventutem. At mulieres non corripiuntur hoc morbo : neque virgines , quibus menses apparent. Quibus autem lachrymarum fluxiones diuturnæ fuerint , hi nyctalopes sunt ; eos interrogare oportet , an capite doluerint , antequam hæc revelarunt. Quicumque , dum neque febricitant , neque decolores sunt , sæpe & verticem , & tempora dolent ; si non alium manifestum habuerint abscessum in facie , aut graviter loquantur , aut dentes doleant ; his sanguinem per nares erupturum esse expectandum est. Quibus vero ex naribus sanguis fluit , hi alioqui sani esse videntur ; his autem vel splenem tumere com-



peries, vel caput dolere, & splendicans quiddam ipsis ob oculos obversari; plerisque vero horum simul & caput, & splen hoc modo se habere videntur. Gingivæ vero vitiatae, & ora graveolentia his sunt, quibus splenes magni; quicunque vero splenes magnos habent, & neque sanguinis eruptiones ipsis contingunt, neque oris graveolentia; horum tibiæ ulcera prava habent, & cicatrices nigras. Si vero vel graviter loquuntur, vel manifestum alium habeant abscessum in facie, vel dentibus dolent, his sanguinis fluxio ex nabus exspectanda. Quibus partes sub oculis vehementer adtolluntur, eos magnos habere lienes comperies; si vero etiam in pedibus tumores accesserint, aquam etiam habere videbuntur; verum & ventrem, & lumbos inspicere oportet.

## C A P U T X V I I .

*De faciei distortionibus, seu convulsione canina, ac de humeri doloribus prædictiones.*

**A**T vero distortionem in facie, si nulli alii corporis parti communicent, cito sedantur; aut sua sponte, aut ex necessitate; reliqui vero siderati, quibus præter motionis impotentiam pars corporis morbofa extenuatur, hi in sanitatem restitui non possunt. Quibus autem colliquationes non accesserint, hi sani evadent. Ceterum de tempore, quando sani erunt, prædicandum est, respectu habito ad vim morbi, & ad tempus, & ad ætatem hominis, & ad anni tempus, ita ut ejus rei memor sis, quod vetustissimi morbi, & pessimi, & qui revolvuntur, gravissime morem gerant; itemque hi, qui sunt in corpore  
admo-

admodum senili; sed & autumnus, & hyems, ad tales morbos submovendos minus opportuni sunt, quam ver, & æstas. Dolores porro in humeris oborientes, qui quidem ad manus descendunt, torporesque, ac dolores inducunt; his quidem abscessus non succedunt, verum nigram bilem vomentes sanantur. Qui vero illic in humeris manent, aut etiam ad dorsum progrediuntur, eos puris, aut atræ bilis vomitu effugiant; verum de his hæc observatio tenenda est: si quidem enim facile spiraverint, ac graciles fuerint, atram bilem ipsos potius vomituros esse spes est; si vero difficiliter spiraverint, & in faciem ipsis color incurrit, qui prius non erat, sive rubicundus, sive niger; eos magis pus exscreanturos esse sperandum est. Ad hæc vero considerandum est etiam, an in pedibus tumores sint; nam & hoc signum in his consentit; atque hic morbus viris vehementissimus esse solet, a quadragesimo anno usque ad sexagesimum, quam ætatem etiam coxendicum dolor maxime infestat.

---

## C A P U T XVIII.

*De coxendicum, lumborum, ac crurum morbis prædictiones.*

**P**ORRO de coxendicum doloribus hæc consideranda sunt: Quibuscunque senioribus & torpores vehementissimi adsunt, & perfrigerationes tum lumborum, cum crurum, & qui pudendum arrigere non possunt; & quibus alvus non nisi coacta egerit, & mucosum alvi recrementum plurimum prodit, his maxime diuturnus morbus erit; prædicendum est annum, ut minimum,

*Princip. Art. Med. Tom. I.*

P



duraturum esse morbum ab eo tempore, quo incepit, & opem nonnisi vere, & æstate expectandam esse. At vero juvenibus non quidem minus doloris inducit coxendicum morbus; verum brevior est; nam quadragesimo die liberantur: sed neque torpores vehementes accedunt, neque perfrigerationes crurum, ac lumborum. Quibus autem hic morbus est quidem in lumbis, ac cruribus, non autem affligit adeo, ut decumbant; considerare oportet, an aliquid uspiam in coxa concreascit, & interrogare, an ad inguen dolor progrediatur; si enim ambo hæc habet, diuturnus fit morbus. Interrogandum insuper est, an in femore torpores insint, & ad poplitem progrediantur; & si hoc confiteatur, rursus interrogandum, an & per tibiam ad summum pedem procedant. Quicumque enim pleraque horum confessi fuerint, his dicendum est, quod crura ipsis aliquando calida, aliquando frigida fiant; quod si morbus hic lumbos relinquens, aliquibus ad infernas partes vertatur, eos confidentes esse jube. Quibuscunque vero coxas, & lumbos non relinquens, ad supernas partes convertitur, malum id esse prædicendum est.

## C A P U T XIX.

*De articulorum, ac alvi doloribus: de impetiginibus, lepris, ac albis vitiliginibus prædictiones.*

**A**T quibus circa articulos dolores fiunt, & tumores, & sedantur, non podagrico modo: in his comperies viscera magna, & in urina subsidentiam albam; & (talis) si tempora elevarit, dicet se sæpe dolere, dicet etiam sudores sibi

nocturnos oboriri. Si vero neque in urina tale quidquam subsidet, neque sudores fiunt, periculum est, ne articuli claudicent, aut in his abscessus fiat, quem melicerida vocant. Accidit autem hic morbus his, quibus in pueritia, & juventute sanguis ex naribus fluere solitus desit. Proinde interrogandum est de sanguinis eruptione, an in juventute contigerit, & num pungentes prurigines, & in pectore, & in dorso insint: & quibus alvus vehementes dolores excitat, absque perturbatione, & quibus hæmorrhoides eveniunt; hoc enim horum morborum principium est: si vero etiam malo colore præditi sint hi homines, interrogandum est, an capite doleant? hoc enim fatebuntur. Quibus vero ex his alvi dolores in dextra parte fuerint, dolores his vehementiores sunt; & præsertim, quum ad præcordium juxta hepar reliquæ doloris fuerint. His autem doloribus prodest sonus statim in alvo obortus; postquam autem dolor quieverit, urinam crassam, ac cum virore pallidam mingunt, atque hoc morbi genus icthale non est, verum valde diuturnum; quum autem jam inveteratus fuerit morbus, homines ab ipso cæcutiunt. At de sanguine interrogare oportet, an in juventute fluxerit, & de visus hebetudine, & de urinæ evacuationis, pallore, itemque de strepitibus, an insint, & succedentes profint; hæc enim omnia fatebuntur (sive rubrum, sive etiam nigrum, his pus scireare magis, quam spuerere oportet; considerata vero his etiam sunt in pedibus œdemata, hoc enim signum his consentit) Impetigines, & lepræ, & vitiligines albæ, quibus quidem juvenibus, aut pueris aliquid horum factum est, aut paulatim conspectum in multo tempore augefcit, his non putare oportet abscessum esse,



eam papularum eruptionem, sed morbum; quibus vero horum aliquid factum est multum, & derepente, hoc sane fuerit abscessus. Oriuntur autem albæ vitiliginis ex maxime lethalibus morbis, qualis est & morbus Elephantiasis appellatus; lepræ vero & impetigines, ex morbis ab atra bile factis; ex his autem facilius sanantur ea, quæ in maxime juvenibus contingunt, & quæ recentissima sunt, & in mollissimis, ac carnosissimis corporis partibus nascuntur.

# HIPPOCRATIS

D E

## VICTUS RATIONE IN MORBIS ACUTIS

### LIBER PRIMUS.

#### P R Æ F A T I O.

*T*Res priores partes hujus operis genuinæ videntur, quarta etsi perantiqua, & ERASISTRATO antiquior, spuria jam GALENO visa est. In P. I. scribit H. de ptisana contra Gnidios, qui victus rationem neglexerint: deinde contra medicos sui ævi, qui in principio morbi acuti agrotum inedia macebant, cibosque offerebant in morbo jam adulto. Contra eos HIPPOCRATES defendit, in acutorum morborum principiis victum propinari debere

*pertenuem, mulsam, aut hordei cremorem, iude paulatim posse medicum ad cibum solidiorem, ipsamque ptisanam progredi.*

---

## C A P U T I.

*Nihil memoratu dignum de Dieta veteres scripserunt. Medicum in acutis morbis cognosci. Verum de iis quam maxime Medicos discrepare.*

**Q**ui Cnidas apellatas sententias conscripserunt, hi sane quæ singulis in morbis ægri patiantur, & quomodo eorum quædam evenerint, recte scripserunt: sed hætenus etiam medicinæ ignarus possit recte de ea re scribere, modo probe ex singulis ægrotis, quæ patiantur, resciverit. Verum quæ Medicum ægro non referente prædiscere oportet, eorum multa prætermisâ sunt, & alia quidem in aliis, nec non ad conjecturalem cognitionem peropportuna. Quæcunque vero ( Cnidii ) proponant, ut conjici possit, quomodo singulis mederi deceat, in iis multa aliter, quam illi differuerint, sentio. Atque non solum ob id non laudo, verum quod & paucis numero remediis usi sint. Nam plurima ab ipsis dicta & commendata sunt ( præterquam in morbis acutis ) medicamenta deorsum purgantia exhibenda, tum serum, tum lac pro tempestate propinandum. Hæc igitur si bona essent, & morbis in quibus dari monuerunt convenientia, longe laude digniora essent, quod pauca sufficerent: sed nunc non ita se res habet. Qui vero rursus tractarunt, & scriptis excoluerunt, de iis sane, quæ singulis adsumenda sint, medice magis differuerunt. Sed neque de victus



ratione quicquam effatu dignum veteres, conscripserunt; &, quanquam magnum id sit, prætermiserunt. Varia tamen singulorum morborum genera, multiplicemque eorum divisionem non ignorarunt quidam. Nonnulli vero singulorum morborum numeros dilucide pronuntiare volentes, non recte scripserunt. Neque enim (eos) numerare facile fuerit, si quis ex eo ægrotantium morborum æstimet, quod ab altero (morbo) re quadam differat, neque eundem esse morbum reputet, nisi idem nomen fortiatur. Mihi vero placet in omni arte animum advertere. Etenim quæ recte procedunt opera, ea quoque singula recte facere oportet; quæ celeritatem postulant, ea quoque celeriter; & quæ munditiem, munde; & quæ citra dolorem administrari desiderant, ea quam maxime sine dolore facere; cætera quoque hujus generis omnia, aliter quam proximi, ad meliorem formam reducere oportet: sed maxime medicum probavero, qui acutis in morbis, qui plerosque homines occidunt, longe melius cæteris se gerat. Sunt autem hi acuti morbi, quos prisce nominarunt pleuritidem, peripneumoniam, phrenitidem, lethargum, febrem ardentem, & quicumque alii morbi ad hos consequuntur: quorum febres omnino continuæ interficiunt. Quum enim nullus communis pestilentis morbi modus populariter grassatus fuerit, sed dispersi morbi, ac non similes fuerint, ab his morbis plures, quam ab aliis omnibus, moriuntur. Populares igitur non admodum cognoscunt eos, qui in his, proximis antecellunt. Aliarumque curationum magis laudatores aut vituperatores sunt. Deinde magnum id indicium, quod hi populares hujusmodi morborum intelligentiam minime habent, cum ad eam non nisi studio perveniri possit. Nam

qui medici non sunt, medici esse videntur, maxime propter hos morbos. Facile est enim nomina, quæ apud ægrotos his morbis adfectos proferri consueverunt, ediscere. Siquis enim ptisanæ cremorem nominaverit, & vinum hoc aut illud, aut etiam mulsum, hæc omnia eadem plebeis tum præstantiores, tum deteriores medici dicere videntur: at non ita se res habet, verum in his sane alii ab aliis magnopere differunt. Mihi vero maxime ea scribi digna esse videntur, quæ cum sint scitu admodum utilia, tamen a medicis ignorantur, quæque magnum adjumentum, vel detrimentum adferunt. Quæ vero ignorantur, hæc sunt: qua de causa adeo ex medicis quidam, in acutis morbis, per totum eorum decursum, continuo ptisanam non colatam exhibent, ac sese medicinam recte facere arbitrantur; quidam vero toti in eo sunt, ne ullum hordeum æger devo-  
ret (magno enim detrimento esse illud existimant;) sed cremorem lintee colatum exhibent: quidam præterea ipsorum, neque crassam ptisanam, neque cremorem dederint; & hi quidem quousque ad diem septimum æger pervenerit; illi autem assidue, donec morbus judicatus fuerit. Itaque hujusmodi quæstiones proponere non admodum medici consueverunt; neque vero fortassis si proponantur, (solutæ) comperiantur. Ac proinde calumniam adeo magnam patitur apud vulgus ars tota, ut nulla omnino ars medica esse existimetur. Quare acutissimis in morbis tantopere dissentiant inter se artifices, ut quæ alter exhibet, optima esse existimans, ea mala jam alter esse arbitretur; ac fere ob id artem vaticinationi similem esse dixerint: quoniam & augures eundem alitem, si sinister quidem appareat, bonum esse augurantur, si vero dexter, malum. Atque



in aruspicina eadem in aliis aliter exponunt; nec de his adeo inter vaticinantes convenit. Hanc vero speculationem utilissimam esse existimo, & quæ plurimis, maximeque necessariis casibus in arte ipsa facienda accommodari potest. Etenim ægrotantibus omnibus ad sanitatem magnum quippiam valet, & sanitate fruentibus, ad sanitatem tuendam, & sese exercentibus, ad bonum habitum, & ad quod quisque voluerit.

---

## CAPUT II.

*Ptisanam in morbis acutis recte prælata esse : oportere ex hordeo optimo eandem præparare, & quam optime coctam. Quod lubricissima sit, & maxime sitim extinguat : quodque aliquando quidem juvet, aliquando vero noceat: unde siderati apud veteres. Quando permittere oporteat, vel inhibere sorbitionis exhibitionem.*

**P**Tisana igitur triticeis eduliis recte prælata fuisse mihi videtur, his in acutis morbis, eosque, qui ipsam prætulērunt, laudo. Cremor enim ejus lævis, concontinuus, suavis, lubricus, & moderate humidus, sitim restinguit, & siquid elui indiguerit, id facile eluitur, neque adstrictionem continet, neque pravamurbationem, neque in alvo turgescit. Nam in elixatione, quoad maxime intumescere potuit, intumuit. Quicunque ergo ptisana hisce in morbis utuntur, nullo die, ut breviter dicam, vasa vacuanda sunt; sed ea utendum, neque intermittendum, nisi aut propter medicamentum, aut clysterem intermittere oporteat. Et his quidem, qui bis die cibum sumere consueverunt,

bis danda est: his vero, qui semel cibum capere consueverunt, his primo die semel danda; paulatim autem progrediendo, si fieri possit, iis etiam bis danda, si quid adjiciendum videatur. Verum per initia copiam dare sufficiat non multam, neque ultra modum crassam; sed ut pro consuetudine aliquid ingeratur, & ne multa vasorum inanitio fiat. Quod autem ad sorbitionis adjiciendæ quantitatem adtinet, si admodum siccus fuerit morbus aut magis, quam quis putaverit, plena manu non est exhibenda: sed ante sorbitionem, aquam mulsam, aut vinum, aut quodcunque utile fuerit, propinare. Quid autem maxime conveniens sit, in singulis generibus (morbis) dicetur. Quod si os humescat, & quæ a pulmone prodeunt, qualia decent (taliter) fuerint, sorbitionis quantitatem, ut equidem breviter dicam, augeri oportet. Nam quæ celerius, magisque madescunt, celeriores crisin denunciant; quæ vero tardius & minus, tardiores judicationem significant. Atque hæc quidem in universum harum rerum natura est. Sed multa quoque alia peropportuna, ex quibus signa elicienda sunt, prætermittuntur, quæ postea dicentur. Et quo purgatio copiosior fuerit, eo majorem copiam ad judicationem usque adjicere oportet; sed maxime duobus ab judicatione diebus, quibus sane aut quinto, aut septimo, aut nono die, indicare videatur judicatio, ut etiam dierum parium & imparium ratio habeatur. Postea vero sorbitione mane utendum est, vespere vero ad cibaria transeundum. Hæc autem plerumque iis conferunt, qui statim integra ptisana utuntur. Dolores etenim in pleuriticis statim sponte desinunt, quum aliquid effatu dignum, tum exspuere, tum expurgari ceperint: etenim



purgationes multo perfectiores sunt, minusque purulenti fiunt, quam si quis aliter victum instituat; & judicationes simpliciores, & melius judicantes, ac minus redeunt. At ptisanam interea ex optimo confici hordeo, & quam optime coctam esse oportet; ac præsertim si non solo cremore uti debeas. Nam cum aliis virtutibus ptisanæ lubricitas efficit, ut hordeum, quum devoratur, minime lædat; nusquam enim adhæret, neque secundum thoracis rectum tramitem moram trahit. Est autem maxime lubrica, sitimque maxime restinguit, & facillime coquitur, & est infirmissima, si optime cocta fuerit, quibus omnibus opus est. Nisi igitur quis, quantum deest, adtulerit, ut idoneus ejusmodi ptisanæ sorbendæ modus efficiatur, plerumque lædet. Quibus etenim statim cibus interclusus est, si quis eo non subvacuato sorbitionem dederit, dolorem, si adest, exacerbaverit, si non adest, statim induxerit, densiorque evaserit spiritus; hoc autem malum est, pulmonem enim magis exsiccat, fatigatque hypochondria, & imum ventrem, septumque transversum. Id vero cavendum, si lateris dolore etiamnum continuo manente, neque ad calida fomenta remittente, sputoque minime prodeunte, imo perquam glutinoso crudesciente, nisi quis dolorem, aut alvo emollita, aut secta vena solverit, aut quicquid ægris, ita laborantibus, conduxerit; si ptisanam ita adfectis dederis, ex ejusmodi medicinis mors præceps oborietur. Has igitur ob causas, & alias hujusmodi etiamnum magis, qui tota utuntur ptisana, septimo die, ac celerius moriuntur; alii quidem mente læsi, alii vero erectæ cervicis spiratione & rhoncho suffocati. At sane hos antiqui sideratos esse existimaverunt, tum ob id maxime, tum non minime, quod

mortuis latus lividum plagæ simile deprehendatur. Rei hujus hæc causa est, quod priusquam dolor solvatur, intereant; brevi siquidem anhelatione corripiuntur. A multo autem densoque spiritu, ut jam dictum est, peragglutinatum cruditate sputum, egressum (spiritus) fieri prohibet, imo stertorem inducit, pulmonis bronchiis impactum; & ubi eo res devenit, plerumque ægrum jugulat. Etenim ipsum sputum intus impactum, spiritum quidem intro ferri prohibet, celeriter vero extra ferri cogit. Atque ita in (ægri) perniciem mutuas tradunt operas: nam retentum sputum densum spiritum facit; spiritusque densus quum sit, sputum agglutinat, & lubricum fieri prohibet. Prehendunt autem hæc, non solum si ptisana intempestive utantur; verum multo magis siquid aliud, quod ptisana minus idoneum sit, vel ederint, vel biberint. Proinde plerumque consimilia sunt auxilia & iis, qui integra ptisana, & iis, qui ejus succo utuntur, nec non illis, quibus neutrum horum, sed sola potio convenit; tamen etiam est, ubi illis diverse providere oportet. Verum hoc modo omnino facere oportet; siquem a cibo recens accepto, & alvo nondum subducta, febris invaserit, siue cum dolore, siue sine dolore; a sorbitione exhibenda tantisper est temperandum, quoad cibi faeces ad imam intestini partem secessisse videantur. Utendum autem est in potu aceto mulso, siquis dolor adfuerit, hyeme quidem calido, æstate vero frigido; & si multa sitis fuerit, etiam aqua mulsa & aqua. Postea vero siquis dolor insit, aut periculum quoddam impendeat, sorbitio neque copiosa, neque crassa exhibenda; verum post septimum aut nonum diem, si validus (æger) fuerit. Quod si cui post recens sumptum cibum,



prioris recrementa nondum per alvum secesserint, huic clyster est infundendus, siquidem validus & ætate florente sit; si vero debilior fuerit, glan-  
de utendum est, si non sua sponte probe prodie-  
rit. Tempus autem exhibendæ sorbitionis tum  
per initia, tum per totum morbum ( hoc ) ma-  
xime observare oportet. Quum quidem pedes fri-  
gidi fuerint, sorbitionis exhibitionem differre  
oportet; maxime vero & a potu temperandum  
est. Quum vero calor ad pedes descenderit,  
tunc dare convenit, reputareque cum in morbis  
omnibus, tum haud minime in acutis, ac potif-  
simum in magis febrilibus, ac periculosissimis  
hocce tempus plurimum posse. Primum autem  
maxime quidem cremore; deinde ptisana, præ-  
scriptas conjecturas accurate consulentem, uti  
oportet.



---

# HIPPOCRATIS

D E

## VICTUS RATIONE IN MORBIS ACUTIS

LIBER SECUNDUS.

---

### P R Æ F A T I O.

*C*ontinetur hoc libro curatio pleuritidis Hippocratica, per venæ incisionem, fomenta, mulsam, oxymel, accurate & vere, nisi quod in dolore lateris, infero venæ sectionem proscribit.

---

### A R G U M E N T U M L I B R I.

*Exemplo doloris lateris, prius de fomentis, venæ sectione, alvo subducenda, purgationibus, & aliis evacuationibus: deinde de cremore hordei, ptisana, maza, pane; de aqua, vino, aqua mulsa, aceto mulso; postremo de variis ac repentinis rerum asduetarum mutationibus amplissime hic differitur.*

### C A P U T I.

*Calefactoriis dolorem pleuritidis tentandum esse dissolvere, vel venæ sectione, vel alvum emolliendo,*



*aut veratro nigro; aut peplio, aut hujusmodi:  
deque harum rerum opportunitate.*

**L** Ateris autem dolorem, sive is per exordia, sive postea obortus sit, tentare calidis quidem fomentis primum dissolvere non dissimilaneum est. Fomentorum autem optimum quidem est aqua calida in utre, aut in vesica, aut in vasculo æneo aut testaceo (adhibita). Verum prius molle quidpiam ad latus lenitatis gratia subicere oportet. At commode etiam sponsia mollis magna, ex aqua calida expressa admovetur. Sed fomentum linteo involvendum est; etenim longiore tempore sufficiet ac perdurabit; atque simul ut ne halitus ad laborantis spiritum efferatur; nisi fortassis & hoc utilitatem quandam habere videatur; interdum enim ad aliquid opportunum est. Ad hæc autem & hordeum, & ervum in aceto temperato paulo acidiores, quam quis bibere queat, macerata, fervefacta, atque in sacculos confuta admovere oportet; eodemque modo fures. Siccum autem fomentum præbent sal, miliumque torrefacta, in sacculis laneis maxime idonea sunt: etenim leve ac blandum est milium. Fomentum hujusmodi lenes dolores etiam ad claviculam pertingentes solvit. At venæ sectio non peræque dolorem solvit, nisi dolor ad claviculam pertingat. Verum si fomentis dolor non solvatur, non multo tempore calefacito; id enim pulmones exiccat, ac suppurationem intus creat. Quod si dolor quidem ad claviculam sui det signum; aut ad brachium; aut circa mammam, aut supra septum transversum gravitas (sentiantur) internam flexus cubiti venam secare juvat, neque copiosum sanguinem detrahare cunctandum est; usque dum multo rubicundior, aut

pro puro & rubro lividus fluat; nam utrunque contingit. Si vero sub septo fuerit dolor, neque sui ad claviculam signum præbeat, alvum aut nigro veratro, aut peplio emollire oportet; veratro quidem nigro, daucum, aut fefeli, aut cuminum, aut anisum, vel aliud quidpiam boni odoris admisceas; peplio vero laſerpitii ſuccum; ſed & hæc inter ſe mixta congeneris ſunt facultatis. Sed veratrum quidem nigrum, melius, & ad judicationem commodius, quam peplium, alvum ducit; peplium vero ſtatus magis excutit. Sed hæc ambo dolorem ſedant. Sedant autem & alia multa ex iis, quæ vim habent dolorem ſedandi: verum quæ noverim ego, hæc ſunt optima. Quandoquidem & quæ in ſorbtionibus dantur alvum ſubducentia medicamenta, opitulantur, quæcunque vel propter amaritudinem, vel aliam quandam inſuavitatem, aut copiam, aut colorem, aut ſuſpicionem aliquam, non admodum ingrata ſunt. At vero ptifanam, quum epotum eſt medicamentum, inſuper ſorbendam ſtatim dare oportet, neque admodum pauciore, quam conſuetum eſt, copia. Quandoquidem rationi conſentaneum eſt, media in purgatione ſorbtionem non exhibere. Quum autem ceſſaverit purgatio, tunc minus quam pro conſuetudine ſorbeat; poſtea vero ſemper copia augeatur, ſi & dolor ſedatus fuerit, nihilque aliud repugnet. Eadem autem mihi ratio eſt, ſi & ptifanæ cremore utendum ſit. Melius enim eſſe dico, ſtatim omnino per morbi exordia ſorbere, potius quam prævacuatis vaſis aut tertio, aut quarto, aut quinto, aut ſexto, aut ſeptimo die ſorbtionem inchoare, niſi hocce tempore morbus prius judicatus fuerit. Præparationes autem & his conſimiles, quales dictæ ſunt, faciendæ,



De forbitionis igitur exhibitione ita sentio. Quin & de potu, qualemcumque tandem ex describendis quis potaturus sit, eadem omnino mihi est ratio. At vero novi medicos, qui contra omnino quam oporteat, faciant. Volunt enim omnes, ubi sub initia morborum homines, aut duos, aut tres, aut etiam plures dies inedia præmaceraverint, ita tum forbitiones, tum potiones exhibere. Et fortassis etiam ipsis consentaneum esse videtur, magna mutatione oboriente corpori, magnam etiam quandam mutationem contra obijcere, non parum quidem commutare bene habet; recte tamen etiam mutatio transferenda, & ex mutatione, ciborum exhibitio etiamnum magis. Plurimum igitur læduntur, qui tota utuntur ptisana, nisi recte mutationem fecerint; læduntur etiam & ii, qui solo utuntur cremore, læduntur præterea & qui solo utuntur potu, sed hi minime. Oportet autem & ex sanorum adhuc hominum victu, quæ conferant, addiscere. Si enim sanis tales vel tales victus magnopere inter se differre videntur, cum in aliis quibusdam, tum in mutationibus; quomodo & in morbis, maximeque in acutissimis, non multum differrent? Atqui quod simplex victus cibi & potus sui semper similis ad sanitatem tutior omnino sit, quam si quis subito ad alium meliorem magnam mutationem faciat, facile addiscitur. Quandoquidem tum bis die, tum semel cibum adfumentibus repentinæ mutationes, damna, & morbos invehunt: & sane qui prandere non consueverunt, si prandeant, ob id statim infirmos effici, & toto corpore graves, & imbecilles, ac ignavos. Quod si præterea cœnaverint, acidum eructant; nonnullis etiam alvi liquida dejectio oboritur: quum præter consuetudinem ventriculus pondere

pondere gravetur, reficcari confuetus, non bis intumescere, neque bis cibos coquere. Iis igitur conducit mutationem rependere: dormire siquidem eos oportet, tanquam noctem a cœna agentes; hyeme quidem citra frigus; æstate vero citra calorem. Quod si dormire nequeant, ubi multa lentaque ambulatione oberraverint, neque stabiliter, nihil cœnent, aut pauca, & innoxia; insuperque minus merum, neque aquosum bibant. Is præterea etiam magis adficietur, si ter die ad satietatem cibum sumpserit; ac etiamnum magis, si sæpius: quanquam multi sunt sane, qui ter die copiosum cibum facile ferunt, quod ita adfuerint. Quinetiam qui bis die cibum sumere consueverunt, ii, nisi pransi fuerint, imbecilles ac infirmi sunt, & ad quodcunque opus ignavi, & oris ventriculi dolore vexantur: iis enim viscera pendere videntur, calidum mejunt, & cum virore pallidum, stercusque exurit. Quibusdam etiam os amarescit, oculi cavantur, tempora palpitant, & extrema perfrigerantur. Ac plurimi quidem impransi cœnam absumere nequeunt; cœnati vero, ventriculum gravant, multoque difficilius in lecto decumbunt, quam si prius etiam pransi fuissent. Quum igitur talia hæc ob dimidiatæ diei victus a consuetudine mutationem sanis contingant, neque adponere quidquam, neque detrahere commodum esse videtur. Qui igitur præter consuetudinem semel cibum acceperit, & toto die evacuatis vasis, quantum consuevit, cœnaverit, si tunc impransus doluit, ac debilis fuit; & ubi cœnavit, gravatus fuerit, multo magis eum gravari par est. Quod si etiamnum longiore tempore evacuatis vasis, derepente post cœnaverit, magis adhuc gravabitur. Cui igitur præter consuetudinem vasa evacuata sunt, ei



hunc diem sic rependere confert, citra frigus, calorem, & laborem. Hæc enim omnia graviter tulerit: & cœnam, quam consuevit, multo parcio- rem faciat, eamque non siccam, sed quodam- modo humectiorem; & postea bibat neque aquo- sum, neque minus quam pro cibi ratione; pos- teroque die pauca prandeat, quo accessione facta ad consuetudinem redeat. Ista tamen eorum qui- dam molestius certe ferunt, qui in supernis par- tibus amara bile infestantur. Non consuetam au- tem cibi abstinentioniam facilius omnino ferunt, qui superioribus partibus pituitosi sunt: quare assum- ptum præter consuetudinem semel in die cibum hi facilius etiam tulerint. Satis igitur idoneum & hoc argumentum, quod eorum, quæ circa temperamentum nostrum, habitumque contin- gunt, maximæ mutationes, maxime morbos effi- ciunt. Neque sane intempestivas, neque vehe- mentissimas vasorum inanitiones moliri fas est; neque vigentibus morbis, & in inflammatione con- sistentibus, cibos exhibere, neque derepente huc aut illuc in toto negotio quicquam mutare licet.

---

## CAPUT II.

*Consuetos cibos ac potus præferendos esse; & re-  
pentinam diætæ mutationem sano quidem noxiam  
esse, non autem aegris.*

**A**C de rebus ad alvum reliquasque partes per-  
tinentibus, multa aliquis dixerit, quæ his  
adfinia sint, quod quidem cibos, quibus assueve-  
runt, facile ferant, etiamsi natura non boni sint;  
eodem modo & potus. Molestæ autem fuerunt ci-

bos, quibus non adfueti sunt, quamvis mali non sint; consimili modo & potus. Et quæcunque multus quidem carnis esus præter consuetudinem adsumptus facit, aut allia, aut laserpitium, aut ejus succus, aut caulis, aut ejusmodi alia insignibus prædita facultatibus propriis. Minus utique miretur quis, si quæ sunt ejusmodi, dolores ventriculis magis quam alia, inducunt. At si didiceris, quantam maza & turbationem, & tumorem, & flatum, & tormina ventri afferat, præter morem comesta ab eo, qui pane vesci solet; aut qualem panis gravitatem & tensionem ventris, mazam edere solito; vel qualem panis ipse calidus devoratus sitim inducat, & repentinam repletionem, tum quod exsiccet, tum quod tarde descendat. Et quam diversa inter se efficiant panes purissimi & confusanei, sive cibarii, præter consuetudinem in cibo adsumpti: itemque maza præter morem arida, aut humida, aut viscida: & quale quid polentæ efficiant recentes non adfuetis, aliæque iis qui recentibus adfueti sunt; & vini, & aquæ potus præter consuetudinem vicissim. derepente permutatus; & aquosum vinum, & meracum derepente præter consuetudinem epotum. Illud enim in superiore ventre humiditatem excrementitiam, & in inferiore statum inducit; hoc vero venarum palpitationem, capitis gravitatem, & sitim. Tum etiam vinum album & nigrum, præter consuetudinem immutanti, etiam si ambo vinosa fuerint: multa tamen in corpore alterarint; ut proinde minus admiratione dignum esse aliquis dicat, dulce & generosum vinum non eandem efficaciam habere, si ab uno ad alterum repente transitus fit. At adversariorum sententiæ, sic aliqua ex parte favendum est, quod his (ægris) victus



mutatio facta sit, corpore neque ad robur, ut cibos adjicere, neque ad infirmitatem, ut cibos demere oporteat, non immutato. Ad hæc autem & virium robur conjectandum est, & morbi cujusque modus, & hominis natura, & consuetudo, & ægri victus, non in cibis solum; verum etiam in potionibus.

---

## C A P U T III.

*Conjectanda ad dietam tuto ægris præscribendam.  
Oportere autem initio morbi sorbitionibus ægros  
nutrire, & ptisanæ cremore; inque morbi vigo-  
re tenuissima diæta utendum esse.*

**M**ulto autem minus ad additionem procedendum: quandoquidem ipsos detractione omnino subducere sæpenumero conducit, ubi suffecturus est æger, donec morbi vigor mitescat. In quibus autem hoc faciendum sit, scribetur. Multa vero etiam alia productis consimilia quis scribere possit. Hoc tamen melius est testimonium. Non enim solum rei, de qua plurimus a me sermo habitus est, cognatum est: sed res ipsa opportunissimum est documentum. Nam quidam per morborum acutorum exordia, nonnunquam quo tum laborare cœperunt, die cibos comederunt; quidam etiam postridie, nonnulli quoque quidvis sine delectu, alii etiam cyceonem sorpserunt. Sane hæc omnia deteriora sunt, quam si quis aliter victum instituerit: sed quæ hoc tempore præter legem fiunt, & peccata committuntur, minus damni adferunt, quam si quis primis quidem duobus, vel tribus diebus

omnino vasa exinanierit, mox quarto, aut quinto talem cibum exhibuerit. Deterius etiam tamen est, si quis totis his diebus vasis prævacuatis, posterioribus deinceps diebus ita victum instituerit, priusquam morbus concoctus sit: sic enim aperte plurimis mortem adfert, nisi mitis quidam omnino morbus extiterit. Quæ vero ab initio errata sunt, his non æque incurabilia sunt, sed multo facilius curantur. Hoc igitur maximum reor esse documentum, quod primidies hac vel illa sorbitione non sint privandi, in his, qui paulo post his aut illis sorbitionibus usuri sunt. Funditus igitur ignorant, qui hordeacea ptisana utuntur, quod ab ea male habeant, quum duobus, aut tribus, aut etiam pluribus diebus antea exinanitis vasis, sorbere cœperint. Neque etiamnum qui cremore utuntur, quod sorbentes lædantur, intelligunt, ubi non recte sorbitionem inchoaverint: hoc tamen cavent, & adgnoscent magnam adferre læsionem, si æger, priusquam morbus concoctus fuerit, ptisanam hordeaceam sorpserit, cremore uti assuetus. Omnia igitur hæc magna testimonia sunt, quod Medici non recte ægrotantes ad cibos adducant; sed & in quibus morbis vasa exinaniri non oportet, his, qui sorbitionibus uti debent, vasa evacuant; & in quibus ex vasorum inanitione ad sorbitiones transeundum non est, in his transeant; & plerunque absolute; aliquando vero iis occasionibus, ex vasorum inanitione ad sorbitiones transeunt, quibus sæpe a sorbitionibus ad vasorum inanitionem accedere prodest; si ita morbum exacerbari contigerit.



## CAPUT IV.

*Symptomata depravatae dietae, in principio morbi esse lethalia: exercitii & otii rationem iis similem esse, quæ ad alvum spectant.*

**I**nterdum autem & cruda a capite adtrahuntur, & a thoracis regione biliosa; vigiliæque his accidunt, ob quas non coquitur morbus; pertristes & amarulenti evadunt, delirant, & splendores ipsis ob oculos obverfantur, aures sonitu implentur, & extrema perfrigescunt, urinae tenues & crudæ, sputa tenuia fiunt, falsa, & colore sincero tincta, & exigua; sudores circa cervicem, & jactationes, & spiritus in ea, quæ sursum fit latione offensans, creber, aut magnus valde, supercilia gravitatem fortiuntur, pravae animi defectiones, vestium a pectore rejectiones, manus tremulae; interdum vero labium inferius concutitur. Hæc autem in principiis apparentia vehementis delirii sunt indicia, & plerumque (ægri) intereunt. Qui vero effugiunt, aut cum abscessu, aut sanguinis e naribus profluvio, aut puris crassi exspuitione evadunt, aliter autem minime. Neque enim horum ita peritos video medicos, quo modo debilitates in morbis dignoscere oporteat, & quæ ob vasorum evacuationem, & quæ ob aliud quoddam irritamentum, & quæ ob laborem, & ab acumine morbi oboriantur, quosque adfectus, ac diversas eorum species natura nostra, & habitus singulis pariat; & quidem hæc cognita aut ignorata, salutem aut mortem adferunt. Majus siquidem malum est, siquis ob laborem, & acumen morbi, debilitato potum,

aut forbitionem copiosiore, aut cibum, exhibeat, ob vasorum vacuationem imbecillum esse arbitratus. Indecorum autem est & ob vasorum vacuationem imbecillum non cognoscere, & victu opprimere: periculum siquidem aliquod adfert & hic error, multo tamen minus quam alter; sed multo magis altero risu dignior hic error est. Nam si medicus alius, aut etiam plebeius accesserit, & quæ contigerunt, cognoverit, dederitque tum cibos, tum potus, quos alter prohibuit, aperte auxilium adtulisse videatur; atque ista maxime artifices apud homines infamant: videtur enim ipsis qui accessit medicus, aut plebeius, hunc tanquam mortuum suscitasse. Propterea & signa scribentur, quæ de horum singulis haberi debent. Sed tamen & hæc sunt iis, quæ ad alvum spectant, consimilia. Etenim si universum corpus præter consuetudinem multum quieverit, non statim robustius evadit. Si vero sane & ubi diuturniori tempore otiatum, ad labores repente venerit, manifesto damno efficietur: ita vero & in singula corporis parte. Nam pedibus quoque & reliquis artibus, laborare non solitis, eadem evenient, si longo post tempore derepente ad laborem accesserint; eadem certe perpetientur oculi, & dentes, & quæcunque tandem pars. Quandoquidem & lectus præter consuetudinem mollis laborem facit, itemque præter solitum durus. Quin & sub dio cubile præter solitum corpus indurat. Sed & horum omnium exempla scribere fatius est. Siquis enim accepto in tibia vulnere, neque admodum periculoso, neque valde benigno, cui neque admodum difficile, neque admodum facile vulnera sanentur, statim prima ab initio die decumbens curetur, & nequaquam crus moveat; sic sane vulnus inflammationis expers



fuerit, multoque celerius sic sanus evaserit, quam si obambulans curaretur: si tamen quinto, aut sexto, aut etiam prius surgens ambulare voluerit, tunc magis utique ægrotabit, quam si statim ab initio oberrans curatus fuisset. Quod si repente graves labores susceperit, multo pejus afficietur, quam si illo modo curatus, aut ipsis diebus multa subito laboraverit. Hæc igitur omnia inter se perpetuo testantur, res omnes, quæ de repente supra modum in hæc vel illa magnopere mutantur, officere.

---

## CAPUT V.

*Noxiam esse mutationem a diuturna vacuatione ad cibi copiam, & a diuturno otio ad vehementem laborem: hujus mutationis cognitionem prodesse. De sorbitione cremoris hordei, deque vigiliæ somnique symptomatibus.*

**M**ultiplex itaque ventri affertur damnum, si ex multa vasorum inanitione derepente quid plus justo exhibeatur. Quin & reliquum corpus si ex multa quiete subito ad majorem devenierit, multo magis lædetur, quam si ex multo cibo ad vasorum inanitionem transeat. Corpus sane his quiescere oportet, imo si ex multo labore derepente ad otium ac ignaviam exciderit: oportet autem & his ventrem a ciborum copia quiescere; sin minus, corpori ægritudinem adferet, & totius corporis gravitatem. Plurimus itaque mihi fermo habitus est de victus rationis in hæc vel illa immutatione, quod hæc nosse valde sit utile, cum ad omnia, tum ad id etiam, de quo erat oratio; quod in morbis acutis, ex va-

forum inanitione, ad forbitiones (ægros) transire jubent, sic enim transeundum est, ut jam ante præcepi; deinde forbitionibus non utendum, priusquam maturuerit, aut signum aliquod aliud apparuerit, vel in intestinis vacuatorium, vel pro-ritatorium, vel in hypochondriis, qualia signa scribentur. Vehemens vigilia potus cibosque tum crudos, tum incoctiores efficit: ac rursus quæ in contraria fit mutatio, corpus dissolvit, & ex-coctionem ac capitis gravitatem inducit.

---

# HIPPOCRATIS

D E

## VICTUS RATIONE IN MORBIS ACUTIS

LIBER TERTIUS.

---

### PRÆFATIO.

*Definit de potulentorum in morbis acutis efficacia, aquæ ipsius, quam multis improbat (neque ego unquam ferre potui) mulsæ, oxymellis, vini, quod liberaliter propinat, ad languores potius reservandum de balneis.*



## CAPUT I.

*Vinum quale, & quibus conducit.*

**A**T vinum dulce, & vinosum, & album, & nigrum, & aquam mulsum, & aquam, & acetum mulsum, his notis in morbis acutis distinguere oportet. Dulce quidem vinoso minus caput gravat, & minus mentem ferit; magisque sane quam alterum, intestinorum dejectiones movet; viscera vero magna lienem jecurque facit; non igitur amara bile scatentibus idoneum. Hisce etenim sitiferum est; quinetiam superiori intestino flatum excitat; non tamen inferiori intestino pro flatus ratione est inimicum, etsi non admodum penetrat, qui a dulci vino est flatus; sed diutius circa hypochondria moratur. Etenim sane hoc in universum minus, quam vinosum album, urinas omnino movet. Sputum vero altero potentius educit, quod dulce est. Et quibus epotum quidem sitim facit, his minus, quam alterum vinum, educit; quibus vero siticulosum non est, his magis quam alterum educit. At vero vinum album vinosum jam plurimum ac maxima ex parte laudatum quidem, & vituperatum est in vini dulcis enarratione. Ad vesicam autem altero magis penetrans, & quum urinas provocet, ac semper perrumpat, multum his morbis contulerit: nam etsi ad alia altero minus est idoneum, quæ tamen in vesica ab eo fit purgatio, liberat, si quale oportet, propellatur. Bonæ hæ conjecturæ sunt de vini utilitate, & noxa, quas me seniores non didicerunt. Fulvo autem vino, & nigro austero in his morbis, tum quidem utaris, si capitis gravitas non affuerit, neque mentis percussio, neque sputum ab adscensu

prohibeatur, neque urina supprimatur, sed dejectiones humentiores, & ramentosiores fuerint; in his sane ex albo mutationem facere decuerit, & quæcunque his similia sunt. At insuper nosse oportet, si dilutius vinum fuerit, superiores quidem partes, & quæ circa vesicam sunt, minus lædere; si vero meracius, iis quæ circa intestina sunt, magis prodesse.

## C A P U T I I.

*Aqua mulsa, quibus conducibilis, quibus non.*

**A**T quæ potui datur mulsa toto morbi decursu, ex acutorum genere in universum quidem, tum amara bile redundantibus, tum quibus tument viscera, minus, quam non talibus est idonea. Sitini tamen minus, quam dulce vinum, infert. Etenim pulmonem emollit, & sputum mediocriter educit, tussimque lenit: habet nanque detergens quoddam, quod si modum excedit, efficit, ut iusto viscosius reddat. Urinas quoque mulsa sufficienter ciet, siqua viscerum affectio non prohibeat. Sed & biliosa excrementa magis subducit, interdum quidem bona, interdum vero magis quam deceat colore saturata, ac spumantiora; idque biliosis magis, & magna viscera habentibus, contingit. At sputi quidem educationem, ac pulmonis mollitionem dilutior mulsa magis efficit; spumosas vero dejectiones, & plusquam convenit sincera bile coloratas, calidioresque, meraca mulsa, quam aquosa, magis ducit. Talis autem dejectio habet quidem & alias graves noxias: neque enim hypochondriorum ardorem extinguunt, sed concitat; gravem,



molestamque membrorum jactationem facit; intestina vero ac sedem exulcerat; sed horum auxilia scribentur. Si igitur hisque in morbis, absque sorbitionibus aqua mulsa pro alio potu utaris; ut multa feliciter consequaris, ita non multum successu frustraberis. Verum quibus danda sit, & quibus non danda, & quas ob causas non danda, maxima ex parte dictum est. Damnata vero est ab hominibus aqua mulsa, quod ipsam bibentes prorsus debilitet, ac propterea mortem accelerare existimata est. Quod quidem propter eos, qui de vita per inediam discedunt, dictum est: nonnulli enim sola mulsa in potu utuntur, tanquam nimirum talis sit. Verum non prorsus ita se res habet; sed si mulsa sola bibatur, aqua quidem multo valentior est, nisi alvum exturbaverit. Sed & vino albo, tenui, parum aquæ ferente, & inodoro; quodammodo validior est, & quodammodo debilior. Multum tamen differt tum vini, tum mellis meracitas, ad utriusque robur. Nam etiamsi duplam vini meraci mensuram quis biberit, ratione mellis quod delinxerit, tamen a solo melle multo validior fuerit, nisi alvum turbaverit. Nam & multo plus stercoris ipsi prodibit. Si tamen pro sorbitione ptisana utatur, insuper vero aquam mulsam bibat, hunc vehementer replebit, ac flatus concitabit, & hypochondriorum visceribus erit noxia. At si ante sorbitionem mulsa bibatur, non ut superepota lædit, imo etiam aliquo modo opitulatur. Cocta autem aqua mulsa adspectu quidem quam cruda longe præstantior est. Splendida namque & tenuis, alba, & pellucida est: sed quam ipsi virtutem attribuiam, qua crudam antecellat, non habeo, neque enim cruda est suavior, si mel probum esse contigerit; cruda tamen est imbecil-

lior, ac minus ducit stercoreis ; quorum neutro ad præsidium mulsa indiget. Præcipue vero ejusmodi ( mulsa cocta ) utendum ; si mel pravum fuerit , & impurum ; & nigrum , neque boni odoris : coctura nanque majorem pravitatum ipsius foeditatem tollit.

---

## CAPUT III.

*Acetum mulsum quibus conducibile , quibus noxium.*

**A**T vero acetum , vocatum mulsum , epotum sæpenumero his in morbis esse perutile comperies : etenim sputum sursum educit , & facilem respirationem facit ; hæc vero habet opportunitates. Quod sane valde acidum est , non majorem efficaciam ad sputa non facile prodeuntia habebit. Nam si exasperantia educeret , ac lubricitatem induceret , & veluti si guttur dilataret , pulmonem utique leniret ; ( nam ipsum emolliret. ) Quod sane si hæc contingerent , magnam id utilitatem præstaret ; interdum vero valde acidum , sputi educationem non fortitur , imo & magis glutinosum reddit , & officit. Id autem maxime perpetiuntur etiam , qui alias perniciose habentes , neque tussire , neque , quæ intus retinentur , exscreare possunt. Ad hoc igitur ægroantis robur conjicere oportet ; & si de eo spem habeas , exhibere. Exhibere autem oportet , si dederis , summe tepidum , idque paulatim , neque affatim. Subacidum vero oxymel os quidem & fauces humectat , sputum educit , & sitim sedat ; hypochondriis ac visceribus ibi locatis placidum est , & ex melle noxias hac parte prohibet ; quod enim in melle biliosum est , emendat : quin



& flatus discutit, urinasque promovet. Intestini tamen inferiorem partem humectiorem reddit, & ramenta inducit. Interdum autem & in acutis morbis hoc pravum est, maxime vero, quod flatus foras prodire prohibeat, imo remeare faciat. Præterea vero etiam debilitat, & extrema refrigerat. Atque hancce noxiam solam ex aceto mulso oboriri novi, quæ etiam ut scribatur digna sit. Exiguum autem ejusmodi potum nocte quidem & jejuno ante forbitionem propinare convenit; sed & quum a forbitione multum intersit temporis, bibere nihil prohibet. Solo vero potu citra forbitiones pro victu utentibus, propterea hoc uti semper & perpetuo non idoneum est; maxime quidem propter intestini abrasionem, aut exasperationem. Quum enim stercore vacuum sit, magis hæc induxerit, quum vasorum adsit vacuatio; postea vero & aqua multa vires diminuerit. Si tamen opitulari apparuerit ad totum morbum copiosus hujus potionis usus, paucum aceti, quoad solum adgnoscat, affundendum est. Ita enim tum quæ lædere solet, ea minime læserit; tum quibus prodesse opus est, his proderit. Ut autem in summa dicatur, orti ab aceto acores, amara bile abundantibus magis, quam melancholicis, conferunt. Amara nanque dissolvuntur, & in pituitam abeunt, dum ab ipso adtolluntur; nigra vero fermentantur, in sublime adtolluntur, ac multiplicantur; acetum enim nigra per superiora evocat. Mulieribus autem longe magis, quam viris, adversatur acetum; nam uterum dolore afficit.

## CAPUT IV.

*Aquæ potus parum juvat in morbis acutis : ejusque rei ratio.*

**A**T vero aquæ potui acutis in morbis, aliud sane nullum munus habeo, quod adscribam. Neque enim in pleuriticis ac peripneumonicis tussim lenit, neque sputum educit; imo cæteris minus, siquis perpetuo aqua ad potum utatur. Verum si inter acetum mulsum, & aquam mulsam aquæ pauculum forbeat, sputum educit propter qualitatis potuum transmutationem; quandam enim intus inundationem advehit: alias neque sitim sedat, sed irritat, siquidem biliosæ naturæ biliosa est, & præcordiis mala, imo pessima, ac biliosissima, viresque maxime labefacit, ubi in vacuitatem venerit. Lienem quoque & hepar auget, quum inflammata fuerint, fluctuatque ac innatat; tarde siquidem permeat, quod subfrigida sit & coctionis expers; neque alvum, neque urinas movet. Nonnihil etiam insuper obest, quod natura feces non educat. Quod si sane pedibus etiamnum frigentibus aliquando epota fuerit, has omnes noxas multo graviores adferet, ad quancunque tandem inclinaverit. Quum vero in ejusmodi morbis vehementem capitis gravitatem, aut mentis læsionem suspicatus fueris, a vino penitus abstinendum est; quo in statu aqua utendum, aut vinum aquosum omnino, flavumque exhibendum, ac prorsus inodorum; atque post ipsius potum aquæ exiguum superbibendum: ita enim vini vehementia caput, ac mentem minus feriet. Sed in quibus maxime ex his morbis aquæ potu utendum



fit, & quando copiosissima, & quando moderata, quando frigida, & quando calida, partim quidem antea dictum est, partim vero suo quæque tempore dicetur. At de cæteris potibus, qualis est hordeaceus, & qui ex herba virente, uva passa, vinaceis, tritico, cnico, myrtis, malo punico, & ex aliis parantur, quum horum aliquo uti tempestivum fuerit, in morbo ipso scribetur, ubi & de compositis agetur medicamentis.

---

## C A P U T V.

*Non omnibus, nec semper balneis utendum esse.*

**B**Alneum vero plerisque morbis, eo utentibus contulerit, his quidem assidue, his vero minime; interdum vero & eam ob causam balneo minus utendum est, quod id homines non recte parare sciunt. At nisi quis accurate lavetur, plurimum inde damni sentiet. Tecto enim citra fumum opus est, & copiosa aqua, & frequenti balneo, sed non immoderatus affuso, nisi res ita postulaverit. Et deterfione quidem potius minime utendum est: at si detergatur, calido ipso ac multo copiosiore, quam fieri soleat, deterfitorio medicamento utendum; multa subinde aqua adfundenda est, & protinus (super ægro) diffundenda. Atque via brevi ad solum opus est, tum ad facilem descensum, tum adscensum. Qui lavatur, moderate se componat, ac tacitum esse oportet; ipsumque nihil agere, sed cæteros tum perfundere, tum detergere. Multa quoque aquæ contemperatio paranda est, celeresque perfusiones faciendæ; ac spongiis pro strigili utendum est, neque valde siccum corpus inungendum. Caput  
spongia

Spongia deterfum, quoad maxime fieri poterit, reficari oportet; neque caput, neque extrema, neque reliquum corpus refrigerari, ac neque eum qui recens forbitionem, aut potum fumpfit, lavare oportet, neque statim a balneo forbere, neque bibere. Enimvero magna pars ægrotanti tribuenda est, si is quum sanitate frueretur, balneo valde oblectatus fuerit, & lavari consueverit. Etenim tales magis appetunt, lotique juvantur, illotique læduntur. Balneum vero peripneumoniæ magis, quam febribus ardentibus in univèrsum, accommodatum est: etenim lateris, pectoris, ac dorsi dolorem balneum lenit, sputum maturat, educit, ac facilem spirationem reddit, & lassitudines tollit, (quum articulos & cutis superficiem emolliat): sed & urinas ciet, capitis gravitatem solvit, & nares humectat. Tot igitur commoda balneum affert, quibus omnibus opus est; sin vero apparatus penuria aliqua in una re vel in pluribus fuerit, periculum est ne magis lædat balneum, quam prosit; Earum enim unaquæque, nisi a ministris prout oporteat, apparata fuerit, magnam noxam advehit. At quibus alvus in morbis plus æquo liquidior est, iis balneum minime opportunum est; imo neque iis, quibus magis quam deceat adstricta est, neque prius soluta. Sed neque viribus defectos lavare oportet, neque ciborum fastidio, aut vomitu jactatos, neque biliosa eructantes; neque quibus sanguis e naribus profluit, nisi minus, quam opportunum sit, fluat (tempus autem nostri): si vero parcius quam pro occasione fluat, lavare convenit, sive univèrsum corpus in cæteris, sive caput solum juverit. Si igitur apparatus idonei fuerint, ægerque feliciter balneum suscepturus sit, quotidie lavare oportet. Quos



autem balneum oblectat, eos etiam si bis die laveris, nihil aberraveris. Tota vero ptisana utentibus multo magis uti balneo licet, quam solo cremore utentibus; licet autem & his interdum; minime vero solo potu utentibus. Sunt autem & ex iis, quibus uti licet; ex præscriptis vero conjiciendum est, tum quibus in singulis victus modis profuturum sit balneum, tum quibus minime. Quibus nanque aliquid eorum maxime deest, quæ balneum bonum efficiunt, & balneo conferunt, lavare oportet; quibus vero nihil horum deest, & adsunt ipsis signa in quibus lavari conducit, lavare oportet.

# HIPPOCRATIS

DE

## VICTUS RATIONE IN MORBIS ACUTIS.

### LIBER QUARTUS.

#### P R Æ F A T I O.

*M*ihi manifesto spurius videtur, vel ob formularum numerum, & ob medicamenta, quæ in legitimis scriptis HIPPOCRATIS non reperias. Sparsi sunt de rebus omnino sui dissimilibus commentarii: historiae non male morborum, pleuritidis, anginae, cholerae, hydropis, ad quam cantharides suadet & alia acer-

*rima: inde monita dietetica, de carribus, herbisque, de condimentis aphorismi varii, & conclusiones nimis late a peculiaribus eventis ad generalia axiomata. Vomitus dieteticum ter quaterve de mense imperat, ut in libris de dieta. Intercedunt etiam chirurgica.*

---

## ARGUMENTUM LIBRI.

*De multis morbis acutis, & aliis; de causo, angina, aphonia, præcordiis inflammatis, catarrho, arterie ulceratione, pulmonis ardore, diversis febribus, pleuritide, peripneumonia, dysenteria, ictero, tetano, hydrope, hæmorrhoidibus, suppuratis, eorumque symptomatis, variis doloribus lateris, oculorum, lumborum, & aliarum partium; quorum diagnostica, prognostica & therapeutica traduntur.*

**A**T febris ardens fit, quum resiccatae venulæ tempore æstivo, acres & biliosos serofos humores ad se adtraxerint. Ac febris multa detinet; corpusque velut ossuaria lassitudine affectum; laborat, ac dolet. Fit plerunque tum ex longo itinere; tum a longa siti, quum arefactæ venulæ acres calidasque fluxiones ad se adtraxerint. Fit vero lingua aspera, & sicca, valdeque nigra; partiumque ventris morfu dolet; dejectiones sunt liquidæ, tum pallidæ fiunt; sitis adest vehemens, & vigiliæ, atque interdum mentis alienationes. Huic tum aquam, tum mulsam coctam aquosam, quantum desideret, potui dato. Quod si os amarum fuerit, vomere confert, & alvum subluere.



Verum si ad hæc non solvatur, cocto asinino lacte purgato. Salsum autem nihil; neque acré exhibendum; non enim ( æger ) ferret. Sorbitionem vero, antequam extra crises fuerit, ne dato. Et si sanguis e naribus fluxerit, solvitur affectio; itemque si sudores supervenerint judicatorii legitimi, cum urinis albis crassisque, & lævibus sedimentis; ac si abscessus aliquis obortus fuerit. Sin vero absque his solutus fuerit, reversio morbi rursus erit, aut coxæ, aut crurum dolor accidet, exspuetque crassa, si sanus futurus sit.

Febris ardentis genus aliud. Alvus subducitur; sitis lingua aspera, sicca, falsa. Urinæ suppressio, vigilia, extrema refrigerata. Tali, nisi sanguis e naribus fluxerit, aut circa collum abscessus, aut crurum dolor oboriatur, & ( æger ) sputa crassa exspuerit ( hæc autem suppressa alvo contingunt ) aut coxæ dolor, aut pudendi livor supervenerit, non judicatur; testiculus quoque intensus, judicatorius est. Sorbitiones dato adtractorias. In acutis autem morbis venam secabis, si morbus vehemens appareat, & qui ægrotant, ætate vigeant, & virium robur ipsis adfuerit. Atenim si angina, aut si quis alius ex pleuriticis morbus fuerit, medicamentis, quæ delinguntur, repurgato; at si imbecilliores appareant, ac plus sanguinis detraxeris, infuso in alvum tertio quoque die utendum, donec in tuto æger fuerit, aut etiam fame opus habeat.

Tumentia hypochondria non spirituum interceptione, septi transversæ contensionibus, aut spirituum protensionibus, quibus in rectæ cervicis spiratione sicca pus non subest; sed a spirituum interceptione hæ affectiones succedunt; potissimum vero & vehementes jecoris dolores & lienis gravitates, atque aliæ inflammationes, & supra

septum tranversum dolores, morborumque collectiones solvi nequeunt, si quis prius medicamentis purgare aggressus fuerit; verum in his venæ sectio princeps remedium est; deinde vero clysteres, nisi vehemens & magnus fuerit morbus; si minus, etiam postea medicamento purgante opus est. Quod & post venæ sectionem purgans medicamentum securitate, ac moderatione indiget. Quicumque vero statim per initia morborum, inflammationes purgante medicamento solvere conantur, ii de contenta quidem ac inflammata parte nihil detrahunt, quum nihil cedat, quæ adhuc cruda est adfectio; verum quæ morbo reluctantur, & sana sunt, ea contabefaciunt. At debili evadente corpore, morbus invalescit; quum autem morbus corpori prævaluerit, is curationem non admittit.

Subitam autem vocis cessationem venarum interceptiones faciunt, si bene valenti citra occasionem, aut vehementem aliam causam id contigerit. Vena igitur brachii dextri interna secanda est, ac sanguis detrahendus, inita secundum habitum ac ætatem plurius minorisque ratione. Horum autem quamplurimis hæc accidunt, faciei rubores, oculorum immobilitates, & manuum distentiones, dentium stridores, pulsationes, maxillarum contractio, extremarum partium refrigeratio, & spirituum in venis interceptiones. Cum dolores accesserint, sanguinis melancholici, acriusque humorum affluxiones fiunt. Demorsæ autem partes internæ dolent. Demorsæ vero & nimis arefactæ venæ, tum distenduntur, tum inflammatæ concidunt, colliguntque ea, quæ affluunt: unde corrupto sanguine, ac spiritibus vias, quæ in ipso secundum naturam sint, permeare nequeuntibus, perfrigerationes fiunt ob stabilitatem, vertigines, vocis ces-



latio, capitis gravitas, & convulsiones: si jam ad cor, aut ad venam pervenerint. Hinc epilepsiæ, aut partium resolutiones eveniunt, si in ambientes locos fluxiones inciderint, atque spiritibus exire nequeuntibus exaruerint. At his sane, prius adhibitis fomentis, confestim per initia venam secare oportet, quum adhuc sublati sunt, qui vexant omnes, tum spiritus, tum fluxiones; facilius etenim remediis patent. Et recreatis viribus, & prospectis judicationibus, si non levetur, venter superior medicamento purgandus est; inferior autem alvus, nisi clystere subducatur, lacte asinino, quod coctum exhibito, neque minus quam heminas duodecim bibat; atque si virium robur ipsi adsit, plusquam sexdecim.

Angina fit, quum sub hyemem aut verum tempus multa ac viscida fluxio e capite ad jugulares venas defluerit, æque propter amplitudinem, copiosiore fluxionem adtraxerint. Quum autem, quod & frigida & viscida sit, obstruat tum spiritus, tum sanguinis vias occludens, vicinas sanguinis partes cogit, ipsumque immobilem ac stabilem efficit, quum frigidus natura sit, & obstruendi vi præditus; ob id suffocantur, livente lingua & rotunda evadente, ac reflexa, propter venas linguæ subjacentes. Nam subsecta uvula, quam nonnulli columellam vocant, vena utrinque crassa apparet; quum igitur hæ oppletæ fuerint, linguæ, quæ ob siccitatem & rara & spongiosa est, innituntur; ea vero præ violentia ex venis humorem accipiens, ex lata, rotunda efficitur; ex bene colorata, livens, ex molli, dura, atque ex flexibili, inflexibilis; ita ut cito suffocet, nisi quis celeriter auxilietur, tum facta ex brachiis venarum sectione, tum sectis, quæ sub lingua sunt, venis, & medica-

mentis linctu medentibus, & calidis oris collutionibus : abrafo quoque capite, ceratum tum collo, tum capiti admovendum, & obvolutis laniis, mollibusque spongiis ex aqua calida expressis fofus adhibendi. Aqua etiam, & mulfa non frigida bibenda est; cremor denique adfumendus, quum jam ex judicatione in tuto fuerit.

Quum vero æftiva vel autumnali tempeftate ex capite calida & nitrofa fluxio defluerit, ut quæ ab anni tempeftate tum acris, tum calida fit; quum hujusmodi fuerit, mordet, ulcerat, & fpiritu implet, erectæ cervicis fpiratio, ficcitasque multa accedit, quæ fub confpectum cadunt, gracilia videntur; posteriores quoque cervicis tendines contenduntur, ac velut nervorum diftentione corripiti videntur: vox quoque abrupta eft, ac fpiratio parva; fpiritusque retractio denfa, ac violenta oboritur. His arteria ulceratur, pulmo incenditur, neque externum aerem introducere queunt; at his (affectio) nifi ad exteriores cervicis partes ultro deferatur, gravior ac inevitabilior eft, tum propter anni tempus, tum quod a calidis acribusque (fit humoribus). Si febris prehenderit, veteri ftercore non fubeunte, aut recenti cibo accepto, five cum lateris dolore, five fecus; eum quietem agere oportet, donec cibi recrementa primum ad imum ventrem defcenderint. Potu autem uti aceto mulfo; at quum gravitas ad lumbos devenerit, inferiorem alvum clyftere fubluito, aut medicamento purgato; quum vero purgatus fuerit, pro victu forbitiorem primum & aquam mulfam; deinde cibaria & elixos pifces præfcribere, vinumque aquofum paucum ad noctem, interdium vero dilutam mulfam. Quum vero flatus ita graveolentes fuerint, aut glande fubdititia, aut alvi infufo (utendum;)



sin minus, in aceti mulsi potu contineto, donec cibi ad inferiorem alvum descenderint; deinde sic elytere subducito.

At si liquidam alvum habenti febris ardens oboriat, si purgare tibi idoneum esse videatur, intra tres dies ne purgaveris, sed vel quarto. Quum autem purgaveris, sorbitionibus utere, observatis febrium accessionibus, ut nequaquam quum adsunt, neque quum futuræ sunt, exhibeas, sed quum cessant, vel quieverunt, & quam longissime ab eorum initio. Frigentibus autem pedibus, neque potum, neque sorbitionem, neque aliud quicquam hujusmodi dabis. Verum maximum esse ducito, si expectaveris, quousque valde incaluerint; deinde id quod utile est, exhibe: frigus enim pedum plerunque febris accessuræ signum est; at eo tempore siquid exhibueris, maxime per omnia peccaveris; morbum namque non parum auxeris. At quum febris desinit, vice versa pedes reliquo corpore calidiores fiunt; quum enim pedes refrigerat, augetur, & ex thorace accensa, flammam ad caput remittit; at confertim calore universo sursum concurrente, atque ad caput exhalante, merito pedes frigescunt, quum natura excarnes & nervosi sint: præterea & a calidissimis locis multum distantes, refrigerantur, sese colligente ad thoracem calore. Ac rursus eadem ratione, quum febris solvitur, & in minutas partes distribuitur, ad pedes (calor) descendit; hoc igitur tempore caput & thorax refrigerantur: eas ob res (sorbition) exhibenda; quod quum pedes frigidi fuerint, calidum ventriculum esse necesse est, multoque fastidio plenum, intentum esse hypochondrium, & corporis jactationem propter internam turbationem, mentis abalienationem, & dolores; (æger) vellicatur, vomere cupit, & si prava vo-

muerit, dolet. At quum calor ad pedes descenderit, urinaque prodierit, etiamsi non sudaverit, omnia cessant; eo igitur tempore sorbitio exhibenda est, alias perniciofa. Quibus autem alvus per febres perpetuo liquida est, his ubi pedes eximie calefeceris, ceratis contexeris, fasciisque obvolveris, animum attende, ne sint reliquo corpore frigidiores; quod si calcant, calefactorium nulum admove, sed cave ne frigescant: potu est utendum quam paucissimo, aqua frigida, aut mulfa.

At quibus in febribus alvus liquida est, & mens perturbata, & horum multi floccos vellunt, naresque fodiunt, & parum quidem ad interrogata respondent, ipsi vero per se nihil compositum dicunt; fane talia mihi melancholica esse videntur. His autem ita se habentibus, si alvus liquida fuerit, & colliquescens; sorbitiones frigidiores & crassiores exhibendæ mihi videntur, & potiones, quæ alvum fistant, vinosiores potius, quam alstringentes.

Quibus autem per febres ab initio tum vertigines, tum capitis pulsationes sunt, ac urina tenuis, in his dum ad crises febris exacerbetur, expectandum est; neque si delirarent, mirarer. At quibus principio urinæ nebulosæ, aut etiam crassæ sunt, hos, si cætera quoque conferant, subpurgare oportet; quibus vero urinæ inter initia tenues, eos ne purgato; sed si videatur, alvum subluere. Hos ita curare confert. Corpus quieti conciliare, ungere, & æqualiter contegere oportet; at pro potu mulfa aquosa uti, & in sorbitione cremore hordei ad vesperam; alvum ab initio subluere, sed his purgantia medicamenta ne exhibeto. Siquid enim circa ventrem commoveris, urina non concoquitur, sed febris sine sudore, & judicatione, diu perdurabit. Sorbitiones autem, quum pro-



pe iudicationes fuerint, ne dederis, si perturbetur; sed quum (turbatio) remiserit, resque in melius processerit.

Omnium autem febrium iudicationes observandæ sunt, atque eo tempore sorbitiones detrahendæ. Hæ vero febres longæ fieri consueverunt, & abscessus habere circa aures & cervicem, si quidem infernæ partes frigidæ fuerint; quod si frigidæ non fuerint, alias habent mutationes. Fluit autem & sanguis e naribus, & his alvi exturbantur. Quibuscunque vero febres anxiosæ sunt, & hypochondria contendunt, quique decumbentes eodem in loco stare nequeunt, & extremis omnibus frigescunt, hi maximam diligentiam & custodiam requirunt; eos autem sic degere oportet, ut non nisi acetum mulsum dilutum exhibeas, neque sorbitionem offeras, donec (febris) desierit, & urina concocta fuerit. Decumbere autem in conclavi obscuro (debent) & in stratis quam mollissimis reclinati, longo tempore eundem decubitum perferre, & quam minime sese jactare: id enim eos maxime juvat. Supra vero hypochondrium lini semen illitum admove, cavendo ne inhorrescat (æger) quum apponitur; sit autem summe tepidum, ex aqua & oleo coctum.

Conjectare vero oportet ex urinis, quid futurum sit; si namque crassiores pallidioresque fuerint, meliores: si vero tenuiores & nigriores, deteriores. Si autem mutationes habeant, temporis diuturnitatem indicant; morbusque necessario tum ad deterius, tum ad melius commutat inæqualitatem. Inconstantes vero febres, donec constant, sinere oportet: quum autem constiterint, victu & curatione convenienti occurrere, facta secundum naturam speculatione. Sunt autem facies ægrotantium multæ: quare medenti animadvertendum

est, ne aliqua ipsum manifesta causa lateat; neque earum quæ ratiocinatione cognoscuntur, neque earum quas die pari aut impari apparere oportet. Maxime igitur numerus impar verendus est; quod hi dies in alterutram partem ægros inclinare faciant. Observare itaque oportet, primum diem, quo æger debilis esse cepit, cognito principio ex quo, & quando; id enim nosse præcipuum existimatur.

Quum autem ipsum interrogaveris, etiam hæc omnia considerabis, imprimis quidem, quomodo caput habeat, an dolore vacet, neque gravitatem in se habeat; deinde an hypochondria, lateraque dolore careant. Si videlicet hypochondrium doleat, aut attollatur, aut obliquitatem aliquam habeat, aut satietatem, aut lateris dolor adfuerit, simulque cum dolore aut tussicula, aut tormina, aut ventris dolor; quum autem horum quicquam hypochondrio adfuerit, alvum potissimum per clysterem solvere oportet; bibat autem mulsam calidam coctam. Sed & perdiscendum, an in exsurrectionibus defectu animi corripiatur, & an spiritum facile ducat. Inspicienda quoque alvi dejectio, num vehementer atro colore prodierit, an sincera, quales sunt sanorum dejectiones, & an tertio die exacerbetur febris. Ubi autem huiusmodi tertianos circuitus in his morbis probe admodum inspexeris, præterea jam & alia consideranda sunt; & si quartus dies tertio quicquam in ipsis simile habuerit, æger in periculo versatur.

Ex signis autem, nigra dejectio mortem significat; quæ vero sani dejectioni similis est, ubi per omnes dies apparuerit, salutaris. Quum autem alvus glandi subditæ non cesserit, & facilis spiratio adfuerit, surgensque æger ad sedem, aut in ipso lecto animi defectu corripiatur.



tur; quum hæc ægro, aut ægræ inter initia affuerint, delirium adfore expecta. Mens vero manibus quoque adhibenda est; nam si tremulæ fuerint, huic sanguinis e naribus destillationem futuram expecta. Inspicere vero ipsas quoque nares oportet, an per utrasque spiritus æqualiter trahatur; & si multus e naribus fertur, convulsio fieri adsolet; si vero convulsio fiat, huic mors expectanda est, & bene habet, si quis prædicat.

At si in febre hyberna, lingua aspera fiat, adsintque animi defectus, huic etiam remissio febris contingere consuevit; verumtamen eum summa inedia curare oportet, & aquæ, ac mulsæ potione, ptisanæque cremore conservato: nihil febris remissioni fidens, quod hujusmodi signa habentes, in mortis periculo versentur. Quum autem hæc cognoveris, optimeque contemplatus fueris, ita fore, si lubeat tibi, prædicendum. Quum autem in febribus quinto die quid terrificum contigerit, aut alvus repente liquida dejecerit, & animi defectus inciderit, aut vocis suppressio prehenderit, aut convulsio vel singultus evenerit, ex his jactari æger consuevit, & sudores sub naso, & circa frontem, ac cervicem posteriore capitis parte suboriri; at qui hæc patiuntur, suspiriosi non multo post intereunt. Quibus autem per febres crura scatent tuberculis, quæ diu immorantia, febribus etiamnum perseverantibus, non maturantur, faucibusque irruit suffocatio, quum nullus tumor in faucibus sit, neque tubercula maturuerint, sed extincta fuerint, iis sanguis e naribus fluere consuevit; qui si copiosus fluxerit, morbi solutionem portendit; sin minus, longitudinem: quo vero parcius fluxerit, eo deterius, & magis diuturnum. Quod si & cætera facillima fuerint, huic dolo-

res ad pedes expectandi; qui si pedem attigerint, isque dolere perseveret, inflammetur, & non levetur; dolores paulatim ad cervicem pervenient, & ad claviculam, ad humerum, ad pectus, & ad articulum; huncque tuberculofum fieri oportebit. His vero extinctis, si manus contrahantur, vel tremulæ fiant, eum convulsioprehendit, ac delirium; quin etiam in superciliis pustulas ferventes, & rubores habet, & palpebra altera ad alteram pergerminat, dura tenet inflammatio, tumet vehementer oculus, & delirium valde increfcit; at noctes magis, quam dies, delirii significationem præbent. Multa vero signa ad numerum imparem magis, quam parem, contingunt: utro tamen horum numerorum contingant, lethales (morbi) succedunt. Hos vero si per initia quidem medicamentis purgare volueris, ante quintum (facito) si venter murmuraverit; si non, impurgatos finito: verum si murmuraverit, alvi-que dejectiones biliosæ fuerint, scammonio moderate subpurgato. In reliqua vero curatione potus ac sorbitiones parcissime exhibeto, quo melius æger habeat, nisi remissione facta decimum quartum transgressus fuerit.

Quum febricitanti decimo quarto die vocis interceptio accesserit, non cita morbi fieri solutio, neque liberatio solet, sed tali temporis diuturnitatem indicat; quum itaque hoc die apparuerit, diuturnior morbus evadit. Quum febricitanti lingua quarto die perturbate fermocinatur, & alvus biliosa liquida dejicit, is delirare consuevit; sed ex eventis, quid consequatur, observandum.

Æstiva ac autumnali tempestate in acutis repentina sanguis destillatio, venarum contentionem, multumque fervorem significat, ac postero die urinas tenues futuras; & si (æger) ætate viguerit, fuerit-



que corpore ob exercitationes bene carnosæ, aut melancholico, vel ex potatione manus tremulæ fuerint, delirium aut convulsionem prænunciare decet. Et si paribus quidem (diebus) supervenerint, melius: judicatoriis vero, perniciosum; nisi copiosus cumulate concitatus sanguis reduntantiæ exitum fecerit per nares, aut per sedem, aut puris excretiones, aut abscessus, aut humorum translationes, aut hypochondriorum dolores, aut ad testes, aut ad crura: his autem concoctis, viæ patent sputis, urinisque crassis, lævibus, albis.

Febri singultuosæ silphii succum, acetum mulsum, daucum tritum potui dato; galbanumque ex melle, & cuminum delingendum; posteaque ptisanæ cremorem forbendum. Is autem evadere non potest, nisi judicatori sudores, & somni æquales accesserint, urinæque crassæ, & acres defluerint, aut in abscessum (morbus) decubuerit. Nux pinea & myrrha ad delingendum (exhibeantur;) his vero acetum mulsum quam paucissimum potui dato: sed si vehementer siticulosi fuerint, aquam hordei.

Peripneumonicos & pleuriticos adfectus ita considerare oportet; an febris acuta sit, & dolores lateris alterius, aut utriusque, & quum sursum fertur spiritus, num laboret, tussés adsint, & sputa educantur rufa, aut livida, aut etiam tenuia, & spumosa, & florida, & siquid aliud discrepet ab iis, quæ illis consueta sunt; ita degere oportet. Si dolor quidem sursum ad claviculam, aut circa mammam, & brachium pertingat, internam brachii venam secare oportet, utracunque fuerit parte, ea in ipsa. Sanguinem vero detrahere pro corporis habitu, anni tempore, ætate, & colore copiosius, & audacter, & si dolor acutus fuerit, ad animi usque deliquium ducere: postea cly-

stere alvum subducere. Si vero deorsum sub thorace dolor fuerit, valdeque urgeat, pleuritico alvum subpurgato; at medio purgationis tempore nihil dato, post purgationem autem acetum mulsum. At quarto die purgandum, verum per tres ab initio dies alvus subluenda; quod si ita non levetur, subpurgato. Custodia vero adhibeatur adusque febris decessionem, ac septimum diem: deinde si in tuto esse videatur, in primis exiguum ac tenuem cremorem admisto melle dato: quod si facile sputum educat, facile spiraret, & laterum dolore careat, paulo crassiores & copiosiores, ac bis die dato. Quod si non facile liberetur, pauciores potionem, modicam sorbitionem, cremorem tenuem, & semel, eo quo melius degit tempore; quod ex urinis deprehendes. Sorbitionem autem his in morbis prius adferre non oportet, quam urinas, aut sputa concocta esse videris. Quod si medicamento purgatus multum dejecerit, dare necesse est, verum pauciores ac tenuiores; non enim poterit præ vasorum vacuatione dormire, neque concoquere similiter, neque judicationes sustinere: verum ubi crudorum colliquationes factæ fuerint, & quæ renituntur rejecerit, nihil obstabit. Concocta autem sputa quidem sunt, quum, puri similia apparuerint; urinæ vero, ubi sedimenta subrubra habuerint, quale eruum est. Cæteris autem laterum doloribus tepefactoria ac cerata admoveere nihil prohibet; crura & lumbos (oleo) calido inungere, & pinguedine illinere; hypochondriis autem adusque mammas ex lini semine cataplasma imponere. Quum autem peripneumonia ad statum pervenerit, nisi repurgetur, auxilium non admittit, ac prava est, si æger difficile spiraverit, urinæ tenues &



acres sint, sudoresque circa cervicem, & caput oboriantur; hi enim sudores pravi sunt, præ suffocatione, & impetu, & violentia morbis superantibus, nisi urinæ copiosæ ac crassæ proruperint, & sputa cocta prodierint; horum autem quidquid sua sponte evenerit, morbum solvet.

Peripneumoniæ medicamentum ad delingendum. Nux pinea, & galbanum ex melle Attico; abrotanum ex aceto mulso, piper, & veratrum nigrum fervefacta pleuritico etiam per initia perdolenti bibenda dato. Confert etiam panacem ex aceto mulso fervefactum, percolatumque propinare tum hepaticis, tum in septi transversi doloribus; & quæcunque per alvum, aut mictionem deducere voles, hæc ex vino, & melle (dabis:) quæ ad alvum, illa cum mulsa aquosa copiosiore propinato.

Dysenteria sedata abscessum aut tumorem aliquem faciet, nisi (desierit) aut in febres, aut sudores, aut urinas crassas, albas, valde perspicuas, aut in tertianas, aut in varices; aut in testiculum, aut in crura, aut in coxam dolor decubuerit. In biliosa febre morbus regius ante septimum diem cum rigore succedens febrem solvit; citra rigorem vero intempestive obortus, lethale.

Lumborum distentio, & ex atrabilariis humoribus per venas spirituum interceptiones quum adfuerint, venæ sectione solvuntur. Quum autem a tendinibus vehementer in anteriorem partem revelluntur, sudoresque circa cervicem & faciem oriuntur, dum præ dolore mordentur, ac resiccantur tendines adusque ossis sacri extremum porrecti, qui quidem crassissimi spinam continent, qua parte maxima ligamenta exorta ad pedes usque desinunt; huic nisi febris, & somnus succerit, & quæ sequuntur coctionem habentes urinæ, sudoresque judicatorii prodierint, vinum Creticum

cum vinosum bibendum, & pultem seu farinam coctam edendam exhibeto; cerato quoque perungere, atque illinere convenit, & crura ad pedes usque calida in pelvi madefacta, velamentis contingere, ac brachia ad digitos usque involvere, lumbosque a cervice ad coxas usque, molli pelle, axungia & cera illita obducere, ita ut anteriora etiam contineat; & ex intervallis per utriculos calida aqua affusa foveto, ac linteo obvolvito, ipsum decumbere iubeto. Alvum autem ne admodum, nisi subditiâ glande, solvas, si ex longo tempore non dejecerit; & si quid tibi processerit in melius, (satis:) sin minus, modi radicem in vino odorato tritam & daucum mane jejuno ante calidæ perfusionem propina; & post hæc cito farinam coctam tepidam quam plurimam edat, vinumque quum voluerit bene temperatum superbibat; & si res quidem in melius tibi processerit, (bene habet;) sin minus, prædicendum.

At morbi omnes solvuntur, aut per os, aut per alvum, aut per vesicam, aut alium aliquem ejusmodi articulum; sudoris autem species morbis omnibus communis est. Quibus a capite fluxio fertur, his veratrum dare oportet. Quicumque vero ex abscessibus, aut venæ ruptione, aut ob intemperantiam, aut ob aliam vehementem quandam causam suppurati fiunt, his ne elleborum dederis; nihil enim proderit; & siquid patiat æger, in causa esse videbitur elleborus. Si vero corpus dissolvatur, aut dolor in capite sit, aut oppletæ aures, aut nares, aut sputatio, aut genuum gravitas, aut corporis præter consuetudinem tumor; quidquid horum contigerit, dabis, si hæc neque a mœrore, neque a curis, neque a vigiliis oriantur; & siquid sane horum causa fuerit, ad id curationem instituere oportet. Dolores autem laterum, dorsi, lumbi



borum, coxarum, qui ex itinere contingunt, & quæcunque inter spirandum ex causa manifesta dolent; sæpius enim dolores ex crapulis, cibisque flatulentis, ad lumbos & coxas venire consueverunt. Quibus vero ipforum talia fuerint, his urinæ difficultas accedit: horum autem iter causa est, gravedinis quoque & raucedinis.

Quæcunque ex victus ratione contingunt, multa quidem unusquisque, prout præter consuetudinem victu usus fuerit, maxime observat; etenim qui prandere non consueverunt, si pransi fuerint, his ingens ventris tumor (oboritur) tum dormitatio, tum plenitudo; si vero supercœnaverint, alvus exturbatur. His a balneo dormire confert, & a somno lenta deambulatione multos conficere circuitus: quod si quidem alvus evacuata fuerit, cœnare, & parcum vinum, sed meracius bibere; si vero alvum non exoneraverint, corpus oleo calido illinere: &, si sitis urgeat, epoto vino aquoso albo, aut dulci, quiescere; si vero non dormierit, amplius quiescere: in reliquis similis victus ratio, qualis crapula gravatis, instituatur.

Ex potionibus autem quæ quidem aquosiores sunt, tardioris sunt transitus, ac velut in orbem actæ circum hypochondria fluitant, & ad mictionem non decurrunt: tali vero potione repletus, nullum celeriter ex iis absolvet opus, quæ contendenti corpori vi & celeritate elaborare accidit; quam maxime autem quiescat, donec una cum cibis concoctæ fuerint. At vero potiones meraciores, & austeriores sunt, palpitationem in corpore, atque in capite pulsationem efficiunt; his belle fuerit, si superdormiant, & calidum quid ex iis, quæ potissimum suavissima ipsis sunt, forbeant. At vero jejunium ad capitis dolorem & crapulam, malum est; qui semel die cibum sumunt,

hi & imbecilli sunt, & calidum mejuunt, præter consuetum vasis vacuatis; os ipsis falsum, & amarum efficitur, in omni opore tremunt: tempora distenduntur, cœnamque perinde ac si pransi fuissent, concoquere nequeunt. Hos autem minus bibere oportet quam consueverunt, liquidioremque mazam pro pane edere; atque ex oleis ruicem, aut maluam, aut ptisanam & betas. At vinum in cibo, quantum est moderatum, ac dilutius bibendum est, atque a cœna paululum deambulandum, donec excurrat urina, minxerintque; piscibus etiam coctis utantur.

Eduvia vero de se potissimum præbent indicia. Allium flatum, & calorem circa thoracem facit, capitis gravitatem, & anxietatem, & si quis alius dolor antea fieri consueverit, eum exacerbaverit; urinas autem ciet, idque habet bonum. Optimum vero est, ut quis ipsum edat, si aut ebrius est, aut ad potationem ire volet. Caseus flatum, & adstrictionem, & ciborum incendium facit, crudum, & incoctum (edulium:) repletos autem in potu edere, deterrimum est. Legumina omnia flatulenta sunt, & cruda, & elixa, & frixa, minime vero vel macerata, vel viridia; his autem nisi cum cibariis utendum non est. Sed horum singula suum vitium habent. Cicer quidem statum, tum crudum tum frixum, & molestiam affert. Lens adstringit, ac turbationem inducit, si cum cortice sit. Lupinus autem horum malorum habet minima. Lasepitii tum caulis, tum succus, nonnullis quidem maxime; inexpertis vero per alvum non descendit. Verum sicca cholera (huc malum) vocatur; fit autem maxime, si cum multo caseo, aut bubularum carniū edulio mixtus fuerit. Nam & melancholicæ affectiones bubularum car-



nium esu ingrevescunt, quod earum natura insuperabilis sit, neque omnis eas ventriculus concoquere possit: at optime liberabuntur, qui perelixis, & perquam vetustis utentur. At caprinæ carnes optimæ; nisi quæ bubulis insunt vitia, habeant omnia, & cruditatem; flatusque, & ructus magis movent, & choleram generant. Verum quæ odoratissimæ, solidæ, & suavissimæ sunt, hæ optimæ sunt tum perelixæ, tum frigidæ; quæ vero insuavissimæ, graveolentes, & duræ, hæ deterrimæ; imo etiam quæ recentes. Optimæ autem sunt æstatis tempore; autumno vero pessimæ. Porcelli carnes pravæ, quum crudiuseculæ, & ambustæ fuerint: magis autem tum turbationem efficiunt. Suillæ autem carniū omnium optimæ sunt; præstantissimæ vero, quæ neque vehementer pingues, neque contra vehementer graciles sunt, neque veteris victimæ ætatem assequutæ. Edendæ vero sunt absque pelle, ac frigidiusculæ; In cholera sicca venter inflatur, & strepitus insunt, & dolor tum laterum, tum lumborum; nihilque alvus dejicit, sed adstricta est. Ita affectum, ne vomat, servato, verum alvus subducatur. Clysterem itaque calidum, ac pinguiissimum celeriter injice; perunctumque in aquam calidam, & quam plurimam, in folio collocatum, & calida sensim adfusa demittito; ac si calefacto ipsi alvus subducatur, liberatus est. Huic etiam dormire confert, ac vinum tenue, & vetus, & meracius bibere: oleum quoque dato, ut quiescat, & alvus subducatur, & solvitur (morbus;) a cibis autem, atque cæteris abstineat; verum si dolor non remiserit, lac asininum bibendum, donec purgatus fuerit, exhibeto. At si alvus liquida fuerit, ac bilis dejiciatur, vexentque tormina,

vomitibus, & suffocationibus; quiescere his est optimum, mulsum bibere, & non vomere.

Hydropum duæ naturæ sunt, quorum alter sub carne, si fieri incipit, vitari non potest; alter vero cum flatibus, multam prosperam curationem expostulat; maxime autem laboribus, fotu, & temperantia. Sicca autem, & acria edat; sic enim maxime urinam excreverit, ac viribus pollebit. Si vero difficulter spiraverit, fueritque tempus vernum, & ætas viguerit, & virium robur adsit; sanguinem e brachio detrahendum oportet, deinde calidos panes vino nigro, & oleo intinctos edat, & quam minimum bibat, & quam plurimum laboret; suillasque carnes carnosas cum aceto coctas edat, ut acclives obambulationes sustinere possit.

Quicumque ventres inferiores calidos habent, ipsis & acres, & inæquales dejectiones a colliquatione prodeunt. Quibus quidem si vires validæ fuerint, revelles elleboro albo; sin minus, trimestris tritici cremor crassus & frigidus exhibendus, & lenticulæ pulmentum, panesque subcinericii, ac pisces: febricitanti quidem elixi; non febricitanti vero, assa. Vinum etiam non febricitanti nigrum; sin minus, aqua ex mespilis, aut myrti baccis, aut malis, aut sorbis, aut palmulis, aut labruscæ florentis racemulis. Si vero febris non detineat, absintque tormina, lac asininum calidum, modicum primum; deinde sensim progressu facto amplius bibat, & lini semen, & triticeam polentam, & fabas Ægyptias, exempto amaro quod inest, detracto cortice inspergens, potui exhibeto: aut ova semiconcreta edat assa, & similam, & milium, & alicam ex lacte coctam: hæc cocta frigida edenda, hisque similia & pocula, & edulia exhibenda.



Dietetices maximum est, febrium tum intentiones, tum remissiones ut in acutis, sic & longis morbis observare, ac cavere, ut tempora quibus cibi offerendi non sunt, serves, & quando tuto offerendi sint, cognoscas; atque etiam quando plurimum ab intentione adfuerint. At nosse oportet eos, quibus caput dolet ob exercitationes, aut cursus, aut itinera, aut venationem, aut quemvis alium intempestivum laborem, aut res venereas; decolores, raucedinosos, lienosos, exangues, difficile spirantes, sicca tussi laborantes, siticulosos, flatulentos, & venarum interceptiones; & eos, quibus intenta sunt tum hypochondria, tum latera; tum dorsum, ac torpore detentos, & obscure videntes, & eos quibus aurium tinnitus incidunt, & qui urinas non continent, morbo regio laborantes, & quorum alvi cruda dejiciunt, quibus sanguis e naribus, aut sede vehementer erumpit, aut inflationibus obsessos, si his vehemens dolor incurset, neque superiores sint: horum nullum medicamento purgandum esse; etenim periculum invehes, nihilque juvabis, spontaneasque liberationes, ac judicationes adimes.

At sicut sanguinem detrahere conferat, firmam prius alvum facere oportet, atque ita detrahere; & ægrum inedia macerare, eique vinum demere; postea congruenti victu, & soribus humidis reliquam curationem perage. At si constricta alvus esse tibi videatur, eam molli clystere subluere. Si vero purgandum esse visum fuerit, tuto per veratrum sursum purga, deorsum vero talium neminem. Optimum autem est, ad urinas, ad sudores, & ad deambulationes adducere, & leni frictione uti, ut ne habitum densiorem efficias; si vero in lecto decumbat, alii eum fricent. Et si in thorace quidem supra septum transversum affec-

tus læserit, eum ut plurimum desidere convenit, & quam minimum reclinari, quoad vires ferant, sedentemque longo tempore oleo multo calido perfricari; si vero in inferiore alvo sub septo transverso doloribus afficiatur, decumbere confert; nulloque motu moveri, præterquam frictione, tali corpori conducit. Qui vero ex inferiore alvo solvuntur dolores, per urinas, & sudores, si moderate delabantur, qui parvi sunt, sua sponte solvuntur; vehementes autem pravi sunt: tales enim aut intereunt, aut aliorum maiorum expertes non convalescunt; verum quæ ejusmodi sunt, incumbunt ac firmantur.

Potio hydropi idonea. Cantharidas tres ablatis cujusque capite, pedibus, & alis, earum corpora in tribus aquæ cyathis trita (exhibe;) & quum ex epoto medicamento laboraverit, calida perfundatur; illitus autem prius, jejunus bibat, & ex oleo panes calidos edat.

Sanguinem sistens medicamentum. Fici succum lana exceptum intus ad venam appone. Aut coagulum involutum in nares immitte. Aut chalcitidem digito prius formatam apprime, & cartilagine utrinque foris comprime, alvumque lacte asinino cocto solve, & caput rade, & refrigerantia, si anni tempestas calida fuerit, admove. Sesamoides sursum purgat, sesquidrachmæ pondere ex aceto mulso tritum, & potui datum; commiscetur autem & veratris tertia potionis pars, ac minus suffocat. Ad Trichosin, Immissum acuti foramen habenti filum in summa superioris palpebræ margine deorsum versus facta perpunctione trans mitte, aliudque sub hoc inferne trajicito; extensa fila confusa, ac colliga, quoad decidant. Et si satis quidem habuerit; bene cedat; sin minus, siquid deficiat, rursus eadem facienda. Hæ-



morrhoidas quoque eodem modo, impulso per acum crassissimo & quammaximo lanæ fuccidæ filo deligabis, (securior enim evadit hæc curatio), deinde iis compressis, septico medicamento utere, neque priusquam deciderint, perfunde; unamque perpetuo relinque; & postea resectis viribus, elleboro purgandum, deinde exerceatur; & exfudet, & ante exercitationem mane frictio multa fiat; cursu abstineat, ebrietate, & acribus, excepto origano. Vomat septimo quoque die, aut ter in mense: sic enim optime corpus habuerit. Vinum fulvum bibat, austerum, & aquosum, & modicum.

Purulentis dissectos scillæ orbiculos in aqua coquito; & ubi valde efferbuerit, effunde, & alia affusa coquito, quoad tactui percocti, & molles apparuerint. Deinde læviter tritis cuminum frixum commisce, alba sesama, & amygdalas recentes tritas, atque hæc melle excepta, delingenda exhibeto; & postea vinum bibat dulce. Sorbitiones autem, papaveris albi subtriti parvum acetabulum, aqua loturæ farinæ hornæ maceratum, melleque adfuso coctum, tepidum sorbeat; sicque diem transigat: deinde quæ contingunt expendens ratione, cœnam dato.

Ad Dyfenteriam. Fabarum purarum quadrantem, furculosque rubiæ duodecim tritos commisce, & coquito, ac pingui addito, delingenda præbeto.

Ad Oculos. Spodium lotum, tanquam farinæ massam probe subactum, non liquidum, læviter teras, acerbo uvæ immaturæ & amaræ fucco humectatum, & in sole resiccatum, ut illini queat, humectato: quum autem siccum evaserit, læviter tritum, siccum oculis illine, eorumque angulis insperge. Ad eosdem humi-

dos. Ebeni drachmam , æris uſſi obolos novem in cote terito , croci obolos tres , his læviter tritis , vini dulcis heminam Atticam affundito ; deinde Soli exponito , & contegito , atque ubi cocta exaruerint , his utere. Ad vehementes eorum dolores. Chalcitidis drachmam , uvæ expreſſæ reliquas partes duas , myrrham , crocumque terito , muſto admixto , in Sole coquito , & eo vehementer dolentes illinito ; ſit autem in vaſe æneo. Earum , quæ ab utero ſuffocantur , cognitio ; digitis duobus comprime , quod ſi ſenſerit , uteri ſtrangulatio eſt ; ſi non , convuſſio.

Ad hydropicos. Meconii ſeu pepli , acetabulum parvum Atticum rotundum potui dato. Squamæ æris quantum ſpecilla tria lata capiunt , cum farina recenti agglutinentur , hæc læviter trita , in catapotia convolvens dato ; deorſum aquam purgant , & ex alvo ſtercus deturbant. In caricis ſingulas ſucci tithymalli guttas ſeptem inſtilla ; deinde in vas novum compoſitas reconde , ac prædicto ante cibum exhibe. Hydropicis cicutam tritam , aqua affuſa , dato edendam , & ſuperbibendum : & meconium ſeu peplum terito , aqua affuſa percolato , & farina ſubactum in placentam coque , mel coctum affundens , hydropicis edendum exhibe , ac ſuperbibendum ( vinum ) dulce aquoſum , vel dilutam muſſam porrige. Quod autem ab excrementis meconium colligis , aſſerua , & cura.



---

# HIPPOCRATIS

## LIBER DE FRACTURIS.

---

### P R Æ F A T I O.

*E* Gregium opus, sapientis viri, & experti, & HIPPOCRATE dignissimum. Fracturas in humero, femore, tibia, cubito, luxationes in genere, tibiæ, cubiti, recte exponit, administrationes chirurgicas dilucide docet cum cautellis, machinis, monitisque chirurgicis. Recte extensionem in fractis & luxatis jubet primo die facere & secundo, neque unquam tertium expectare. Ad experientiam suam ubique provocat. Condone antiquitati, si virgarum cornerum inflexarum elatere tibiam extendere suasit.

---

### S E C T I O P R I M A.

**O**PORTET medicum & luxationum, & fracturarum extensiones quamdirectissimas facere. Hæc enim justissima natura est. Si vero quid vel hac, vel illac inclinarit, ad pronam partem vergere convenit. Minus enim hoc peccatum est quam ad supinam. Qui igitur nihil præmeditati sunt, plerumque nihil peccant. Ipse enim qui deligatur, manum porrigit, ut qui ita a justa natura cogatur. Qui vero sapientes sibi videntur medici, hi sunt nimirum qui peccant.

Studii igitur non multi est manum fractam tractare, & quilibet, ut ita dicam, medicus hoc potest. Verum cogor plura de hoc scribere, quod sciam medicos esse, qui sibi sapientes esse videntur ex figuris manus in deligatione, ex quibus ipsos indoctos esse putare oportebat. Sed enim multa in hac arte modo judicantur. Quod enim peregrinum est, quum nondum intellexerint an bonum sit, magis laudant quam familiare, quod jam bonum esse sciunt; & alienum magis laudant quam probe notum. \* Dicendum igitur, quænam medicorum peccata de natura manus tum dedocere, tum docere velim. Nam & aliorum corporis ossium doctrinam hic sermo affert. Manum itaque, de qua nobis sermo est, quidam pronam deligandam dedit; ille vero cogebat sic tenere velut sagittantes, quum humerum injiciunt, atque ita habentem deligabat. hoc ipsum illi secundum naturam esse existimans; & in testimonium adducebat tum omnia cubiti ossa, quod directionem inter se haberent, tum coloris concordiam, quod ipsa per seipsam rectitudinem haberet, idque hoc modo & externa & interna parte. Hoc modo etiam dicebat, & carnes, & nervos a natura productos esse, & artem sagittandi in testimonium citabat, & hæc dicens, ac faciens, sapiens esse sibi videbatur. Verum aliarum artium oblitus erat, & eorum quæ robore & eorum quæ artificiis operantur ac efficiunt, non animadvertens aliam in alio figuram secundum naturam esse, & in eodem opere alias dextræ manus figuras secundum naturam esse, alias sinistræ, si ita contingat. Alia enim figura in jaculatione secundum naturam est, alia in fundæ jactu, alia in lapidis jactu, alia in pugilatu, alia in quiescendo. Quot vero artes invenire quis possit, in quibus non



eadem figura manuum naturalis est? & in unaquaque arte aliter ad instrumentum, quod quisque habet, & ad opus, quod perficere vult, manus figurantur. Ei vero, qui sagittandi artem exercet, hanc figuram alterius manus optimam esse, consentaneum est. Cardiniformis enim brachii pars, in cubiti sede in hac figura innitens, ossibus cubiti & brachii rectitudinem facit, veluti totum unum esset; & refectio articuli fracta est in hac figura. Verisimile est igitur hoc modo minime flexibilem & rigidissimum esse hunc locum, & non superari, neque remittere, dum a dextra manu nervus trahitur: & sic nervum quidem quamplurimum trahet, a firmissimo vero, ac confertissimo emittet. Ex talibus enim sagittarum emissionibus celeres & vehementiæ, & longinquitates fiunt. Deligationi vero cum arte sagittandi nihil commune est. Nam & ubi deligavit, si manum ita habiturus esset, multos utique dolores majores vulnere adderet; & si flectere juberet, neque ossa, neque nervi, neque carnes in eodem permanerent, sed superata deligatione alio transferrentur. Et quæ tandem est figuræ sagittarii utilitas? Et in hac parte fortasse non peccaret is, qui sibi sapiens esse videtur, si ipsum vulneratum sibi manum exhibere permetteret. \* Alius porro medicus supinam manum præbens ita extendere jubebat, atque hoc modo habentem deligabat, hanc figuram naturalem esse putans, conjectura esse colore facta; & ossa hoc modo secundum naturam esse existimans, eo quod os eminens circa manus juncturam, ubi parvus digitus est, e directo esse apparet ejus ossis, ex quo ulnam homines metiuntur, & hæc testimonia adducebat, quod secundum naturam hoc modo figura se haberet; & recte dicere putabatur.

At vero si quidem manus supina extendatur, vehementer utique doluerit. Cognoscere autem poterit hoc quisque sua manu ita extenta, quod dolorosa est hæc figura. Nam & debilior vir, fortiolem ita manibus suis comprehensum, ut cubiti flexura supina frangitur, quocumque voluerit duxerit. Neque enim si gladium in hac manu habeat, eo uti poterit, adeo violenta hæc figura est. Deinde si ubi deligavit quis, in hac figura sinat, major quidem dolor ubi obambulet, magnus autem etiam ubi decubuerit, sentietur. Quin & flectere manum si opus fuerit, omnino necesse est & musculos, & ossa aliam figuram habere. Sed & citra reliquam perniciem in hac figura hæc ignorabat. Os enim circa juncturam manus eminens, juxta parvum digitum, hoc quidem cubiti est. Quod vero in flexura est, a quo ulnam homines metiuntur, id brachii caput est. Ille vero idem os esse, & hoc & illud putabat; itemque multi alii. Est autem idem cum illo, is qui cubitus sive cubiti gibbus vocatur, in quem innitimur. Si quis igitur ita supinam manum habeat, tunc & os distortum apparet, & nervi a manus junctura tendentes ex interna parte, & de digitis, distorti fiunt. Tendunt enim hi nervi ad os brachii, unde ulna mensuratur. Tanta sane, ac talia sunt peccata, & ignorantiae naturæ manus. Si vero velut ego jubeo, manum fractam quis extendat, os quidem quod est circa parvum digitum, ad cubiti flexuram tendens, in directum convertet, rectitudinem vero habebunt nervi a manus junctura ad brachii summas partes tendentes; & manus dum appensa excipitur, in consimili figura erit, in quali etiam erat dum deligaretur, ita ut neque ambulanti, neque decumbenti ullus dolor aut fatiga-



tio accedat. Desidere vero hominem ita oportet, ut ossis pars ad clarissimam præsentem lucem constituatur, ne is qui extensionem tractat, circa sufficientem directionem fallatur. Nam periti artificis manum admotam, ne os quidem emicans in contactu latere poterit. Porro ex cubiti ossibus ubi non ambo fracta sunt, facilior curatio est, si supernum os fauciatum est, etiamsi crassus id existat; partim quod sanum subtentum fundamenti loco ipsi est, partim quod facilius occultari potest, nisi juxta manus juncturam fauciari contigerit. Crassa enim est caro, quæ superne innascitur. Infernum vero os excarne est, & non facile occultari potest, & vehementiore extensione opus habet. Si vero hoc contritum non fuerit, sed alterum illud, vilior extensio sufficit. At si ambo fracta fuerint, fortissima extensione opus habent. In puero etenim vidi extenta magis quam oportebat. Verum plerique minus quam oportet, extenduntur. \* Convenit autem, facta extensione, volis admotis dirigere; deinde cerato illito non ita multo, ut ne deligamenta circumfluent; ita deligare, ut summam manum non inferius cubiti flexura habeat, sed etiam paullo superius, ne ad summam partem sanguis influat, sed intercipiatur. Postea linteo deligare, initio ejus supra fracturam injecto, ita ut firmet quidem, non tamen admodum premat. Postquam autem circumdedit eodem loco bis aut ter, ad supernam partem deligans distribuat, quo sanguinis influxiones intercipientur, & illic desinat. Convenit autem prima lintea non esse longa. Secundorum vero linteorum initium supra fracturam injicere, ita ut semel circumdet eodem loco, deinde deorsum distribuat, & minus premens, & magis traducens, quo linteum dextram deligentur, aut ad

ipsi sufficiens sit, ad recurrendum eo ubi alterum desivit. Hic igitur lintea ad sinistram, aut dextram deligentur, aut utram partem contulerit, ad fracturæ figuram, & in utram declinare expedierit. Postea vero splenia extendere oportet, modico cerato illita. Nam sic & mitius & stabilius se habent. Deinde sic linteis deligare alternatim, modo in dextram, modo in sinistram; & plerumque inferne initio facto, sursum ducere; aliquando etiam superne deorsum. Extremitates autem subaridas, & in acutum abeuntes, spleniis obvolutis curare oportet, ita ut copia opertiorum non totum acervatim, sed particulatim corrigat. Insuper autem circa manus juncturam sive articulum laxè circumdate splenia oportet alias atque alias. Copia vero linteorum sufficiens primum, duæ partes sunt. Signa autem bene curati, & terminus rectè deligati, hæc sunt: si interrogaveris ipsum an compressus sit, & si compressum quidem se esse dixerit, sed leniter, & maxime circa ipsam fracturam. Hujusmodi ita facta esse perpetuo dicere oportet eum, qui rectè deligatur. Signa vero mediocritatis hæc sunt. Ea die ac nocte qua deligatus est, ipse sibi videatur non minus, sed magis compressus esse. Postridie vero tumorem parvum, mollem ad summam manum obortum esse. Mediocritatis enim factæ a te compressionis signum hoc est. Desinente autem die minus compressus esse sibi videatur. Tertia vero die deligamenta laxa esse ipsi videantur. Et si quid horum jam relatorum defecerit, noscere oportet deligationem moderata laxiorem esse. Si vero quid ex relatis abundaverit; nosse oportet ultra modum compressum esse. Et ex his conjectura facta, postea deligans aut laxabis, aut comprimes magis. Resolvere autem oportet ter-



tia die; ubi extenderis. Et si primum moderate deligasti, hanc deligationem paullo magis quam illam comprimere oportet, & initia supra fracturam injicere, quemadmodum etiam antea. Si quidem enim hanc prius deligaveris, fanies ex hac ad extremitates hinc atque illinc exhauritur. Si vero aliquam aliam partem prius compresseris, in illam ex compressa exhauritur. Intelligentia autem ad multa utilis est. Sic igitur semper incipere oportet & deligationem, & compressionem ex hoc loco. Reliqua vero juxta rationem, ita ut quanto longius a fractura digressus fueris, minus comprimās, nunquam quidem laxa omnino circumdando, sed adhærentia. Postea vero pluribus linteis deligare oportet in singulis deligationibus. Et si interrogetur, dicat se paullo magis compressum esse quam prius, & præsertim circa fracturam. Sed & alia & circa tumorem, & circa dolorem, & circa adlevationem pro prioris deligationis ratione fiant. Postquam vero tertius jam aderit dies, laxiora esse ipsi videantur deligamenta. Deinde resolvere oportet, & rursus paullo, magis comprimendo deligare, & hoc cum omnibus linteis, quibus deligandus erat. Et postea omnia ea ipsum apprehendant, quæ etiam in primis deligationum circuitibus contigerant. Ubi vero tertius aderit dies, & septimus a prima deligatione, siquidem recte deligatus fuerit, tumor in summa manu, atque hic non valde magnus erit. Locis autem, qui deligatur, in omnibus deligationibus tenuior, ac gracilior comperietur: verum in septimo etiam valde tenuis; & ossa fracta magis moventur, & facilius ad correctionem ducuntur. Et si hæc hujusmodi fuerint, facta coaptatione velut ad ferulas adhibendas deligare oportet, paullo magis

com-

comprimendo quam antea, si non dolor aliquis major fuerit ex tumore, qui est in summa manu. Postquam autem linteis deligaveris, ferulas circumponere oportet, & vinculis quam laxissimis circumdare, quietis saltem gratia, ut ferularum appositio ad compressionem manus nihil faciat. Postea vero & dolor, & adlevatio eodem modo fiant, velut in primis deligationum circuitibus. At vero ubi tertio die laxas esse dixerit, tunc postea ferulas firmare oportet, maxime quidem circa fracturam, sed & alia juxta rationem, si quidem & deligatio magis laxa fuerit, quam comprimat. Crassissimam autem ferulam esse oportet, qua parte extat fractura, non tamen multum. Et ad hoc studium vel maxime adhibendum est, ut ferula e directo magni digiti non ponatur, sed hac vel illac: immo neque a directo parvi digiti, qua parte os supereminet in manus articulo, sed hac vel illac. Quod si ad fracturam conferat hac parte aliquas ferulas poni, breviores ipsas aliis esse oportet, ut ne perveniant ad ossa præminencia, juxta manus articulum. Periculum est enim ulcerationis, & denudationis nervorum. Oportet autem tertio quoque die ferulis valde leniter firmare, hoc cogitantes, quod ferule, deligationis conservandæ gratia, apponuntur, non autem compressionis gratia adligantur. Si quidem igitur probe novaveris, quod in prioribus deligationibus ossa sufficienter sunt directæ, & neque pruritus infestum, neque ulla aliqua ulceratio suspecta sit: ita cum ferulis deligatum finire oportet, donec viginti dies transgressus fuerit. In triginta enim diebus universis maxime ex toto cubiti ossa corroborantur. Certum tamen nihil est. Nam & natura & natura, & ætas ab ætate valde differunt. Post.



quam autem solveris, aquam calidam adfundere oportet, & postea deligare, paullo minus comprimendo quam antea, & paucioribus linteis quam prius. Et postea tertio quoque die solvere, ac rursus deligare, ita ut minus comprimas, & paucioribus linteis utaris. At vero si ubi ferulis deligatus est, ossa non recte posita esse suspiceris, aut aliud quid vulneratum vexet, in dimidio temporis spatio, aut paullo prius solvere, & rursus deligare oportet. \* Victus porro his, quibus ab initio ulcera non facta fuerint, neque ossa extra eminent, sufficit aliquanto simplicior. Verum parciore victu utendum est ipsis usque ad diem decimum, ut qui jam etiam quiescant; & obsoniis tenellis utendum, quæ transitui mediocritatem exhibent. A vino vero, & carnis esu abstinendum. Postea tamen sensim progressu facto reficiendi sunt. Hic sermo velut lex iusta posita est de fracturarum curatione, & quomodo tractare oporteat, & quomodo eventus sequi, ex iusta tractatione. Quidquid vero non ita eventum habuerit, scire oportet, quod in tractatione quid defectuose, aut redundanter factum est. Quin & hæc insuper in hoc simplici modo considerare oportet, quæ non ita valde curare solent medici, & quidem quum omnem curationem, & totam deligationem corrumpere possint, si non recte fiant. Si enim ambo ossa fracta fuerint, aut infernum solum: is vero qui deligatus est, in fascia quadam manum exceptam ac appensam habeat, & plurima fasciæ pars circa fracturam existit, ita ut manus hinc atque hinc pendeat: hunc necesse est reperiri os ad supernam partem distortum habentem. Si vero sic fractis ossibus, & summam manum in fascia habet, & partem iuxta cubiti flexuram, reliqua vero cubiti pars non sit

elevata: hic ad infernam partem os distortum habere comperietur. Proinde in fascia molli latitudinem habente maximam cubiti partem, & manus articulum æqualiter suspendere, ac elevata gestare oportet.

## S E C T I O I I.

**A**T vero si brachium fractum fuerit, si quidem quis extentam manum in hac figura extendat, musculus brachii extentus deligabitur. Postquam autem deligatus cubiti flexuram inflexerit, musculus brachii aliam figuram habebit. Iustissima igitur brachii extensio hæc est. Lignum cubitale, aut paullo brevius, qualia sunt ligna, quæ in foramina ligonum immittuntur, suspendere oportet, hinc atque illinc cætera deligatum. Hominem vero in alta quapiam sede collocatum, ita manu superincumbere oportet, ut lignum id sub ala sit moderate habens, ut homo vix sedere possit, & fere sublevatus sit; supposito postea alio quopiam fulcimento, & coriaceo pulvino uno aut pluribus subjectis, quo moderatam altitudinem habeat cubitus, ad rectum angulum obliquatus. Optimum quidem est corium latum ac molle, aut fasciam latam circumdare, & magnum aliquod pondus appendere, quod moderate intendere possit; sin minus, vir aliquis robustus in hac figura cubiti, circa cubiti flexuram deorsum cogat. At vero medicus erectus stans, & alterum pedem in altiore quopiam habens, adgressionem faciat, ita ut volis os dirigat ac componat: facile autem dirigetur. Nam hæc extensio bona est, si quis ipsam recte præparet. Deinde deliget fasciarum principiis supra fracturam injectis; & reliqua omnia, quemadmodum prius mo-



nuius, tractet; & easdem interrogationes faciat; & iisdem signis utatur, an moderate habeat, aut secus. Et per tertium diem deliget, & magis comprimatur. Et septima, aut nona die cum ferulis deliget. Et si suspicionem habeat, os non bene positum esse, intermedio tempore solvat, & ubi probe collocavit, rursus deliget. \* Corroboratur autem maxime os brachii in xl. diebus. Postquam vero hos excefferit, solvere oportet, & minus comprimere, & paucioribus quoque linteis deligare. Cæterum victum quemdam exquisitorem, quam prius constituere oportet, & ad longius tempus. Ejus vero conjecturam facere oportet, ad tumoris, qui in summa manu est, robur respiciendo. Insuper autem & ad hæc animum advertere oportet, quod brachium a natura ad externam partem incurvatum est, & distorqueri solet, si non bene curetur. Sed & alia omnia ossa, quæ a natura ad hanc partem distorta sunt, etiam dum curantur ubi fracta sunt, distorqueri solent. Ubi igitur tale quippiam in suspicionem venerit, lata insuper fascia brachium circumcirca complecti oportet, & circum pectus deligare, & ubi quiescere volet, inter cubiti flexuram & costas, splenium quoddam multiplex convolutum ac complicatum supponere, aut aliud quid, quod huic simile existat. Hoc enim modo incurvatio ossis recta evadet. Cavere tamen oportet, ut ne minus ad internam partem vergat.

Pes vero hominis ex multis, ac parvis ossibus compositus est, quemadmodum etiam summa manus. Franguntur quidem non ita valde hæc ossa, si non una cum corpore, ab acuto aliquo aut gravi vulnerato. Vulnerata igitur quomodo curare oporteat, in ulcerationum parte refertur. Si vero quid e loco suo motum fuerit, aut digitorum articu-

lus, aut aliud quoddam ex ossibus summi pedis, unumquodque in suum locum cogere oportet, quemadmodum & ea, quæ in manu sunt. Curare vero oportet cerato, & spleniis, & linteis velut etiam fracturas, exceptis ferulis, eodem modo comprimendo, & per tertium diem deligando. Interrogetur item is, qui deligatur, similiter velut in fracturis, & de compressione facta, & an laxa sit deligatio. At vero sana fiunt in xx. diebus perfecte omnia, exceptis his quæ cum tibiæ ossibus communionem habent, & cum ipsa e directo. Conducit autem hoc tempore decumbere. At non tolerant contemnentes morbum. Verum priusquam sani fiant, obambulant. Et propterea plurimi non perfecte sanantur, sed dolor ipsos sæpe merito commonefacit. Totum enim corporis pondus pedes vehunt. Quum igitur nondum sani iter faciunt, articuli moti male curantur, ideoque alias atque alias hi qui ad tibiæ sunt dolent. Quæ vero cum tibiæ ossibus communionem habent, & majora aliis sunt, & ubi hæc mota sunt, diuturniorem medelam requirunt. Curatio tamen eadem est. Verum linteis, & spleniis pluribus uti oportet, & in totum hinc atque illinc deligare. Comprimere item velut alia omnia, ea maxime parte qua emota sunt, & primas quoque linteorum obvolutiones eodem modo facere. In unaquaque vero resolutione, multa calida aqua uti oportet. In omnibus enim circa articulos lesionibus multa aqua calida adfundenda est. Cæterum compressiones, & laxationes in iisdem temporibus eadem signa ostendunt, quæ in superioribus; & religationes eodem fiant. Sani vero perfecte hi fiunt in xl. maxime diebus, si decumbere sustinuerint; sin minus, eadem patiuntur, quæ prius relata sunt, & adhuc am-



plius. Porro quicumque saltu de alto quopiam loco facto, in calcaneum vehementer se fulciverunt, his ossa quidem disparantur, venulæ vero sanguinem effundunt, carne circa os contusa, tumor autem accedit, & dolor multus. Os enim hoc parvum non est, & supereminet quidem sub tibiæ rectitudinem, communionem vero habet cum venis ac nervis principalibus. Tendo autem posterior huic ossi annectitur. Hos curare oportet cerato, & spleniis, & linteis, & aqua plurima calida, & linteis pluribus. Et ab his opus est etiam aliis quamoptimis, ac lenissimis; & si quidem mollis fuerit a natura cutis circum calcaneum, sic finire oportet. Si vero crassa, & dura, veluti quidam habent, incidere oportet æqualiter, & adtenuare, ita tamen ut ne vulneretur. At vero talia bene deligare non cuiusvis est. Si enim deliget quis, quomodo alia circa malleolos deligantur, ita ut aliquando circum pedem, aliquando circum tendinem fasciæ circumdantur; hæc constrictiones calcaneum separant, qua parte contusio facta est. Atque ita periculum est, ne calcanei os corrumpatur; & fane si corruptum fuerit, per omne ævum morbus durare potest. Nam & alia quæ non ex tali modo sunt, ipsum corrumpunt, sed in decubitu denigrato calcaneo ex figuræ neglectu, aut in tibia vulnere fiente periculoso, ac diuturno, & communionem cum calcaneo habente, aut in femore, aut ubi ex alio morbo diuturnus decubitus contingit. Adtamen & talibus diuturnæ, ac molestæ adfectiones fiunt, & quæ sæpe refringantur, si non bona diligentia, & multa quiete curentur. Quare etiam ea, quæ ex tali modo corrumpuntur, supra aliquam læsionem, magna corpori pericula inducunt. Febres enim peracutæ oboriuntur, continuæ, tre-

mulæ, singultuosæ, mentem contingentes, paucis diebus durantes, ac occidentes. Fieri etiam possunt venarum sanguifluarum livores, venarum nausæ, & cancerationes ex compressione. Fieri autem possunt hæc absque alia corruptione. Atque hæc quidem relata sunt, ubi vehementissimæ contusiones fiunt. Plurima tamen leniter circumcirca contunduntur, neque ullum magnum curationis studium exigunt, sed recte tamen tractare oportet. Quum vero vehemens in fulciendo illisio facta esse visa fuerit, tunc sane relata facere convenit, & deligationem plurimam facere circum calcaneum obvolutam, ita ut aliquando ad summas pedis partes, aliquando ad medias, aliquando ad tibiæ partes, ex opposito lintea obvolvantur. Deligare insuper oportet & vicina omnia, hinc atque illinc, velut etiam prius dictum est, & vehementem compressionem non facere, sed cum multis linteis. Præstat autem & veratrum bibendum dare eadem die, aut postridie; & tertia die resolvere, ac rursus deligare. Signa porro an recrudescent, aut non, hæc sunt. Quum sanguis e venis effusus, & denigrationes, & his vicina sunt subrubra, & subdura, periculum est ne recrudescent. At si quidem febre careat, sursum purgans medicamentum dandum est, velut dictum est, itemque si non continua febre laboret. Si vero continua fuerit febris, medicamentum dandum non est. Verum & a cibis, & a forbitionibus abstinendum. Potu vero utendum aqua, non vino, sed fævorum cremore decocto, aut aceto mulso dulci. Si vero non recrudescent, sanguis e venis effusus, & denigrationes, & vicinæ partes cum virore subpallidæ fient, & non duræ, & bonum est hoc testimonium in omnibus fugillatis, sanguine e venis sub-



ter cutem effuso, quod non recrudescent. Quæcumque vero cum duritia livefcunt, ea ut denigrescant periculum est. Cæterum hoc studio habere oportet, ut pes plerumque paullo altius reliquo corpore habeatur. Sanus autem fieri poterit in sexaginta diebus, si quieverit. At vero tibiæ duo ossa sunt, quorum alterum altero hac parte multo tenuius est, illa vero parte non multo tenuius. Cohærent autem inter se juxta pedem, & appendicem communem habent. Verum in rectitudine tibiæ non cohærent. Juxta femur autem cohærent, & appendicem habent, & appendix discriminationem. Longius vero paullo alterum os est, quod secundum parvum digitum est. Et talis quidem est natura ossium in tibia. Luxantur autem aliquando juxta pedem ambo ossa, quandoque cum appendice, quandoque vero appendix tantum emovetur, quandoque alterum tantum os. Hæc autem minus molesta sunt, quam ea quæ in articulo manus existunt, si quiescere homines sustineant. Curatio vero consimilis est velut illorum. Nam & repositionem ex extensione, velut in illis, facere oportet. Verum vehementiore extensione opus habent, quanto fortius est ea parte corpus. Plerumque tamen sufficiunt viri duo, alter hinc alter illinc extendentes. Si vero non satis robusti fuerint, facile est vehementiorem extensionem facere. Aut enim rotæ modiolum, aut aliud quid huic simile defodere oportet, & molle quiddam pedi circumdare, & postea latis bubulis loris pede deligato, principia lororum aut ad pistillum, aut ad aliud lignum alligare, atque ita ligno in summum modiolum indito refringere, ita ut alii contra extendant humeris & poplite apprehensis. Potest etiam superna corporis pars necessitate hac exten-

sionis urgeri, partim quidem si ita voles, ligno rotundo levigate alte defosso, partem quamdam ipsius supereminentem intra crura juxta ani & scorti intercapedinem applicato, quo corpus sequi prohibeat ad eos qui a pedibus extendunt. Deinde ad crus quod extenditur declinare non oportet, sed aliquem a latere assidere, qui nates, retrudat, ne corpus circumtrahatur. Partim vero si etiam circa alas hinc atque illinc ligna adfigantur, manus autem extentæ ferventur, apprehendat autem quis circa genu, atque ita contra extendat. Partim item si quis velit, aliis loris circa genu aut circa femur deligatis, & alio rotæ modiolus supra caput defosso, & loris ex ligno quopiam alligatis, & ligno ita in rotæ modiolum defixo, ad contrariam partem his, qui a pedibus extendunt, adtrahere potest. Quin & si voles, pro rotarum modiolis trabem mediocrem sub lectum extends, deinde ad trabis hinc atque illinc caput ligna fulciens ac refringens, lora ipsis adligata intendes. Si vero & hoc velis, assellis hinc atque illinc constitutis, in ipsis extensionem facies. Sunt autem & alii multi extensionum modi. Optimum autem fuerit, si quis in magna civitate medicum agit, ut lignum habeat præparatum, in quo omnes necessitates insint, tum ad omnes fracturas, tum ad omnes articulorum repositiones, ex extensione, ac vectium usu. Satis autem est, si lignum fuerit & longitudine, & latitudine, & crassitudine tale, quales columnæ quernæ quadrangulæ sunt. Postquam autem sufficienter extenderis, facile jam est articulum reponere. Elevatur enim in directum supra pristinam sedem. Dirigere itaque manuum volis oportet, ita ut his partim in id, quod eluxatum eminet, inuitaris, partim ab altera parte



infra malleolum renitaris, Ubi vero reposueris, si quidem fieri poterit, extentum ita deligabis. Si vero præ loris impediaris, his exsolutis distentionem facias, donec deligaveris. Deligare autem eodem modo oportet, & fasciarum initiis similiter in id, quod luxatum eminet, injectis, & primis obvolutionibus plurimis supra id factis, imo etiam spleniis plurimis supra id impositis, & compressione maxime isthic contingente. Sed & hinc atque illinc multum insuper deligare oportet. Magis autem hic articulus compressione opus habet in prima deligatione, quam is, qui in manu est. Postquam autem deligaveris, sublimius reliquo corpore deligatam partem habeat. Positum autem ipsius ita facere oportet, quo quamminime pes dependeat. At vero adtenuationem corporis ita facere oportet, prout talem vel talem vim ipsa luxatio habet. Aliqua enim parum, aliqua multum luxantur. In totum vero magis, & longiore tempore in vulneribus circa crura, quam his, quæ circa manus sunt, adtenuare oportet. Nam & majora, & crassiora hæc, quam illa sunt; & sane etiam necessarium est quiescere corpus ac decumbere. Verum postea deligare articulum tertia die, neque prohibet quicquam, neque urget; & alia omnia similiter, velut superius relata, curare oportet. Et si quidem quiete decumbet, sufficient quadraginta dies, si solum in suum locum ossa rursus defecerint. Si vero quiescere nolet, non facile quidem crure uti poterit, & deligatione ad multum tempus uti cogetur. Quæcumque vero ossa non perfecte defident in suum locum, sed aliquid deficit, progressu temporis attenuatur coxa, & femur, & tibia. Et si quidem intro luxata fuerint, externa pars attenuatur. Si vero extra, interna.

Plurima autem ad internam partem luxantur.

Postquam vero ambo tibiæ ossa fracta fuerint citra exulcerationem, extensione vehementiore opus habent. Extendere autem oportet quibusdam modis ex prædictis, si magnæ emotiones fuerint. Sufficiunt etiam a viris fientes extensiones. Plerumque enim suffecerint duo viri robusti, alter hinc, alter illinc distendentes. Intendere autem oportet in directum, secundum naturam, & secundum rectitudinem tibiæ, ac femoris, sive tibiæ fractæ, sive femoris ossa extenderis. Sed & deligare sic oportet utrisque extentis, utrum tandem horum deligaveris. Non enim eadem cruri, & manui conferunt. Nam ubi cubiti & brachii ossa fracta fuerint deligata, manus appensa excipitur. At si extenta deligaveris, figuræ carniū alterantur inter flectendum in cubiti flexura. Fieri enim non potest, ut cubiti flexura ad multum tempus maneat extenta. Non enim sæpe in hac figura, sed in flexione esse consuevit. Quin & quum homines obambulare possint, ubi circa manum fauciati fuerint, opus habent flexione in cubiti flexura. At crus quum & in ambulando, & in stando consueverit, aliquando quidem extentum esse, aliquando vero fere extentum esse ad internam partem secundum naturam: & sane etiam ad hoc ut reliquum corpus vehat: propterea facile est ipsi extentum esse, ubi ejus necessitatem habuerit. Quin & in cubilibus sæpe in hac figura est, ut videlicet sit extentum. Postquam autem vulneratum fuerit, necessitas animi propositum in servitutem adigit. Impotentes enim fiunt ad se adtollendum, adeo ut ne meminerint quidem, ut inlectant, ac exsurgant; sed quiescunt in hac figura decumbentes. Propter has igitur causas, neque extensionis, neque deligationis figura ea-



dem manui & cruri conducit. Si quidem igitur suffecerit extensio, quæ per viros fit, nihil aliud laboris frustra infumere oportet. Imperitiam enim arguit machinas adhibere, ubi ipsis non est opus. Si vero non sufficiens fuerit extensio per viros, etiam ex aliis necessariis quædam adhibere oportet, si quæ commoda fuerint. Quum autem satis jam extenta fuerint, facile est dirigere ossa, & ad naturam reducere, manuum volis, ac palmis corrigendo, ac coaptando. Ubi vero direxeris, linteis deligare extenta sive ad dextram partem, sive ad sinistram, & circumducere prima lintea conducant. Initia autem ipsorum supra fracturam injiciantur, & circum hanc primæ quoque obvolutiones circumducantur, deinde deligando sursum ad tibiam distribuantur, velut in fracturis dictum est. Cæterum lintea latiora esse oportet, & longiora, eaque multo plura circa crus quam in manu. Ubi vero deligaveris, super planum quoddam & molle deponere convenit, ut neque hac, neque illac distorqueatur; neque repandum, neque gibbum fiat. Maxime autem confert pulvinar, aut linteum, aut laneum, durum, laxum, per medium secundum longitudinem subjectum, aut aliud quid, quod huic simile existit. Nam de canalibus, qui sub crura fracta subjiciuntur, quid consulam ambigo, an supponere ipsos conveniat, aut non; profunt enim, non tamen quantum putant hi, qui ipsos supponunt. Non enim quiescere cogunt canales, velut illi putant. Nam neque dum reliquum corpus aut hac, aut illac vertitur, cogit canalus ut crus ne sequatur, si non ipse homo hujus rei curam habeat. Neque rursus absque corpore crus moveri canalus prohibet vel in hanc, vel in illam partem. Quin & crudelius est lignum subjicere, si non si-

mul molle quiddam in ipsum indatur. At utilissimum est in strato permutando, & in progressibus ad alvum exonerandam. Licet igitur & cum canali, & sine canali, & bene, & male rem moliri. Verum vulgo persuasum est, etiam medicum minus delinquere, si canalis subjiciatur, etiam si minus hoc artem referat. Oportet enim super plano quopiam, ac molli, cubare crus ipsum, penitus in directum; alioqui necesse est deligationem superari a distortionem, quæ in positu contingit, quocumque & quantuncumque tandem inclinarit. Respondeat autem deligatus eadem, quæ etiam prius dicta sunt. Nam & deligationem talem esse oportet, & tumorem ita attolli ad extremas partes, & laxationes ita, & religationes per tertium diem; & quod deligatur, gracilius inveniri, & deligationes magis facere, & pluribus linteis, & circumdare pedem laxè, si non vulnus valde propinquum genu fuerit. Extendere autem moderate, & dirigere ossa in unaquaque deligatione oportet. Si enim recte curetur, & tumor secundum rationem procedat; tum locus, qui deligatur, tenuior, ac gracilior erit, tum ossa adductu faciliora, & extensioni magis obedientia. Postquam autem septimus, aut undecimus aderit dies, ferulas apponere oportet, quemadmodum & in aliis fracturis dictum est. Cæterum ferulatum locationes vitare oportet & secundum malleolorum rectitudinem, & supra tendinem, qui est in tibia pedis. At tibiæ ossa corroborantur in quadraginta diebus, si recte curentur. Si vero suspicionem habeas os aliquod directione opus habere, aut de ulceratione aliqua timeas, intermedio tempore solvere, & probe coaptata religare oportet.

Porro si alterum tibiæ os fractum fuerit, exten-



sione quidem debiliore opus habet, non tamen deficere, neque segniter agere in extendendo convenit, & maxime quidem omnes fracturas in prima deligatione, quantum ejus fieri debet, extendere oportet; sin minus, quamcitissime. Quodcumque enim os non recto modo coaptatum deligans quis compresserit, locus majori dolore vexabitur. Reliqua vero curatio eadem est. At vero ex ossibus his internum, tibia & prima tibia appellatum, molestiam majorem in curando exhibet, & extensione magis opus habet; & si non recte coaptata ossa fuerint, occultari non possunt. Est enim totum conspicuum, & carnis exfors; & hoc fracto, longe tardius progredi eo crure poterint. Si vero externum os fractum fuerit, & multo facilius ferunt, & multo melius occultare possunt, etiamsi non bene fuerit coaptatum. Est enim carnosum, & cito in pedes consistunt. Plurimum enim oneris internum tibiæ os vehit. Nam simul & una cum ipso crure, & oneris secundum crus rectitudine, majorem laboris partem internum os suffert. Femoris enim caput supernam corporis partem sustinet. Hoc autem intra crus est, & non extra, sed secundum tibiæ rectitudinem; & simul reliqua dimidia corporis pars huic rectitudini magis appropinquat, & non externæ; & simul crassius est internum quam externum, quemadmodum etiam id, quod in cubito est, secundum parvi digiti rectitudinem tenuius est, & longius. In articulo tamen inferno non similis est ossis longioris constitutio. Inæqualiter enim cubiti gibbus, sive flexura, & poples flectuntur. Propter has igitur causas, externo quidem osse fracto, celeres progressus fiunt, interno vero fracto, tardi.

At vero si femoris os fractum fuerit, ex-

tenfionem præ omnibus facere oportet; ita ut ne defectuosius fiat. Amplior enim facta nihil læferit. Neque enim, fi quis distantia ex vehementia extenfionis offa deligaverit, fieri poterit ut deligatio ipfa teneat, ut ita diftent; fed coeunt inter fe offa quamcitiffime, ubi intendentes ipfa remiferunt. Craffiffimæ enim, ac fortiffimæ quum fint hac parte carnes, deligationem superabunt, non ab ipfa superabuntur. Magnum enim dedecus eft ac detrimentum, femur brevius efficere. Nam fi quidem manus brevior fiat, & occultari poterit, & non magnus eft error. At crus fi brevius fiat, claudum hominem efficiet. Sanum enim crus longius eft, & id redarguit. Quare utilius fuerit, ut fi quis male curandus fit, ambo potius crura fracta habeat, quam alterum tantum; æquilibris enim ipfe fibi ipfi fuerit hoc modo. Poftquam vero fufficienter extenderis, directione, ac coaptatione per manuum volas facta, eodem modo deligare oportet, velut etiam prius fcriptum eft, injectis etiam fasciarum initiis velut dictum eft, & deligationis diftributione furfum verfus fiente, & deligatus eadem refpondeat, velut etiam prius; & doleat eodem modo, & melius habeat, & fimiliter rurfus deligetur, & ferularum appofitio eadem fit. Corroboratur autem femur in quinquaginta diebus. Insuper vero & hoc confiderare oportet, quod femur gibbofum magis eft ad externam partem, quam ad internam, & magis ad anteriorem, quam pofteriorem. In has itaque partes etiam diftorquetur, fi non probe curetur, & fane iifdem partibus etiam ipfe fe ipfo magis excarnis eft, ut neque occultari poffit in diftortione. Si igitur huiufmodi quippiam fufpectum habueris, machinari ea oportet.



tet, quæ in brachio distorto confuluimus. Pauca insuper linthea circa coxam, & locum inter coxas & lumbos circumdare oportet, quo & inguina, & articulus circa intermediam crurum, ac inguinum partem, plechada appellatam, insuper deligetur. Nam & alias confert, & ut ne extremæ ferularum partes lædant, si ad non deligata adhibeantur. Dêficere autem oportet semper ferulas, a nudâ parte, & hinc atque illinc multum; & positionem ferularum semper ita providere convenit, ut neque super os aliquod circa articulos natura prominens, neque super nervum circa articulum fiat. Tumores vero juxta poplitem, aut circa pedem, aut juxta aliam quampiam partem, ex compressione elevatos, multis lanis succidis probe carminatis, vino ac oleo respersis, cerato sublito, deligare oportet, & ubi prefferint ferulæ, citius laxare. Graciles autem fieri poterint, si supra ferulas gracilibus lintheis tumores deligaris, ab infima parte initio factò, ad supernam procedendo. Sic enim quamcitissime tumor gracilis fieri poterit, & transcendit supra priores deligationes. Verum hoc deligationis modo uti non oportet, si non periculum fuerit in tumore, pustularum, aut denigrationis. Tale vero nihil fit, si non quis valde premat fracturam, aut suspensam habeat, aut manu scalpat; aut aliud quid, quod irriter, corpori allabatur. At vero canalem si quis sub ipsum femur supponat, qui poplitem non excedat, læferit magis, quam profuerit. Neque enim prohibuerit, quo minus & corpus, & tibia sine femore moveatur. Noxius enim erit ad poplitem pertingens, & quod minime oportet, id facere impulerit. Minime vero oportet genu flectere. Omnem enim turbationem deligationibus inducit,

inducit, & femore, & tibia deligata, quisquis genu flexerit. Necesse enim erit propter hoc, musculos alias atque alias aliam figuram habere. Necesse est item ossa fracta moveri. Præ omnibus itaque faciendum, ut poples sit extentus. Videtur igitur canalis similiter prodesse, qui a coxa ad pedem usque subjectus contineat, & alias circa poplitem fasciam cum canali laxè circumdare oportet, quemadmodum infantes in cunis fascis obvolvuntur. Deinde si femur ad supernam partem distorqueatur, aut ad latus, melius ita contineri poterit una cum canali. Cæterum calcanei summi valde magnam curam habere convenit, ut & in tibiæ, & in femoris fracturis apte se habeat. Si enim dependeat pes, reliqua tibia firmata, necesse est juxta anteriorem tibiæ partem ossa incurva esse. Si vero calcaneum quidem moderato altius fuerit firmatum, reliqua vero tibia aliquantulum elevata, necesse est huic ossi, ut circa anteriorem tibiæ partem moderato cavius appareat; atque hoc adhuc magis, si calcaneum hominis natura fuerit magnum. Sed & omnia ossa tardius corroborantur, si non secundum naturam posita fuerint, itemque ea, quæ non in eadem figura quiescunt; & calli quoque debiliores ipsis obducuntur.

## S E C T I O. III.

**A**Tque hæc quidem de his, quibus ossa quidem fracta sunt, non autem extra eminent, neque alias ulcus factum est. Quibus vero ossa fracta sunt simplici modo, & non multifido, ita ut eadem die reposita sint, aut postridie in sedem suam recepta, & nullus timor sit filorum ossium discessionis; aut etiam quibus ulcus qui.

*Princ. Art. Med. Tom. I.* V



dem factum est, ossa vero fracta non extra eminent, neque modus fracturæ talis est, ut sint segmenta a fissis ossibus separata; tales spes est simplici modo curari posse. Et quidem sane neque magni quippiam boni, neque mali facientes, ulcera quidem curant aliquo purgatorio, aut picatum ceratum, ut emplastrum cruentis vulneribus idoneum, aut aliud quid, ex his quæ facere solent, imponentes. Ego vero eos laudo, qui splenia vino imbuta, aut lanas succidas, aut aliud quid hujusmodi deligant. Ubi vero ulcera pura facta fuerint, & jam coalescunt, tunc multis linteis deligare, & ferulis dirigere conantur. Hæc quidem curatio boni aliquid facit, nihil autem magni mali; ossa tamen non similiter in suam sedem firmari possunt, verum corpora aliquanto tumidiora ea parte fiunt, quam sit opportunum, fiunt autem & breviora his, quibus utraque ossa aut cubiti, aut tibiæ fracta sunt. Alii vero rursus sunt, qui talia statim linteis curant, & hinc atque illinc linteis deligant, ulcus vero ipsum relinquunt, & perfrigerari sinunt; deinde super ulcus purgatorium aliquod imponunt, & spleniis vino imbutis, & lanis succidis curant. Hæc curatio mala est, & verisimile est eos, qui ita curant, tum in aliis fracturis, tum in hujusmodi maxime imprudenter se gerere. Maximum enim est cognoscere quomodo initium lintei injicere oportet, & qua parte maxime comprimere; & quæ utilitas contingat, si quis initium lintei recte injiciat; & qua maxime oportet parte premat; & quæ detrimenta inducantur, si quis non recte injiciat, neque ubi maxime oportet premat, sed hinc atque illinc id faciat, & dictum quidem est etiam in superioribus, quæ ex utrisque eveniant. Testatur autem & ipsa hæc medicina. Necesse est

enim ei, qui ita deligatur, tumorem ad ipsum ulcus elevari. Itenim si sanum corpus hinc atque illinc fuerit deligatum, in medio vero relictum utique spatium maxime intumuerit, ac decoloratum reddatur, quo modo ulcus hæc non perpetietur? Necesse igitur est, ut ulcus quidem decoloratum sit, & labiis eversum ac protuberans, verum lachrymosum & non suppurans, ossa vero, etiam quæ discedura non erant, discedant; sed & pulsans, & febriens ulcus fuerit. Coguntur autem propter tumorem cataplasmata insuper imponere, quod & ipsum incommodum est his, qui hinc atque illinc deligantur. Pondus enim inutile ad reliquum pulsum accedit. Postremum vero deligamenta resolvunt, ubi jam malum ipsis recrudesceat, & de cætero citra deligationem curant. Neque vero minus, etiam si aliud quoddam ejusmodi vulnus acceperint, eodem modo curant. Non enim deligationem hinc atque illinc factam, & ulceris perfrigerationem in causa esse putant, sed aliud quoddam infortunium. Attamen de hoc tam multa non scripsissem, si non certo scirem, incommodam esse hanc deligationem, & multos esse qui ita curent, & magni momenti esse hanc rem dediscere, & testimonio hæc esse, quod recte scripta sint ea, quæ prius scripta sunt, sive maxime premendæ sint, sive minime ipsæ fracturæ.

Oportet autem, ut in summa dicam, his, quibus non est futuri discessus ossis expectatio, eandem curationem adhibere, veluti his quibus os fractum fuerit, ulcus autem non habent. Nam & extensiones, & directiones, ac coaptationes ossium eodem modo facere oportet, & consimilem deligationem. Super ipsum enim ulcus splenium tenue duplex, picato cerato illitum, deligandum est, & circumsitæ partes ce-



rato albo illinendæ. Verum lintea, & reliqua latiora aliquantum fissa sint magis, quam si non ulcus haberent; & id, quo primum deligamus, multo latius sit ipso ulcere. Quæ enim angustiora sunt quam ulcus, cinctum ulcus tenent, id quod fieri non convenit, sed prima circumductio totum ulcus comprehendat, & linteam hinc atque illinc præmineat. Itaque secundum ulceris rectitudinem linteam injicere oportet, & premere paullo minus, quam si ulcus non haberent. Distribuenda vero est deligatio, velut etiam prius dictum est. Lintea autem semper quidem mollis modi sint, magis tamen in talibus, quam si ulcus non esset. Copia vero linteorum non minor sit prius relatis, sed etiam aliquanto amplior. Si vero deligatus fuerit, videatur is sibi lintea firmata quidem esse, non autem compressa, dicatque super ulcus maxime firmata esse. Eadem autem tempora esse oportet, ad hoc ut magis firmata esse videantur, & ad hoc ut magis laxa videantur, quemadmodum etiam in superioribus dictum est. Deligatio etiam postea facienda per tertium diem, ita ut omnia postea faciamus consimili modo, velut prius dictum est, præterquam quod in totum minus aliquanto hæc, quam illa comprimenda sunt. Quod si secundum rationem, quæ fieri par est, facta fuerint, gracilior quidem semper comperietur ulceris pars, graciliores autem & reliquæ omnes, quæ a deligatione continentur; & suppurationes citiores erunt, quam in ulceribus aliter curatis; & quæcumque carunculæ in vulnere denigratæ sunt, & mortificatæ, citius abrumpuntur ac excidunt in hac curatione, quam in aliis; & ad cicatricem citius pervenit ulcus, si hoc modo, quam si alio

curetur. At omnium horum causa est, quod & locus circa ulcus gracilis sit, & quæ circumfita sunt, gracilia omnia fiunt. In reliquis igitur omnibus consimiliter curare oportet, velut ossa sine ulcerationibus fracta. Verum ferulas apponere non oportet. Et propterea lintea his plura esse debent, quam aliis, & quod minus comprimantur, & quod ferulae tardius apponantur. Si tamen ferulas apposueris, non secundum rectitudinem ulceris appones, sed ita ut laxæ adhibeantur, providendo ut nulla magna ab ipsis constrictio fiat. Dictum autem hoc quoque est in his, quæ prius scripta sunt. Victus autem rationem exquisitiorem, & longiori tempore constituere oportet his, quibus ab initio ulcera fiunt, & quibus ossa extra eminent; & ut in summa dicatur, in vehementissimis vulneribus exquisitiore, eoque diuturniore victu uti convenit.

Eadem etiam curatio ulcerum est, in quibus ossa quidem fracta sunt, sed ulcus ab initio non fuit, verum inter medendum factum est, aut ulcere linteis magis compresso, aut a ferularum infessu, aut ab alia quapiam causa. Cognoscuntur autem tales fracturae, an ulcus subsit, & dolore, & pulsibus; & tumor qui in extremis partibus est, talibus durus efficitur; & si digitum admoveris, adtollitur, sed & cito rursus subterfugit. Si igitur tale quid suspicatus fuerit, solvere oportet; & si quidem pruritus circa subligationes fuerit, aut alia quapiam parte deligata, cerato picato pro altero uti. Si vero horum nihil fuerit, verum ipsum ulcus irritatum, reperitur nigrum valde aut impurum; & futurum est, ut & carnes suppurentur, & nervi insuper excidant: hos omnino perfrigerare non oportet, neque quidquam has suppurationes vereri, sed curare in reliquis omni-



nibus confimili modo, velut eos quibus ab initio ulcus factum est. Linteis vero deligare incipere oportet valde laxis a tumore, qui in extremis partibus consistit, atque ita deligationem distribuere semper sursum versus, nusquam quidem comprimendo, sed maxime super ulcus firmando, super alia vero minus: & prima quidem lintea hæc munda sint, & non angusta. Copia vero linteorum tanta sit, quanta est si cum ferulis deligatio fiat, aut paullo minor. Super ipsum autem ulcus sufficiens est splenium cerato albo illitum. Sive enim caro, sive nervus denigratus fuerit, excidet. Talia enim acribus curare non oportet, sed mollibus, velut ambusta. Deligare vero postea per tertium diem convenit, ferulas autem non apponere. Quiescere vero magis quam prius, & medico cibo uti. Scire vero expedit, sive caro, sive nervus sit, id quod excidet, quod hoc modo multo minus ultra depascitur, & multo citius excidet, & multo graciliores circumsitæ partes erunt, quam si quis exsolutis linteis, aliquid medicamentorum purgatoriorum super ulcus imponat. Quin & si exciderit id quod suppurasset, & citius carne repletur, & citius ad cicatricem pervenit, quam si illo aut alio modo curetur. Omnia sane in hoc sita sunt, ut quis hæc recte & moderate deligare sciat. Conferunt insuper & figuræ, quales esse oportet, & reliqua victus ratio, & linteorum aptitudo. Si vero in recens vulneratis decipiaris, omnium discessum non fore putans, quum tamen expectatio sit illa emerfura esse, modum curationis timere non oportet. Nihil enim magni mali contigerit, si modo bonas, ac innoxias deligationes manu facere noveris. Signum autem hoc est, si ossium discessus in hoc

curationis modo futurus est. Pus enim multum fuit ex ulcere, & gliscere, ac turgere adfecta pars videtur. Frequentius igitur deligare oportet ob nimiam humiditatem, & quod alias etiam febres fiunt. Et si quidem valde preman-  
tur a deligatione, & ulcus, & circumsitæ partes graciles fiunt.

Quicumque itaque valde tenuium ossium discessus fiunt, hi nulla magna mutatione opus habent, nisi ut laxius deligatio fiat, ut ne pus intercipiatur, sed facile effluere possit. Sed & frequentius deligare oportet, donec os discesserit, & ferulas non apponere. Quibus vero majoris ossis discessus expectatur, siue hoc a principio prænoveris, siue etiam postea cognoveris, non amplius eadem curatione opus habet. Sed extensiones, & directiones ita facere oportet, velut dictum est; splenia vero duplicata, latitudine quidem dimidio palmo non minora: quale tamen fuerit vulnus, juxta hoc conjectura facienda est: longitudine vero paullo quidem breviora, quam ut bis circum fauciatum corpus circumduci possint, multo vero longiora, quam ut semel. Copia vero tot sint, quot facere conducit. Hæc in vino nigro austero madesacta, ex medio initio facto, circumvolvere oportet, quemadmodum fascia ex duobus initiis deligatur; & deinde asciatim alternatione ipsorum facta, initia dimittere. Hæc & super ipsum ulcus adhibenda sunt; & ab utraque ulceris parte, & ne comprimantur, sed saltem fulciendi ulceris gratia incumbant. Supra ipsum vero ulcus ceratum picatum imponere oportet, aut aliquod ex emplastris cruentis vulneribus destinatis, aut aliud quoddam medicamentum, quod familiare, ac idoneum sit humectationi adhibendæ. Et si quidem æstatis tempus fuerit,



vinò madefacere splenia frequenter oportet; si vero hyems, lanas succidas multas vino & oleo imbutas adhibeto. Oportet autem capræ pellem subternere, & defluxiones observare, ut facile effluere possint, ita ut meminerimus quod hi loci in iisdem figuris multo tempore permanentes, intertrigines curatu difficiles faciunt.

Qui vero deligatione sanari per aliquem ex relictis, aut referendis modis non possunt, eos magnam huc curam adhibere convenit, ut fractam corporis partem commode positam habeant secundum rectitudinem, animadversione ad hoc habita, ut sursum magis, quam deorsum vergat. Si vero quis bene ac facile opus perficere velit, operæ pretium est etiam machinamenta facere, quo justam & non violentam extensionem pars corporis fracta habeat. Maxime vero in tibia machinamenta adhibere expedit. Sunt igitur aliqui, qui in omnibus tibiæ fracturis, & quæ deligantur, & quæ non deligantur, pedem summum ad lectum adligant, aut ad aliud quoddam lignum juxta lectum defossum. Hi itaque omnia mala faciunt, nihil autem boni. Neque enim ullam opem adfert extensioni hæc pedis alligatio. Nihilo enim minus ad pedem concedet reliquum corpus, atque sic non amplius extenditur. Neque rursus ad rectitudinem quicquam prodest, sed etiam obest. Dum enim vertitur reliquum corpus aut hac, aut illac, nihil prohibebit vinculum illud, quo minus & pes, & ossa pedi adnexa reliquum corpus sequantur. Imo si pes adligatus non fuisset, minus distorqueretur. Si vero quis pilas duas ex corio Ægyptio consuat, tales quales gestant hi qui multo tempore in magnis compedibus vincti sunt; habeant autem pilæ hinc atque illinc tunicas, ad vulneris quidem partes, profundiores,

ad articulorum vero partes, breviores; sint item tumidæ, ac molles, & congruentes ad hoc, ut altera supra malleolos, altera infra genu coaptetur. Habeat insuper utraque duas utrinque appendices a latere aut ex simplici, aut ex duplici loro breviores velut anfas, ita ut alteræ sint ab utraque malleoli, alteræ ab utraque genu parte; & superna pila alteras tales habeat secundum eandem rectitudinem. Postea virgis corneis acceptis, æqualem inter se magnitudinem habentibus, crassitudine quidem digitali, longitudine vero ut flexæ appendicibus congruant, huc diligentiam adhibeas, ut extremæ virgarum partes non ad corpus, sed ad summas pilarum eminentias innitantur. Oportet autem tria esse virgarum paria, aut etiam plura, & alias aliis aliquanto longiores, & aliquanto breviores ac minores, ut si velis magis distendere possis. Locentur autem virgæ utræque hinc atque illinc a malleorum utraque parte. Hæc itaque si bene machinatus fueris, & extensionem justam exhibuerint, & secundum rectitudinem æqualem, & vulnere nullus dolor accesserit. Nam quæ expressa fuerint, si quid tamen exprimetur, partim ad pedem abducentur, partim ad femur; & virgæ hinc atque illinc a malleolis accommodatiores erunt, ut tibiæ positio non impediatur, & vulnus probe impingat, ac sustentetur. Neque enim impedimento est, si quis velit duas virgas superiores ipsas inter se conjungere, & si quis leviter quid superimponere velit, ut id quod superimponitur, a vulnere elevatum sit. Si quidem igitur & pilæ lenes, & molles, & bonæ, & recenter confutæ fuerint, & virgarum intentio probe intenta fuerit, velut jam dictum est, commodum erit machinamentum. Si vero quid



horum non recte habuerit , læserit magis quam profuerit. Convenit autem & alias machinas aut bene machinari, aut non machinari. Turpe enim est & minime artificiosum , in machinis struendis a machinis aberrare.

Plerique porro medici fracturas, & cum ulceribus, & sine ulceribus, primis diebus lanis succidis curant, & nihil ab arte alienum ipsis hoc esse videtur; & qui quidem a recens vulneratis coguntur, ex linteorum inopia lanis uti, his plurimus veniæ locus patet. Non enim habuerit quis in linteorum penuria aliud quid multo melius ad tales deligandas, quam est lana. Verum omnino multæ lanæ esse debent, & valde bene carminatæ; & non asperæ. Nam paucarum & malarum vires etiam modicæ sunt. Qui vero ad unum, aut duos dies lanis deligare justum esse censent, tertia vero ac quarta linteis deligantes premunt, ac extendunt tunc vel maxime, hi in re multi adeo, ac magni in medicina momenti se imprudenter gerunt. Minime enim tertia, ac quarta die omnia vulnera movere oportet, & ut in summa dicam, etiam omnes specillorum admotiones vitare convenit in his diebus, & alia quoque quibus vulnera irritantur. In totum enim tertia, ac quarta dies in plerisque vulneribus recrudescantias pariunt, & quæ ad inflammationem ac immunditiam procedunt, & quæ ad febres deveniunt. Et hæc res multi momenti est ut discatur, ut si qua alia. Cum qua enim ex utilissimis in medicina rebus non solum circa vulnera, verum etiam circa alios multos morbos communionem non habet? nisi quis etiam alios morbos ulcera esse dixerit. Habet enim & hic sermo aliquam verisimilitudinem. Multis enim modis alii aliis cognati sunt.

Quicumque tamen justum esse putant lanis uti,

donec septem præterierint dies, deinde vero extendere, ac dirigere, & linteis deligare, hi non similiter imprudentes videri poterint. Nam & maximum inflammationis periculum præteriit, & ossa laxa, ac apta post hos dies sunt. Longe tamen & hæc curatio superatur ab ea deligatione, quæ ab initio linteis fit. Ille enim modus præparat, ac efficit, ut septima die ferulis perfecte deligari possint. Hinc autem modus multo tardior est. Sed & alia quædam detrimenta habet. Verum longum esset omnia scribere. Quibus vero ossa fracta & extra eminentia in suam sedem collocari non possunt, his hæc restitutio debetur. Ferramenta facere oportet ad eum modum, quem vectes habent illi quibus lapicide utuntur, alia latiora, alia angustiora. Esse vero convenit tria, aut plura etiam, quo quis maxime congruis utitur. Postea cum his una cum extensione motionem aggredi oportet; ita ut ad inferiorem ossis partem subjicias, ad superiorem vero partem ossis superiorem ferramenti partem innitendo firmes; in summa, quemadmodum si quis lapidem aut lignum vehementer vecte commoveat. Sint autem valida ferramenta quantum ejus fieri potest, ut ne flectantur. Hoc magnum auxilium est, si & ferramenta idonea fuerint, & si quis velut convenit commotionem faciat. Nam ex omnibus instrumentis, quæ homines machinati sunt, fortissima hæc tria existunt, aselli circumductio, per vectes commotio, & cuneorum usus. At sine horum uno aliquo, aut sine omnibus, nullum vehementissimum opus homines perficiunt. Non igitur spernenda est hæc per ferreos illos vectes commotio, aut enim hoc modo, aut nullo alio in sedem suam collabentur. Si vero superna ossis pars immutata fuerit,



ac confracta, ut vecti adhibendo locus non sit commodus, sed acutum quid prominet, tunc osse scalpendo derafo, securam vecti sedem facere oportet. Hanc autem per vectes commotionem, & extensionem eadem die, aut secunda facere oportet. Non autem tertia. Minime vero quarta, aut quinta. Nam etiamsi non reponas, sed alias molestiam exhibeas in his diebus, inflammationem induxeris: quanto magis si reponas? Convulsionem tamen multo magis induxeris si reponas, quam si reponere omittas. Atque hæc probe nosse convenit. Si enim reponenti convulsio accesserit, non multa salutis spes est. Commodum autem est rursus ejicere os a sua sede, si hoc fieri citra molestiam possit. Non enim in laxioribus, quam oportunum est, convulsiones, ac distentiones accedunt, sed in his quæ magis extenta sunt. Cæterum de qua re nunc nobis sermo est, in prædictis illis diebus molestiam exhibere non oportet, & curam adhibere, ut ulcus minime inflammetur, & maxime suppuretur. Postquam vero septem præterierint dies, aut paullo plures, si sine febre fuerit & ulcus non inflammatum sit, tunc minus vetat ut reponere tentes, si speres obtenturum te esse; sin minus, non oportet frustra molestiam suscipere, & inferre. Si igitur ossa reposueris in suam sedem, jam scripti sunt modi quomodo curare oportet, sive ossa discessura esse, sive non, expectatio sit; & si quidem ossium discessus expectatio sit, eo quem dixi modo cum linteis, in omnibus talibus deligationem facere oportet, ex medio linteo initio facto ut plurimum, velut ex duobus initiis fascia deligatur. Conjecturam autem facere oportet juxta ulceris formam, quo sit quam minimum hians, ac labiis protuberans, &

expassum. Aliis enim ad dextram deligare commodum est, aliis ad sinistram, aliis ex duobus initiis.

Quæcumque vero ossa repositionem effugerunt, ea discessura esse, nosse oportet; itemque ea, quæ carnibus penitus nudata sunt. Nudatur autem quorundam superna pars, quorundam vero carnes circumcirca mortificantur. Et quibusdam quidem ex veteri vulnere aliqua ossa emarcuerunt, quibusdam vero non; & aliquibus magis, aliquibus minus, & partim parva, partim magna. Propter hæc igitur relata, uno verbo dici non potest, quando ossa sint discessura. Aliqua enim ob parvitatem; aliqua ex eo quod in summa parte existunt, citius discedunt: aliqua eo quod non discedunt, resiccata & marcida fientia desquamantur. Præterea differt curatio a curatione. In totum igitur ossa citissime his discedunt, quibus citissimæ fiunt suppurationes, & citissimæ, ac optimæ carnis productiones. Subnascentes enim juxta læsam partem carnes plerumque ossa ipsa elevant. Totus tamen ossis circulus, si in quadraginta diebus discesserit, bene discedet. Quædam enim ad sexaginta dies perveniunt. Nam & rariora ossa citius discedunt, solidiora vero tardius. Alia autem minora; multo minore temporis spatio, alia aliter.

Cæterum os extra eminens his de causis præsecare oportet, si reponi non possit, & parum absit ut reponi posse videatur, & fieri poterit ut auferatur, & si noxium fuerit, & de carnibus quid rumpat, & sensus molestiam exhibeat. Sed & si nudum fuerit, tale auferre oportet. Reliqua sive præseces, sive non præseces, non multum refert. Hoc enim certo scire expedit, quod ossa, quæ carnibus perfecte privantur, ac exarescunt, omnia penitus discedent. A quibus vero squamæ discessuræ sunt, ea præse-



care non oportet. Conjecturam vero eorum, quæ discedent, ex constitutis signis facere oportet. Curare autem tales spleniis & vinosa curatione, velut etiam prius de discessuris ossibus scriptum est. Sed cavere decet, ne primo tempore frigidis madescant. Rigorum enim febrilium periculum est. Periculum item convulsionem. Frigida enim semper convulsionem provocant; quandoque vero etiam ulcera. Nosse quoque id convenit, necesse esse ibi corpora breviora fieri, ubi ossa fracta ac immita curantur, & quibus totus ossis circulus discedit.

At vero quibus femoris aut brachii os extra eminet, hi non valde superstites evadunt. Nam & ossa magna sunt, & multum medullæ habent; & quæ simul vulnerantur, multa sunt & magni momenti, & nervi, & musculi, & venæ. Et si quidem reposueris, convulsionem accedere solent. Si vero non reposita fuerint, febres acutæ, & biliosæ, & singultuosæ oboriuntur, & denigrantur. Non minus autem superstites evadunt hi, quibus reposita non sunt, neque tentatum est, ut reponerentur. Adhuc vero magis evadunt, quibus inferna ossis pars eminet extra, quam quibus superna. Evadunt etiam quibus reposita fuerint, attamen raro. Nam & curationes a curationibus multum differunt, & naturæ corporum a naturis, ad facile tolerandum. Multum etiam differt an in interna brachii, ac femoris parte ossa extra promineant. Multæ enim & periculosæ venarum extensiones in interna parte sunt, quarum aliquæ si vulnerentur, lethales sunt. Sunt autem & in externa parte, verum minus. In talibus igitur vulneribus, qualia pericula immineant, ignorare non oportet, & ad temporum occasiones prædicere. Si vero reponere hæc ossa cogaris, & reponendi aliqua

tibi spes sit, & non multa ossis immutatio fuerit; & muscoli non concurrerint: solent enim concurrere: vectis molitio etiam his cum extensione opem bene ferre poterit. Ubi vero reponis, veratrum molle bibendum dare oportet eadem die, si eadem die reposita fuerint; sin minus, ne aggredi quidem oportet. Verum ulcus curare oportet velut in capitis ossibus fractis, & frigidi nihil adhibere, & cibos penitus auferre; & si quidem amara bile præditus natura fuerit, favorum cremorem odoratum coctum, aut acetum mulsum dulce in aquam instillato, eoque pro victu utatur. Si vero amara bile præditus non sit, aquæ potionem utatur. Et si quidem continua febre laborarit, ad quatuordecim dies ut minimum hoc victu degat. Si vero sine febre sit, septem diebus. Postea sensim progressu fiente, secundum rationem ad vulgarem victum adducatur. Et quibus ossa non reposita fuerint, eandem item medicamentum purgationem facere oportet, & ulcerum curationem, eundem item exhibere victum; & dependentem de corpore partem non extendere, sed magis adducere, quo laxior sit pars circa ulcus. At ossium discessus diuturnus est, velut etiam prius dictum est; maxime vero talia fugere oportet, si modo quis honestam fugam habeat. Nam & spes paucae sunt, & pericula multa; & si quis non reponat, artis expers esse videri poterit; & si reponat, propinquius ad mortem, quod ad salutem perduxerit.

Cæterum luxationes, & emotiones ossium circa genua multo mitiores sunt emotionibus, ac luxationibus circa cubiti flexuram. Nam femoris articulus pro magnitudine expeditior est quam brachii, & iustam naturam solum habet, eamque rotundam. Brachii vero articulus & magnus est,



& sinus plures habet. Ad hæc vero, tibiæ ossa longitudine inter se similia sunt, & externunt os paullulum ne memorabili quidem modo excedit, nullum magnum impedimentum adferens, a quo externus tendo circa poplitem enascitur. At cubiti ossa inæqualia sunt, & quod brevius est, multo crassius est; quod vero tenuis est, multum superat & excedit articulum. Dependet tamen & hoc ex nervis, juxta communem ossium connexionem. Majorem autem partem connexionis nervorum in brachio os tenue habet, quam crassum. Horum itaque articulorum, & ossium flexuræ cubiti natura hujusmodi est. Et propter naturæ modum ossa circa genu sæpe quidem luxantur, facile autem rursus incidunt, ac reponuntur. Inflammatio vero non magna accedit, neque vinculum articuli. Luxantur autem plerumque in internam partem, aliquando etiam ad externam, quandoque etiam ad poplitem. Horum omnium repositiones non sunt difficiles. Verum si quidem foras, aut intro luxentur, hominem in humili aliquo sedili sedere oportet, ita ut crus altius, non tamen multo habeat. Extensio autem plerumque moderata sufficit, ita ut ab altera parte tibia, ab altera femur in diversum extendatur. At ossa circa cubiti flexuram molestiora sunt, quam quæ circa genu sunt, & difficilius reponi possunt, etiam ob inflammationem, si quis non statim reponat. Luxantur quidem minus quam illa, verum difficilius reponuntur ac coaptantur, insuperque inflammantur, ac callum acquirunt. Sunt autem & horum plerumque parvæ inclinationes, aliquando ad partem ad costas, aliquando ad externam, non ut totus articulus sit emotus, sed manet quid juxta ossis brachii cavitatem, qua parte cubiti os excedens ha-

bet. Talia igitur, five hac, five illac luxentur, facile est reponere; & sufficit extensio in directum fiens secundum brachii rectitudinem, ita ut alter juxta manus juncturam extendat, alter locum sub alis amplectatur. Medicus vero altera manu ad emotum articulum admota, volis impellat; altera prope ad articulum injecta retrudat. Obediunt autem tales luxationes, & non tarde reponuntur, si quis antea quam inflammentur reponat. Luxantur autem plerumque magis ad internam patem, luxantur etiam ad externam. Innotescit id ex figura, & talia sæpe etiam absque vehementi tensione rursus incidunt. Oportet autem in his quæ intro luxantur, articulum quidem ad naturam suam repellere, cubitum vero in pronam partem vergentem circumducere. Et plerumque sane cubiti luxationes hujusmodi sunt.

Si vero transgressus fuerit articulus, aut hac, aut illac, supra cubiti os, quod ad brachii cavitatem excedit: fit quidem raro hoc: si vero fiat, non amplius similiter extensio in directum fiens, talibus luxationibus idonea est. In tali enim extensione, os a cubito excedens, brachii transgressionem prohibet. Oportet itaque sic emotis extensionem talem facere, qualis prius descripta est, ubi quis ossa brachii fracta deligat, ut ab alia quidem in supernam partem tensio fiat, ab ipsa vero cubiti flexura ad infernam cogatur. Sic enim brachium supra suum sinum maxime elevabitur. Si vero elevatum fuerit, facilis est restitutio cum volis manuum, ita ut emotam quidem brachii partem apprehendentes impellamus, os vero cubiti juxta articulum retrudamus, utraque eodem modo, minus tamen. Atque talis extensio hujusmodi luxationis justissima est. Po-



terit etiam reponi per extensionem in directum; verum minus quam hoc modo.

At si in anteriorem partem brachium luxetur: rarissime autem hoc contingit. Sed quid repentina eluctatio non ejecerit? Multa enim etiam præter naturam suam excidunt, etiam si magnum quid sit quod prohibeat. Huic autem eluctationi magnum quoddam obstaculum est, & os crassius quod superexcedit, & multa nervorum extensio; attamen quidam sane eluctantur. Signum autem his qui ita eluctati sunt. Niñil de cubito flectere possunt. Manifestus est etiam articulus ad contactum. Si quidem igitur non statim repositus fuerit, vehementes ac violentæ inflammationes, itemque febriles fiunt. Si vero statim quis occurrat, facile reponi potest. Oportet autem linteum durum convolutum (suffecerit non magnum) imponere obliquum in cubiti flexuram, & derepente cubitum inflectere, & manum quam maxime ad humerum adducere. Sufficiens igitur fuerit hæc repositio his, qui ita eluctati sunt. Sed & extensio in directum, hunc repositionis modum coaptare potest; volis tamen manus in eminentem brachii partem injectis, juxta flexuram retro impellere oportet, ita ut aliquis inferne iisdem in cubiti gibbum injectis, ad cubiti rectitudinem retrudat. Efficax est etiam in hoc luxationis modo illa extensio, quæ prius scripta est, quomodo ossa brachii fracta extendere oportet, ubi sunt deliganda. Postquam vero extenta fuerint, sic cum manuum volis injectis coaptationes facere, velut etiam prius scriptum est.

Cæterum si in posteriorem partem brachium exciderit, raro autem hoc contingit, hæc luxatio omnium maxime dolorosa existit, & febres continuas meracæ bilis paucorum dierum, ac maxime lethales inducit; & tales extendere

brachium non possunt. Si igitur statim affueris, extento cubiti gibbo cogere oportet, & sponte incidit. Si vero febris prævenierit, non amplius reponere oportet; dolor enim in cogendo augefcet. Ut autem in summa dicam, neque alium articulum febrienti reponere oportet, minime vero cubiti gibbum. Sunt autem & aliæ lacerationes, ac molestiæ circa cubiti gibbum. Hoc enim os crassius; si quando ab altero emotum est, neque flecti, neque extendi similiter potest. Manifestum autem sit ex contactu, juxta cubiti flexuram, circa venæ discissionem supra musculum tendentem. Quibus autem tale accidit, his non amplius facile est ad suam naturam reducere. Neque enim aliam ullam communem duorum ossium connexionem emotam ad pristinam naturam collocare, facile est; sed necesse est tumorem habere ipsam disparationem. Quomodo vero deligare oporteat in articulo, dictum est in deligatione circa malleolum.

Quibusdam autem os cubiti brachio subjectum frangitur, quandoque quidem cartilaginosa ipsius pars, ex qua tendo retro brachium enascitur, & ubi hæc emota fuerit, febrile est ac malignum. Articulus tamen manet in suo loco; æqualiter enim basis ipsius hac parte excedit. Quum autem abductus fuerit ea parte qua caput brachii excidit, vagabundus magis sit articulus, quam si penitus sit abruptus. Nam ut in summa dicam, omnia ossa que franguntur, minus noxia sunt, quam si ossa quidem non frangantur, venæ autem & nervi alicuius momenti in his locis contundantur. Vicinius enim ad mortem accedunt hæc quam illa, si febris continua accesserit. Paucæ tamen tales fracturæ sunt. Quandoque vero hoc brachii caput juxta appendicem frangitur, atque hoc quam



videatur multo magis noxium esse, longe mitius noxis circa cubiti gibbum contingentibus existit.

Quomodo igitur singulas luxationes reponere, & præsertim curare oportet, scriptum est; & quod statim reponere articulum maxime confert, propter celeritatem inflammationis nervorum. Nam etiamsi elapsa statim reposita fuerint, similiter tamen nervi distentionem facere solent; & ad tempus aliquod tum extensionem, quam facere solent, tum influxionem impedire. Confert autem omnia hæc similiter curare, & quæ franguntur, & quæ disparantur, & quæ luxantur. Omnia enim multis linteis, & spleniis, & cerato curare oportet, velut etiam alias fracturas. At figuram cubiti gibbi in his etiam omnino talem facere oportet, qualem in his quibus brachium fractum, & cubitus deligabatur. Communissima enim omnibus luxationibus, & emotionibus, & fracturis hæc figura est. Communissima item ad distentionem postea faciendam, & ad singula extendenda, ac inflectenda. Hinc enim viæ sunt ad utrasque partes consimiles. Commodissima est etiam hæc figura ipsi ægroto, ut ipsum & gestet, & appensum excipiat. His adde, si a callo apprehensus fuerit, si quidem extenta manus apprehendatur, melius fuerit, si non adsit; multis enim impedimento erit, paucis adjumento. Si vero inflexa, magis quidem commoda fuerit. Verum longe commodior, si mediam figuram obtinens callo apprehendatur, & hæc quidem de figura. Deligare vero oportet, primum linteii initio super ipsam læsam partem injecto, sive fracta fuerit, sive emota, sive disparata; primas etiam obvolutiones super ipsam facere, ita ut maxime hac parte innitantur, minus vero hinc atque illinc. Deligationem autem communem facere o-

pōrtet & cubiti, & brachii, utriusque multo plus quam plerique faciunt, quo quam remotissime a læsa parte tumor hinc atque illinc exprimatur. Circumdetur insuper etiam acuta cubiti pars, sive læsio in hac fuerit, sive non, ut ne tumor ibi circa ipsam colligatur. Fugiendum vero est in deligatione, quantum ejus fieri potest, ut ne circa flexuram multa lintea coacervata sint. Compressio autem quammaxime circa læsam partem facienda est. Sed & reliqua compressio, ac laxatio eadem adhibeatur, & iisdem temporibus singula, quemadmodum in ossium fractorum curatione antea scriptum est. Et reliigationes postea per diem tertium fiant. Videatur autem laxa esse deligatio tertia die, & etiam tunc & ferulæ conveniente tempore adhibeantur. Neque enim alienum hoc est, & in his quibus ossa fracta, & quibus non fracta sunt, si non febriant. Sint autem quam laxissimæ partim a brachio extentæ, partim ad cubitum positæ; & non sint crassæ. Necesse est etiam inæquales ipsas esse inter se, ut vicissim permutentur qua parte conducit, conjectura juxta inflexionem facta. Quin & spleniorum appositionem ejusmodi facere oportet, velut de ferulis dictum est, ita tamen ut paulo tumidiora super læsam partem apponantur. Tempora vero ab inflammatione, & ab his, quæ prius scripta sunt, conjectare oportet.



---

# HIPPOCRATIS

## LIBER DE ARTICULIS.

---

### PRÆFATIO.

*Manifesto pars est, & continuatio prioris libri, quo eæ fracturæ & luxationes tractantur, de quibus prior liber non agit; fracturæ quidem costarum, scapulæ, claviculæ, nasi, aurisque: luxationes vertebrarum, maxillæ, femoris, digitorum. Eadem huius libri dignitas est. Femoris luxationes HIPPOCRATIS quatuor omnino describit, & cuique suam opponit encheiresin qua reponatur, olim a Ctesia correptas, & à recentioribus, qui nullam luxationem femoris admittunt absque fractura. Sed accuratior naturæ observatio HIPPOCRATIS effata confirmavit.*

### SECTIO PRIMA.

**H**UMERI vero articulum uno modo luxari novi, ad locum sub alis; sursum autem nunquam, neque ad externam partem. Non tamen adfirmaverim an luxetur, aut non, etiam si habeam quod dicam de ipso. Sed neque in anteriorem partem unquam vidi, neque videtur mihi unquam excidisse. Medicis tamen videtur valde in anteriorem partem luxari, & maxime decipiuntur in his, quorum carnes tabes circa articulum & brachium occupavit. Apparet enim in talibus caput brachii omnino in anteriorem

partem eminens. Atque ego tale aliquando non excidisse adferens, ob hanc rem apud medicos & vulgus male audiui. Solus enim ipsis ignorare videbar, alii vero omnes cognoscere. Nec potui ipsis persuadere, nisi admodum difficulter, rem ita se habere. Si quis in brachio supernam humeri partem carnibus denudarit; denudarit autem qua parte musculus sursum tendit, nudarit item tendinem, qui sub alis, & juxta claviculam ad pectus est; apparuerit utique caput brachii in anteriorem partem vehementer eminens, etiamsi non sit elapsum. A natura enim pronum est brachii caput in anteriorem partem, reliquum autem brachii os ad externam partem incurvum. Conversatur autem brachium cum scapulæ cavitate obliquum, quum juxta costas fuerit porrectum. Quum vero ad anteriorem partem extenta fuerit tota manus, tunc brachii caput e directo est in scapulæ cavitate, & non amplius in anteriorem partem eminere conspicitur. Verum de quo nunc est sermo, nunquam vidi in anteriorem partem elapsum; non tamen affirmarim ne de hoc quidem, an ita excidat, nec ne. Quum igitur exciderit brachium ad locum sub alis, multi reponere noverunt, utpote, quod multis elabatur. Eruditi autem est omnes modos nosse, quibus medici id reponunt, & quo modo quis his modis quam optime utatur. Optimo vero horum modorum uti oportet, si fortissimam necessitatem videris. Optimus autem est qui postremus describetur.

Quibuscumque igitur frequenter humerus excidit, hi plerumque ipsi sibi ipsis ad reponendum sufficientes sunt. Immissis enim alterius manus digitis ac nodis in locum subalarem, articulum sursum cogunt, cubiti vero gibbum ad pectus adducunt. Eodem etiam



modo medicus reponet, si ipse quidem subalari, articulo magis intro elapso, subtentis digitis a costis diducat, ita ut capite suo in summum humerum injecto, renitendi gratia, genibus vero juxta cubiti gibbum ad brachium admotis, ad costas retrudat. Conducit autem eum, qui reponit, fortes manus habere; aut ipse quidem manibus & capite ita faciat, alius vero quidam cubiti gibbum ad pectus adducat. Est autem & humeri repositio ut cubitus retrorsum ad spinam subducatur, deinde altera manu in summam gibbi cubiti partem injecta retortio fiat, altera vero juxta articulum retro innitatur. Hæc repositio, & ea quæ prius dicta est, quum non sint secundum naturam, tamen articulum circumagitantes incidere cogunt. Qui vero calcaneo reponere conantur, propinquum quid ei, quod est secundum naturam, cogunt. Oportet autem hominem humi supinum reclinare; eum vero, qui reponit, humi sedere qua parte articulus excidit. Deinde apprehensam manum læsam, cum suis manibus extendere, calcaneo vero in subalarem locum injecto, dextro in dextrum, sinistro in sinistrum, retrudere. Oportet autem in cavitationem sub ala rotundum quid congruens indere, commodissimæ vero fuerint pilæ valde parvæ ac duræ, quales multæ ex coriis consuuntur. Si enim non ejusmodi quid inditum fuerit, calcaneum ad brachii caput pervenire non potest, Dum enim manus extenditur, locus sub ala cavatur. Tendines enim, qui hinc atque illinc locum sub ala constringunt, contrarii sunt. Oportet autem aliquem ab altera parte ejus, qui extenditur, confidentem, sanum humerum continere, ut ne corpus circumtrahatur, dum læsa manus in alteram partem extenditur. Postea ubi pila

sub alam subdita fuerit, molle lorum sufficienti latitudine præditum, circum pilam circumdare oportet, ita ut quidem eo loco ex utrisque initiis apprehenso sursum retrahat, a capite ejus, qui extenditur, confidens, & pede ad summi humeros innitens. Pila vero quam penitissime, & maxime intus ad costas sita sit, & non ad brachii caput.

Est & alia repositio, quum humerum alter subdit. Majorem tamen esse oportet eum, qui humerum supponit, ita ut apprehensa manu, humerum suum acuminatum sub illius luxati alam supponat, & deinde aliquantum verset, ut velut sedi insideat, ea conjectura facta, ut homo ille circa humerum suum ex ala pendeat, ipse vero seipsum in hunc humerum altiorrem faciat, quam in alterum, brachium autem pendentis ad pectus suum quam citissime cogendo adducat. In hac vero figura insuper concutiat, ubi hominem sustulerit, quo reliquum corpus in adversam partem brachio, quod continetur, vergat. Si vero valde levis fuerit homo, puer aliquis levis insuper ex ipso retrorsum pendeat. Atque hæc omnes repositiones in palestra usitatae sunt, eo quod non opus habent aliorum instrumentorum importatione. Poterit tamen quis etiam alibi his uti. Sed & qui circum pistillum cogunt, propemodum secundum naturam reponunt. Oportet autem pistillum molli quadam fascia esse involutum: minus enim ita labarit: & inter costas, ac brachii caput subter intrusum; & si quidem breve fuerit pistillum, collocare hominem in sedili aliquo oportet, quo vix brachium circum pistillum circumdare possit. Sit autem potius longum pistillum, quo homo stans ferme circum pistillum dependeat. Postea brachium quidem & cubitus circa pistillum por-



rigantur, ab altera vero corporis parte quis manibus circa cervicem ad claviculam circumjectis deorsum cogat. Hæc repositio moderate secundum naturam est, & repositionem facere potest, si probe ipsam tractent. Quin & per scalam alia quædam hujusmodi repositio fieri potest, & adhuc melior, eo quod corpus hinc atque illinc elevatum, securius librando adæquari potest. Nam circum pistillum etiamsi humerus fixus maneat, periculum tamen est ne corpus hac aut illac circumagatur. Oportet tamen & super scalam superne rotundum quid deligatum esse, quod ad loci sub ala cavitatem congruum sit, & quod brachii caput ad naturam redire insuper cogat.

Optima vero ex omnibus repositionibus talis est. Lignum esse oportet latitudine quidem quinque aut quatuor in totum digitorum, crassitudine vero duorum digitorum, aut etiam tenuius, longitudine autem bicubitali, aut paullo brevius. Sit autem altera parte summa rotundum, & angustissimum ac tenuissimum hac parte, habeatque crepidinem paullulum supereminentem in extrema rotunditatis parte, sed non ea, quæ ad costas, verum ea, quæ ad brachii caput existit, quo sub alam congrua sit, juxta costas sub brachii caput subdita. Linteo autem, vel fascia molli lignum summa parte obvolvatur, quo levius reddatur. Deinde subdito ligni capite quampenitissime sub alam, inter costas, ac brachii caput, totam manum ad lignum porrectam alligare oportet, juxta brachium, juxta cubitum, & juxta manus juncturam, quo quammaxime sit quieta. Præ omnibus autem curandum est, ut summa ligni pars quampenitissime intra subalarem locum recipiatur, brachii caput transgressa. Postea inter duas columnas trabem transversam probe alliga-

re oportet, & deinde manum cum ligno supra trabem transmittere, quo manus ab altera parte sit, corpus ab altera, trabs vero sub ala; & postea ad alteram partem manum deorsum cogere una cum ligno circum trabem, ad alteram vero reliquum corpus. Trabs autem ea altitudine alligetur, ut reliquum corpus elevatum summis pedum digitis innitatur. Hic modus repositionis humeri longe optimus est. Justissime enim commotionem facit, si solum penitus intus ad brachii caput lignum fuerit. Justissimæ item sunt in utramque partem adæquationem facientes librationes, & ad hæc offi brachii securæ.

Recentes itaque luxationes citius incidunt, quam quis putare possit, & priusquam extentæ esse videantur. Sed & veteres sola hæc repositio reponere potest, si non jam ob vetustatem caro quidem in acetabulum devenit, caput autem brachii in loco, ad quem declinavit, semitam sibi ipsi jam fecit. Veruntamen etiam ita inveteratum brachii elapsum mihi posse reponere videtur. Quid enim iusta molitio non noverit? manere tamen in loco posse, non ita mihi videtur, sed prout consuevit, rursus luxabitur. Idem facit etiam, si circum scalam, eodem modo velut dixi præparatam, coactio transmissi brachii fiat. Abunde item sufficit circum magnam sedem Thessalicam coactionem facere, si recens fuerit luxatio. Præparatum autem esse oportet lignum, velut dictum est; hominem vero locare oportet in sede obliquum, deinde brachium una cum ligno supra sedis reclinatorium transmittere, & ad alteram partem corpus deorsum cogere, ad alteram brachium cum ligno. Idem quoque facit coactio supra biforem januam. His autem, quæ forte præsentia fuerint, utendum est. Nosse igitur expedit, quod



naturæ a naturis multum differunt, ad hoc ut elabentia facile rursus incidat. Differt etiam acetabulum ab acetabulo, quum aliud facile transcendendi possit, aliud minus. Plurimum item differt nervorum ligamentum, quum in quibusdam remissum sit, in quibusdam intentum. Nam humiditas hominibus fit ex articulis propter nervorum connexionem, si laxa fuerit, & intensiones facile ferat. Multos enim videas, qui adeo humidi sunt, ut quando velint, articuli ipsi citra dolorem excidant, & absque dolore restituantur. Differt etiam habitus quidam corporis. Nam his, quibus bene se habet membrum, & carnosus, & minus excidit, & difficilius incidit. Ubi vero ipsi seipsis tenuiores & magis excarnes fuerunt, tunc & magis excidit, & facilius incidit. Argumentum autem quod hæc ita se habeant, hoc est, Bobus enim tunc magis femora excidunt ex acetabulo, quum tenuissimi existunt. Fiunt autem tenuissimi boves ad finem hyemis. Tunc igitur etiam maxime luxantur; si tamen & huiusmodi quiddam in medicina scribere convenit. Verum convenit utique. Bene enim Homerus didicit, quod ex omnibus pecudibus boves quammaxime laborent hoc tempore, & ex bobus potissimum aratores, eo quod hyeme operentur. His itaque maxime excidunt articuli. Hi enim maxime adtenuantur. Nam reliqua quidem pecora brevem herbam depasci possunt, bos autem non ita valde, priusquam alta fiat. Reliquis enim tenuis est labri prominentia, tenuis item superna maxilla. Bovi vero crassa est labii prominentia, crassa item & obtusa superna maxilla. Quapropter in breves herbas subicere non potest. Rursus solipeda animalia, utpote utrinque dentata, & dentes inter se committere possunt,

& sub brevem herbam dentes subjicere queunt, delectanturque tali herba magis, quam alta. Brevis enim herba in totum melior ac solidior est, quam alta. Adde, quod alta etiam prius fructum effert. Ob hoc igitur ita cecinit:

*Haud secus ac bobus nigris gratissima veris*

*Tempora proveniunt:*

quia gratissima apparet ipsis alta herba. Sed & alias bos laxum habet hunc articulum, magis quam alia animalia, & ob id etiam magis, quam alia pedem trahit, & maxime quum macilentus est, & jam senex. Propter omnia hæc etiam maxime bovi excidit. Plura autem de ipso a me scripta sunt, eo quod omnium antea relatorum testimonia hæc sunt.

Verum de quo nunc sermo est, excarnibus magis excidit, sicut etiam citius incidit, quam probe carnosus; & humidis, ac excarnibus minus inflammatur, quam siccis, ac carnosus; & in posterum tempus quoque minus vincitur. Sed & mucus amplior moderato subest, sinon adsit inflammatio, & sic sane lubricus fuerit. Mucosiores enim omnino sunt articuli excarnibus, quam carnosus. Nam & ipsæ carnes eorum, qui non recte ex arte fame macerati sunt, in macilentis mucosiores sunt, quam in crassis. Quibus tamen cum inflammatione mucus subest, his inflammatio vinculo facto articulum continet, & ob id hi, qui submucosi sunt, articuli non valde excidunt, & exciderent utique, si non plus aut minus inflammationis accessisset. Quibus igitur, quum articulus excidit, circumstitæ partes non inflammantur, & statim citra dolorem humero uti possunt, hi putant quidem nihil opus esse, ut sui ipsorum curam gerant; medici tamen est, ut contra tales vaticinetur: talibus excidit rursus magis, quam his, quibus



nervi sunt inflammati. Atque hæc res in omnibus in homine ita habet, & maxime circa humerum, & genu. Maxime igitur etiam hæc excidunt. Quibus autem nervi inflammati sunt, hi humero uti non possunt. Prohibet enim dolor, & inflammationis distentio. Tales igitur curare oportet cerato, & spleniis, & linteis multis deligando. Sub alam vero lanam mollem puram convolutam subicere oportet, ad cavitatem explendam, quo fulcimentum quidem sit deligationi, articulum vero sustentet. At brachium plerumque sursum vergens tenere oportet. Sic enim procul fuerit humeri caput a loco, in quem excidit. Oportet autem, postquam humerum deligaveris, brachium ad costas adligare, fascia quadam in orbem circum corpus obducta. Fricare quoque humerum oportet placide, & accurate. Multarum autem rerum peritum medicum esse expedit, & non minus frictionis. Ex eodem enim nomine non idem eventus subsequitur. Nam & vincere potest frictio articulum justo laxiore, & solvere articulum justo duriores. Verum de frictione in alio opere a nobis tractabitur. Talem igitur humerum mollibus manibus fricare convenit, confert enim, & alias leniter. Articulum autem commovere non violenter, sed intantum, ut citra dolorem commoveatur. Restituuntur vero omnes articuli partim longiore, partim breviori tempore.

An autem brachium exciderit, his signis cognoscere oportet. Nam ubi iustum corpus habent homines, manus item ac crura, sano in exemplum uti oportet ad non sanum, & non sano ad sanum, non alienos articulos inspiciendo, (alii enim aliis magis extantibus natura sunt articulis) sed ipsos ejus qui adfectus est, an dissimilis sit sanus ægroto. Et

hoc recte quidem dictum est, multam tamen erroneam intelligentiam talia habent; & non satis est solum sermonis doctrina artem hanc nosse, sed conversatione etiam versare oportet. Multi enim præ dolore, aut ex alia causa, quum non exciderint ipsis articuli, tamen non possunt in similes figuras restitui, in quales sanum corpus figuratur. Proinde & talem figuram insuper intelligere, ac considerare oportet. Sed & in loco sub ala caput brachii multo magis incumbere videtur in luxato, quam in sano. Quin & superne juxta supernam humeri partem cavus apparet locus, & summi humeri os exstans conspicitur, utpote articulo ad infernum locum digresso; & est etiam aliqua erronea in hoc intelligentia; sed postea de ipso scribetur. Est enim dignum de quo scribatur. Præterea in luxato cubiti gibbus magis a costis distare videtur, quam in altero. Si tamen quis vim adferens cogat, adducitur quidem, sed cum dolore. Sed & sursum ad aurem manum adtollere, cubiti gibbo extento, non valde potest, velut sanam, neque hac & illac similiter diducere. Hæc igitur signa sunt humeri luxati, repositiones item præscriptæ & curationes hæ sunt.

Operæ pretium vero est discere, quomodo frequenter excidentibus humeros curare oporteat. Multi enim a certa minibus jam prohibiti sunt ob hanc calamitatem, quum alias penitus fuerint inculpabiles. Multi etiam ad res bellicas inutiles fuerunt, & ob hanc calamitatem perierunt. Sed & propterea res digna est quæ discatur, quod nullum noverim qui recte medeatur, sed alios ne adgredi quidem sciam, alios contra quam conducit, & sentire, & facere. Multi enim medici humeros luxatos adferunt & juxta supernam humeri partem, & jux-



ta anteriorem, qua parte caput brachii extuberat, & juxta posteriorem paullulum retro supernam partem. Hæ igitur uestiones, si quidem sursum brachium excidisset aut in anteriorem, aut posteriorem partem, rectæ iniustæ essent. Nunc vero quum deorsum excidit, ejiciunt magis hæ uestiones, quam impediunt. A superna enim spatii amplitudine caput brachii excludunt. Verum hæc ita urere oportet. Cutem sub ala digitis apprehensam adtrahere oportet, secundum ipsam maxime rectitudinem, secundum quam brachii caput excidit. Deinde ita adtractam cutem in ulteriorem partem perurere.

Ferramentis autem talia urere oportet non crassis, neque valde calvis, sed oblongis. Citius enim penetrant, & manu firmata transigi possunt. Pellucidis item his urere oportet, quo quam celerrime pro viribus penetrent. Nam crassa tarde penetrantia latiores crustarum elapsiones faciunt, & periculum est, ne cicatrices rumpantur; & nihilo quidem deterius hoc esset, verum turpius & ab arte alienius. Postquam autem in ulteriorem partem perusseris, in plurimis satis est ut infernæ parti soli has crustas inuras. Quod si periculum esse non videatur ne cicatrices rumpantur, sed multum spatii interpositum sit, tenue quoddam specillum per iniusta foramina trajicere oportet, cute adhuc adtracta. Neque enim alias trajicere possis. Ubi vero trajeceris cutem dimittere. Postea inter crustas aliam crustam tenui ferramento infligere ac inurere, donec specillum contingas. Quantum vero de cute sub ala apprehendere oportet, hinc conjectare licet. Glandulæ sub ala sunt, sicut etiam in aliis corporis partibus. Verum in alio libro de tota glandularum natura scribetur, quod sint, & qualia in quilibus

bus significant ac possunt. Glandulas igitur simul apprehendere non oportet, neque ea quæ glandulis sunt interiora. Magnum enim adferunt periculum. Sunt enim nervis maximi momenti vicina. Quantum vero extra glandulas est, ejus quamplurimam partem apprehendere oportet. Nihil enim periculi est. Nosse tamen hoc expedit, quod si fortiter brachium extenderis, nihil cutis sub ala apprehendere poteris, quod sane adtractu memorabile sit. Distrahitur enim in extensione. Nec vero nervos ulla machina vulnerare oportet. Hi enim prompti expositique sunt ac extenti in hac figura. Si vero parum brachium elevaris, multum quidem cutis apprehendes; nervi vero, quorum curam gerere oportet, intus ultra apprehensionem consistent. Nonne igitur in omni arte præ omnibus curandum est, ut in singulis figuræ justæ inveniantur? Atque hæc quidem de loco sub ala. Et sufficiunt hæc apprehensiones, si crustæ recte fuerint inustæ. Extra vero alam duo solum loci sunt, ubi quis crustas inurere queat, huic affectioni auxiliantes. Unam in anteriore parte, inter brachii caput, & tendinem juxta alam. Et hæc quidem parte cutem penitus perurere oportet, sed non altius. Vena enim crassa propinqua est, & nervi, quorum neutra igne calefacienda sunt. Retrorsum autem alteram crustam inurere licet, multum supra tendinem, qui est juxta alam, & paullulum infra brachii caput. Et cutem quidem penitus perurere oportet. Verum neque hic valde altam crustam facere. Inimicus enim est ignis nervis. Curare igitur ulcera per omnem curationem oportet, ita ut brachium nunquam vehementer extendas, sed moderate, ulcerum saltem curandorum gratia. Minus enim ita perfrigerantur.



Conducit enim omnes uestiones tegere, ut etiam leniter curentur, & minus disparentur, minusque sanguinis erumpat, & minus convulsio accedat. Ubi vero pura facta fuerint ulcera, & ad cicatrices devenerint, tunc sane penitus brachium semper die, ac nocte, costis alligatum esse oportet. Sed & quum sana facta fuerint ulcera, similiter ad multum tempus brachium ad costas alligandum est. Sic enim maxime cicatrix induci poterit, & spatii amplitudo intercipietur, & quam maxime luxatur brachium. Quibuscumque vero humerus repositione fuerit destitutus: si quidem homines adhuc crescant, os brachii non similiter, ut sanum coangescit, sed augefcit quidem, verum altero brevius aliquando efficitur. Et qui mustelæ cubito præditi sunt, parvumque, ac macilentum brachium ex nativitate habent, galeancones vocati, ob duplices has calamitates fiunt tales, tum si talis aliqua luxatio ipsos, dum in utero sunt, corripuerit, tum ob aliam calamitatem, de qua postea aliquando scribetur. Quin & hi, quibus cum adhuc infantes sunt, profundæ, ac submersæ suppurationes circa brachii caput fiunt, omnes galeancones efficiuntur, & sive secti fuerint, sive ulti, sive sua sponte ipsis eruperint, hæc ita se habere nosse oportet. Qui tamen ex nativitate galeancones sunt, etiam si manu potentissime uti possint, tamen neque ipsi extento cubiti gibbo, brachium ad aurem extendere, ac elevare possunt. Sed multo minus hanc, quam sanam manum. Quibus vero jam viris exciderit humerus, & repositus non fuerit, his superna humeri pars magis excarnis efficitur, & habitus hac parte tenuis fit. Quum tamen dolor cessaverit, non omnia ea similiter operari possunt, quæ elevato cubiti gibbo a co-

his in obliquum operari oportet. Quæ vero transmoto brachio juxta costas, aut in anteriorem, aut in posteriorem partem operari oportet, ea operari possunt. Nam & scobinam, & ferram trahere poterint, securi item findere, & fodere, si non valde sursum cubiti gibbum adtollant, sed & alia juxta tales figuras operantur.

At vero, quibus summus humerus fuerit avulsus, his os avulsum extra eminens apparet. Est autem hoc velut vinculum claviculæ, & scapulæ. Alia enim est hominis natura hac parte, quam aliorum animalium. Medici igitur in hoc vulnere maxime falluntur. Nam quum os avulsum eminet, superna humeri pars humilis, & cava apparet, ut etiam velut humeri elapsi curam adhibeant. Multos igitur novi medicos, alias non malos, qui graviter afflixaerunt, tales humeros reponere conantes, ita excidisse rati, & non prius desistunt ipsi existimare se humerum reponere, quam vel desperarint, vel frustrati fuerint. His curatio quidem eadem, quæ etiam aliis hujusmodi, ceratum, splenia, & lintea, & deligatio ejusmodi; deorsum tamen cogere os supereminens oportet, & splenia super hoc ponere plurima, & hac parte maxime premere; & brachium ad costas adligatum ad supernam partem tenere. Sic enim os avulsum maxime appropinquarit. Hæc tamen probe nosse expedit, & velut certa prædicere, si aliqui voles, quod nullum detrimentum, neque parvum, neque magnum, humero contingit ex hoc vulnere. Sed locus turpior evadit. Neque enim hos in pristinam sedem sedem similiter firmari poterit, velut natura exigit, sed necesse est plus, aut minus tumidum esse ad supernam partem. Neque enim aliud ullum os in eundem locum restituitur, quod cum alio osse commu-



nionem habet, & adhærens a veteri naturali sede avulsum fuerit. Paucis autem diebus summus humerus doloris exors fit, si probe deligetur.

Clavicula porro fracta, si quidem penitus caulatim hoc contigerit, curatu facilius est. Si vero oblonge, difficilius sanatur: & contraria in his contingunt, aliter quam quis putaverit. Nam quæ penitus caulatim fracta est, cogi magis poterit, ut ad naturam redeat. Et si diligens cura adhibeatur, partem, quæ superior est, inferiorem fecerit figuris idoneis, & deligatione conveniente. Si vero perfecte non firmata fuerit, attamen supereminens ossis pars non valde acuta fit. At quorum os in longitudinem fractum fuerit, his similis ossibus avulsis calamitas contingit, de quibus antea scriptum est. Neque enim ipsum ad seipsum valde firmari solet, & summa ossis eminentis valde acuta fit. In universum igitur nosse expedit, quod nullum detrimentum, neque humero neque reliquo corpori, ob claviculæ fracturam accedit, si non insuper corruptio aliqua contingat. Raro autem hoc fit. Deformitas tamen circa claviculæ fracturam accedit primum turpissima, deinde vero minor fit. Coalescit autem clavicula cito, itemque alia ossa laxa. Celerem enim calli obductionem talia faciunt. Quum igitur recens fracta fuerit, vulnerati ad curationem festinant, majus malum esse putantes quam est, & medici quoque prompti sunt ad recte curandum. Progressu vero temporis & vulnerati, utpote qui neque dolent, neque iter facere, neque cibum capere prohibentur, negligunt; & medici, utpote qui suis sedibus restituere non possunt, aufugiunt, neque vulneratorum negligentiam ægre ferunt. In hoc autem calli obductio acceleratur.

Deligationis vero modus plerisque consimi-

lis est, ut cerato, & spleniis, & mollibus linteis curatio fiat. Insuper autem & hæc curatio, & hæc animadversio habenda est, & præsertim in hac aggreffione, quod plurima splenia juxta eminentem partem imponere oportet, & plurimis deligationibus maxime circa hanc partem premere. Sunt autem aliqui, quibus complacuit plumbum grave insuper adligare, ut supereminentem partem deorsum cogat. Fortassis autem neque intelligunt, qui simpliciter deligant. Sed neque hic modus ad claviculam fractam pertinet. Neque enim fieri potest, ut id, quod eminet memorabili modo, deprimatur. Alii vero quidam sunt, qui quum cognoverint, quod hæ deligationes erroneæ sunt, & non secundum naturam, supereminentia deorsum cogunt: deligant quidem ipsos spleniis, & linteis utentes, velut etiam alii; verum cincto homine fascia quadam, qua parte maxime cingi solet, postquam splenia supra eminentes fracturas imposuerunt, ita ut isthic magna mole extuberent, tunc initium linteï ad cincturam ex anteriore parte alligant, atque ita deligant in directum claviculæ extendentes, ac retrorsum ducentes, & isthic cincturæ circumdatum in anteriorem partem reducunt, & rursus in posteriorem. Aliqui vero non cincturæ linteum circumdant, sed circum interfemineum juxta sedem, & per spinam linteum circumdantes, hoc modo fracturam comprimunt. Hæc itaque si quis inexpertus audit, prope secundum naturam esse videntur; verum si quis utatur, inutilia existunt. Neque enim stabilia sunt, etiamsi decumbat quis, quamvis ita vel maxime stabilitas contingat; attamen si decumbens aut crus inflexerit, aut ipse se inclinet, omnia deligamenta movebuntur, & a-



lioque noxia est hæc deligatio. Nam & sedes intercluditur, & lintea in hac angustia acervata fiunt, & quæ rursus cingulo circumdantur, non ita valida facta cinctura circumdari possunt, ut non cingulum sursum adscendere cogant, neque ita necesse est omnia deligamenta laxari. Quamproximo vero quis rem conficere videri possit, etiamsi non magna faciat, si quibusdam linteis cingulum circumdet, plurimis autem linteis priorem deligationem perficiat. Sic enim maxime stabiles fuerint deligationes, & mutuam inter se opem tulerint. Plurima igitur ex his, quæ contingunt his, quibus clavicula fracta est, relata sunt.

Insuper autem, & hoc intelligere oportet, quod clavicula plerumque frangitur, ita ut os, quod a pectore est, ad supernam partem emineat; quod vero a summo humero est, in infernam partem subsidat. Causæ vero horum hæ sunt, quod pectus neque multo inferius, neque superius procedere potest. Nam articuli in pectore motus parvus est. Ipsum enim sibi ipsi, & spinæ ex continuitate commissum est. Proxime quidem clavicula ad humeri articulum fluctuat. Cogitur enim frequentem motum habere propter summi humeri connexionem; & alioqui ubi vulnerata est, ad supernam partem defugit ea pars, quæ pectori adhæret, & non valde ad infernam partem cogi potest. Nam & a natura levis est, & loci amplitudo ipsi superne major est, quam inferne. At humerus, & brachium, & quæ his adnexa sunt, a costis, ac pectore facile exsolvi possunt, & propterea multo superius, ac inferius abduci queunt. Quum igitur fracta fuerit clavicula, os quod ad humerum est, magis deorsum repit. Huc enim ipsum una cum humero, & brachio defluere proclivius est, quam

furfum ferri. Quum igitur hæc ita fe habeant, imprudenter fe gerunt, qui supereminentem offis partem deorfum cogere oportere putant. Nam infernam ad supernam adducendam efle manifestum eft. Hæc enim motum habet; hæc eft, quæ a natura difceffit. Clarum itaque eft, aliter nullo modo ipfam cogi poffe: deligationes enim nihilo magis appellant, quam repellunt. Si vero quis brachium quammaxime ad costas admotum furfum cogat, ut quam acutiffimus efle humerus videatur, perfpicuum eft, quod fic adaptari poterit ad os, quod a pectore eft, unde eft divulfa. Si quis igitur legitima deligatione utatur celeris curationis gratia, & reliqua omnia frustra fieri putet præter figuram relata, is & recte intellexerit, & celerrime, ac optime curaverit. Decumbere tamen hominem multum refert, & fufficiunt dies xiiij. fi quieverit, aut ad summum viginti. Si tamen contrario modo clavicula fracta fuerit, quod non valde contingit, ut os quod a pectore eft fubfidat, quod vero a summo humero eft superemineat, alterique superftet; nulla magna curatione in his opus fuerit. Ipfe enim humerus, & brachium fi demittatur, offa inter fe committere, ac firmare potest, & utilis quæpiam deligatio fuffecerit, & pauci dies fatis erunt ad callum obducendum. Quod fi hoc modo fracta non fuerit, fed in obliquum hac vel illac luxata, ad naturam reducere oportebit, humero cum brachio furfum adducto, velut etiam ante dictum eft. Quum autem ad pristinam naturam refederit, reliqua curatio velox erit. Plerasque igitur immutationes, ac luxationes brachium, fi furfum cogatur, corrigit.

Quæcumque vero luxationes ex fupernis oblique ad latus fiunt, aut deorfum, his corre-



ctio præparatur, si homo supinus decubuerit, juxta medias autem scapulas aliquid altius superpositum fuerit, quo pectus maxime in utramque partem inflexum sit, & brachium adducat quis ad costas porrectum. Medicus autem altera manus vola in brachii caput injecta retrudat, altera ossa fracta componat. Sic enim quammaxime ad naturam reduxerit. Verum quod jam dictum est, est supernum os facile ad partem subsidere solet. Plerisque igitur, ubi deligati fuerint, figura ipsa opitulatur, ita ut ad ipsas costas cubiti gibbum habentes, hoc modo humerum ad supernam partem cogant. Quibusdam vero humerum quidem sursum, velut dictum est, cogere oportet; cubiti autem gibbum ad pectus adducere; summam vero manum ad summum sanum humerum adhibere. Siquidem igitur decumbere sustinet, fulcimentum, aliquod, quod obfirmet, apponere oportet, quo humerus quammaxime superne maneat. Si vero obambulare volet, fundam ex fascia factam, & acutæ gibbi cubiti parti circumdatam, de collo appensam gestare oportet.

## SECTIO II.

**C**Ubi porro gibbi articulus ubi emotus, aut luxatus est ad costas, aut foras, acuta ipsius parte in brachii cavitate manente, extensione indirectum facta, id, quod eminet retrorsum & in obliquum repellere oportet. Ubi vero perfecte excidit aut hac, aut illac, extensio, in qua brachium fractum deligatur, requiritur. Ita enim incurva gibbi non pars non impedit. Excidit autem maxime ad partem versus costas, Correctiones vero facere oportet quamplurimum ab-

ducendo, & ut ne brachii caput cornicem contingat, sublimem circumducere, ac inflectere, & non in directum cogere; simul autem contraria in utramque partem detrudere, & in sedem compellere. Contulerit etiam in his gibbi cubiti inversio modo in supinam, modo in pronam partem. Curatio vero ex figura est, ut summam manum paullo altiore cubiti gibbo habeant, brachium vero ad costas. Sic etiam appensi exceptio, & positio, & gestandi facilitas, & natura, & usus in communi sunt, si modo non male callus obducatur. Obducitur autem cito. Curatio fit linteis juxta legem articulare, ita ut acuta ejus pars insuper deligetur. Recrudescit autem maxime cubiti gibbus febribus, doloribus, nausea, & vomitu meracæ bilis, præsertim si retrorsum luxatus fuerit, ob torporem; deinde, si in anteriorem partem. Verum curatio eadem est. Repositio vero retrorsum luxati, ut extentum distendamus: signum autem est, quod extendere ipsum non possunt, sicut in anteriorem partem luxati, quod inflectere nequeunt. Verum tunc durum quiddam involutum indere oportet, & circum hoc ab extensione derepente inflectere. Disparationis autem ossium signum est manifestum ex contactu juxta venam, quæ in brachio finditur. At vero callus cito his obducitur. Ex nativitate autem breviora sunt ossa infra noxam, plurimum quæ proxima sunt, cubiti; deinde manus; postea digitorum. Verum brachium, & humerus robustiora sunt propter inversionem. At altera manus propter opera adhuc fortior est. Imminutio vero carniū fit, si foras excidit, intrinsecus; sin minus, in contrarium prout excidit. Cubiti vero gibbus si intro, aut extra exciderit, extensio fit in communi



figura cubiti ad brachium. Fascia enim sub alam data, ipsam exceptam suspendere oportet; ad summum vero cubiti gibbum juxta articulum pondus appendere, aut manibus deorsum cogerere. Ubi vero articulus ultra elevatus est, coaptationes manuum volis fiunt, velut etiam in manibus. Deligatio quoque in hac figura, & exceptio appensi, & positio. At si in posteriorem excidit partem, statim extentum palmis dirigere, ac coaptare oportet. Simul autem in directione etiam aliis opus est. Si in anteriorem, circum linteum convolutum justæ molis inflectendo simul directionem facere oportet. Si vero in alteram partem inclinarit, in directione simul utraque facere oportet. Verum curationi communis est figura, & deligatio. Possunt autem & ex distentione omnia in communi contingere. At vero repositiones aliæ ex superelevatione reponuntur, aliæ ex extensione, aliæ ex circumvolutione. Hæ vero ex figurarum excessibus aut hac, aut illac celeriter fiunt.

Manus articulus aut intro, aut extra luxatur, plerumque vero intro. Signa autem facilia cognita sunt. Si enim intro luxatus est, digitos inflexere non possunt. Si extra, extendere nequeunt. Repositio fit digitis supra mensam positis, ut ab aliis atque aliis in diversum extensio fiat, & id, quod eminent, aut vola, aut calcaneo retrudatur, & in anteriorem partem deorsum protrudatur, Inferne vero juxta alterum os moles aliqua convoluta mollis supponatur, si supra eminent, manu prona locata; si infra, supina. Curatio vero linteis fit. Totam porro manus aut intro, aut extra, aut hac, aut illac luxatur. Maxime vero intro. Quandoque autem & appendix emota est. Quandoque vero alterum os disparatum distat. His extensio

fortis facienda est, & quod quidem eminet retrudatur, alterum vero contra trudatur, duabus speciebus simul contingentibus, & retrorsum, & in obliquum, aut manibus supra mensam, aut calcaneo. Quæ vero recrudescent ac deformia sunt, tempore ad usum corroborantur. Curatio fit linteis cum manu & cubito, & ferulæ usque ad digitos ponuntur. At ferulis hæc deligata frequentius quam fracturas solvere oportet, & perfusionem ampliorem adhibere. Ex nativitate autem manus brevior fit, & carnes imminuuntur maxime in contraria parte ei, in qua luxatio facta est. At adulto jam ossa manent.

Digiti vero articulus luxatus facilis cognitu est. Repositio fit extendens in directum, ita ut quod eminet os protrudatur, contrarium vero contra trudatur. Curatio fit fasciis, ac linteis. Si vero non reponantur, forinsecus callo obducitur. At si ex nativitate, aut dum adhuc crescit homo, luxata fuerint ossa, breviora fiunt infra luxationem, & carnes imminuuntur contraria maxime parte ei, in qua luxatio facta est. In adulto vero ossa manent.

Maxilla vero paucis jam perfecte luxata est. Os enim, quod a superiore maxilla prodit, cum eo osse subjugatum est, quod sub aurem annexum est, quodque capita infernæ maxillæ concludit, ac dirimit, quum altero capite superius sit, altero inferius, & extremæ infernæ genæ partes ita se habent, ut altera ob longitudinem non facile accessum admittat, altera vero cornix est, & supra jugale os excedit. Simul autem & ambarum harum extremitatum nervosi tendines existunt, ex quibus muscoli dependent, qui temporales, ac manducatorii appellantur. Propterea autem appellantur, & propterea moventur, eo quod hinc de-



pendent. Nam in edendo, & in loquendo, & in reliquo oris usu superna quidem maxilla quiescit. Est enim capiti connexa, & non coarticulata. Inferna autem maxilla movetur. Coarticulata enim est a superna maxilla, & a capite. Cur igitur in convulsionibus, ac distentionibus hic articulus distentus primus de se significationem præbeat, & cur plagæ temporales periculosæ sint, ac soporem inducant, alio libro referetur. Quod vero non valde luxetur, causæ hæ sunt. Sed & hæc quoque causa est, quod non valde tales ciborum necessitates hominem apprehendunt, ut magis quam potest hiet. Exciderit autem a nulla alia figura, quam si quis valde hians maxillam in alteram partem diducat. Confert tamen ad hoc, ut excidat, hoc ipsum. Quicumque enim nervi, & quicumque muscoli circa articulos sunt, aut ab articulis, ex quibus colligantur, horum quicumque in usu sæpe moventur, hi etiam maxime ad extensiones remittunt, quemadmodum etiam pelles molliissimæ multum remittunt. De quo igitur sermo est, luxatur quidem, & excedit maxilla raro; laxatur tamen sæpe in hiatibus, velut etiam aliæ musculorum, ac nervorum immutationes hoc faciunt. Manifestum vero ex his maxime fit, ubi excidit. Prominet enim inferna maxilla in anteriorem partem, & in contrariam luxationi partem abducitur; & ossis cornix circa supernam maxillam tumidior fit; & internas maxillas difficulter committunt. Quæ vero repositio his conveniat, manifestum est. Oportet enim aliquem vulnerati caput detinere, & alterum infernam maxillam intrinsecus, ac extrinsecus ad mentum digitis apprehendere, & primum maxillam aliquandiu hac atque illac manu abducere,

& ipsum hominem jubere, ut maxillam laxam habeat, & simul adducat, ac quammaxime remittat. Deinde repente tribus figuris simul laxare oportet, diligenti in hoc animadversione habita. Nam & ex distortionem ad naturam deducere oportet, & infernam maxillam retrorsum protrudere, ita ut æger hæc sequatur, & maxillas committat, ac non hiet. Atque hæc quidem repositio est, & neque aliis figuris fieri poterit. Curatio vero brevis sufficit. Splenium enim inceratum apponitur, ac laxo deligamento deligatur. Securius autem hæc aggressio perficitur, homine supino reclinato, & coriaceo pulvinari plenissime farcto capiti supposito, ut in ipsum innitens, quamminimum cedat. Insuper autem & caput vulnerati aliquis detinere debet.

Si vero ambæ maxillæ luxatæ fuerint, curatio quidem eadem est, verum hi os minus committere possunt. Nam his genæ prominentiores sunt, sed indistortæ. Quod vero distortæ non sint, maxime cognoveris ex dentium tum supernorum tum infernorum terminis e directo inter se correspondentibus. His confert, ut quam citissime reponantur. Repositionis autem modus prius dictus est. Si vero non reponantur, animæ periculum imminet præ febribus continuis, & torpido sopore. Soporiferi enim hi muscoli sunt, & dum alterantur, & dum intenduntur præter naturam. Solet etiam alvus his biliosa, meraca, pauca egerere. Et si vomuerint, meraca vomunt. Hi igitur etiam moriuntur decima maxime die.

At si fracta fuerit inferna maxilla, si quidem non omnino caulatim hoc contigerit, sed cohæret adhuc os, confractum tamen fuerit, dirigere quidem os oportet digitis circa linguam obliquam subjectis, forinsecus vero contra niti,



prout contulerit. Et si distorti fuerint dentes juxta vulnus commoti, postquam os directum fuerit, dentes inter se conjugare oportet, non duos solum, sed etiam plures, atque hoc maxime auro, sin minus, lineo filo, donec os corroboretur. Postea cerato, & spleniis paucis, & lintheis modicis deligare, non nimium firmis, sed laxis. Nam hoc probe nosse expedit, quod deligatio per linthea maxillæ fractæ parum quidem contulerit, si recte fiat; magnopere vero læferit, si prave deligetur. Frequenter autem circa linguam explorare oportet, & multo tempore reniti, ac digitis dirigere os confractum, optimumque esset, si hoc semper fieri posset, sed fieri nequit.

Si vero os penitus caulatim diffractum fuerit, raro autem hoc contingit, dirigere quidem os oportet, velut dictum est. Ubi vero direxeris, dentes conjugare, quemadmodum antea dictum est. Magnopere enim contulerit ad quietem, & adhuc magis si quis recte conjungat, & velut oportet futuras consuat. At enim non facile est, omnem chirurgiam scripto exquisite prodere, sed ex his, quæ scripta sunt, formam & imaginem concipere oportet. Postea corio opus est Carthaginensi, & si quidem junior fuerit vulneratus, satis est squama inde detracta uti. Si vero adultior, ipso corio; ita ut defecta inde particula trium digitorum latitudine, aut prout congrua fuerit, sublita prius e gummi maxilla, ita enim mitius fuerit, glutine agglutinetur summa sui parte, ad diffractam maxillæ partem, digiti aut paullo amplior distantia a vulnere. Et hæc quidem particula ad infernam partem agglutinanda est, & habeat fissuram e directo menti, quo acutam ejus partem circumcirca complectatur. Alterum autem ejusmodi lorum, aut paullo latius

ad supernam maxillæ partem agglutinare oportet, tanta a vulnere distantia, quanta illa altera lori particula abfuit. Sit autem & hoc fissum, ut circumcirca aurem ambiat. Sint autem hæc lora acuta, qua parte committuntur, & ubi ipsorum extremitates connectere, ac colligare oportet. In agglutinatione vero caro corii ad cutem vergat. Sic enim magis agglutinatum adhærescit. Postea extento hoc loro, magis autem eo, quod circa mentum est, quammaxime, ne maxilla evacuetur, lora ipsa circa verticem connectere oportet, & deinde linteo frontem deligare; & superinjectum quid esse oportet, velut moris est, quo vincula quieta sint, ac firma. Decubitus autem faciat in sanam maxillam, non maxillæ, sed capiti innitens. Adtenuandum vero est corpus usque ad dies decem, deinde renutriendum non tarde. Si enim primis diebus inflammatio non accesserit, in viginti diebus maxilla corroboratur; perfecte enim callo obducitur, quemadmodum etiam alia ossa rara, si non corruptio infestaret. Verum de corruptionibus omnium ossium alia longa tractatio restat. Hæc extensio per agglutinamenta fiens, mitis est, & prompta ad moderationem faciendam, & ad multas, ac multis locis faciendas directiones accommodata. At medici non intelligentia æque, ac manibus prompti, tum in aliis vulneribus, tum in maxillarum fracturis tales existunt. Variis enim modis & bene, & male maxillam fractam deligant. Omnis enim deligatio maxillæ sic fractæ, ossa ad fracturam magis vergentia inclinat, quam ad naturam ducit. Si vero inferna maxilla circa connexionem ad mentum divulgata fuerit. Sola autem hæc connexio in inferna maxilla est. Verum in superna multæ. Sed non volo fer-



mone longius aberrare. In aliis enim morborum speciebus de his dicendum est. Si igitur connectio ad mentum disparata fuerit, ipsam coaptare cujuslibet viri est. Os enim, quod eminet, ad internam partem digitis admotis detrudere oportet. Quod vero intro vergit, ad externam partem digitis immixtis reducere. Hæc tamen extensione distendendo facere oportet. Facilius enim sic ad naturam redibunt, quam si quis ossa inter se complicans cogere conetur. Ubi vero coaptata fuerint, conjugare oportet dentes inter se hinc atque illinc, velut prius dictum est. Curare vero cerato, & spleniis paucis, ac linteis. Deligationem autem brevem potius, quam variam hic locus maxime admittit. Nam ut æquilis non est, prope tamen ad æquilibrium accedit. At lintei obvolutionem facere oportet, si quidem dextra maxilla eminet, in dexteram. In dexteram enim fieri putatur, si dextra manus deligationi præit. Si vero altera maxilla eminuerit, aliter deligationem ducere oportet, & si quidem recte quis coaptationem adeptus fuerit, & velut convenit quieverit, cita curatio continget, & dentes illæsi manent. Sin minus, diuturnior fiet curatio, & distortionem habebit, dentes autem læsi, & inutiles fiunt.

Porro si nasus fractus fuerit, fracturæ modus non unus est. Verum qui pulchris deligationibus gaudent citra intelligentiam, tum in aliis multis damnum incurrunt, tum in fracturis circa nasum vel maxime. Ex deligationibus enim hæc maxime varia est, & quæ plurimas ascias habeat, & interruptiones, ac interceptiones cutis maxime varias rhombiformes. Sicut igitur dictum est, qui nulla intelligentia præditi adgreffionis studio tenentur, ultro se offerunt ad nasum fractum deligandum.

Una

Una itaque alteraque die lætatur medicus, gaudet quoque is, qui deligatur. Deinde cito quidem is, qui deligatur, fatiatur. Noxia enim, & molesta est gestatio: satis autem est, medico ostentasse, quod nasum varie deligare novit; facit autem talis deligatio omnia contra quam convenit. Partim enim, qui propter fracturam limi fiunt, si superne quis magis premat, siniores nimirum fient; partim vero, quibus nasus hac, aut illac distorquetur, aut circa cartilaginem, aut superius, palam est, quod neque ipsis superne deligatio proderit, sed etiam magis lædet. Non enim ita congruit spleniis altera nasi pars, quamquam neque hoc faciant deligantes. Proxime vero deligatio resistere mihi videtur, si juxta medium nasum circa acutam partem contusa caro ad os fuerit, aut etiam os parum, & non multum contusum sit. Talibus enim nasus callo obducitur, & aliquanto asperior evadit. Sed tamen neque his deligatio multo negotio opus habet, si modo etiam deligare oportet. Sufficit autem super contusionem splenium inceratum extendere. Postea velut ex duobus initiis deligatio fit, ita semel linteum circumdandum est. Optima tamen curatio est per farinam triticeam hornam, viscosam, subactam, modicam, ita ut talia ex illa velut cataplasmate integantur. Si igitur triticea farina bona fuerit, & tractu facilis, ea ad omnia hujusmodi uti oportet. Si vero non facilis tractu sit, modicam mannam levissime tritam, & aqua dilutam, cum farina subigere oportet, aut gummi parum similiter ammiscere. Quibuscumque igitur nasus fractus est, ut deorsum, & in sinum vergat, si quidem ex anteriore parte juxta cartilaginem subsidat, fieri potest, ut aliquid, quod ipsum dirigat, in nares indatur.



Sin minus , omnia talia digitis in nares injectis dirigere oportet , si id fieri datur. Sin minus , crassum specillum non in anteriorem narium partem digitis indere oportet , sed qua parte nasus subsidit ; extrinsecus autem ab utraque parte nasum apprehendere , simulque cogere , ac sursum ducere. Et si quidem valde in anteriore parte fuerit fractura , fieri poterit , ut aliquid intra nares indatur , velut jam dictum est , nimirum linthei rasura , aut aliud quid hujusmodi , lintheo involutum , aut potius in corio Carthaginensi confutum , ea figura , quæ congruat loco , cui incumbet. Si vero ulterius facta fuerit fractura , fieri non potest , ut aliquid indatur. Si enim in anteriore parte molesta est gestatio , quomodo non sit in interiore ? Primum igitur & intrinsecus conformando , & forinsecus non parcendo , ad pristinam naturam reducere , ac dirigere oportet. Valde enim conformatur nasus fractus , maxime quidem eadem die ; sin minus , paullo postea. Verum segniter agunt medici , & levius quam convenit primum contingunt. Injicere enim manus hinc atque illinc juxta naturam nasi quam infime oportet , ex infernis sursum cogendo , & sic quammaxime erigere , una cum interna directione etiam extrinsecas dirigendo. Postea ad hæc nullus talis medicus est , si studium adhibere , ac tolerare vult , velut ipsius digiti indices. Hi enim maxime secundum naturam sunt. Utrumque enim digitum injicere , eoque totum nasum firmare oportet , atque ita in quiete habere , si quidem fieri posset , semper donec corroboretur ; sin minus , plurimo tempore , velut dictum est. Quod si fieri nequeat , aut puer , aut aliqua mulier hoc faciant. Molles enim manus esse oportet. Sic enim quamoptime nasus

curari poterit, ubi non in obliquum, sed ad infernam partem æqualiter sublidat. Ego igitur nullum unquam nasum vidi, qui sic fractus dirigi non potuisset, si statim ita corrigeretur priusquam callus obduceretur, si modo quis recte curare velit. Verum homines, ut ne deformes fiant, multo quidem pretio coemerint, studium autem adhibere non sciunt, simulque non tolerant, si non dolore vexentur, aut mortem timeant; quamquam brevi tempore nasus callo obducatur, decem enim diebus corroboratur, si non corruptio insuper accedat. Quibuscumque vero os in obliquum frangitur, curatio quidem eadem est. Verum directionem non æqualem utrimque facere oportet, sed quod inclinatum est, extrinsecus cogendo ad naturam compellere, & in nares facta contrectatione, ea quæ intro repunt impigre dirigere, donec correctæ fuerint, ita ut ejus probe memineris. Quod si non statim corrigantur, fieri non possit, ut nasus non distortus fiat. Postquam autem ad naturam reduxeris, digitos plures, aut unum digitum ad locum admovere oportet, qua parte eminebat, atque ita aut ipsum, aut alium quemdam sustentare, donec vulnus corroboratum fuerit. Sed & in narem parvum digitum immittere oportet, & alias atque alias impellendo ea quæ inclinata sunt dirigere. At si quid inflammationis his accedat, farina subacta uti oportet, & tamen incumbente etiam farina digitos similiter admovere opus est. Si vero juxta cartilaginem in obliquum fractus sit, necesse est summum nasum distorti. Talibus igitur in summam narem aliquid, quod dirigat ex relatis, aut quod his simile sit, indere oportet. Poterit autem quis multa idonea invenire, quæ neque odorem habeant, neque



alias lenia sunt. Ego vero quandoque pulmonis ovilli fructum defectum indidi. Hoc enim forte obtingebat. Nam spongiæ inditæ humiditates fuscipiunt. Postea Carthagenensis corii squamam magni digiti latitudine, aut prout contulerit resectam, extrinsecus ad nasum inclinatum agglutinare oportet, & deinde hoc corii lorum, prout contulerit, extendere. Paulo tamen amplius extendere convenit, quo erectus, & absolute directus sit nasus. Longum autem sit hoc lorum, ut postea infra aurem abductum circum caput obducatur; & licet quidem lori extremitatem ad frontem agglutinare, licet etiam longius ducere, & deinde capiti obductum deligare. Hic modus simul justam directionem habet, & simul ad moderationem faciendam promptus est, ut si quis magis, aut minus nasi inclinationem ad contrarium facere velit. Nam quibus in obliquum nasus frangitur, eos in reliquis, velut relatum est, curare oportet. Plurimis tamen insuper opus est, ut inclinationis in contrarium gratia, lorum ad summum nasum agglutinetur. Quibuscumque vero cum fractura etiam ulcera adfunt, eos ea propter turbari non oportet. Verum super ulcera ceratum picatum imponere, aut ex emplastris aliquod cruentis vulneribus idoneum. Facilia enim curatu talia sunt. Similiter etiam, si ossa discessura sunt. Primam directionem impigre facere oportet nihil omittendo, & directionem per digitos etiam postero tempore, ita ut laxius quidem admoveas, admoveas tamen. Ex omnibus enim corporis partibus nasus facillime conformari potest. Cæterum lororum agglutinatione, ac in contrarium inclinatione, uti omnino nihil prohibet, siue ulcera adfuerint, siue inflammatio. Nullam enim molestiam exhibent.

At vero si auris fracta fuerit, deligationes omnes inimicæ sunt. Neque enim ita laxam quis circumdare poterit. Si vero magis premat, majus malum operabitur. Nam & sana auris deligatione pressa, dolore, & pulsatione, & febre adficitur. Sed & cataplasmata pessima quidem omnino sunt, quæ gravissima sunt. Verum & alia pleraque omnia mala sunt, & abscessus inducunt, & mucum ampliolem suggerunt, & deinde suppurationes noxias. His autem fracta auris minime opus habet. Proximum tamen locum habet, si quid imponi debet, farina viscosa, quam neque ipsam gravem esse oportet. Contingere vero quamminime conducit. Bonum enim aliquando medicamentum est, etiam nullum adhibere medicamentum, & ad aures, & ad multa alia. Vellicationem insuper, ac scalpulturam vitare oportet. Corpus autem attenuare, & magis in quo periculum est, ne auris suppuretur. Melius est quoque alvum mollire. Si vero quis facile vomat, ex moderata aliqua purgatione vomitum faciat. At si ad suppurationem deveniat, cito quidem aperire non oportet; multa enim ex his, quæ suppurari videntur, quandoque resorbentur, etiamsi nondum quis ullum cataplasma imposuit. Si vero quis aperire cogatur, celerrime quidem sana fit, si in ulteriorem partem perurat. Illud tamen certo scire expedit, quod mutila fiet auris, & minor altera, si perusta fuerit. Si vero non in ulteriorem partem peruratur, tumidam partem non valde parva sectione incidere oportet. Sub crassiore enim cute pus reperitur, quam quis putaverit. Verum ut in summa dicam, alia quoque omnia mucosa, & mucos facientia, utpote quæ sunt viscosa, ad contactum sub digitis hac atque



illac cito dilabuntur; & propterea sub crassiore cute medici talia inveniunt, quam putarint. Nam & aliquas nervorum contortiones, ganglia appellatas, quæ sane laxæ, ac fluidæ sunt, mucosamque carnem habent, multi aperiunt, humorem in talibus se inventuros esse putantes. Medicus quidem igitur sententia sua fallitur, verum rei hujusmodi nullum ex apertione accedit detrimentum. Qui vero aquosi loci sint, aut muco pleni, & in qualibus locis singula si aperiuntur mortem afferant, aut etiam alia detrimenta inducant, de his in alio opere scribetur. Quum igitur inciderit quis aurem, ab omnibus quidem cataplasmatibus, & ab omni linamentorum usu abstinere oportet. Curare autem vel emplastro aliquo cruentis vulneribus idoneo, vel aliquo alio, quod neque gravitatem, neque dolorem inducat. Si enim cartilago denudari inceperit, & subsidencia purulenta, aut mucosa habuerit, molestum est. Fit autem & hoc propter illas curationes. Cæterum omnium eorum, quæ recruderunt, perussio in ulteriorem partem sufficientissima medela est.

### SECTIO III.

**V**erticula vero spinæ quibuscumque in gibbum trahuntur ex morbis, pleraque ut solvantur, fieri non potest. Insuperque & quæ supra septi transversæ juncturam, ac connexionem gibba fiunt. Quæ vero infra, eorum aliqua solvunt varices in cruribus fientes. Magis autem hæc varices, quæ in vena juxta poplitem fiunt, quibuscumque gibbositas contigerit, eam solvunt. Fiunt autem & in vena circa inguina. Jam vero quibusdam etiam dysenteria diuturna solvit.

Et quibus quidem gibba fit spina dum pueri sunt, priusquam corpus ad augmentum plenum perfectum fuerit, his corpus juxta spinam coaugeri non solet. Sed crura quidem, ac manus perficiuntur, illæ vero partes defectuosiores sunt. Et quibus supra septum transversum gibbositas est, his & costæ in amplitudinem augeri non solent, sed in anteriorem partem & pectus acutum fit, sed non latum; ipsique & difficulter spirant, & stridulam faucium asperitatem habent. Nam ventriculi, qui spiritum suscipiunt, ac emittunt, minorem amplitudinem habent. Sed & juxta magnum verticulum cervicem repandam habere coguntur, ut ne caput ipsis cernuum sit. Multam igitur angustiam faucibus exhibet etiam hoc os intro vergens. Nam & his, qui natura recti sunt, spirandi difficultatem hoc os inducit, si intro vergat, donec repressum fuerit. Ob talem igitur figuram ejusmodi homines eminentis gutturis magis, quam sani apparent; & tuberculis circa pulmonem duris, ac crudis plerumque tales affecti sunt. Nam & gibbositatis occasio, & distentio plerisque propter tales collectiones fit, cum quibus vicini nervi communionem habent. Quibus vero infra septum transversum gibbositas est, horum quibusdam morbi renum, ac vesicæ accedunt. Sed & abscessus ad suppurationem, & circa laterum mollitudines, & inguina diuturni, ac ægre curabiles; & neutri horum gibbositates solvunt. Coxæ vero his magis excarnes sunt, quam his quibus superne gibbositas contigit. Universa tamen spina his longior est, quam superne gibbosis. Pubes vero, & barba tardior, ac imperfectior. Sed & infecundiores hi sunt, quam superne gibbosi. At vero quibus jam aucto corpore gibbositas facta fuerit, his palam præsentis



tunc morbi judicationem gibbositas facit, per tempus tamen, aliquid ex iisdem significatione de se plus, aut minus præbet, quemadmodum etiam in pueris. Minus autem maligne in totum talia se habent, & multi sane jam facile, ac sano modo gibbositatem sustinuerunt usque ad senectutem; & maxime hi, quibus ad carnositatem, ac pinguitudinem promotum fuerit corpus, pauci tamen talium sexaginta annos transgressi sunt, plerique vero brevioris vitæ sunt. Quibusdam etiam in latus, aut hac, aut illac, verticula obliqua fiunt. Et omnia, aut pleraque talia propter collectiones intra spinam fiunt. Quibusdam una cum morbo etiam figuræ insuper conferunt, ad quas reclinari consueverunt. Verum de his in diuturnis pulmonis morbis dicitur. Illic enim de his, quæ futura sunt, pulcherrimæ prænotiones habentur.

Porro quibus ex casu spina gibba fit, horum sane pauca superantur, ita ut dirigi possint. Nam quæ in scala fiunt extensiones, nihil direxerunt, quod ego sciam. Utuntur enim ipsa maxime hi medici, qui multitudinis famam aucupantur. Apud tales enim hæc in admiratione sunt, si aut pendentem, aut projici aliquem, aut quæ his similia sunt videant, & hæc celebrant semper, neque ipsis curæ est, quale quid eveniat ex hac aggressionem, siue bonum id sit, siue malum. Medici tamen, qui talia studio habent, quos sane ego novi, imperiti sunt. Inventum equidem vetus est, & laudo sane vehementer eum qui primus excogitavit & hoc machinamentum, & quodvis aliud secundum naturam inventum. Nihil enim despero, si quis recte constructum concutiat, fieri posse, ut quædam dirigantur. Ipse tamen omnia hujusmodi hoc modo curare erubui, propter-

ea quod impostorum magis tales sunt modi. Quibus igitur prope cervicem gibbositas fuerit, his verisimile est, has in caput extensiones minus prodesse, parvum enim pondus habet caput, & summi humeri deorsum vergentes. Verum tales verisimile est magis dirigi posse, si in pedes concutiantur: Ita enim major propensio ad hujusmodi fieret. Quibus autem magis inferius gibbositas est, hos par est ut magis in caput concutiantur.

Si quis igitur concutere volet, recte sane hoc modo præparare poterit. Scalam coriaceis, aut laneis pulvinaribus insternere oportet probe adligatis, paullo amplius & in longitudinem, & in utramque partem, quam quantum corpus hominis occuparit. Deinde hominem supinum supra scalam reclinare, & postea pedes quidem adligare juxta malleolos ad scalam non disparatos, vinculo quidem satis valido, verum molli. Adligare vero etiam oportet infra & supra utrumque genu, itemque circa coxas. Circa laterum autem mollitudinem, & circa pectus laxas fascias circumdare, ita ut ne impediant concussionem. Manus vero ad costas extentas, ad corpus applicare, & non ad scalam. Ubi vero hæc præparaveris, scalam ita ad turrin aliquam altam, aut ad domus lacunar adtrahere oportet. Locus autem, in quo concussionem facis, renitens sit. Eos vero, qui extendunt, probe doctos esse convenit, quo æqualiter, & probe, & ex æquilibrio, ac derepente demittant, ut neque scala in alteram partem repens ad terram deveniat, neque ipsi pronui sint. Quod si tamen a turri, aut malo defixo carchesium habente, quis demittat, adhuc melius præparabit, ita ut ex trochlea aut asello laxatis instrumentis ac funibus demissio fiat. Verum injucundum est de his lon-



gius verba facere; atamen ex his structuris maxime quis concuti poterit. Si vero valde superne fuerit gibbositas, & concutere sit opus, omnino in pedes id faciendum est, velut dictum est. Ita enim major propensio ad hæc contingit. Et firmare quidem oportet juxta pectus ad scalam fortiter deligando, juxta cervicem vero fascia quam laxissima, directionis saltem gratia. Sed & ipsum caput juxta frontem ad scalam adligare oportet, manus autem porrectas ad corpus adligare, non ad scalam. Reliquum vero corpus indeligatum esse oportet, nisi quantum satis est directionis gratia, alia atque alia laxa fascia circumdatum esse. Verum considerandum est ne concussionem impendant hæc vincula. Crura vero ad scalam quidem ne deligentur, sed inter se, ita ut secundum spinam in directum vergant. Atque hæc quidem hoc modo facienda sunt, si omnino opus fuerit in scala concussionem fieri. Turpe tamen est & in omni arte, & non minime in medicina, multam turbam, & multam ostentationem, & multum rumorem concitare, & deinde nullam utilitatem afferre.

Oportet autem primum spinæ naturam qualis est cognoscere; ad multos enim morbos ea opus fuerit. Nam qua parte ad ventrem vergit, verticula intus inter se paria sunt, & inter se ligata vinculo mucoso, ac nervoso, de cartilaginibus exorto usque ad medullam. Alii vero nervi nervosi perpetui adnexusi, hinc atque illinc juxta ipsa porriguntur. Verum venarum & arteriarum communitates, in alio sermone declarabuntur, quot & quales sint, & unde proficiantur, & in qualibus qualia possint. Itemque quibus involucris ipsa medulla intecta sit, & unde profectis, & ubi desinentibus, & quibuscum communionem habentibus,

& qualia potentibus. At in ulteriore parte in articulis verticula inter se cardinis in modum conferta sunt. Nervi vero communes juxta omnia & in externis, & in internis partibus porriguntur. Et processus ossis ad externam partem, ab omnibus verticulis unus de unoquoque, tum a majoribus, tum a minoribus. In his autem processibus cartilaginum appendices, & ex illis nervorum progerminatio, cognata ac consimilis extremis nervis. Costæ vero adnexæ sunt, ad internam partem magis, quam ad externam capitibus vergentes; ad unumquodque autem verticulum adarticulatæ sunt. Curvissimæ autem sunt hominis costæ obtorto modo. Intermediani verò partem costarum, & ossium, de verticulis procedentium, explent utrinque muscoli, a cer-vice initio sumpto usque ad septi transversæ adnexionem. Ipsa autem spina secundum longitudinem rectobliqua est, a sacro quidem osse usque ad magnum verticulum, juxta quod crurum adnexio dependet, gibbosa est. Nam & vesica, & genituræ, & intestini recti laxa pars in hac parte constituta sunt. Inde vero usque ad septi adnexionem in directum repanda est, & musculos adnatos habet solus hic locus, ex internis partibus, quos lumbarios vocant. Ab hac autem parte usque ad magnum verticulum, quod supra supernas humeri partes est, e directo gibbosa est, imo magis esse videtur quam est. Nam spina media sui parte altissimas ossium propagines habet, hinc autem atque illinc, minores. Ipse vero cervicis articulus repandus est. Quibuscumque igitur gibbositates juxta verticula fiunt, his expulsio magna a connexione abrupta, unius aut plurium verticulorum, non ita multis, sed paucis contingit. Neque enim talia vulnera



fieri facile est, neque ad externam partem expelli facile est, si non ex anteriore parte, forti aliqua re per ventrem quis vulneratus fuerit; sic autem utique perierit: aut nisi quis ex alto loco delapsus, coxis, aut humeris impegerit. Sed & hic utique morietur, etiamsi statim non intereat.

At ex posteriore parte ad internam, hujusmodi expulsionem fieri non est proclive, si non in immensum grave aliquod onus irruat. Nam ex ossibus, quæ foras enata sunt, unum quodque ejusmodi est, ut prius ipsum frangatur, quam magnam intro inclinationem faciat, ita ut & ligamenta, & articulos inter se alternatos, ac articulatos violet. Præterea & spinalis medulla affligeretur, si ex modico loco inflexionem haberet, ubi verticulum tali expulsionem exsiluisset, & verticulum, quod exsiluisset, spinalem medullam utique premeret, si non etiam abrumperet. At ea pressa, ac intercepta, multarum & magnarum & nobilium partium torporem induceret. Quare neque curæ foret medico, quomodo verticulum dirigat, ac coaptet, quum multa, & violenta alia mala adsint. Itaque si tale contingat, palam est, quod neque concutiendo, neque alio quodam modo reponi possit, nisi quis dissecto homine, & manu in ventrem injecta inquisitionem faciat, & ex interna parte ad externam manu retrudat, atque hæc in mortuo quidem fieri possent, in vivo autem non ita. Cur igitur hæc scribo? Quia sunt quidam, qui putant se curasse homines, quibus intro exciderint verticula articulos penitus transgressa; & sane facillimam hanc distortionem esse, ut quis inde convalescat, aliqui censent, eamque nulla repositione opus habere, sed sua sponte talia sanescere. Ignari autem multi sunt; & lucro hoc habent quod ignorant. Per-

suadent enim alios. Verum falluntur hi hac de causa. Spinam, quæ in spina ipsa eminet, verticula ipsa esse putant, quia unumquodque ex his ossibus ad contactum rotundum apparet, ignorantes, quod hæc ossa sunt ea, quæ a verticulis enata sunt, de quibus paullo ante dixi. At verticula longe magis in anteriorem partem ab sunt. Angustissimum enim ventrem ex omnibus animalibus homo habet, quantum ad magnitudinem attinet, a posteriore ad anteriorem partem, insuperque etiam juxta pectus. Quum igitur horum supereminentium ossium aliquod vehementer fractum fuerit, sive unum, sive plura, ea parte humilior locus redditur, quam hinc atque illic: & propterea decipiuntur putantes verticula intro abiisse. Decipiunt autem insuper ipsos etiam figuræ vulneratorum. Si enim inclinare se conantur, dolent, quum ea parte qua vulnerati sunt, cutis sit circumtenta; & simul ossa fracta ita magis corpus affligunt. Si vero in repandum recurvantur, melius habent. Nam & cutis juxta vulnus laxior fit, & ossa minus affligunt. Sed & si quis ipsos contingat, ea parte repandi cedunt, & locus vacuus, ac mollis hac parte ad contactum apparet. Hæc omnia relata insuper medicos decipiunt. Verum tales cito sani & illæsi sua sponte sunt. Cito enim omnia ejusmodi ossa, quæ laxa sunt, callo obducuntur. Obliquatur igitur spina etiam sanis juxta multos modos. Nam & in natura, & in usu ita se habet. Sed & præ senectute, ac doloribus. Nam hæc colligandi vim habent.

At gibbositates ex casibus contingentes plerumque fiunt, si aut in costas innitatur, ac impingat, aut in humeros cadat. Necessè est enim foris apparere in gibbosiata unum aliquod altissimum verticulum, minus vero ea, quæ sunt



hinc atque illinc. Non igitur profilit multum ab aliis, sed parum, quum singula acervatim concedant. Propter hoc igitur etiam spinalis medulla ejusmodi distortionem facile fert, eo quod circularis ipsi distortio contingit, non angularis.

Oportet autem fabricam instrumenti coactorii hujusmodi construere. Licet equidem lignum robustum & latum, incisuram oblongam habens, defodere. Licet etiam pro ligno, in pariete incisuram oblongam facere, quæ aut cubiti altitudine, aut prout congruum fuerit, a pavimento exstet. Postea columnam quernam, quadrangularem, obliquam ad parietem adjicere oportet, tanto spatio in medio relicto, ut aliquis pertransire possit, si forte opus sit. Et super columnam quidem, aut tunicas, aut aliud quid molle, quod tamen non multum cedat, internerere oportet, homini vero fomentum adhibere. Si vero admittat, ipsum etiam multa calida lavare. Deinde pronum extentum reclinare, & manus ipsius secundum naturam extensas ad corpus adligare. Postea vero loro molli, satis lato, ac longo, ex duobus perpetuis inter se adversariis loris constante, ex media ipsius parte, juxta medium pectus quamproxime sub alas bis circumdare oportet; & quod superest de loris utrisque, juxta alam circum humeros obvolvatur, & initia ipsorum ad lignum quoddam pistilliforme adligentur, ita ut congruant secundum longitudinem subjæctæ columnæ, ad quam lignum illud pistilliforme adponere, & renitendo extensionem facere oportet. Tali vero quodam alio vinculo & supra genua, & supra calcaneos adligato, initia item ad ejusmodi lignum adligare oportet. Postea autem alio loro lato, ac molli, & robusto, fasciæ formam habente, longitudi-

nemque, ac latitudinem sufficientem, partem inter coxas & lumbos, quamproxime ad coxas, circumcirca fortiter deligare, atque ita tum huius lori, tum aliorum duorum capita, ad lignum a pedibus exstans adligare; & postea in hac figura hinc atque illinc, æqua simul inclinatione, simulque in directum extensionem facere. Nul- lum enim magnum malum talis extensio indu- xerit, si commode præparata fuerit, nisi quis de industria se extendendum exhibeat. At medicus, sive alius quisquam fortis & non imperitus, im- posita manus vola supra gibbum, & altera ma- nu insuper alteri superimposita; deorsum cogat, animadversione habita an in directum deorsum cogere oporteat, sive ad caput, sive ad coxas. Atque hæc coactio maxime innoxia est. Sed & si quis insideat super gibbum, & attollendo se, dum ille distenditur, incutiat, innoxium est. Neque quicquam prohibet pede inscendere, ac gestari supra gibbum, atque ita sensim incute- re. Ad hoc autem moderate faciendum idoneus quis fuerit ex his, qui in palæstra adfueti sunt. Efficacissima tamen coactio est, si aut paries in- cisuram habeat, aut lignum defossam infra spi- næ altitudinem incisum sit, quantum moderate habere videatur, ita ut tabula tiliacea, aut cu- iusdam alterius ligni, non tenuis, incisuræ in- datur, & postea linteum quoddam multiplex, aut parvum quoddam coriaceum pulvinar super gibbum imponatur. Quampaucissima tamen im- posita esse conducit, cavendi saltem gratia, ut ne tabula præ duritie dolorem aliquem impor- tune inducat. Sit autem gibbositas e directo maxime incisuræ in pariete, quo qua parte ma- xime exstat, ea quammaxime tabula imposita pre- mat. Ubi vero imposita fuerit, aliquis extremam



tabulæ partem deprimat, aut duo hoc faciant, si unus non suffecerit; alii vero corpus secundum longitudinem, velut dictum est, extendant, partim hinc, partim illinc constituti. Potest etiam a fellis extensio fieri, aut juxta lignum defossis, aut in ipso ligno a fellorum postibus constructis, sive erectos velis utrinque paullulum supereminentes, sive hinc atque illinc juxta ligni verticem. Hæ coactiones moderationem admittunt, ut & vehementissime, & moderate fieri possint. Talem autem vim habent, ut si quis etiam ad perniciem tales necessitates adhibere velit, & non ad curationem, tunc quoque multum possint. Nam si quis secundum longitudinem hinc atque illinc saltem sic extendat, & nullam aliam necessitatem addat, tamen sic etiam extensionem facere poterit. Sed & si non extendat, & tabula solum ita quis utatur, etiam sic sufficienter deorsum cogere poterit. Bonæ autem sunt hujusmodi violentiæ, quibus & vehementioribus & debilioribus uti licet, usu ipsorum prout quisque vult moderato. Et sane etiam secundum naturam coactionem faciunt. Nam ea, quæ exstant, ad locum suum redire cogit depressio. Quæ vero præter naturam coiverunt, ea extendunt extensiones secundum naturam. Proinde neque meliores his necessitates ego habeo, neque justiores. Rectitudo enim extensionis juxta ipsam spinam, inferne & juxta os sacrum appellatum, nullam ansam habet; superne vero juxta cervicem & caput, habet quidem ansam, sed in speciem indecora est; & si hac parte extensio fiat redundans, etiam alias læsiones inducere poterit. Experimentum autem aliquando feci, ut homine supino extento, utrem non inflatum sub gibbum subderem, & postea folle ex officina fabri

in subjectum utrem immisso inflarem. Verum res mihi non successit. Quum enim bene extenderem hominem, vincebatur uter, & non poterat flatus aliquam coactionem facere. Sed & alias hæc res prompta erat ad dilaplionem, nimirum quum in idem & hominis gibbositas, & utris pleni incurva turgiditas cogantur. Quum autem rursus non valde extenderem hominem, uter quidem præ flatu incurvus turgebat, homo vero omnino magis, quam conducebat, repandus fiebat. Scripsi autem hoc de industria. Pulchrum enim est etiam ea discere, quæ in experimentum adsumpta successu caruerunt, & cur successum non habuerint.

Quibuscumque porro verticula introrsum obliquantur aut ex casu, aut gravi aliqua re illapfa, his nullum quidem verticulum existat plerumque ita multum ab aliis. Si vero existiterit multum, aut unum, aut plura, mortem inducunt, velut etiam antea dictum est. Circularis etiam hæc, & non angularis emotio existit. Urinæ igitur talibus magis supprimuntur, itemque alvi egestio, quam his qui extrorsum gibbosi fiunt; & pedes, ac tota crura magis perfrigerantur, & lethalia sunt hæc magis, quam illa quæ dixi. Sed & si superstites evadunt hi, magis profluam urinam habent, & cruribus impotentiores, ac torpidiores fiunt. Si vero etiam in superna parte magis repandi fiant, totius corporis impotentia, ac torpor accedit. Atque ego sane nullam machinam habeo, per quam talia in idem restitui possint, si non alicui concussio per scalam opem tulerit, aut etiam alia quædam ejusmodi curatio, aut extensio, qualis est ea, quæ paullo antea relata est. At coactionem una cum extensione nullam habeo, quæ sane fieri ita posset, velut in gibbo tabula coactionem fa-



ciebat. Quomodo enim quis ab anteriore parte per ventrem coactionem facere possit? Neque enim fieri hoc potest. Sed neque tusses, neque sternutationes ullam vim habent, ut extensioni auxiliari possint. Nec vero flatus immissio in ventrem quicquam efficere poterit. Quin & si magnæ cucurbitæ adfigantur, adtractionis nimirum gratia verticulorum intro repentium, magno hoc mentis errore contingit. Propellunt enim magis, quam adtrahunt, & neque hoc animadvertunt hi, qui ipsas adfigunt. Quanto enim magis ipsas quis adigit, tanto magis repandi fiunt hi, quibus adfiguntur, cute simul sursum coacta. Possem autem & alios concussionum modos, quam hi sunt quos antea retuli, exponere, quos sane adfectioni magis convenire quis putare possit, verum non valde ipsis fidem habeo, & propterea non scribo. In summa igitur de his quæ relata sunt, ita acervatim constituere oportet, quod ea quidem, quæ in repandum emota sunt, lethalia sunt, ac noxia; quæ vero in gibbum, innoxia in totum, quantum ad mortem, & urinæ suppressionem, ac torporem attinet. Non enim rivos, qui sunt in ventre, gibbositas ad externam partem intendit, neque fluidos esse prohibet. Repanditas vero ambo hæc facit, & ad alia multa hæc accedunt. Nam multo plures & cruribus, & manibus impotentes fiunt, & corpore torpescunt, & urinæ his supprimuntur, quibus gibbositas quidem neque extra, neque intro extiterit, verum in rectitudinem spinæ vehementer concussi fuerint. Quibus vero gibbositas exstat, hi minus talia perpetiuntur. Multa vero etiam alia in medicina quis videre poterit, ex quibus ea quidem, quæ fortia sunt, innoxia sunt per se to-

tam morbi judicationem inducentia ; quæ vero debiliora , noxia , ita ut & diuturnos morbos progenerent , & cum reliquo corpore ampliorem communionem habeant.

Nam & costarum fractura ejusmodi quid perpetitur. Quibus enim fracta fuerit costa una , aut plures , velut plurimis frangitur , ita ut ossa ad internam partem non vergant , neque denudata sint , ex his pauci jam febricitarunt. Sed neque sanguinem multi jam exspuerunt , neque suppurati multi sunt , neque curatione medicamentorum ex illitis linamentis opus habent , neque ossium corruptiones accedunt , & victus vulgaris sufficit. Si enim febris continua ipsos non corripuerit , etiam vasa per inediam his vacua fieri deterius est , quam si non vacua fiant. Majorem item dolorem , ac febrem & tussim inducit. Moderata enim ventris repletio , costarum fit directio. Verum vacuatio pendentes costas facit , & hæc dependentia dolorem inducit. Extrinsecus autem vulgaris deligatio talibus sufficit , ita ut cerato , & spleniis , & linteis plana deligatio placide firmetur , aut etiam laneum quiddam insuper imponatur. Corroborantur autem costa diebus viginti. Celeriter enim his ossibus calli obducuntur. At contusa circa costas carne , aut ex plaga , aut ex casu , aut renisu , aut alio quopiam ejusmodi multi jam multum sanguinem spuerunt. Rivi enim in molli ad unamquamque costam extenta parte , & nervi , a principalissimis in corpore partibus progressus habent. Multi itaque jam tussiculosi , & tuberculosi , ac suppurati facti sunt , & linamentis opus habuerunt , & costa ipsis corruptionem sensit. Sed & quibus nihil tale accessit , carne circa costas contusa : tardius tamen dolor in ipsis sedatur , quam in



his , quibus costa fracta fuerit : & in talibus vulneribus locus dolorum recidivas magis habet. Proinde aliqui tales noxas magis contemnunt , si costa ipsis fracta fuerit. Quin & curatione exactiore tales indigent , si modo sapiant. Vitum enim contractum esse conducit , & corpore quammaxime quiescere , & a venere abstinere , edulibusque pinguibus , & fauces exasperantibus , ac fortibus omnibus , venamque in cubiti flexura secare , & quammaxime filere. Deligare vero locum contusum conducit spleniis non multiplicibus , sed multis , & multo latioribus tota contusione , & cerato sublinere , & linteis latis cum fasciis latis , ac mollibus deligare , & moderate firmare ; ut deligatus non valde se compressum esse dicat , neque rursus laxum. Initium autem sumere debet , qui deligat , in ipsa contusione , atque isthic maxime firmare : facienda vero est deligatio velut a duobus initiis , deligandumque , ut ne circumflua sit cutis circa costas , sed æquilibris. Deligandum autem aut singulis , aut alternis diebus. Præstat autem , & alvum mollire levi aliquo medicamento , cibi saltem evacuandi gratia , & ad decem quidem dies attenuare. Postea vero corpus renutrire , ac tenerum facere. Quamdiu vero attenuas , deligatione magis firmata utendum est. Quum autem ad teneritudinem deducis , laxiore. Et si quidem sanguinem ab initio exspuerit , quadraginta dierum curationem , ac deligationem facere oportet. Si vero sanguinem non sputat , sufficit , viginti diebus ut plurimum curatio. Verum ex robore vulneris tempora conjectare oportet. Qui porro tales contusiones neglexerint , etiamsi aliud nihil majoris mali ipsis contingat , tamen locus contusus mucosiores carnem habet , quam

antea habebat. Ubi vero tale quippiam relinquitur, & curatione non probe exprimitur, deterius quidem est, si juxta ipsam os mucositas relicta fuerit. Neque enim caro amplius similiter os contingit, & os ipsum morbosius redditur, & corruptiones ossis diuturnæ multis jam ex hujusmodi occasionibus factæ sunt. Sed & si juxta os non fuerit, verum ipsa caro mucosa sit, at tamen etiam sic recidivæ, ac dolores alias atque alias fiunt, si quis forte corpore ægrota-verit. Quapropter deligatione uti oportet bona, simulque multum conveniente, quoad ea humoris effusio, quæ in contusione facta est, resiccetur, ac reforbeatur, locus autem carne sana augeatur, & ossis quoque caro augeat. At quibus ex neglectu vetustatem contraxerit, ita ut locus sit dolorosus, & caro submucosa, his ultio medela optima est. Et si quidem ipsa caro mucosa fuerit; usque ad os utere oportet, non tamen ut os percalescat. Si vero inter costas mucositas fuerit, ne sic quidem in superficie urere oportet, cavere tamen ne in ulteriorem partem peruras. Si vero ad os ipsum contusio esse videatur; & sit adhuc recens, & nondum os corruptionem sentiat; si quidem parva admodum fuerit, sic urere oportet, veluti dictum est. Si vero oblonga fuerit juxta os contusionis elevatio, plures crustas inurere oportet. Cæterum de corruptione costæ, una cum eorum, qui linamentis opus habent, curatione dicetur.

Si vero femoris articulus ex coxa exciderit: excidit autem juxta quatuor modos, introrsum quidem sæpe, foras autem præ aliis sæpe. Verum in posteriorem, ac anteriorem partem excidit quidem, sed raro. Quibus igitur intro excesserit, his longius apparet crus, si ad alte-



terum comparetur, atque hoc merito propter duas causas. Nam os, quod a coxa procedit, & sursum ad pectinem fertur, fundamentum fit capitis femoris, & articuli cervix in acetabulo vehitur, & nates forinfecus cavæ apparent, utpote quum intro cesserit femoris caput. Et rursum summa femoris pars juxta genu extra reperire cogitur. Tibia item, & pes, eodem modo. Quum igitur foras repat pes, medici ob imperitiam sanum pedem ad hunc adhibent, & non hunc ad sanum; & propterea multo longius læsum crus apparet, quam sanum. Multis autem etiam aliis locis talia sinistram intelligentiam habent. Nec vero flectere juxta inguen similiter, ut sanum possunt. Sed & si femoris caput in interfemineo contingatur, palam extuberare comperitur.

Signa igitur hæc sunt in his, quibus femur intro excidit. Quibus igitur articulus elapsus non fuerit repositus, sed aut frustra tentatus est, aut neglectus, his & ambulatio per crutis circumvolutionem, velut in bobus fit, & plurima vexatio ipsis in sano crure contingit; & coguntur, juxta lateris mollitudinem, aut juxta elapsum articulum, mutili, ac obliqui esse. Juxta sanum vero crus, nates ad externam partem rotundæ esse coguntur. Si quis enim sani cruris pede extra ambularet, protruderet utique reliquum corpus, ut ad læsum crus veheretur. Læsum autem vehere hoc non poterit; quomodo enim posset? Cogitur igitur sic sanicruris pede intro ambulare, & non extra. Ita enim maxime vehit sanum crus & suam ipsius, & læsi cruris partem corporis, utrisque incumbentem. Quum autem juxta lateris mollitudinem, ac juxta articulum caventur, parvi apparent, & baculo inniti coguntur a latere juxta sanum crus.

Hæc enim parte fulcimento opus habent. Ad hanc enim & nates repunt, & in hac corporis pondus vehitur. Coguntur item se inclinare. Manum enim, quæ est a parte cruris læsi, ad obliquum femur firmare coguntur. Non enim potest læsum crus vehere corpus, in crurum permutatione, si non ditineatur, dum ad terram premitur. In his igitur figuris esse coguntur hi, quibus intro elapsus, non fuerit repositus articulus, homine non præmeditante, ut quamfacillime sit figuratus. Sed ipsa hæc calamitas ex præsentibus ea, quæ facillima sunt, eligere docet. Nam & qui ulcus habent in pede, aut tibia, non omnes crure valde ingredi possunt; & infantes sic iter faciunt, extra enim ingrediuntur læso crure. Et duplex lucrum consequuntur. Duplici enim corpus habent. Nam & corpus non similiter vehitur in eo crure, quod extra ingreditur, sicut in eo, quod intro. Non enim secundum rectitudinem ipsi incumbit pondus, sed multo magis ei, quod subingreditur. Ipsi enim e directo incumbit pondus tum in ipsa ambulatione, tum in crurum permutatione. In hac enim figura sanum crus celerrime supponere poterit, si eo quod læsum est, exterius; sano interius ingrediatur. Verum de quo nunc sermo est, bonum est, ut corpus ipsum sibi ipsi facillimas figuras inveniatur.

Quibus igitur nondum perfectis ad augmentum, elapsus articulus non fuerit repositus, his femur decurtatur, & tibia, & pes. Neque enim ossa similiter in longitudinem augefcunt, sed breviora fiunt. Maxime autem femoris. Excarne item & emusculatum, ac effeminatum, & tenuius totum fit crus, simul quidem propter privationem loci articuli, simul autem, quod eo uti non possunt,



eo quod secundum naturam situs non est. Usus enim aliquis liberat ab effeminatione, liberat etiam aliquantum ab intercepto in longitudinem augmento. Maxime igitur læduntur hi, quibus, dum in ventre sunt, hic articulus fuerit luxatus. Secundo loco hi, quibus valde infantibus idem contigit. Minime vero hi, qui perfecti sunt. Qualis igitur ambulatio perfectis contingat, dictum est.

Quibus vero, dum infantes sunt, calamitas hæc incidit, plerique ad corporis directionem tardi sunt, immo male ad sanum crus devolvuntur, manu, quæ est ad sanum crus, ad terram se fulcientes. Sed & ex perfectæ ætatis hominibus quidam, quibus hæc calamitas contigit, ad ambulationem rectam cunctantur. Quicumque vero infantes hac calamitate pressi, recte educati fuerint, sano quidem crure in rectum utuntur, verum sub alam secundum sanum crus scipionem ferunt, aliqui etiam sub utramque alam. Crus autem læsum elevatum habent, & tanto melius habent, quanto brevius ipsius læsum crus fuerit. Sanum autem crus nihilo minus ipsis robustum est, quam si ambo sana essent. Effeminantur tamen omnibus talibus carnes cruris, & plerumque hoc magis perpetiuntur hæ, quæ sunt ab externa parte, quam quæ ab interna. Cæterum quidem fabulantur Amazonides masculam suam sobolem statim, dum infantes, sunt luxare, alias circa genua, alias circa coxas, quo nimirum claudi fiant, & masculum genus femineo insidias non struat. Utuntur itaque his pro opificibus, ad coriaria, aut fabrilia, aut alia sedentaria opera. An equidem vera hæc sint, ego non novi; quod autem tales fiant, scio, si quis ipsos statim, dum infantes sunt, luxet. Juxta coxas igitur magna differen-

tia est, an extra, aut intro fiat luxatio. Juxta genua vero differentia quidem aliqua est, sed minor. Modus autem utriusque claudicationis proprius est.

Decurtantur enim magis hi, quibus extra luxatio facta est. Recti autem minus stant, quibus intro luxatio contigit. Eodem modo etiam si juxta malleolum luxatio fiat, si quidem ad externam partem id contingat, mutili quidem fiunt, verum stare possunt. Si vero ad internam, valgi quidem fiunt, minus autem stare possunt. At vero coactio ossium talis fit. Quibus quidem circa malleolum tibiæ os excessit, his pedis quidem ossa minime coaugescunt; hæc enim proxime ad vulnus sunt. Verum tibiæ ossa augentur quidem non multo defectuosius, carnes tamen minuuntur. Quibus vero juxta malleolum manserit articulus secundum naturam, juxta genu autem excesserit, his tibiæ os similiter coaugescere non solet, sed brevius fit. Hoc enim proxime ad vulnus est. Pedis autem ossa minuuntur quidem, sed non similiter, velut paullo ante dictum est, quia articulus circa pedem salvus est. Si vero ipso etiam uti possent, velut mutilo, minus adhuc pedis ossa his minuerentur.

At quibus circa coxam luxatio contingit, his femoris os non similiter coaugescere solet: hoc enim proxime ad vulnus est: sed brevius sano fit. Tibiæ tamen ossa non similiter his augmento destituuntur, neque ossa pedis, atque hoc ea de causa, quod femoris articulus, qui ad tibiam est, & tibiæ articulus, qui ad pedem est, in sua natura manet. Carnes tamen minuuntur his totius cruris. Si vero uti crure possent, adhuc magis ossa augerentur, velut etiam prius dictum est, excepto femore, & minus excarnes essent. Multo tamen minus carnosius



quam hi, qui sani sunt, essent. Argumento autem, quod talia ita se habent, hoc est. Quicumque enim brachio elapso, mustellæ cubito præditi sunt, parvumque, ac macilentum brachium habent aut ex nativitate, aut etiam dum augeſcunt, priusquam perfecti evadant, galeancones appellati, hi os quidem brachii breve habent, cubitum autem, & summam manum paullo defectuosioreſ quam ſani, propter relatas cauſſas, eo quod brachium vulnerato articulo proximum eſt, ut ideo brevius factum ſit. Rurſus autem cubitus propterea non ſimiliter calamitatem percipit; quia brachii articulus, qui eſt ad cubitum, in veteri natura manet. Et rurſus manus adhuc longius abeſt a calamitate, quam cubitus. Propter has igitur cauſſas contingit, ut & oſſa, quæ non coaugentur, non coaugēſcant, & quæ coaugentur, coaugēſcant. Cæterum ad carnoſitatem, & manui, & brachio multum profuerit, ſi quis manu laborando ſe fatiget. Quæcumque enim manuum opera ſunt, plurima ex ipsis Galeancones hac manu operari conantur, velut altera poſſunt, & nihilo defectuoſius, quam cum illæſa efficiunt. Non enim ſupra manus, velut ſupra pedes, corpus vehi neceſſe eſt. Verum levia ſunt ipsis opera. Propter uſum autem non minuuntur carnes galeanconibus neque circa manum, neque circa cubitum. Sed & brachium propterea aliquam opem ſentit ad carnoſitatem. Quum autem coxa eluxata fuerit ad internam partem a nativitate, aut adhuc infanti, carnes ideo magis minuuntur, quam in manu, quod crure uti non poſſint. Quod autem hæc hoc modo ſe habeant, teſtimonium unum quoddam in paullo poſteriori referendis habebitur. At quibus in exteriorem

partem femoris caput excefferit, his crus brevius apparet, si ad alterum extendatur, atque id merito. Non enim super os fundamentum fit capitis femoris, sicut quum intro excidebat, sed juxta os, quod inclinatam naturam habet, in carne humida, ac cedente firmatur; & propterea quidem brevius apparet. Intrinsecus, autem juxta plechada, intermediam crurum, ac inguinum partem, femur magis mutilum & excarne fit. Nates autem extrinsecus incurviores, utpote quum extra femoris caput elapsum sit. Sed & superius apparent nates, utpote quum caro, quæ isthic est, femoris capiti cesserit. Summa vero femoris pars circa genu intro repere videtur, tibia item, & pes. Sed neque inflectere velut sanum crus possunt. Et signa quidem femoris extra elapsi hæc sunt.

Quibus igitur perfectis jam elapsus articulus non fuerit repositus, his totum crus brevius apparet. In ambulatione autem calcaneo terram pertingere non possunt. Verum pectore pedis in terra consistunt, ac progrediuntur, parum autem ad internam partem summis digitis vergunt. At crus læsum in his multo magis corpus vehere potest, quam quibus ad internam partem excidit, partem quod caput femoris, & cervix articuli, quum natura obliqua sit, sub multam coxæ partem subsistit, partim quod summus pes non ad externam partem inclinatus esse cogitur, sed prope est ad rectitudinem corpori, & tendit etiam interius. Quum igitur semitam, ac callem acceperit articulus, in carne ad quam elapsus est, & caro viscositatem contraxerit, doloris exfors progressu temporis fit. Quum autem doloris exfors factus fuerit, possunt quidem absque baculo iter facere, si alias voluerint, possunt autem & vehere corpus supra.



crus læsum. Itaque propter usum carnes talibus minus effeminantur, quam illis, de quibus paullo ante dictum est. Effœminatur autem aut plus, aut, minus. Magisquam adhuc effeminantur plerumque juxta internam partem, quam juxta externam. Plerique tamen ex his calceamentum sibi inducere non possunt propter cruris inflexibilitatem. Quidam vero etiam hoc possunt. At quibus, dum adhuc in ventre sunt, hic articulus fuerit luxatus, aut dum adhuc augescunt, vi elapsus, non fuerit repositus, aut etiam præ morbo hic articulus excefferit, ac luxatus fuerit: multa enim hujusmodi sunt: talium quibusdam si corruptionem senserit femur, suppurationes diuturnæ, & lineamentis indigentes fiunt, & aliquibus osium denudationes. Similiter autem, & quibus corruptionem femoris os sentit, & quibus non sentit, multo brevius fit, & velut sanum coaugescere non solet. Tibiæ tamen ossa breviora quidem fiunt, quam alterius tibiæ, sed paullulum, ob causas antea relatas. Ambulare vero tales possunt, & quidam ex ipsis eo modo quo perfecti, quibus elapsus articulus repositus non est; aliqui vero etiam toto pede consistentes progrediuntur, declinant tamen inter ambulandum propter cruris brevitatem coacti. Hæc autem hoc modo fiunt, si diligenter educati fuerint in figuris, & recte in quibus oportet, priusquam ad iter faciendum corroborati fuerint; diligenter item & recte, postquam corroborati fuerint. Plurima autem diligentia opus habent hi, quibus dum maxime infantes sunt, hæc calamitas contigerit. Si enim neglecti fuerint dum infantes sunt, inutile penitus, & omni augmento privatum totum crus evadit, & carnes totius cruris magis minuuntur,

quam fani. Multo tamen minus his minuuntur, quam illis quibus intro excidit, propter usum, & laborem; ita ut statim crure uti possint, velut etiam paullo ante in galeanconibus dictum est. Sunt autem aliqui, quibus partim statim a nativitate, partim præ morbo, amborum crurum articuli exciderunt ad externam partem. His igitur ossa quidem easdem affectiones habent, ac perpetiuntur. Carnes tamen minime effeminantur. Sed & satis carnosæ crura fiunt, præterquam si quid sane circa internam partem paululum deficiat. Propterea vero satis carnosæ sunt, quia utrisque cruribus similiter utuntur. Similiter enim fluctuant hac atque illac inter ambulandum, & vehementer eminentibus natibus hi videntur propter articulorum excessum. Si vero ossa ipsis corruptionem non senserint, neque gibbosi supra coxas fiant: nonnullos enim etiam talia corripunt: Si igitur tale quid non contigerit, satis fani de cætero durant. Totum tamen corpus hi minus augescens habent, capite excepto.

At vero quibus in posteriorem partem femoris caput exciderit: paucis autem excidit: hi crus extendere non possunt neque juxta articulum elapsum, neque ita valde circa poplitem, & multo minus, quam hi, quibus jamdudum id contigit. Hi etiam magis & circa inguen, & circa poplitem articulum extendunt. Illud tamen insuper intelligere oportet: est enim commodum, & magni faciendum, & plerisque ignotum: quod neque fani articulum circa poplitem extendere possunt, si non simul extendant etiam articulum circa inguen, præterquam si pedem valde sursum attollant. Sic enim poterint. Hi itaque neque inflectere articulum circa poplitem similiter possunt, sed multo difficilius, si non



etiam articulum circa inguen inflexerint. Multa vero etiam alia circa corpus, hujusmodi fraternitates, ac cognationes habent, & circa nervorum distentiones, & circa musculorum figuras, plurima, & pluris facienda, ut cognoscantur, quam quispiam putaverit. Item circa intestini naturam, & totius ventris, & circa uterorum errores, ac distentiones. Verum de his alibi nobis sermo erit cognatus his, quæ nunc dicuntur. Sed de quo nunc sermo est, neque extendere possunt, velut jam dictum est, & brevius crus apparet; atque hoc ob duas causas, & quod non extenditur, & quod ad natium carnem elapsum est. Natura enim ossis coxæ ea parte est, qua & caput, & cervix femoris existit. Ubi vero luxatum fuerit, primum ad externam partem natium defertur. Inflectere tamen possunt, si dolor non prohibeat, & tibia, & pes moderate recta apparent, & neque hac, neque illac multum inclinata. Juxta inguen vero caro insuper aliquanto mollior esse videtur, præsertim ad contactum, utpote articulo ad alteram partem elapso. Ad ipsas autem nates si adtrectetur femoris caput, aliquanto etiam magis extuberare videtur; atque hæc quidem signa sunt, si cui in posteriorem partem femur excidit.

Cui igitur jam perfecto elapsum, non fuerit repositum, hic ambulare quidem potest, ubi tempus intercefferit, & dolor sedatus fuerit, & articulus in carnem versari adsueverit. Cogitur tamen vehementer se inflectere circa inguina, dum iter facit, atque hoc ob duas causas; tum quod multo brevius crus fit ob ea, quæ antea dicta sunt; tum quod multum valde abest ab eo, ut calcaneo terram contingat. Si enim conaretur vel paullulum pede illo vehi, ita ut nihil aliud ha-

beat, quo se firmet, retro sane corruerit. Magna enim fuerit momenti inclinatio, & coxis multum in posteriorem partem supereminentibus super pedis gressum, & spina insuper ad coxas vergente. Vix autem pectore pedis terram attingit, & ne sic quidem, nisi ipse seipsum circa inguina inflectat, & altero crure circa poplitem insuper se inflectat. Ob hæc autem cogitur, ut manum, quæ est secundum læsum crus, ad supernam femoris partem in singulis gressibus firmet. Cogit igitur aliquantum hoc ipsum, ut circa inguina inflectatur. Nam in permutatione crurum in ambulando; corpus supra læsum crus vehi non potest, si non insuper firmetur crus per manum ad terram, nimirum quum non sub corpore articulus subsistat, sed ad posteriorem partem juxta coxam existet. Absque tamen baculo tales iter facere possunt, si alias adsueverint, eo quod gressus pedis in uteri rectitudine manet, & non ad extremam partem inclinatus est. Quapropter nihil opus habent baculi fulcimento. Quicumque tamen pro femoris per manum apprehensione, supposito sub alam, quæ ad sinistrum crus est, scipione inniti volunt, hi siquidem longiorem scipionem supposuerint, erectiores quidem iter facient, pede autem ad terram non innituntur. Si vero pede inniti volent, brevior ipsis baculus faciendus est, & ad inguina ut se inflectant necesse fuerit.

Cæterum carniū imminutiones etiam his secundum rationem fiunt, velut antea dictum est. Qui enim elevatum habent crus, & nihil laborant, his etiam maxime minuuntur. Si vero plurimo utuntur ingressu, his minime minuuntur. Sanum tamen crus nihil inde utilitatis consequitur, sed etiam deformius fit, si læso crure ad terram innitentes utantur.



Illi enim simul inserviens, & extra prominente coxa esse cogitur, & circa poplitem se inflectere. Si vero quis læso crure non ad terram utatur, sed elevatum habeat, & scipioni innitatur, sic sanum crus robustum fiet. Nam & in naturali statu degit, & exercitationes ipsum corroborant. Possit aliquis dicere, extra medicinam talia esse. Quid enim opus est, de his, quæ incurabilia jam facta sunt, amplius tractare? At hoc facere multum refert. Ejusdem enim professionis est & hæc cognoscere. Non enim fieri potest, ut inter se dirimantur. Oportet enim curabilia ita tractare, ut ne incurabilia fiant, ea intelligentia, ut quammaxime prohibeamus, ne ad hoc deveniant, ut incurabilia reddantur. Oportet autem, & incurabilia cognoscere, ut ne maxime lædant. Prædictiones autem splendidæ sunt, ac gloriosæ ex cognitione, quo, & qualiter, & quando singula desinent, sive eo vertantur, ut incurabilia fiant, sive curationis spem exhibeant. Quibuscumque vero ex nativitate, aut dum adhuc alias augefcunt, ita elapsus fuerit articulus, & non repositus, sive ex violentia elapsus sit, sive præ morbo: multæ enim hujusmodi luxationes fiunt in morbis; qui vero sint hi morbi, in quibus articuli elabuntur, postea scribetur: Si itaque elapsus non fuerit repositus, femoris quidem os breve fit, affligitur autem totum crus, & augmento destituitur, & multo magis excarne fit, eo quod ipso non utantur. Nam & articulus circa poplitem his affligitur. Nervi enim ob ea, quæ antea dicta sunt, intenduntur. Quare articulum circa poplitem extendere non possunt hi, quibus hoc modo coxa excidit. Ut enim in summa dicam, omnia, quæ in corpore ad usum facta sunt, si quis moderate ipsis utatur,

&

& in his laboribus exerceat, ad quos singula sunt adsueta, sic quidem sana sunt, & augefcunt, & probe confenescunt. Si vero quis non utatur, sed quiescat, morboſiora fiunt, & non augefcunt; & cito confenescunt. Inter hæc autem non minime perpetiuntur hoc & articuli, & nervi, ſi quis non iſſis utatur. Propter has igitur cauſas magis in hoc luxationis modo, quam in aliis affliguntur. Totum enim crus & in offium, & in carnum natura, augmento deſtituitur. Tales igitur ubi jam in viros evaſerunt, elevatum, ac inclinatum crus hoc habent, altero vero vehuntur baculo innitentes, aliqui uno, aliqui duobus.

Quibus porro in anteriorem partem femoris caput elapſum fuerit, paucis autem hoc contingit: hi extendere quidem crus perfecte poſſunt, inflectere autem ſe minime hi poſſunt circa inguen. Affliguntur autem etiam, ſi circa poplitem ſe inflectere coguntur. Longitudo vero cruris conſimilis apparet, & circa calcaneum quidem valde. Verum ſummus pes aliquanto minus in anteriorem partem prominere ſolet. Totum autem crus rectitudinem habet ſecundum naturam, & neque hac, neque illac vergit. Cæterum hi ſtatim dolore corripuntur maxime, & urina imprimis ſupprimitur aliquanto magis, quam in aliis luxationibus. Caput enim femoris proxime his incumbit ad præcipuos nervos, & circa inguen quidem extuberantes videntur, & locus extentus apparet. Verum circa nates rugoſior, & maxime excarnis. Atque hæc quidem, quæ relata ſunt, ſigna ſunt eorum, quibus ita femur excidit. Quibuſcumque igitur viris jam factis, hic articulus elapſus non fuerit repoſitus; hi, ubi dolor iſſis ſedatus fuerit, & articulus in eo loco in quem excidit, verſari adſueverit,



statim fere recti ambulare possunt absque baculo, & valde quidem recti, utpote quum ad læsum crus, neque circa inguen, neque circa poplitem facile se flectere possint. Propter inguinis itaque inflexibilitatem rectiore toto crure in ambulando utuntur, quam quum sani essent. Sed & aliquando ad terram pedem trahunt, utpote quum supernos articulos non facile inflectant, & toto pede ingrediuntur. Nihilo enim minus hi calcaneo ingrediuntur, quam anteriore pedis parte. Si vero magnis gressibus progredi possent, etiam valde calcaneo insistentes progredierentur. Nam & sani, quanto minoribus gressibus iter faciunt, tanto magis calcaneo ingrediuntur, alterum pedem deponentes, contrarium elevantes. Quibuscumque itaque hoc modo excidit, adhuc etiam magis calcaneo terram contingunt, quam anteriore pedis parte. Anterior enim pedis pars, ubi reliquum crus extentum fuerit, non similiter in anteriorem partem inflecti potest, sicut ubi crus fuerit inflexum. Neque rursus sinuari pes potest crure inflexo, sicut ubi crus fuerit extentum. Sana igitur natura hoc modo est, veluti dictum est. Quum vero elapsus articulus repositus non fuerit, sic iter faciunt, velut dictum est, ob prædictas has causas. Magis tamen ex carne crus fit, quam alterum, & juxta nates, & circa furam, & juxta posteriorem rectitudinem. At vero, quibus dum adhuc infantes sunt, articulus sic elapsus non fuerit repositus, aut etiam a nativitate ita habuerint, & his femoris os aliquanto magis minuitur, quam tibiæ, aut pedis ossa. Et minimum quidem in hoc luxationis modo femur minuitur. Carnes tamen undique minuuntur, maxime circa posteriorem rectitudinem, quemadmodum etiam prius dictum

est. Quicumque igitur recte educati fuerint, hi ubi augeſcunt, crure uti poſſunt, breviori aliquantum exiſtente, quam altero, ita tamen, ut baculo innitantur ea parte, qua læſum crus eſt. Non enim abſque calcaneo, pedis pectore admodum uti poſſunt, ut in id innitantur, quemadmodum in aliis claudicationibus aliqui poſſunt. Cauſa vero cur non poſſint, ea eſt, quæ paullo ante relata eſt. Ob id igitur baculo inſuper opus habent. Qui vero neglecti fuerint, & crure ad terram non utuntur, ſed elevatum id habent, hiſ minuuntur quidem oſſa, ubi augeſcunt, magis quam hiſ, qui eo utuntur. Minuuntur autem & carnes magis multo, quam hiſ, qui utuntur.

#### SECTIO IV.

**V** Erum circa articulos in directum mutilatur hiſ crus aliquanto magis, quam quibus alio modo luxatio facta eſt. Quo igitur in ſumma dicatur, articuli excident, ac qui luxantur, inæqualiter inter ſeipſos excidunt, ac luxantur aliquando multo plus, aliquando multo minus. Et quibus quidem multo plus luxati, aut elapſi fuerint, hiſ omnino difficilius reponuntur. Et ſi repositi non fuerint, majores & manifeſtiores mutilationes, ac afflictiones tales habent & oſſium, & carnum, & figurarum. Ubi vero minus exciderint, & luxati fuerint, tales facilius, quam alii reponi poſſunt. Si vero fruſtra tentati, aut neglecti fuerint, minores, ac minus noxiæ mutilationes hiſ fiunt, quam illiſ, de quibus paullo ante dictum eſt. Reliqui igitur articuli etiam valde multum differunt ad hoc, ut aliquando minor, aliquando major luxatio fiat. Verum femoris, & brachii capita quaſiſimillime



inter se utraque excidunt. Nam capita prout rotunda sunt, simplicem, & calvam rotunditatem habent. Orbiculares autem sinus sunt, qui capita excipiunt, capitibus tamen ipsis congruentes. Quapropter fieri non potest, ut dimidium articuli ex ipsis elabatur. Nam ob rotunditatis circumferentiam aut ad externam, aut ad internam partem luxari poterit. Sed de quo nunc sermo est, perfecte excidunt, nam alioqui non excidunt. Attamen & hi aliquando plus, aliquando minus a naturali statu profiliunt, & femur aliquanto magis, quam brachium patitur. Nam aliquæ etiam ex his luxationibus, quæ a nativitate fiunt, si parum clapsæ fuerint, ad naturalem statum reduci possunt, & maxime articuli circa pedem. Quicumque a nativitate mutili fiunt, plerique ex his curabiles sunt, si non valde magna emotio facta fuerit, aut etiam præauctis jam pueris contigerit. Optimum igitur est, ut talia quamcelerrime curentur, priusquam valde magnus ossium defectus fiat, & priusquam admodum magnus carniū defectus circa tibiam contingat.

Modus itaque mutilationis non unus est, sed plures. Plurima quidem eluxata non sunt penitus, sed per figuræ consuetudinem in quadam pedis interceptione mutilata. Animadvertendum autem in horum curatione est, ut tibiæ circa malleolum os, quod extrinsecus est, ad internam partem detrudatur, ac dirigatur, & calcanei os, quod e directo illi subjacet, ad externam partem retrudatur, quo ossa, quæ eminent, sibi ipsis occurrant juxta medium, ac obliquum pedem. Digi vero acervati una cum magno digito ad internam partem inclinentur, atque ita circumcirca cogantur. Probe autem deligare oportet cerato refinato, & spleniis, & linteis mollibus

non paucis, neque nimis compressis, atque ita deligationis circumductiones facere, velut etiam manibus directio pedis fiebat, quo pes paullo magis ad valgum vergere videatur. Soleam etiam quamdam facere oportet aut ex pelle non nimis dura, aut e plumbo, eamque insuper adligare non ad corpus positam, sed ubi jam postremis linteis deligare voles. Quum vero jam deligatus fuerit, unius alicujus linteï ex his, quibus deligatur, initium ad deligamenta, quæ infra pedem sunt, adsuere oportet, e directo parvi digiti, & postea sursum extendere, ita ut moderate habere videatur, atque sic supra suram circumdare, quo sic extensum, ac collocatum stabile maneat. In summa, quasi quis ceram fingat, ad naturam justam adducere oportet, ita ut & inclinata, & distenta præter naturam, & manibus sic dirigamus, & similiter deligatione: adducamus autem non violenter, sed leniter. Adsuere vero ita oportet lintea, ut conducat, ad reparationes, ac appensiones faciendas. Aliæ enim claudicationes alia reparatione, ac appensione opus habent. Calcæum insuper plumbeum facere oportet, extra deligationem adligatum, qualem modulum crepidæ chiæ habebunt. Verum nihil ipso opus est, si quis & manibus recte direxerit, & linteis recte deligaverit, & appensiones, ac reparationes per adfuta lintea recte fecerit. Atque hæc quidem est curatio, & neque sectione, neque ustione, neque alia varietate quicquam opus habet. Citius enim talia medicinæ obtemperant, quam quis putaverit. Devincere tamen tempore oportet, donec in justis figuris corpus auctum fuerit. Ubi vero calcei ratio habenda est, Arbylæ lutigradæ, calceamenti ita appellati species, accommodatissimæ existunt. Hoc enim calceamentum



minime a pede superatur, sed potius ipsum superat. Idoneus est etiam creticus calceamentorum modus.

At vero, quibus tibiæ ossibus luxatis, ac ulcere inducto, articuli circa pedem penitus eminent, sive intro vergant, sive extra, tales reponere non oportet, sed permittere, ut quicumque velit medicus reponat. Illud enim clare scire oportet, quod homo morietur, si repositi permanferint. Sed & vita paucorum dierum his continget. Pauci enim ex ipsis septimum diem transgrediuntur. Convulsio enim est, quæ ipsos occidit. Sed & cancerari contingit tibiā, ac pedem. Hæc ita futura esse certo scire oportet. Et neque veratrum mihi videtur profuturum esse, & eadem die datum, & rursus epotum; proxime autem si quicquam huiusmodi facit, non tamen mihi hoc videtur. Si vero repositi non fuerint, & ne tentati quidem ab initio, plerique ipsorum superstitēs evadunt. Sic autem & tibiā, & pedem coaptari oportet, prout ipse volet, modo non sint dependentia, aut commota. Curatio vero facienda est cerato picato, & spleniis vino imbutis, paucis, non valde frigidis. Frigiditas enim in talibus convulsionem accersit. Idonea etiam sunt folia betarum, aut tussilaginis, bechii appellatæ, aut alicujus alterius huiusmodi, in vino nigro austero semicocta, ac imposita. Et facienda est curatio super ulcus, & super partes adjacentes. Et cerato tepido ipsum ulcus illinendum. Si vero hyemis tempus fuerit, etiam lanæ succidæ, vino ac oleo tepidis imbutæ superne ipsum madefaciant. Deligatio vero nulla, neque ullum cataplasma adhibendum est. Probe enim nosse couenit, quod compressio, ac omnis oneris gestatio talibus omne malum affert. Accommodata autem sunt ad talia & ex emplastris

aliqua, quæ cruentis vulneribus destinata sunt, quibus videlicet ex ipsis confert, ut lanæ superimpositæ vino madefiant, & multo tempore finantur. Quæ vero ex illis cruentis emplastris, paucissimis diebus incumbere debent, & quæ resina comprehenduntur forinfecus adjecta, non similiter ut illa idonea sunt, diuturna enim sit horum ulcerum purgatio, quum multo tempore dolore abundant. Quosdam tamen ex his deligare, bonum est. Verum illud clare nosse oportet, quod necesse est, hominem turpiter claudum fieri. Nam pes in talibus in supernam partem retractus est, & ossa luxata, extra eminentia apparent. Neque enim ullum ex talibus ossibus plerumque denudatur, nisi leviter aliquantum; neque abscedit, sed tenuibus, ac debilibus cicatricibus circumducitur: atque hoc si multo tempore quieverint: sin minus, periculum est ne ulcusculum immedicabile reliquatur. Verum de quo sermo est, qui sic curantur, servantur. Sivero rep situs fuerit articulus, ac permanferit, moriuntur.

Eadem ratio est, si etiam cubiti ossa circa manus articulum ulcere facto emineant sive ad internam manus partem, sive ad externam. Clare enim nosse id oportet, quod is morietur intra paucos dies tali morte, qualis antea dicta est, cui reposita ossa permanferint. Quibus vero reposita non fuerint, neque repositio tentata est, hi multo plures superstites manent. Curatio autem ejusmodi talibus commoda est, qualis jam dicta est. Figuram vero claudicationis turpem esse necesse est, & digitos manus debiles, ac inutiles. Si enim ad internam partem ossa luxata fuerint, digitos inflectere non potest. Si vero ad externam, extendere nequit. Quibus vero tibiæ os, facto ulcere, circa genu eminuerit



foras, sive ad externam partem sive ad internam, his si quis reponat, adhuc promptior mors adest, quam aliis, etiamsi etiam illis prompta aderat. Si vero omiſſa repositione medearis, spes quidem salutis hoc solo modo exſiſtit. Verum periculofiora hæc offa ſunt, quanto ſuperiora, ac robuſtiora ſunt, & a fortioribus elapſa.

At ſi os femoris, quod ad genu eſt, ulcere factò elapſum fuerit, & repositum permanſerit, mortem adhuc violentiorem citius induxerit, quam prius relata. Si vero repositum non fuerit, longe magis periculofum eſt, quam priora. Sola tamen hæc ſalutis ſpes eſt. Eadem vero ratio eſt & de articulis circa gibbum cubiti, & de cubito ac brachio. Quæcumque enim ex his luxata, ulcere factò, eminuerint, ea omnia ſi reposita fuerint, mortem inducunt; non reposita, ſpēm ſalutis; claudicationem vero ſuperſtitibus. Lethaliores autem ſunt ſuperiores articuli, ſi reponantur. Sed & ſi non reponantur, periculofiores iidem ſunt. Si vero alicui ſuperiores articuli luxati, factò ulcere, emineant, hi, etſi reponantur, celerrimam mortem inducunt; & ſi non reponantur, periculofiores ſunt. Curatio vero jam relata eſt, quæ mihi accommodatiſſima eſſe videtur. At vero quibus articuli digitorum aut pedis, aut manus luxati, factò ulcere, eminuerint, offe non fractò, ſed circa ipſam connexionem avulſo, his ſi repositi permanſerint, adest quidem periculum convulſionis, ſi non bene curati fuerint; attamen operæ pretium eſt, ut repositio fiat, cum prædictione, quod multa cuſtodia, ac cura opus habet. Reponere vero facillimum eſt, efficaciſſimumque ac artiſicioſiſſimum per vecticulum, velut etiam antea dictum eſt in fractis, ac eminentibus offibus. Poſtea quieſcere quammaxime con-

venit, & decumberè, ac pauco cibo uti. Melius est & pharmaco sursum purgante levi aliquo uti. Ulcus vero curare oportet aut cruentis emplastris, quæ madefiunt, aut polyophthalmi si-ve buphthalmi foliis impositis, aut quibus ossa in capite fracta curantur. Nihil autem valde frigidum adhibere. Minime igitur primi articuli periculosi sunt. Superiores autem periculosiores. Reponere vero oportet, eadem die, aut postridie; tertio, ac quarto minime. Quarto enim die maxime recrudesce-*re* solent. Quibus autem non statim repositi fuerint, in his dictos dies transgredi oportet. Quidquid enim intra decem dies repositum fuerit, omne id continetur. Si vero reposito osse convulsio accedat, articulum statim ejicere oportet, & calida quam sæpiissime humectare, & totum corpus, & præsertim circa articulos, calide & leniter, ac molliter tractare. Verum inclinatum magis, quam extentum, totum corpus esse oportet. Expectandum tamen est articulos circa digitos, qui reponuntur, abscessuros esse. Plerumque enim ita contingit, si vel quævis inflammatio subsit. Quare si non propter vulgi imperitiam medico verenda esset accusatio, nullum penitus reponere oportebat. Atque ad hunc modum periculosa sunt ossa, circa articulos eminentia foras, si reponantur, quemadmodum dictum est.

Quæcumque vero circa articulos digitorum penitus refecantur, ea plerumque innoxia sunt, si non quis in ipsa vulneratione ex animi deliquio lædatur. Et curatio vulgaris talibus ulceribus sufficit. Sed & quæ non circa articulos, sed juxta aliam quamdam ossium rectitudinem refecantur, & hæc innoxia sunt, & adhuc aliis curatu facilia. Et quæ juxta digitos ossa fracta extra eminent, non ad articulum,



& hæc si reponantur innoxia sunt. At resectiones ossium perfectæ circa articulos, & in pede, & in manu, & in tibia ad malleolos, & in cubito ad juncturam manus, plerisque, quibus refecantur, innoxia sunt, si non statim animi deliquium evertat, aut quarta die febris continua accedat. Corruptiones tamen carniū contingunt, & in vulneribus sanguifluis fientibus, & vehementibus constrictionibus, & in ossium fracturis magis, quam oportet compressis; & aliis vinculis violentis intercepta plerisque decidunt. Et plerique ex talibus superstites evadunt, & quibus femoris pars aliqua, & carniū, & ossis decedit, & quibus brachii pars (minus autem si cubiti, aut tibiæ pars deciderit) & amplius facile ferentes superstites evadunt. Quibus igitur fractis ossibus corruptiones statim fiunt, & denigrationes, his abruptiones corporis celeres circumcirca fiunt, & decidentia cito decidunt, ut quum ossa jam antea remiserint emollita. Quibus vero dum ossa sana sunt, denigrationes fiunt, carnes quidem etiam his cito moriuntur, ossa vero tarde abscedunt, qua parte termini sunt denigrationis, & ossis nudatio extat. Oportet autem partes corporis quæcumque infra terminos denigrationis sunt, quum jam penitus mortuæ fuerint & doloris exfortes, juxta articulum auferre, providendo ut ne vulneres. Si enim is, cui resectio fit, dolore affectus fuerit, & corpus nondum mortuum fuerit ea parte qua refecatur, magnum periculum est, ne præ dolore animi deliquium incidat. Talia vero animi deliquia multos jam e vestigio peremerunt.

Femoris itaque os tali modo denudatum octogesimo die abscedere vidi. Tibia tamen huic homini circa genu vigesima die ablata fuerat, aut ut mihi vi-

debatur, etiam citius. Non enim simul, sed ad majorem providentiam facere quid mihi visum fuit. At tibiæ ossa ex ejusmodi denigratione circa mediam tibiā sexagesimo die mihi deciderunt, quæcumque ex ipsis fuerunt denudata. Differt quidem & curatio a curatione, ad hoc ut ossa denudata citius aut tardius decidant. Differt etiam compressione, prout vehementior aut debilior sit, ad hoc ut citius aut tardius nervi denigrati emoriantur, carnes item & arteriæ ac venæ. Nam quæcumque non vehementer intercepta moriuntur, ex talibus quædam ad ossium denudationes non perveniunt, sed magis in superficie decidunt. Propter has igitur causas non unum numeri nomen temporis poni potest, in quanto singulas ex his judicantur. Assumere vero valde oportet tales curationes. Sunt enim magis horrendi aspectus, quam curationis, & curatio lenis omnibus talibus sufficit. Ipsa enim seipsa solum judicant: & circa victum diligentiam adhibere oportet, ut pro viribus febris exsors sit, & in justis figuris corpus collocare. Justæ autem hæ sunt, ut neque sublimius elevatum sit, neque deorsum repat. Sed magis præterea sursum vergat, donec perfecte fuerit circumcirca abruptum. Nam in hoc tempore sanguinis eruptionum periculum imminet. Ob id igitur vulnera deorsum repentia facere non oportet, sed vice versa. Alioqui ubi tempus amplius accesserit, & ulcera pura facta fuerint, non amplius hæ figuræ commodæ sunt, sed positio recta, & aliquando deorsum repentes. Temporis enim progressu quibusdam horum ossis discessionibus fiunt, & subligaminibus opus habent. Expectare tamen oportet, ut tales per tempus a dysenteria corripiantur. Nam in plerisque denigrescentibus dy-



ſenteria accedit, & in ſanguinis eruptionibus ex ulceribus. Accedit autem judicatis jam denigrationibus, ac ſanguinis eruptione, & procedit quidem large, ac vehementi impetu, ſed non ad multos dies durat, neque lethalis eſt. Neque enim valde cibum averſantur tales, neque alias vaſa vacua facere conducit.

Femoris porro luxationem circa coxam hoc modo reponere oportet, ſi ad internam partem elapſum fuerit. Bona quidem ac juſta & ſecundum naturam hæc repositio eſt, & ſane etiam aliquid oſtentationis habens, ſi quis talium rerum jaſtatione ſuperbire velit. Ex pedibus hominem ad tranſverſam mediæ domus trabem ſuſpendere oportet vinculo forti, ſed molli ac lato, ita ut pedes quatuor digitorum ſpatio, aut minus, inter ſe diſtantes habeat. Sed & ſupra genua latum, ac molle lorum circumdatum eſſe oportet, quod item ad trabem illam extendat. Crus autem læſum duobus digitis amplius quam alterum extantum eſſe oportet. A terra vero abſit caput ad duorum cubitorum ſpatium, aut paullo plus, aut minus. Manus autem juxta latera extantæ, aliquo molli ſint alligatæ. Omnia vero hæc ſupino jacenti ipſi præparentur, ut quambreviſſimo tempore pendeat. Poſtquam vero ſuſpenſus fuerit, virum peritum & non debilem immiſſo inter femora cubito ita agere oportet, ut cubitum inter caput femoris elapſum, & interfemineum locumque inter anum ac pudendum ponat, & poſtea altera manu ad illam interpoſitam conjuncta, rectus aſtans ad ſuſpenſi corpus, derepente ſe appendens ſublimis, quamæquabiliſſime dependeat. Hæc repositio omnia, quibus ſecundum naturam opus eſt, exhibet. Nam & ipſum corpus ſuſpenſum ſua ipſius gravitate extensionem facit, & is qui ap-

pendet, una cum extensione, femoris caput super acetabulum elevari cogit, simulque cum cubiti osse, velut cum vecte molitur ac cogit, ut ad pristinam naturam relabatur. Oportet autem vincula omnino bene constructa esse, & curare ut fortissimus sit is, qui se appendit.

Quemadmodum igitur etiam antea dictum est, magna est differentia naturarum in hominibus, ad hoc ut vel facile, vel difficulter repositio fiat. Et cur magna sit differentia dictum est antea, ubi de humero egimus. Quibusdam enim femur rursus incidit nullo adhibito apparatu, sed ex modica extensione, quantum manibus directio fieri potest, & ex levi commotione. Multis autem qui crurum juxta articulum inflexerunt, jam facta circumagitatione rursus incidit. At multo plura vulgari cuilibet apparatui non obtemperant. Quapropter scire quidem oportet de singulis optima in omni arte, uti vero his, quæ singulis vicibus idonea visa fuerint. Relati igitur sunt extensionum modi etiam in superioribus, ut quis uti possit ex his, qui forte adfuerint. Oportet enim in contrarias partes fieri extensionem vehementer, in alteram, cruris; in alteram, corporis. Si enim probe extensio facta fuerit, femoris caput supra pristinam sedem elevabitur. Et si quidem ita superelevatum fuerit, ne prohibere quidem facile sit, quo minus ipsum in suam sedem infideat. Quare omnis jam vectis molitio, ac directio sufficit. Sed enim in extensione deficiunt, & ob id majorem turbationem exhibet repositio. Oportet igitur non solum juxta pedem vincula adligata esse, sed etiam supra genu, quo non magis circa articulum sit deligatio in extensione, quam circa coxæ articulum. Sic igitur extensionem ad pedis partem præparatam facere



oportet. Sed & in alteram partem extensionem non solum ex deligatione circa pectus & alas in contrarium extendere oportet, sed etiam loro longo, duplicato, robusto, leni, circa interfemineum inserto, & a posteriore parte ad spinam porrecto, ab anteriore vero ad claviculam tendente, ibique ad alterum initium adligato, ita coactionem facere oportet, ut alii hinc, alii illinc extensionem faciant, ita tamen ut lorum circa interfemineum, non super femoris caput porrectum sit, sed inter caput & interfemineum. Verum inter extendendum pugno ad femoris caput quis innixus, id ad exteriorem partem propellat. Si vero is, qui trahitur, elevetur, injecta manu, & cum altera manu conjuncta, simul deorsum trahat, simulque ad externam partem cogat. Alius vero quispiam partem femoris ad genua placcide ad internam partem dirigat.

Dictum autem est etiam antea, operæ pretium esse, ut si quis in urbe populosa medicinam exerceat, lignum possideat quadrangulare sex cubitorum, aut paullo minus, latitudine bicubitali: crassitudo autem sufficit dodrantalis. Id secundum longitudinem hinc atque illinc sectionem incisam habere oportet, ut ne altior, quam oportet, machinatio fiat. Deinde postes aselli breves, robustos, utrimque inaptatos habere. Postea sufficit quidem in dimidia ligni parte, nihil tamen vetat etiam per totum, velut fossas longas quinque vel sex, quatuor digitorum spatium inter se distantes, incisas esse; & satis est, ut sint hæ & latitudine, & profunditate trium digitorum. Habere etiam in medio hoc lignum debet excavationem profundiorē quadrangulam trium digitorum, quo in hanc excavationem, ubi opus esse visum fuerit, lignum cavitati congruum infigatur, quod superne sit ro-

tundum. Infigendum autem hoc est, si quando conducere visum fuerit, inter caput femoris, & locum inter anum, ac pudendum. Hoc lignum erectum stans prohibet, ne concedat corpus, dum a pedibus extenditur. Quandoque enim hoc ipsum lignum sufficit pro extensione in contrarium superne facienda. Aliquando etiam, dum hinc atque illinc crus extenditur, hoc ipsum lignum hac vel illac laxum incumbens, commodum ad hoc fuerit, ut instar vectis caput femoris ad externam partem extrudat. Ob hoc enim etiam fossæ incisæ sunt, quo in quibuscumque ex ipsis congruum id facere fuerit, vectis ligneus immissus molitionem faciat, aut circa articulorum capita, aut ad ipsa penitus capita infixus, una cum extensione, sive ad externam sive ad internam, molitionem facere expedierit; sive etiam rotundum vectem esse conducat, sive latum. Alius enim alii articulo conducit.

Commoda autem est in omnium articulorum cruris repositione hæc per vectes molitio una cum concussionē. Verum de quo nunc sermo est, teretem, ac rotundum vectem esse convenit. Ex his machinis, ac coactionibus, non videtur mihi fieri posse, ut ullius articuli repositio frustra tentetur. Invenire tamen quis possit etiam alios modos repositionis hujus articuli. Si enim lignum hoc magnum habeat in medio a lateribus duos postes pedales, ejus altitudinis, quæ conferre videtur, alterum hinc, alterum illinc. Deinde lignum transversum, velut scalæ gradus, postibus impositum sit, atque ita sano crure inter postes transmissio, læsum crus supra gradum adaptatum habeat. Verum ad altitudinem, & ad articulum qua parte excedit, facile quiddam adaptare oportet. Gradum enim moderato altiorem facere oportet, & stragulum mul-



tiplex prout congruum fuerit, sub corpus subextendere. Deinde lignum moderatam latitudinem, ac longitudinem habens, sub crus ad malleolum usque extentum esse oportet, quod ultra femoris caput, quantum ejus fieri potest, porrigatur, & ad crus adligetur quotiescumque opus fuerit, ut moderate habeat. Postea dum extenditur crus, sive ligno pistilloformi, sive aliqua alia ex his extensionibus, crus simul circum gradum una cum adligato ligno deorsum cogere oportet, ita ut aliquis supra articulum juxta coxam hominem detineat. Hoc enim modo simul & extensio femoris caput super acetabulum adtollet, simulque molitio femoris caput in pristinam naturam detrudet. Hæ omnes relatæ necessitates, ac coactiones fortes sunt, & omnes calamitate superiores, si quis recte ac bene præparet. Quemadmodum autem etiam antea dictum est, a longe debilioribus extensionibus, & viliori apparatu plerisque rursus incidit. At vero si ad externam partem femoris caput luxatum fuerit, extensiones quidem hinc atque illinc facere oportet, eodem modo velut dictum est. Verum molitionem cum vecte lato, una cum extensione facere convenit, ab externa parte ad internam cogendo, ita ut ad ipsas nates, & paullo superius vectem adhibeas. Ad sanam vero coxam juxta nates aliquis manibus renitatur, ut ne cedat corpus, aut alio quopiam hujusmodi vecte submisso, & ex fossa conveniente fulcito contra obnitatur. Partem autem femoris luxati, quæ ad genu est, ab interna parte foras placide abducatur. Cæterum suspensio in hoc modo luxationis articuli non convenit. Cubitus enim ejus, qui se appendit, caput femoris ab acetabulo propellit. Molitionem tamen cum ligno subiecto ita quis adaptare possit, ut

ut huic luxationis modo conveniat, si forinsecus adhibeat. Sed quid opus est plura dicere? Si enim recte extensio fiat, & recte per vectes motio contingat, qui articulus hoc modo elapsus non reponi possit? At si in posteriorem partem femur exciderit, extensiones & in diversum tensiones ita facere oportet, velut dictum est, ita tamen ut super lignum multiplex stragulum insternatur, quo mollissimum sit, & homo pronus reclinetur, ac sic extendatur. Verum una cum extensiones, etiam tabula deorsum cogere oportet eodem modo, veluti gibbositates, e directo natium tabula collocata, aut magis ad infernam, quam ad supernam coxarum partem, & incisura in pariete ad tabulam excipiendam non recta sit, sed paullulum declivis ad pedum partem. Hæc repositio maxime secundum naturam est huic luxationis modo, & simul fortissima. Suffecerit autem fortassis pro tabula, ut aliquis insideat, aut manibus innitatur, aut inscendat derepente, simulque cum extensione incumbat. Nulla vero alia ex relatis repositionibus secundum naturam est huic luxationis modo. Si vero in anteriorem partem elapsus fuerit, idem quidem modus extensionum faciendus est. Verum virum & manibus validissimum, & alias peritissimum, vola manus alterius circa inguina firmata, & altera manu insuper injecta, simul luxationem deorsum propellere, simulque femoris partem, quæ ad genu est ad anteriorem partem compellere oportet. Hic enim modus repositionis huic luxationi maxime secundum naturam est. Sed & suspensio finitimum quid secundum naturam habet. Oportet tamen eum qui se appendit peritum esse, ut ne cubito articulum excutiat, sed circa medium inter anum, ac pudendum locum, &



juxta os sacrum se appendat. Laudatur etiam is, qui per utrem hunc articulum reponere conatus est. Et jam sane aliquos vidi, qui præ imperitia, etiam extra & retro luxatos, per utrem reponere conabantur, non animadvertentes, quod magis ipsum ejicerent, quam reponerent articulum. Nam qui primus excogitavit, haud dubie ad intro elapsos articulos, per utrem repositionem tentavit. Nosse igitur oportet, quod alia multa utre sunt potiora. Oportet autem utrem non inflatum intra femora ponere, quantum fieri potest supreme ad locum inter anum, ac pudendum adductum; & facto a patellis genu initio, femora per fasciam usque ad mediam femorum partem deligare, deinde in partem utris solutam folle ex officina fabri immisso inflare, & utrem cogere ut distendatur. Hominem vero in latus decumbere oportet, & læsum crus superne habere. Atque hic quidem est apparatus, sed plerique pejus præparant, quam ego nunc dixi. Non enim deligant femora ad multam partem, sed solum genua, & non insuper extendunt: est autem insuper extensio quoque facienda. Attamen aliqui jam reposuerant, facile rem assequeuti. Non autem ita facile est coactionem hoc modo perficere. Nam & uter dum inflatur, tumidissimas partes suas ad articuli caput non habet, quod maxime emoliri oportet; sed inferius ipso, medius ipse locatus est circa media femora, aut adhuc inferius: & rursus femora ipsa natura sunt curva. Superne enim carnosæ sunt, & inter se sociatæ. Inferne vero sicca, ut etiam natura femorum utrem ab opportunissimo loco repellat. Si vero quis parvum utrem imponat, fieri non potest, ut parvum robur articulum cogat. Si itaque utre uti velis, femora inter se ad multam

partem colliganda sunt, & una cum corporis extensione uter inflandus est. Crura vero ambo deliganda sunt usque ad finem in hoc repositionis modo.

At vero in universa arte hoc plurimi facere præ omnibus oportet, ut id, quod ægrotat, sanum facias. Si vero multis modis fieri possit sanatio, ut eum, qui minime molestus est, eligas. Nam & virum bonum, & artis peritum, hoc declarat, qui populo imponere non studeat. Verum de quo nunc sermo est, tales quædam sunt familiares extensiones corporis, ut ex his, quæ adsunt expedita, ac facilis reperiri possit. Nam si vincula ex loris mollia, ac lenia non adfuerint, sed aut ferrea, aut funes nautici, aut domestici, fasciis aut panniculis laneis ea maxime parte amplius obvolvere oportet, qua vincula detentionem factura sunt, atque ita vinculis deligare. Deinde in lecto robustissimo, & ex præsentibus maximo, hominem bene extendere oportet, hoc modo. Lecti pedes qui ad caput sunt, aut a pedibus, ad limen januæ, intus aut foris prout commodum fuerit firmentur. Ad alteros autem lecti pedes lignum quadrangulare transversum objiciatur, ita ut a pede ad pedem pertingat. Et si quidem tenue fuerit lignum, ad pedes lecti deligetur. Si vero crassum, non est opus. Deinde initia vinculorum, & eorum quæ a capite sunt, & eorum quæ a pedibus, utraque adligentur ad pistillum, aut ad aliud hujusmodi lignum, ita ut e directo corporis sint, aut paulo superius. Moderate vero extendantur ad pistilla erecta consistentia, quorum alterum ad limen, alterum ad lignum objectum firmetur, atque sic refractis pistillis extensio fiat. Sufficit autem scala, quæ robustos gradus habet, sub lectum extenta, pro limine ac ligno objecto, quo pistillis



ad convenientes gradus hinc atque illinc firmatis, ita vinculorum extensio fiat.

Porro reponitur femoris articulus etiam hoc modo, si ad internam, & ad anteriorem partem luxatus fuerit. Supra scalam in terram defixam hominem collocare oportet, deinde sanum crus placide extensum deligare, ubi commodum fuerit; ex sinistro vero vas testaceum aqua plenum, aut sportulam lapidibus refertam appendere. Alius repositionis modus, si ad internam partem luxatus fuerit. Inter duas columnas trabem moderata altitudine deligare oportet. Præmineat autem una pars trabis pro magnitudine nati, & ubi stragula circum pectus hominis deligaveris, ipsum hominem supra præminentem trabis partem collocato, & deinde pectus ad columnam lato aliquo vinculo adligato. Postea sanum quidem crus detineat aliquis, ut ne circumagatur. Ex læso vero appendatur pondus quantum congruit, velut etiam prius dictum est. Primum igitur scire expedit, quod omnium ossium commissuræ plerumque sunt caput, & acetabulum. In quibusdam vero, & locus acetabuli formam refert, & oblongus est. Quidam vero loci leviter sinuosi sunt.

Semper autem reponere oportet omnes articulos elapsos, maxime quidem statim, dum adhuc calidi sunt. Sin minus, quamcelerrime. Nam & ei, qui reponit facilius, ac citius reponere contingit, & ægroto multo minus doloris adfert repositio priusquam intumuerit. Omnes etiam articulos ubi reponere voles, præmollire ac commovere oportet. Sic enim facilius reponi solet. Circa omnes autem articulorum repositiones hominem adtenuare oportet, maxime circa maximos articulos & repositu difficillimos, minimum circa minimos & faciles.

At vero si digitorum articulus, five primus, five secundus, five tertius in manu exciderit, idem ac æqualis repositionis modus est, difficilius tamen semper maxime articuli reponuntur. Excidunt autem quatuor modis, aut sursum, aut deorsum, aut in obliquum utrimque, maxime quidem superne, minime autem in obliquum, in vehementi motu. Utrunque autem in ea parte in quam exciderunt, velut crepido est. Si quidem igitur ad supernam, aut infernam partem exciderit articulus, eo quod levior est hic locus, quam a lateribus, & simul parva facta est transgressio; facile est reponere. Modus autem repositioonis sic habet. Digitum summum aut deligamento aliquo, aut alia quapiam hujusmodi re obvolvito, ut ne, ubi summum digitum apprehensum tendis, elabatur. Quum autem obvolveris, alter quispiam manum supra juncturam apprehendat, alter digitum obvolutum, atque ita uterque ad seipsum probe extendat, simulque elapsum articulum ad sedem suam detrudat. Si vero in obliquum excidit, extensionis quidem idem modus est. Ubi vero jam visus fuerit tibi articulus lineam transgressus esse, simul cum extensione statim ad locum suum detrudere oportet, ita ut alius quidam ex altera digiti parte observet, ac repellat, ut ne rursus illic elabatur. Moderate quoque repositionem faciunt vimineæ texturæ, sauræ id est laceratæ appellatæ, ex palmis contextæ; ita ut dum digitum hinc atque illinc distendis, altera manu lacertam, altera manus juncturam apprehendas. Postquam autem reposueris, deligare oportet linteis quamcitissime, tenuissimis, inceratis, cerna que valde molli, neque valde dura. Dura enim digito abscedit. Mollis autem & liquefscens eliquatur, & digito calefcente deperit. Solvendus



autem est digiti articulus tertia, aut quarta die. In summa, si inflammatus fuerit, frequentius solvendus est; sin minus, rarius. De omnibus articulis hæc dico. Restituitur digiti articulus decimaquarta die. Idem vero est curationis modus digitorum manus, ac pedis. Circa omnes autem articulorum repositiones attenuare oportet, ac fame macerare usque ad septimum diem: & si inflammati sint, frequentius solvere; sin minus, rarius. Quietem vero semper habere oportet afflictum articulum, & quamoptime figuratum positum esse.

Genu porro propter expeditam, ac facilem naturam mitius est, quam cubiti gibbus. Quare etiam facile excidit. Excidit autem sæpe intro. Sed & extra, & in posteriorem partem. Repositiones autem fiunt ex repentina conflexione, aut ex calcitracione: aut convolutam fasciæ molem in poplitem ponito, & circum illam corpus ita ad flectendum genua in terram dimmittio. Potest etiam, ubi in posteriorem partem excidit, moderata extensione reponi, veluti cubiti gibbus. Si vero hac aut illac excessit, ex conflexione, aut ex calcitracione reponitur. Cæterum directio ex moderata extensione omnibus communis est. Si vero non inciderit; hi, quibus in posteriorem partem excidit, flectere non possunt: sed neque alii ita valde: minuitur autem femoris, & tibiæ anterior pars. Si vero intro; valgiores fiunt. Minuuntur autem externæ partes. Si vero extra; magis vari, ac detorti, minus claudi fiunt, crassiore autem ossæ vehuntur, & internæ partes minuuntur. At si ex nativitate, aut in augmento hæc fiant, juxta priorem rationem res se habet. Cæterum articuli circa malleolos luxati extensione vehementi opus habent aut manibus, aut aliis

hujusmodi, & simul directione utrumque præstante. Commune autem hoc est omnibus. At vero luxationes articulorum in pede, velut eas, quæ in manu fiunt, sanabis. Qui vero cum tibia communionem habent, & ex nativitate elapsi sunt, aut etiam in augmento luxati, eadem cum manu repositionem expetunt.

Quicumque vero facto saltu ex supernis, calcaneo innitentes se firmarunt, sic ut ossa disparata sint, & venæ humores effuderint, & nervi contusi sint; si graviter hæc acciderint, periculum est, ne corruptione accedente, per omnem vitam affligantur, obtorta enim fiunt ossa, nervi autem inter se communionem habent. Quin & quibus fractis aut ex vulnere vel in tibia, vel in femore, aut nervis exsolutis, qui his communicant, aut ex negligenti decubitu calcaneum fuerit denigratum, etiam his maximæ recrudescentiæ ex talibus fiunt. Quandoque etiam ad corruptionem accedunt febres acutæ, singultuosæ, mentem percellentes, citam mortem inducentes, & insuper venarum sanguinarum livores. Signa recrudescentium sunt, si effuso sanguine sugillata, & denigrata, & vicina his, subdura ac subruba fuerint. Si enim cum duritia livescant, periculum est, ne denigrescant. Si vero sublivida sint, aut etiam livida, mollia, & diffusa, aut cum virore subpallida, ac mollia; hæc in omnibus talibus bona sunt. Curatio, si febris absit, veratro in potu dato fit; sin minus, non, sed potu si opus sit, favorum cremor decoctus, aut acetum mulsum dulce detur. Deligatio convenit qualis in articulis. Ad contusiones autem magis, quam ad omnia, linteis pluribus, ac mollioribus utendum est, & minus comprimendum, & plurima insuper calcaneo obvolvenda. Figura sit velut deli-



gatio postulat, ut ne ad calcaneum exprimatur. Ferulis utendum non est. Quibus vero aut ipse pes solus excefferit, aut cum appendice, excidit quidem magis ad internam partem; his si non rursus incidat, attenuatur progressu temporis & coxa, & femur, & tibiæ pars luxationi opposita. Repositio est velut juncturæ ad manum. Extensio autem vehemens. Curatio pro lege articulorum. Recrudescit, sed minus quam manus articulus sive junctura, si quieverint. Victus parcior quiescentibus expedit. Quæ vero ex nativitate, aut in augmento fiunt, juxta priorem rationem.

---

## HIPPOCRATIS

### MOCHLICUS.

---

#### P R Æ F A T I O.

*Compendium brevissimum, neque tamen inconcinnum, librorum de fracturis & articulis. Vix decem voces proprias continet.*

**N**Asus autem confractus eodem momento conformari potest. Si quidem igitur cartilago desidit, derafam lintei lanuginem Carthaginiensis corii cortice, aut aliqua alia re, quæ non irriteret, convolutam, in nares immittere

oportet. Id autem deligatio præstat. Est & alia curatio, ubi simul injecto sulphure cum cerato, statim nasus componitur, deinde digitis immittis explorando continetur, & in alteram partem convertitur. Carthaginienſe vero corium ſinendum, donec callum obduxerit, ſive ulcus adſuerit, ſive oſſa diſceſſionem factura ſint. Neque enim committendum ut ſic maxime recrudeſcant.

Auri fractæ neque vinculum, neque cataplaſma adhibendum. Quod ſi quo ſit opus, ceratum quam maxime leve, aut ſulphuris agglutinatione conveniet. At quibus aures ad ſuppurationem tendunt, iis pus craſſiore loco reperitur. Tibi autem imponent quæcunque ſubmucosa & humida carne plena ſunt, & neque ex huiusmodi ſeſione detrimentum contingit. Ubi autem, & quænam mortifera exiſtant, ea ſunt appoſita. Aures cito ſaneſcunt, ſi in utramque partem feramentum candens adigatur. Mutila tamen & minor candenti ferro præter trajecta auris redditur. Quod ſi aperta fuerit levi aliquo medicamento, quod cruentis vulneribus adhibetur impoſito opus erit.

Maxillæ autem frequenter quidem convelluntur, raro vero excidunt, maxime quidem hiantibus. Neque enim hic caſus incidit, niſi quis vehementer os aperiendo, in alteram partem torqueat. Idque magis incidit, quod nervi in-obliquum etiam ubi contorquentur concedunt. Cuius rei hæ notæ ſunt, maxilla inferior in anteriorem partem prominet, & in alteram luxationis partem pervertitur, ægri maxillas committere nequeunt. Quod ſi utraque parte maxilla prolabatur, prominet magis, os minus committunt, minime diſtorquentur, quod dentium fines indicant, cum inferiores ſuperioribus ex



adverso respondeant. Utraque igitur maxillæ parte prolapsa, nisi statim reposita fuerit, hi intra decimum diem febre assidua & segni sopore moriuntur. Hi enim muscoli huiusmodi soporem invehunt, alvus paucis & sinceris exturbatur, & si vomitus adfuerit, ejusmodi vomitione refundunt. At si altera parte maxilla excidat, minor est noxia, eadem tamen utrorumque est repositio. Homine decumbente aut in sedili collocato, capite prehenso, utramque maxillæ partem ambabus manibus, tum interiore, tum exteriori parte apprehendere, ac tria simul facere oportet, in directum ac in posteriorem partem propellere, & corpus commovere. Curatio per malagmata, figurationes, & menti exceptionem perficitur. Ista enim ad repositionem faciunt.

At vero humerus inferiorem in partem excidit, aliam in partem excidere non audiui. Videtur siquidem in anteriorem partem excidere, quibus carnes, quæ circa articulum sunt, natura extenuatæ fuerint, quale quid etiam in bobus per hyemem ob macilentiam cernitur, & magis excidit, ac extenuatis, aut gracilibus, aut siccis, iisque quibus humiditates circa articulos citra inflammationem continentur. Ipsa enim colligaret quidem. Ex quo qui bobes curant ac stimulant, in iisque repositionem tentant, errant, tum quia etiam homini ita constituto, hic habitus communis est. Quibus quoque accedit Homeri autoritas, quod boves tunc maxime graciles existunt. At quibus humerus recondi non potuit, iis quæ cubito in latus a costis sublato sunt, non admodum præstare possunt. Quibus igitur pctissimum excidat, & quomodo habeant dictum est. Quibus vero a primo natali die ista contingunt, iis ossa potius quæ ad luxationem

proxime accedunt, breviora sunt ( quale quid tunc iis qui mustelæ cubito præditi sunt, & *galeancones* Græcis dicuntur, usuvenire solet ) quod cubito minus, adhuc autem manui accedere videtur. Quæ vero supra sunt, nihil tale sentiunt, sed quæ vicinitatem habent, valde emaciantur. Imminuuntur autem maxime, quæ altera luxationis parte sunt, & quæ incrementum accipiunt, minus tamen quodammodo, quam quæ talia sunt ab ortu. Quin & profundæ suppurationes circa juncturam recens natis præcipue ad humerum sunt, iisque non secus ac luxata efficiunt. Quod si adultis ista contingunt, ossa quidem non minuuntur. Neque enim causa est, cur alia non æque simul augeantur. At carni-um imminutiones sunt, quod hæ in dies & augeantur & minuantur, idque per ætates & corporis habitus, qui in eo obtinent. Præterea etiam indicio est id, quod ad summum humerum est avulsum & cavum, propterea quod summo humero avulso & cavo, brachium prolapsum esse existimant: brachii autem caput in ala cernitur. Neque enim attollere ipsum queunt, neque huc vel illuc traducere. Quod similiter ex altero humero deprehenditur. His autem rationibus reponitur, si pugno quidem in alam injecto, caput sursum propellas, manum vero præterea ad pectus adducas, aut si retroducendo ita ut circumoberret, compellas. Aut capite ad summum humerum objecto, manibus vero in alam injectis, brachii caput abducas, cubiti autem gibbum genibus protrudas, aut genuum loco alterum cubiti gibbum ad latus adducere, ut prius jubeas. Aut si supposito in alam humero, æger in humero insideat. Aut ubi calce, adhibitis his, quæ alæ cavitatem compleant, ad dextrum



humerum, dextro usus fueris. Aut ubi per pitillum, aut scalæ gradum coegeris, aut una cum ligno ad manum porrecto super trabeculam transversam converteris; curatio perficitur eo habitu, ut brachium ad costas adducatur, manus summa ac humerus sursum detineantur, sicque sursum deligatio fiat & appensio. Quod si repositus humerus non fuerit, summus humerus etiam extenuatur. Summus humerus avulsus, speciem quidem prolapsi humeri exhibet, nullo tamen privatur, neque in pristinum statum restituitur. Idem habitus tum in deligatione, tum in suspensione, qui etiam luxato convenit, & pro deligationis lege.

At vero cubiti gibbi articulo in latus, aut anteriorem in partem dimoto quidem aut subluxato, acuta ejus parte in brachii cavo remanente, distentione in directum facta, eminentia retro & & ad latus propellere oportet. Quod si prorsus in hanc vel illam partem exciderit, distentio quidem, in qua brachium deligatur, adhibenda. Sic namque cubiti flexus nihil impediet. Potissimum vero ex laterum parte excidit. In suum autem locum dirigitur, quam plurimum abducendo, ne caput brachii acutum ossis processum attingat. Suspensum vero circumagere & circumflectere oportet, neque vim id directum adhibere, simulque in contrarium in utrunque partem impellere, & in sedem compellere. Ad hæc quoque contulerit cubiti gibbum modo quidem pronum, modo etiam supinum contorquere. Repositio autem est, quæ ex habitu quidem pendet, si summa manus paulo cubiti gibbo altior, brachium vero ad latera adductum teneatur. Sic quoque & appensio, & facilis gestatio, & natura, & usus in commune conferunt, si modo callus,

qui celeriter increfcit, prave non obducatur. Curatio per lintea pro lege articulari inftitui debet, & cubiti eminentia infuper deligari. Rurfus autem maxime excandefcit cubiti gibbus, febresque, dolorem, naufeam, ac meracæ bilis vomitionem movet, fecundum id, fi in anteriorem elapfus fit. Curatio eadem adhibenda. Reconditur vero ubi in posteriorem excidit, fi porrectum brachium in diverfa contendatur. Cujus rei indicium eft, quod extendi nequit, ut & in anteriorem prolapfi, quod minime flecti poteft. Hic autem impofito duro aliquo collecto, fuper id, ubi extenderis, de repente flectendus eft. At diffidentium inter fe offium indicium, qua vena in brachio fcinditur, ad contactum patet. Hæc vero celeriter callo obducuntur. Quibus a primo ortu ifta contingunt, iis offa infra noxiam breviora evadunt, plurimum vero quæ cubito funt proxima, deinde ea quæ in manu, poftremo quæ in digitis. Brachium autem & humerus propter nutritionem validiora evadunt. Manus item altera, propter opera, etiam longe validior eft. At carniū imminutio, fi quidem in anteriorem partem articulus prolapfus eft, interiore parte fit, fin minus contra quam exciderit. Cubiti autem gibbus ubi interiorem in partem, aut anteriorem exciderit, in habitu quidem angulari cubiti ad brachium communi reponitur. Ex ala namque fascia excepta fufpenfio facienda, ad cubitum vero fummum fuppoſitum pondus aliquod juxta articulum appendendum, vel manibus adurgendum. Tum fufpenſo in ſublimi articulo, offa manuum volis adducenda. Hoc in habitu deligatio, appenſio, & poſitio velut in manibus fieri debet. At ubi poſteriorem in partem excidit, de repente extensione facta, manuum



palms dirigendum, simulque hæc in directione, tum in cæteris usurpanda sunt. Quod si priorem in partem prolapsio facta sit, circum linteum convolutum, & in justam molem sublatum, inflectendo simul directio facienda. Sin alteram in partem inclinarit, cum directione simul utraque facienda sunt. Ad curam autem communiter habitus & deligatio spectant. Possunt enim ex distensione communiter omnia contingere. Repositiones vero partim quidem in sublime elevando, partim distendendo, partim vero circumoberrando fiunt. Idque cognoscitur, neque descriptione indiget. Reponitur autem in directum contendendo, & quod eminet protundendo, & quod contra est retrudendo. Curatio vero est accommodata, quæ per lintea fit deligatio. Nisi enim restitutus fuerit, exteriori parte callum contrahit. Quæ a primo ortu aut dum adolescunt ossa prolapsa fuerint, ea infra luxationem breviora evadunt, & carnes adversa ex parte, in quam prolapsio facta est, potissimum imminuuntur. Adulto vero ossa eadem magnitudine permanent.

Femoris articulus quatuor modis excidit, plurimum interiorem in partem, deinde in exteriori, aliis vero modis similiter. Hujus rei indicium commune quidem alterum crus, intro vero emoti proprium, ubi in interfemineo coxæ caput tactu percipitur, neque similiter crus inflectunt. Crus vero multo longius videtur, nisi utroque in medium adducto distensionem feceris. Etenim pes & genu exteriori in partem feruntur. Si igitur a primo ortu, aut dum incrementum accipiunt, exciderit, femur brevius evadit, quam calamitatem minus tibia, cætera vero pro ratione sentiunt. Carnes autem imminuuntur, maxime tamen parte exteriori. Ii in dirigendo

corpore negligenter se gerunt, & ad sanum crus convolvuntur. Quod si cogantur, scipione uno vel duobus innixi incedunt, crus vero adtollunt. Quo enim brevius, eo levius est. Quod si jam adultis istud accidit, ossa quidem eadem magnitudine perseverant, carnes tamen quo ante dictum est modo imminuuntur, & crus circumvolvendo, velut boves incedunt. Ad lateris autem inanitatē incurvantur, sani cruris extra prominente coxendice. Hoc enim ut subeat ad vehendum necesse est, illud vero ut extra feratur. Neque enim vehere potest, non magis quam quibus pes ulcere laborat. Ad cruris quoque sani latus baculo corpus fulciunt. Crus vero læsum manu super genu posita adurgent, quo inter ambulandum corpus vehat. Coxendice infra si utatur, infra etiam ossa minus imminuuntur, carnes vero magis.

At exteriorem in partem emoti femoris, contraria tum signa, tum status sunt, genuque ac pes introrsum paulo spectant. Quibus hæc dum adhuc adolefcunt, aut a primo ortu contingunt, iis crus non æque augetur, eademque ratione coxæ articulus paulo supra eminens non similiter. Quibus vero frequenter exteriorem in partem citra inflammationem prolabitur, ii humidiores crure utuntur, non secus ac manus pollex, qui maxime suapte natura excidit, quibus quidem magis aut minus excidit, partim vero ægrius aut facilius prolabitur. Est ubi celerius recondi spes est, & quibus nullam curationem recipit, interdumque sæpius excidit, & curationem admittit. A primo vero ortu aut in adolefcencia, aut per morbum ubi ista contingunt, ac præcipue certe per morbum, interdum quibusdam os sideratur, quinetiam quibusdam non omnia eveniunt,



minus tamen quam quibus intro luxatio facta est depravantur, si proba & diligens curatio adhibeatur, adeo ut toto pede insistentes, plurima adhibita diligentia in utranque partem propendant. Quæ si in infantia neglecta fuerint, vitiantur, adhibita vero cura toto crure utilitatem sentiunt, minusque quodammodo imminuuntur. At quibus hunc in modum utraque ossa exciderunt, his noxiis afficiuntur, pleniores quidem sunt, præterquam interiore parte, admodum prominentibus exteriorem in partem natibus conspiciuntur & femoribus introrsum obtortis. Ii nisi siderentur, aut gibbosi superiore coxæ parte evadant, salubriter quidem degunt, corpore tamen minus, capite excepto, augentur.

Quibus autem posteriorem in partem femur prolapsum est, hæ notæ adfunt; pars anterior mollior est, posterior prominet, pes rectus est, crus inflectere non nisi cum dolore queunt, extendere vero minime, his crus brevius evadit. Sed neque hoc nisi valde sustollant, tum ad poplitem tum ad inguen extendere possunt, neque in plurimis superior articulus primus flecti incipit. Quod commune est articulis, nervis, musculis, intestinis, uteris, aliisque hujusmodi. His coxendicis os declive in natem fertur, quam ob causam, quodque crus extendere nequeunt, breve evadit. Totius cruris carnes in omnibus imminuuntur. In quibus autem maxime, aut ubi ista contingant, dictum est. Corporis pars quæque ubi sua munia obierit, robur quidem accipit, si vero otietur, vitiatur, præterquam si lassitudine, febre aut inflammatione tentetur. Quod etiam exteriorem in partem prolapsum est, eo quod in cedentem carnem excidit, brevius efficitur, quod vero in interiorem, eo quod  
supra

supra os prominet, longius. Quibus igitur adultis repositum non fuerit, ii ad inguina curvati incedunt, & alterum poplitem inflectunt, ima pedis planta vix terram attingunt, & manu crusprehendunt, si absque baculo incedere velint. Qui si longior fuerit, non ingredientur, quod si ingredientur brevem esse oportet. Carnium autem fit imminutio si laborent & crus in usum admittatur, velut ante dictum est. Quod & integro cruri pro ratione accidit. At quibus ex primo ortu, aut per adolescentiam, aut per morbum adfectio ista aut luxatio contingit ( quibus vero in morbis id fiat dicetur ), ii maxime propter nervorum & articulorum ignaviam, maxiam sentiunt. Genu quoque ob enumeratas causas vitium sentit, quo inflexo, baculo uno aut duobus innixi, incedunt. Crus vero integrum, qui in usum admittitur, bene habitum est.

At quibus priorem in partem femur excidit, iis contraria signa adsunt, posteriore parte molle est, anteriore prominet, crus hi minime inflectunt, maxime vero extendunt, pes rectus est, crus æquale, calx summus paulum contractus, aut hi statim dolore præcipue conflictantur, urinæque imprimis in his luxationibus supprimitur. Femoris enim caput ad insignes nervos incumbit, loca anteriora contenta sunt neque incrementum sumunt, morbis & maturæ senectuti obnoxia redduntur, posteriora in rugas contracta. Quibus adultis ista contingunt ii recti inambulant, calce magis incedentes. Ac si admodum progredi valeant etiam valde ( calce incedunt. ) Pedem autem per terram trahuunt. Femur minimum ob usum, præcipue vero posteriore parte. Toto crure erectiones mediocri baculo ad crus adfectum indigent. Quibus vero ex prima origine adoles-



centibus hæc contingunt, ii si probe & diligenter curentur, crure non secus ac adulti utuntur. At neglectis paulum extentum est. Ipsi enim quod ad rectum habitum maxime spectat, articulis capti sunt. Ossium autem & carnium imminutiones pro ratione contingunt.

Coxæ autem valida quidem distensio & directio communis est, quæ vel manibus, vel asserere, vel vectis molitione præstatur. Et luxationem quidem, quæ ad interiora fit, rotundo, quæ ad exteriora lato vecte, moliri decet, præcipue vero quæ ad exteriora. Quæ certe in interioram partem prolapsa sunt, utribus ad eam cruris partem, quæ in angustum tenuatur oppositis curare convenit, simulque cum distensione & crurum deligatione suspensio adhibenda, diductis paulum pedibus. Deinde manibus implexis quendam appensum esse oportet, qui inter dirigendum simul utraque prætet. Istaque reponendi ratio luxationi ad anteriora & cæteris abunde convenit, minime vero ei, quæ fit in exteriora. Lignum etiam velut in humero ad manum subtentum, quibus ad interiora luxatio facta est, convenit, aliis vero minus. Deorsum autem impelles cum distensione præcipue anteriorum aut posteriorum partium, aut manu, aut pede, insidere, aut asserere uti conveniet.

Genu cubiti gibbo ob succinctam & commodam ejus naturam benignius est, ideoque facilius excidit & reponitur. Sæpius autem interioram in partem, sed & in exterioram & posterioram prolabitur. At reconditur subita confectione & exalcitratione, aut si circa obvolutum fasciæ globulum in poplite positum, ut de repente corpus in genua flectatur permiseris. Idque præcipue luxationem in posteriora restituit. Possunt

quoque quæ posteriorem in partem luxatur, moderata extensione, non secus ac cubiti gibbus, suum in locum reverti. Quæ vero in hanc vel illam partem exceſſerunt, conflexio, aut calcium impulsio, aut extensio reponit, præcipueque hæc quod posteriorem in partem excidit. At quæ moderata extensione fit restitutio, omnibus communis est. Ac nisi repositio facta fuerit, neque ubi posteriorem in partem excidit, sed neque cum alas in partes exceſſit, flecti admodum queunt, femoris vero & tibiæ in anteriore parte imminuitur. Ac si anteriorem in partem excidit, ii valgi magis evadunt, exterioribus autem partibus imminuuntur. Quod si anteriorem in partem prolapsum est, vari magis, claudi vero minus efficiuntur. Crassiore nanque ossis parte gestantur, ac interioribus partibus imminuuntur. At quibus a primo ortu, aut dum adoleſcunt, luxatio facta est, ii quomodo prius dictum est se habent.

Quæ circa malleolos luxantur, valida intentione, quæ per manus aut alia huiusmodi adhibetur, opus habent, ac directione, quæ simul utrumque efficiat: quod omnibus commune est. Quæ vero in pede contingunt, velut ea, quæ in manu sunt, curationem accipiunt. Quæ cum tibia consensionem habent, & a primo ortu exciderint, aut dum adhuc corpus augetur luxentur, eandem quam in manu curationem habent. At quibus ex alto defilientibus in calcem innixis, ossa defident, venæ subter cutem effunduntur, ac nervi contunduntur, ubi hæc gravissima contingerit, periculum quidem, est ne iis siderata ossa per totam vitam negotium faceſſant. Obtorta siquidem ossa evadunt, nervi quoque consensione inter se conspirant. Quibus item ex fractura vel



vulnere, vel in tibia, vel femore, vel ex nervorum dissolutione, qui cum his communiant, aut alicui ex negligentiore decubitu, calx denigrata fuerit, iis quoque ex talibus recrudescente mala consueverunt. Interdum ad siderationem febres accedunt valde acutæ, singultuosæ, cum tremoris sensu, mentem adtentantes, & quæ præcipitem mortem adferunt, prætereaque venarum sanguinem fundentium livores & cancerationes. Recrudescens morbi indicia sunt, ubi sanguis e venis sub cutem effusus, & quæ nigrescunt, quæque his vicina, duritiem aut ruborem aliquem contraxerint. Etenim si cum duritie livescunt, ut nigrescant periclitantur. Quod si sublivida, aut livida & mollia fuerint, & diffusæ, aut ex virore aliquantulum pallida & mollia, hæc in omnibus huiusmodi bona sunt. Curatio vero, siquidem febris absit, per veratrum confert, alicui non exhibendum, sed potius aqua mulsa acida (*oxuglum* vocant) si opus est, exhibenda. Deligatio, quæ articulos componat, atque in his magis convenit. Ad collisæ pluribus etiam linteis & mollioribus utendum. In his minor compressio, & copiosa aqua convenit, plurima fasciæ parte ad calcem circumjecta. Figura ea sit, quam deligatio requirit, ut ne in calcem expressio fiat, supra genu ducta sit, beneque illic disposita, neque ferulæ adhibendæ.

At ubi pes, vel solus, vel cum adnato osse excessit, interiorum in partem magis excidit, ac nisi recondatur, coxæ, femoris, & tibiæ pars ex adverso luxationi respondens, temporis successu extenuantur. Repositio eadem, quæ primæ juncturæ manus debetur, contentio vero vehementior, curatio pro lege articulorum. Quod si quiescant, minus quam in prima manus junctura

morbus recrudeſcit, & quod quietem agunt tenuior victus ratio imperanda. Quæ vero a primo ortu, aut dum adoleſcunt, contigerunt, eam quæ prius dicta eſt tractationem poſtulant. Deinde nonnullæ ex prima origine luxationes, ſi parum elapſæ fuerint, in ſtatum naturalem dirigi poſſunt, præſertim vero ubi pes intro convertitur & varus efficitur. Neque enim id uno modo contingit. Hujus autem curationem inſtituunt, quaſi ceram fingendo partibus conformatis ceratum, quod reſinam accipiat adhibatum, lintea copioſa, ſoleæ, aut plumbea lamina non ad cutem adligata. Ad quæ partis exceptionem, & corporis habitum accommodatum eſſe oportet.

Quod ſi luxata vulnerata cute exſtent, ſinere ea præſtat, ita ſane ut non dependeant, neque retro adducantur. Curatio vero cerato, quod picem habeat, aut ſpleniis vino madentibus calidis (his enim omnibus frigus nocet) inſtituenda, & foliis, per hyemem autem lanis ſordidis. Ac neque integumentis gratia quicquam imponendum, neque deligandum, victus ratione tenui utendum. Frigus, pondus multum, compreſſio, vis adhibita, habitus corporis conſtitutus, hæc ſane omnia certam habent perniciem. Mediocriter autem curati, turpiter claudi fiunt. Etenim ſi iſta pedibus contingant, pes contrahitur, & ſi qua alia in parte, idem pro ratione evenit, oſſa non admodum abſcedunt. Parum enim nudantur, & tenuibus circum cicatricibus obducuntur. Horum quæ maxima, & quæ valde ſupra, periculi ſunt pleniffima. Unica vero ſpes ſalutis, ſi non reponantur, præterquam quæ ſunt ad digitos, & ad ſummam manum. Ac in his ubi periculum prædixeris, ad repositionem aggredi oportet, aut primo, aut altero die, ſi



minus, ad decimum, quarto minime. Repositio fit per vectium molitionem, curatio autem qualis in capitis ossibus, & per calida. Veratro quoque etiam statim, deinde quibus repositio facta est, uti præstat. In reliquis probe nosse convenit, ad repositionem maximorum præcipue & superiorem, etiam celerrimas mortes consequi. Pes autem ubi excessit, convulsione & cancro tentatur. Quod si repositione facta quid huiusmodi supervenit, sola spes est, si qua restat, ut ejiciatur. Neque enim ab his quæ laxant, verum ab his, quæ intendunt, convulsiones fiunt.

At præcisiones, quæ in articulo, aut circa ossa contingunt, dum non superiore parte, sed ad pedem, prope ad manum fiant, ex his superflunt, nisi statim fere animi defectione intereant. Iis eadem curatione quæ capiti, & per calida debetur. Ex sideratione tamen carnium, tum ubi vulnera sanguinem profundentia constringuntur, tum ubi ossium fracturæ comprimuntur, & ex vinctis denigrationes contingunt, & quibus pars femoris & brachii excidit, ossaque & carnes decidunt, multi superflunt, cum, si qualia, facile tolerentur. Quibus igitur ossa fracta sunt, celeres quidem circum abruptiones fiunt, ossa autem qua parte nudantur, decidunt, tardius tamen. Inferiores autem vulnere & sano corpore partes, cum prius sint mortuæ, insuper auferre oportet, ea cautione adhibita, ut dolorem evites, simul enim cum animi defectione intereunt. Femoris os in hoc casu octogesimo die resolutum est. Tibia autem vigesimo die detracta fuit. Tibiæ quoque media ossa sexagesimo die resoluta sunt. In his celeriter aut tarde ut ossa decendant, medicæ compressiones in causa sunt. In cæteris vero quæ leviter tractantur, ossa quidem

non decidunt, neque in his carnes, sed summæ partes nudantur. Ista autem ad curationem assumere oportet. Plurima enim formidabilia magis sunt, quam noxia. Curatio lenis esto, quæ per calida & diligentem victus rationem institui debet. Profluentis sanguinis & frigoris periculum impendet. Habitus corporis, ut ne acclivis sit, deinde, ut pus subsidat, æqualis, aut quicumque talibus, iisque quæ denigrantur accommodatus existit. Sanguinis profluvia ac cruentæ dejectiones, circa judicationem largæ quidem, sed paucorum dierum his contingunt. Neque vero hi cibos averfantur, neque admodum febribus corripuntur, neque quicquam vacuandum.

Quæ interiorē in partem fit vertebrarum perversio, quod ad urinæ suppressionem & stuporem attinet, lethalis est. Quæ vero exteriorē in partem incurvantur eorum, plurima minus sunt noxia, quam quæ concutiendo non exceſſerunt, quod illa in sese morbi discrimen recipiant, hæc vero in magnam corporis partem gliscant, & in præcipuis partibus eveniant. Quale quid in costis cernitur, quæ fractæ paucae quidem febre, & sanguinis sputo, ossisque vitio tentantur, siue una, siue plures fractæ sint, curatioque simplex convenit absque inedia, si febris absit, deligatio quoque pro lege fracturarum. Callus vero viginti diebus, quod laxum os sit, inducitur. At circumcirca contusis costis, tuberculosi & tussiculosi evadunt, ac ea quæ per linamenta fit curatione opus habent, costæque sideratione tentantur. Ad unamquamque enim costam nervi ab omnibus partibus ducuntur. At quæ ex casu in gibbum incurvantur, ea minus in directum agi possunt, verum ægrius diriguntur,



quæ sunt supra septum transversum. Quibus quoque a puero id contingit, ea non augentur, sed vel crura, vel manus, vel caput. Adultis gibbus si fiat, statim quidem a morbo liberat, successu tamen temporis per eadem, quæ junioribus sui significationem edit, minus tamen maligne habent. Ac facile tolerant quibus corpus carnosum & pingue redditur, horum tamen pauci ad sexagesimum annum vitam produxerunt. Sed & vertebræ in obliquum intorquentur. Ad id etiam conferunt habitus, in quo decumbunt, de quibus prænotiones fiunt. Multi vero etiam sanguinem expuerunt suppuratique extiterunt. Quibus curatio diligens instituenda, & deligatio pro more. Victus ratio primis diebus exquisita esse debet, deinde plenior, quies, silentium imparandum, habitus corporis accommodandus, alvus subducenda, venere abstinendum. Sed & quibus sanguis non expuitur, ii dolorem magis sentiunt, temporeque recidivas potius pati solent, quam quibus costa perfracta est. At quibus mucosum quiddam relinquitur, id doloribus sui memoriam commovet. Curatio unctione perficitur, si in quibusdam quidem ab osse ad os usque candens ferramentum demittas, ipsum autem non attingas. Quod si in intermediis costis fuerit, non in ulteriorem partem penetrandum, neque in summo adurendum; alioqui syderatio sequetur; & curatio per linamenta experiunda, de quibus dicentur omnia, quæ intro subire, aut sub visum cadere oportet. Verbis vero non satis explicari possunt, neque cibaria, potiones, calor, frigus, corporis habitus. Tum quod medicamenta partim quidem sicca, partim vero humida quædam etiam fulva, quædam nigra, quædam vero etiam alba, nonnulla quoque acerba, eaque hoc modo

adhibita, cum victus ratione ulceris curationem faciunt.

Reponendi & dirigendi quædam lex est, tum quæ per vectis molitionem instituitur, tum per cuneolum. Suppositus quidem asellus abducere; vectis vero adducere solet. Quæ autem reponenda aut dirigenda sunt, ea extensione facta, in ea figura, in qua unum quodque supra sinum suum sublime attolletur, adurgenda. Quod vero excessit, supra id unde excessit protrudendum. Istud autem manibus, aut appensione, aut asellis, aut ad aliquid injectis vinculis, præstatur. Manibus igitur ad partes utimur, primam vero manus juncturam & cubiti gibbum adurgere satis est. Eam quidem quæ est ad manuum juncturam recta ad cubiti gibbum: cubiti autem gibbum eo habitu, ut ad brachium rectum angulum efficiat, qualem in brachio, quod manui subtenditur reddit. In quibus vero pedis aut manus digitos, in manus junctura, aut spinæ ex gibbo inclinatione, quod excessit intro cogere, & adurgendo compellere convenit. In reliquis quidem propulsiones, quæ manibus sunt, abunde sunt. Eminentia vero supra aliquid collocata, calce aut sublimiore patinæ parte in suam sedem propellere oportet, ita ut qua exstant mollis globulus accomodate supponatur, altera autem ex parte peritus aliquis retro & deorsum protrudat, sive anteriorem, sive posteriorem in partem prolapsa sint. Quæ in obliquum inclinant, partim protrudere, partim retrahere utrinque & ex altera parte oportet. At spinæ ex gibbo inclinationes, quæ quidem anteriorem in partem sunt, neque sternutamento, neque tussi, neque flatu immisso, neque cucurbitula restituantur, verum aliqua distensione opus est. In errorem autem inducuntur,



quod, velut aliquando fractis vertebris contingit, etiam spinæ introrsum inclinationes præ dolore intro luxationem fecisse videantur. Hæc vero celeriter & facile coalescunt. Quæ exteriorem in partem incurvantur, partim quidem quæ supra sunt, in pedes distensio, partim vero quæ infra contrario modo facta restituit. Impulsio vero cum distensione, aut insidendo, aut pede, aut affere fieri debet. Quæ in hanc vel illam partem obliquantur, si quæ admoveatur distensio, ac præterea corporis habitus, adhibita victus ratione, restituit.

Quæ ad usum sunt accommodata, ea omnia lata, blanda, specie valida esse oportet. Neque lintea ante convoluta esse debent, præparata tamen antequam vis adhibeatur, omnia, moderata tum longitudine, tum latitudine, tum crassitudine. Velut in femoris distensione, quod est ad malleolum & supra genu deligari debet, & per hæc quidem eodem distensio fieri. Juxta lumbos autem & circa axillas, & ad interfemineum, & femur, vincula injici debent, ac media sui partim quidem ad pectus, partim vero ad dorsum tendere. Hæc vero ad id quod subter est, quo omnia extenduntur, deliganda, sive ad pistillares fustes, sive ad asellum. In lecto igitur si istud moliare, hæc quidem lecti fulcra ad januæ limen obfirmare oportet, ad altera vero lignum validum transversum objicere, pistillaribus autem fustibus, qui supra sunt ad hæc obnixis, distensionem facere, aut rotæ modiolis defossis, aut scala disposita, utranque in partem impellere. In usu autem communi est asser sex cubitorum, latitudinis bicubitalis, crassitudinis dodrantalis, duos humiles asellos hinc & inde habens. In medio quoque columellas habeat, in quas ve-

Iut scalæ gradus expoliti infiguntur, quæque ad subsistendum moderata ad lignum magnitudine se habeant, velut in demisso humero contingit. Cava quoque lævia exsculpta, veluti quosdam alveos habere oportet, quatuor digitorum latitudine & altitudine, tantumque inter se distare, quantum ad directionem, in ipsa per vectem molitione, satis esse videatur. In medio vero cavum in quadratam figuram exsculptum esse debet, in quod columella immittatur, quæ juxta interfe-mineum posita, defluere corpus vetet, quando aliquanto laxior immissa molitionem, quandam faciet. Oportet autem tabellæ lineæ, aut quæ summum in pariete quodammodo insculptum habeat, extremum protrudere, & in alteram partem vi impellere, supposito molli aliquo quod conveniat.

Quibus ex palato os discessit, iis medius nasus defidit. Quibus vero caput colliditur, aut re aliqua incidente, aut frangente, aut apprimente, eorum nonnullis ex capite in fauces acria veniunt, & ex capitis vulnere. Ac ad jecur & femur partium, ubi alia super aliam effertur, & luxationem fecerunt, notæ redundant, & quatenus, quaque ratione, quantumque inter se differant, considerandum. Quibus quoque acetabulum perruptum est, & quibus nervus aliquis divellitur, & quibus os adnatum perfractum, tum quibus & quanam ratione unum etiam, aut duo, (in quibus os geminum est) & quænam eos pericula circumstent, aut spes affulgeant, quibus desperatio, & quando tristis exitus impendet, aut certa salus imminet, & quænam repositionem, aut manus tractationem, & quando postulent, & quænam minime, aut quando non. In his tum spes, tum pericula prædicenda, tum qualia & quando sub manus tractationem veniant spectan-



da. Tum quæ a primo ortu luxata adhuc incrementum accipiunt, aut jam acceperunt, & quodnam citius, & quodnam tardius, quodque claudum & quam ratione, quodque minime existat. Tum quam ob causam & quodnam imminutionem sentiat, & quam parte, & quonam modo, ac quibus ista minus contingit. Est etiam animadvertendum, quod fracta citius aut tardius coalescunt, aut perversiones & ossium ferruminationes fiunt, eorumque curationes, quibus ulcera statim, aut quibus postea contingunt, quibus etiam ossa fracta minora evadunt, quibus minime, quibus fracta cute emineant & quam parte magis existant, quibus loco emoti aut exferti articuli compingantur, & quasnam ob causas in quibus sensui patent, in quibus mentis agitatione comprehenduntur. Ad adfectiones & curationes spectant, quæ legitimis de deligatione præceptis continentur, præparatio, exhibitio, distensio, frictio, deligatio, suspensio, collocatio, habitus, temporum & victus ratio. Quæ laxa sunt citissime coalescunt, contra vero, quæ contrario se habent modo. In perversionibus incurvi fiunt, carne privantur & nervis. Quod repositum & longius multo locum unde excessit superabit, quam quod loco motum est. Nervi, qui in motu sunt & loco humore flaccescente, ii facile cedunt, qui vero non, minus. Optimum ubi quid excidit, citissime reponi. Si febris occupaverit, non tentanda repositio, neque quarto die, minime vero cubiti gibbum quinto die. Quæcunque etiam torpidum habent sensum, ubi inflammatio remiserit, quam citissime reponere optimum. Divulsa in nervis aut cartilaginibus, aut adnato osse, aut dissidentia circa juncturas, in pristinum statum restitui nequeunt, sed in plerisque celeriter

callum contrahunt, usus autem servatur. Partes extremæ facile excidunt. Quæ facile excidunt minime inflammatione tentantur. Quæ vero minime incalescunt, iis, si diligens curatio non adhibeatur, maxime rursus excidunt. Extensio eo habitu quo maxime superadtollentur, fieri debet natura & loco in considerationem adhibito. Qua parte exceſſerunt directio fiat, retro recta & in obliquum, propellenda autem celeri revulſione adhibita. Jam vero cito revellere per circumactionem licet. Quæ frequentiffime excidunt nullo negotio reponuntur. In causa est nervorum aut ossium solutio, nervorum quidem longitudinis aut incrementi, ossium vero acetabuli æqualitas, capitis lævitas. Consuetudo usum facit. In causa quoque est corporis dispositio & habitus, & ætas, & mucus, qui sine inflammatione subest.

Quibus ulcera statim facta sunt aut ossibus cute exstantibus, aut postea ex pruritu aut asperitate, ea quidem ubi senseris, confestim solvito, ulceri cerato picato impolito, deligatoque fasciæ initio super vulnus injecto, ac in reliquis perinde te gerito ac si ea parte læsio nulla existeret. Hoc nanque modo ea pars maxime extenuabitur, & citissime circumabrupta excidet, & repurgata ulcera celerrime coalescent. Ferulæ vero neque ad ipsum ulcus admovendæ, neque apprimendæ. Et in quibus non magna ossa absunt, ita se gerendum: & in quibus magna ossa absunt, & cum multa suppuratio adsit, non amplius ista neque eodem modo facienda, sed nudatur pars recrementorum, quæ moram traxerunt, gratia. At quæcunque magna ossa cute eminent, iis, sive reponantur, sive non, deligatio quidem non convenit sed distensio. Orbes conficiuntur quales



compedes, quorum unus quidem juxta malleolum, alter ad genu in crure adaptetur. Hi lati, leves & validi funto, circulos habentes. Virgæ autem corneæ eam convenientem, tum magnitudinem, tum crassitudinem habeant, ut distensionem moliantur. Habenas vero utrinque in extremis finibus habeant, quibus ad annulos alligentur, ita ut extremi fines orbibus innixi, vim adhibeant. Curationem perficiunt ceratum picatum calidum, habitus corporis, pedis & coxendicis positio, exquisita victus ratio. Quæ supereminent ossa, eodem aut postero die reponito, quarto aut quinto die minime, sed ubi gracilia evaserint. Repositio vero per vectium molitionem facienda est, aut ossis quod reponitur, si firmamentum non habeat, impedimenta præcidenda. Quinetiam nudata ossa decident, & breviora evadent. At articuli partim quidem magis, partim vero minus luxantur, & qui quidem minus, facile reconduntur. Quibusdam quoque majora tum ossium, tum nervorum, & articulorum ac carniū vitia contingunt. Femur autem & brachium quam simili inter se modo contingunt.

---

## HIPPOCRATIS

### L I B E R

## DE CAPITIS VULNERIBUS.

---

### P R Æ F A T I O.

*ET* iste genuinus est, & perinde ut alii libri chirurgici, quos diximus, ex optimis operibus HIP-

POCRATIS. *Multo enim plura in Semejoticis & practicis sunt, quæ egeant interpretatione & restrictione, in istis omnia simplicia, & vera sunt, & auctorem conscium vides, se vera docere & indubitata. Præmittuntur anatomica aliqua, cum paradoxis futuris.*

*Locus hic reperitur, in quo eas suturas fallere, & pro fissuris imponere scribit, cujus loci manifesta est cum Epidemicorum libro quinto connexio. Hic etiam capitis mala symptomata sua in alterno latere producere legas. Terebræ usum jam vulgo notum, & minutas in eo cautelas receptas fuisse videas.*

**N**ULLUM capitis vulnus leviter contemni debet. Sæpe enim cutis sola contusa ferro, aut alia aliqua re, si non diligenter, & cum quadam cautione curetur: veluti si sanguis concretus non expurgetur, aut aliud quiddam negligatur: ulcus incrudescens non parum molestiæ exhibet, & aliquando etiam febrem inducit; & medico quidem negotia, ægroto vero periculum non minus adfert. Verum hoc multo magis contingit, si calvaria, & cerebri membranæ rumpuntur. Quare si non singula hæc diligenter medicus curaverit, sæpe mortis causa existit. Et de his quidem omnibus etiam alibi diximus, sed & nunc dicendum est.

Primum igitur capite vulnerato interrogare oportet, per quid vulneratum sit. Deinde quid homo fecerit, quum vulneratus fuit. Postea qua parte vulnus inflictum sit. Nam hominum capita nihil inter se similiter habent, neque futuræ ca-



pitis in omnibus eodem loco consistunt. Verum quisquis ex priore capitis parte prominentiam habet: est autem prominentia, rotunda ossis pars eminens præ alia: hujus futuræ consistunt in capite, velut litera græca T pingitur. Breviorem enim lineam ad prominentiam transversam constitutam habet; alteram vero lineam per medium caput, sed secundum longitudinem ad collum semper habet. Qui vero ex posteriore capitis parte prominentiam habet, hujus futuræ etiam contrario priori modo consistunt. Brevior enim linea ad prominentiam transversa consistit; longior autem per medium caput, secundum longitudinem ad frontem semper constituta est. Quisquis autem ex utraque capitis parte, & anteriore, & posteriore, prominentiam habet; huic futuræ sunt similiter constitutæ, velut litera græca H scribitur. Consistunt autem longæ quidem lineæ ad utramque prominentiam transversæ. Brevis autem per medium caput, secundum longitudinem ad utramque longam lineam desinens. At qui neutra parte ullam prominentiam habet, hic futuras habet, velut litera græca X pingitur. Consistunt autem hæ lineæ, altera quidem transversa ad tempora pertingens, altera vero secundum longitudinem per medium caput.

Duplex autem est os juxta medium caput; durissima vero ac densissima suprema ipsius pars existit, & infima quæ est ad membranam. Consimilis est color ossis sub carne, consimilis est color ossis inferne. Secedit autem a supremo, ac infimo osse, a durissimis, ac densissimis, ad mollius, ac minus densum, & communius, ad duplicatam laminam. Est autem duplicata lamina cavissima, ac molliissima, & maxime antrofa. Est autem & totum os capitis, excepta valde modica suprema,

Suprema, ac infima parte; spongiæ simile, & habet os in seipso carunculas similes multas humidas; & si quis ipsas digitis conterat; sanguis utique ex ipsis prodierit. Sunt etiam in ossæ venulæ tenuiores, ac caviore, sanguine plenæ. Quod igitur ad duritiem, & molli-  
tiem, & cavitatem attinet, sic habet. Quod vero ad crassitudinem ac tenuitatem; hoc modo.

Universi capitis os tenuissimum est ac debilissimum; quod est circa sinciput; & carni paucissimam; ac tenuissimam hac parte os in se ipso habet, & cerebrum hac capitis parte plurimum subest. Et quia hæc ita se habent, ut & vulnera; & tela æqualia sint magnitudine, & minora; & similiter vulneratus quis sit, & minus; os hac capitis parte & magis contunditur, & rumpitur, & magis intro contusum cedit; & lethaliora, ac ad curandum, & effugiendam mortem difficiliora sunt vulnera hac parte; quam alibi in capite. Et ut sint æqualia vulnera; & similiter vulneratus quis sit, & minus; homo ubi etiam alias ex vulnere moriturus est, breviori tempore moritur; qui hac parte capitis vulnus habet, quam qui alia. Cerebrum enim & citissime & maxime juxta sinciput sentit mala; quæ in carne, & in ossæ fiunt. Sub tenuissimo enim ossæ, ac modica carne cerebrum est hac parte; & plurimum cerebrum sub sincipite jacet.

Cæterum ex reliquis ossibus id, quod circa tempora est debilissimum est. Commissura enim est infernæ maxillæ ad calvaria, & motus in temporibus sursum, ac deorsum, velut articuli; & auditus prope ipsum est; & vena per tempora extenta est; cava; ac fortis. Omni vero capitis ossæ robustius est os verticis; & quod est retro au-



res, robustius est, quam totum quod in anteriore parte est; & carnem ampliorem ac profundiorē in seipso hoc os habet. Et sane his ita se habentibus, si quis & vulneribus, & telis, omnibus æqualibus, ac similibus, & maioribus, ac minoribus, similiter sit vulneratus, & magis; hac capitis parte os minus rumpitur, & contunditur, & si homo alias moriturus est ex vulnere, si in posteriore capitis parte vulnus habet, diutius durans tempore morietur. In longiore enim tempore os suppuratur, & deorsum ad cerebrum transpuratur, propter ossis crassitudinem; & paucius etiam cerebrum hac parte subest; & plures mortem effugiunt plerumque ex his, qui posteriore capitis parte vulnerati sunt, quam qui anteriore.

Sed & in hyeme diutius tempore vivit homo quam in æstate, quisquis etiam alias moriturus est ex vulnere, quacumque capitis parte vulnus habeat. At vero sedes telorum ac leviorum, ipsæ in seipsis fientes in osse, & cum fissura, & contusione, ac introcessione: sunt autem hæ similiter & in anteriore & in posteriore capitis parte: ex his mors non contingit secundum iustitiam, etiamsi contingat. Sutura vero in ulcere si compareat, osse denudato, quacumque capitis parte ulcere fiente, debilissimus æger est ad resistendum vulnere ac telo, si in ipsam futuram telum incubuerit; & maxime omnium, si telum in sincipite, juxta debilissimam capitis partem incussum fuerit, & futuræ circa ulcus, si ita contingat, fuerint, & telum ipsas futuras contigerit.

Vulneratur porro os in capite tot modis. Singularum autem modorum plures species fractu.

ræ in vulnere fiunt. Os vulneratum rumpitur, & ossi fissuram continenti ac ambienti necesse est contusionem accédere; si ruptum fuerit. Nam telum quod os rumpit, idem hoc etiam os aut magis, aut minus contundit, id ipsum videlicet os, in quo fissuram rumpit. Atque hic unus modus est.

Species autem fissurarum omnigenæ sunt. Nam & tenuiores, & valde tenues conspicuæ sunt. Quædam vero neque statim post vulnerationem, neque in diebus, in quibus dolorum utilitas mors homini contingere potest. Rursus autem aliquæ fissuræ crassiores, ac ampliores fiunt, quædam vero etiam valde amplæ. Et aliæ quidem in longiorem modum rumpuntur, aliæ vero in brevior, & aliæ rectiores sunt, aliæ etiam valde rectæ, aliæ vero curviores, & curvæ, ac profundiores, aliæ autem ad infernam partem, & per totum os. Poterit autem & os in sua ipsius natura contundi, ita ut nulla fissura ad contusionem ossi accedat. Atque hic secundus modus est.

Species autem contusionis plures sunt. Nani & magis, & minus contunditur, & altius ac per totum os, & minus in altum ac per totum os, & in ampliorem & minorem tum longitudinem, tum latitudinem. Verum harum specierum nullam oculis intuenti cognoscere datur, qualenam specie existat, & quanta magnitudine. Neque enim etiam si sint contusa, & malum factum sit, an contusa sint, oculis videre conspicuum fit statim post vulnerationem; quemadmodum neque aliquæ fissuræ videri possunt, quæ rupto ossi procul absunt. Intro etiam cedit os ex natura sua, una cum Effuris; alias enim non intro cesserit. Nam



quod intro cedit, abrumpiturque ac frangitur; intro cedit ab alio osse, quod in sua ipsius natura manet: & sic sane fissura adest intro-  
cessioni. Atque hic tertius modus est.

Intro autem cedit os per multas species. Nam & major ossis pars, & minor intro cedit; & magis ac profundius deorsum, & minus ac magis in superficie. Quin & sede teli in osse contingente, fissura utique ad sedem accesserit, & ad fissuram etiam contusionem magis aut minus accedere necesse est, si quidem & fissura accedat ea parte, qua & sedes facta est; & fissura sit in osse continente & sedem, & contusionem. Atque hic quartus modus est, in quo sedes teli sit in osse. Sedes autem vocatur, quum manente osse in sua ipsius natura, telum, quod in os incubuit, manifestum fecerit ubi incubuit. Verum in singulis modis plures species fiunt. Et de contusione quidem, ac fissura, si ambo hæc ad sedem accedant, & si contusio sola fiat, jam dictum est, quod multæ species & contusionis, & fissuræ fiunt.

Hæc autem sedes ipsa in seipsa longior, ac brevior, fit, & curvior, ac rectior, & orbiculatior: & multæ aliæ species talis modi sunt, prout etiam figura teli fuerit, & eadem etiam profundiores deorsum, & magis & minus, & angustiores, & ampliores, & valde amplæ, si dissectione intercisa fuerit. Quanta autem dissectione in longitudinem, ac latitudinem fiat, in osse sedes est, si alia ossa dissectionem ambientia in sua ipsorum natura manserint, & non una cum dissectione intro cesserint ex sua natura. Nam si ita contingat, intro cessio fuerit, & non amplius ossis sedes. Si vero alia capitis parte vulneratur, & ulcus habet homo, & os carne

denudatum est, quintus hic modus est: & hanc calamitatem, ubi facta est, nulla re juvare queas. Nam si passus est hoc malum, non est quod ex ipso exquirere possis, an passus sit hoc malum, neque qua capitis parte: ex his fracturæ modis ad perforationem devenit, tum si contusio ad visum inconspicua est, tum si aliquo modo manifesta fuerit, & fissura si inconspicua visui fuerit, & ad visum manifesta. Sed & si sede teli in osse fiente, fissura ac contusio ad sedem accedat, & si contusio sola accedat ad sedem, absque fissura; hæc quoque ad perforationem devenit. At vero os, quod ex sua natura intro cessit, parum perforatione opus habet: & quæ maxime introcesserunt, & maxime fracta sunt, ea perforatione minime opus habent. Neque sedes ipsa in seipsa fiens, absque fissura ac contusione, perforatione indiget. Neque dissectio ipsa, si magna, ac ampla fuerit. Dissectio enim & sedes idem sunt.

Cæterum primum spectare oportet in vulnere, qua capitis parte, & num in debilioribus vulnus habeat: & capillos considerare circa ulcus, an dissecti sint a telo, & an intus sint in vulnere; quod si est, periculum est os carne nudum esse. Itaque dicere oportet, os aliquam læsionem a telo habere. Atque hæc longe prius considerasse, ac dixisse oportet, antequam hominem contingas. Ubi vero jam contigeris, clare nosse conari, an nudum carne os sit, aut non, & si quidem oculis conspicuum fuerit os nudum, bene habet; sin minus, specillo considerato, & si quidem inveneris os carne nudum esse, & non sanum a vulnere, ejus quod in osse est, dinotionem primum facere oportet.



tet, inspiciendo & quantum sit malum, & quo opere opus habeat. Oportet etiam vulneratum interrogare ut passus sit, & quo modo.

Si vero non conspicuum fuerit os, multo adhuc magis interrogationem facere oportet, an habeat quid mali, aut non habeat: & si nudum est os, ut factum sit, & juxta quem modum. Nam contusiones & fissuras in osse non apparentes, & tamen præsentes, ex vulnerati responsione cognoscere primum conari oportet, an tale quid passum sit os, aut non passum, deinde ratione & opere exquirere, citra specilli admotionem. Specilli enim admotio non indicat, an tale quid mali os passum sit, & an habeat quid in seipso, aut non passum sit. Sed sedem teli indicat specillum, & an intro cesserit os ex natura sua, & an vehementer fractum sit os: quæ etiam oculis conspicua videnti cognoscere datur. Rumpitur autem os obscuris fissuris, & manifestis; & contunditur obscuris contusionibus; & intro ex sua natura maxime cedit, quum alter ab altero fauciatur, de industria fauciare volens; aut quum ex altiore loco sit jactus, aut plagæ ictus, uter tandem fuerit, magis quam ex plano loco; & si contineat manu telum, sive jaciat, sive percutiat; & si fortior debiliorem vulnerat.

Ex his vero qui cadentes vulnerantur ad os, aut in ipsum os, is qui ex altissimo loco cadit, & in durissimum, ac obtusissimum; huic periculum est, ut os & rumpatur, & contundatur, & intro cedat ex sua natura. Ei vero, qui ex plano magis loco cadit, & in molliorem, os minus hæc patitur, aut etiam non patitur.

Quæcumque vero illabentia in caput tela, ad os vulnerant, ex his id quod ex altissimo

loco illapsum est, & minime ex plano, & quod durissimum ac obtusissimum, & gravissimum ac minime leve est, & quod minime acutum ac molle; hoc & ruperit os, & contuderit. Et maxime sane periculum est, ut os hæc patiatur, quum & hæc fiant, & e directo adversus telum fauciarum contingat, sive ex manu percutiatur, sive jactum suscipiat, sive quid ipsi incidat, sive ipse collapsus faucietur, ita ut quomodocumque fauciat, osse adversus telum occurrat. Quæ vero tela ex obliquo os fauciant, minus & os rumpunt, & intro ad caput contundunt, etiam si carne fuerit os denudatum. Nam quædam vulnera ita inflicta, neque denudant os carne. Profecto ex telis maxime os rumpunt & manifestis, & obscuris fissuris, & contundunt, & ex natura sua os intro cedere faciunt, quæ sunt rotunda, & orbiculata, & undiquaque plana, & obtusa, & gravia, & dura; & carnem hæc contundunt, & maturam faciunt, ac concidunt; & ulcera fiunt a talibus telis in obliquum, sed & in circulum: subcava & suppurata magis fiunt, ac humida sunt, & diutius tempore purgantur. Necessè est enim carnes contusas, ac concisas pus fieri, ac consumi. At tela oblonga, multum tenuia, & acuta, & levia carnem magis dissecant quam contundunt, & os eodem modo. Et sedem quidem inducit id ipsum, quod etiam dissecavit. Dissectio enim & sedes idem sunt. Verum non valde eos contundunt talia tela, neque rumpunt, neque ex natura sua intro cedere faciunt.

Cæterum oportet supra conspectum tuum, quicquid tandem apparuerit in osse, etiam de omnibus his interrogationem facere. Nam magis & minus fauciat signa hæc sunt, si vulne-



ratus soporem altiore incidit, & caligo offusa fuerit, & vertigo, & si ceciderit. Quum autem os carne denudatum a telo fuerit, & circa ipsas futuras ulcus fieri contigerit, difficile est sedem teli deprehendere, quæ in alio osse manifesta est, an insit in osse, aut non insit, & an sedes facta sit in ipsis futuris. Occultat enim ipsa futura, asperior existens reliquo osse, & non satis clarum est ubi in ipso futura est, & ubi ossis sedes, si non valde magna sedes fiat.

Accedit etiam ruptio ad sedem, plerumque & ipsa in futuris fiens, & fit etiam hæc ruptio rupto osse deprehensu difficilior, eo quod circa ipsam futuram ruptio fit, si rumpitur, ut plurimum. Proclive enim est hac parte os rumpi, ac dissolvi propter ossis hac parte debilitatem, ac raritatem, & propterea quod parata sit futura ut rumpatur, ac dissolvatur. Nam reliqua ossa futuram ambientia, ruptionis exortia manere possunt, eo quod robustiora sunt, quam futura. Verum ruptio circa futuram fiens, etiam dissolutio futuræ est, & non facile est deprehendere, neque si a teli sede fiat in futura, ubi rupta fuerit, ac dissoluta.

Verum difficilior est deprehendere fissuram ex contusione. Fallunt enim & mentem, & visum medici hæ futuræ, fissuræ speciem referentes, & reliquo osse asperiores existentes, nisi vehementer dissectæ fuerint, ac dissolutæ. Dissectio autem & sedes idem sunt. Proinde si circa futuras vulnus factum fuerit, & ad os telum incubuerit, animadversionem habere oportet, ac invenire, quod os passum sit. Nam ab æqualibus magnitudine telis, & similibus, ac multo minoribus, & similiter, & multo minus vulneratus, longe magis malum accipit, qui in

osse in futuras telum recepit, quam qui non in futuras id recepit. Et pleraque horum perforare oportet. Verum ipsas futuras perforare non oportet, sed secedendo in propinquo osse perforationem facere, si perfores.

Porro de curatione vulnerum in capite, & quo modo deprehendere oportet affectiones in capite fientes non manifestas, ita mihi videtur. Ulcus in capite nullo humore humectare convenit, ac ne vino quidem, neque cataplasmate integere, neque lineamento curationem facere. Neque vero comprimere oportet ulcus in capite, si non in fronte fuerit, aut in loco pilis nudato, aut circa supercilium & oculum. Hic enim fientia ulcera, cataplasmatibus, ac deligatione magis opus habent, quam in aliis capitis partibus. Continet, ac ambit reliquum caput totam frontem, partes autem ulcus ambientes, in quacumque tandem parte ulcera fuerint, inflammantur, ac intumescunt, propter sanguinis influxionem. Oportet autem neque ea quæ in fronte sunt ulcera, per omne tempus cataplasmatibus integere, ac deligare, sed postquam inflammatio sedata est, & tumor sedatus, a cataplasmatibus, ac deligatione cessare. At in reliquo capite ulcus neque lineamentis, neque cataplasmatibus, neque deligatione curare oportet, si non & sectione opus habeat.

Secare autem oportet, ulceribus in capite, ac fronte fientibus, qua parte os carne nudum fuerit, & læsionem aliquam ex telo habere visum fuerit. Ulcera vero, quæ non habent sufficientem magnitudinem longitudinis, ac latitudinis, ad ossis inspectionem, an quid mali passum sit a telo, & quale id passum sit, & quantum caro contusa est, & quantam os læsionem



habet, & rursus an illæsum sit os a telo, & nihil mali passum sit, & ad curationem qualinam opus habet ulcus, & caro, & ossis affectio; talia sane ulcera sectione opus habent. Si vero etiam os quidem carne fuerit denudatum, subcava vero fuerint ulcera in obliquum, cavitatem quamplurimum refecare oportet, ubi non facile est medicamento quocumque pervenire. Sed & orbiculatiora ulcera, ac plurimum subcava, etiam ipsa refecare oportet, circulo divisim inciso secundum longitudinem pro hominis natura, ut longius fiat ulcus. At vero in capitis sectione reliquæ quidem capitis partes securitatem habent, dum secantur. Verum tempora, & adhuc supra tempora, venam, quæ per tempora fertur, secare non oportet. Convulsio enim corripit sectum. Et si quidem sinistra tempora secta fuerint, dextera convulsio corripit. Si vero dextra secta fuerint, sinistra convulsio apprehendit. Quum igitur ulcus in capite fecas, ossium gratia carne denudatorum scire cupiens, an habeat os quid mali a telo, aut non habeat, secare oportet vulnus tanta magnitudine, quanta sursum opus habere visum fuerit. Secantem vero carnem ab osse diducere oportet, quæ ad membranam, & ad os existit. Deinde lineamentum per totum ulcus adhibere oportet, quod ulcus quamamplissimum in posterum diem faciat, cum minimo dolore. Ubi vero lineamentum adhibuisti, cataplasmate utere, quanto tempore etiam lineamento, ita ut mazam ex tenui polenta in aceto subigas, aut coquas, & quammaxime viscosam facias.

Postridie vero ubi lineamentum exemeris, inspecto osse quod passum est, si non conspicua tibi sit vulneratio, qualisnam sit in osse, neque cognoscas, an os aliquid mali in se habeat, aut

non habeat, telum autem ad os pervenisse, ac læsisse videatur; radere oportet specillo rasorio secundum longitudinem, ac profunditatem pro hominis natura, & rursus si etiam transversum sit os, ruptionum gratia ad visum inconspicuarum, & contusionis obscuræ gratia, quæ non intro cessit ex natura alterius ossis capitis. Indicat enim ipsa ratio magis, si non etiam alias conspicuæ fuerint hæ affectiones, ex telo in osse existentes. Et si sedem teli in osse videris, tum ipsam teli sedem radere oportet, tum ambientia ipsam ossa, ne sæpe ad sedem ruptio accedat, & contusio, aut sola contusio, & deinde lateant, quum non conspicua existant.

Postquam autem os scalpro raseris, si quid ad perforationem tendere ossis fauciatio videatur, perforare oportet, & citra perforationem triduum non excedere, sed in hoc perforare tum alias, tum tempore calido, si ab initio curationem susceperis.

Si vero suspiceris os ruptum, aut contusum esse, aut ambo hæc; conjectura facta, quam vehementer fauciatus sit, ex vulnerati verbis, & quod a forti id contigit, qui fauciavit, si alius ab alio vulneratus fuerit, & quod telum quo vulneratus est, ex maleficorum telorum ordine fuit, deinde quod vertigo, & caligo ipsum corripuerit, & quod in soporem profundiorum inciderit, & quod ceciderit: his ita fientibus, si non cognoscas, an os ruptum sit, aut contusum, aut ambo hæc, neque alias videas: super os aliquid maxime nigri coloris, nigro medicamento liquato subactum, imponere oportet, & subextento linteo oleo imbuto super ulcus, & deinde mazæ cataplasmate appposito deligare, postridie vero exsoluto, ac expurgato ulcere deradere. Et si sanum



non fuerit , sed ruptum , ac contusum , reliquum quidem os rasum album erit , fissura vero & contusio , quæ nigrum medicamento eliquatum in seipsam suscepit , in reliquo osse albo nigra erit. Cæterum hanc fissuram conspectam rursus secundum profunditatem radere oportet. Et si quidem radens fissuram hanc conspectam nigram exemeris , & deleveris e conspectu sublatam , contusio quidem ossis aut magis aut minus facta fuit , quæ sane etiam fissuram a scalpro rasorio deletam rupit. Verum minus horrenda hæc est , & minus negotii exhibuerit , fissura deleta. Si vero in profundo sit , & dum raditur deleri nolit , ad perforationem devenit hæc calamitas. Sed perforare oportet , ac de cætero ulcus curare. Cavere autem convenit ut ne aliquid mali os contrahat ex carne , si male curetur. Nam & perforato ossi , & alias denudato , sed sano ; & si læsionem aliquam ex telo habeat , & tamen sanum esse putetur , periculum magis imminet , ut suppuratum fiat , etiamsi alias futurum non esset.

Si et caro os ambiens male curetur , inflammetur , ac constringatur. Ignescit enim , et multa flamma impletur. Et sane os ex ambientibus carnibus in seipsum calorem et flammam , et quæcumque mala in seipsa habet caro , trahit , et ex his ita suppuratum fit. Malum est etiam humidam esse carnem in ulcere , et putrescentem ad multum tempus purgari. Quare suppuratum quidem quamcelerrime ulcus facere oportet. Sic enim ambientes ulcus partes quamminimum inflammabuntur , et ulcus citissime purum erit. Necessè est enim carnes concisas , ac contusas a telo suppuratas fieri , ac consumi. Postquam autem purgatum fuerit , siccius fieri ulcus oportet. Sic enim citissime sanum fiet , sicca carne germi-

nante, et non humida. Et sic quoque ulceri caro non superincrefcet.

Eadem ratio membranæ circum cerebrum eft. Statim enim offe perforato, et exfecto, ac de membrana detracto, ipfam denudatam membranam puram quamcitiffime, ac ficcam facere oportet, ut ne ubi ad multum tempus humida fit, computrefcat, ac in tumorem adtollatur. His enim ita fientibus, periculum eft ipfam putrefieri. At vero os quod difcedere a quovis alio offe oportet, ulcere in capite fiente, & fede teli in offe exiftente, aut alias offe plurimum denudato, difcedit, ubi plurimum exfanguie factum eft. Reficcatur enim fanguis ex offe & a tempore, & a plurimis medicamentis. Citiffime enim difcefferit, fi quis ulcus quamcitiffime purgarit, & de cætero & ulcus, & os tum majus, tum minus reficcaverit. Quod enim citiffime reficcatum, ac testaceum factum fuerit, ex hoc facto maxime dimittitur ab alio offe, quod fanguinolentum, ac vivum exiftit, & quum exfanguie, ac ficcum fiat, a fanguinolento ac vivo valde difcedit.

Quæcumque vero offa intro contufa cedunt ex fua ipforum natura, rupta aut etiam diffecta, valde ampla, talia minus periculofa funt, ubi membrana fana fuerit; & quæ pluribus fifsuris, & amplioribus intro rupta funt, adhuc minus periculofa funt, & ad detractionem facilia funt, & nullum ex talibus perforare oportet, neque periclitari offa auferre conando, priusquam fponfe fua emergant, priore forma exfoluta. Emergunt autem carne fubnafcente. Subnafcitur autem ex duplicata offis lamina, & ex fano offe, fi fuperna offis pars fola fuerit corrupta. Sic vero quamcitiffime, & caro fubnafci, ac germinare poterit, & offa emerferint, fi quis ulcus, quamci-



tissime suppuratum redditum, purum faciat. Et si per totum os ambæ partes intro contusæ cesserint ad membranam, & superna ossis pars, & inferna, si quis similiter medeatur, ulcus celerrime sanum erit, & ossa, quæ intro cesserunt, celerrime emergunt, ac revertuntur. At vero puerorum ossa & tenuiora, & molliora sunt, ea de causa quod sanguinolentiora sunt & cava, & neque antrofa, neque densa, neque solida; & a telis æqualibus, ac debilioribus si similiter, ac minus fuerint vulnerati, junioris pueri vulnus & magis, & citius suppuratur, & in breviori tempore quam senioris: & si alias ex vulnere moriturus est, junior seniore citius perit.

Cæterum si os denudatum carne fuerit, animadversione habita cognoscere conari oportet, si oculis videre, ac noscere non datur, an ruptum sit os, & an contusum, aut solum contusum, & an sede teli facta, adsit contusio, aut fissura, aut ambo hæc. Et si quid horum os passum fuerit, detracto sanguine, parvo terebello modice & cum cautione os terebrare oportet. Tenuius est enim os, & minus profundum juvenibus, quam senioribus.

Quicumque vero ex vulneribus in capite moriturus est, & fieri non potest ut sanus fiat, ac servetur, ex his signis dinotionem morituri facere oportet, & quod futurum est prædicere. Patitur enim hæc. Quum quis os fractum, aut ruptum, aut contusum, aut quocumque modo fractum intelligens, per errorem deliquerit, & neque raserit, neque perforaverit, veluti os non opus habeat, & velut os sanum existat; ante decimumquartum diem febris corripiet ut plurimum in hyeme. In æstâte vero post septimum diem febris corripit, & postquam hoc fac-

tum fuerit, ulcus colorem amittit, & ex ipso sanies pauca fluit, & quod inflammatum est ex ipso emoritur, & viscosum fit, & apparet velut fassamentum, colore fulvum, sublividum, & os tunc corrumpi incipit, & fit valde nigrum, postremo pallidum, aut valde album evadens. Quum vero jam suppuratum fuerit, in lingua pustulæ oboriuntur, & desipiens æger moritur, & convulsio plerisque corripit in altera corporis parte: Si quidem in sinistra parte capitis ulcus habeat, in dextra corporis parte convulsio corripit. Si vero in dextra capitis parte ulcus habeat, in sinistra corporis parte convulsio corripit. Sunt autem & qui siderati fiunt, atque sic percunt ante septimum diem in æstate, aut decimumquartum in hyeme. Similiter autem significant hæc signa & in juniore, si vulnus existat.

Quapropter ubi intellexeris febrem invadere hominem, & ex aliis signis aliquod ipsi accedere, non cunctari oportet, sed os usque ad membranam perforare, aut scalpro rasorio deradere. Est enim & ad perforationem, & ad rasionem facile, ac expeditum. Deinde reliqua sic curare, prout conducere visum fuerit, respectu ad id, quod fit, habito. Quum vero in vulnere in capite, homine terebello perforato, aut non perforato, osse autem denudato, tumor rubicundus, ignis sacri speciem referens, accesserit in facie, & in oculis utrisque, aut altero: & si quis tumorem contingat, doleat: & febris corripit, ac rigor: & ulcus ipsum tum quod ad carnem attinet, tum quod ad os, bene habeat ad aspectum: & ambientes ulcus partes bene habeant excepto tumore, qui in facie



existit: & aliud peccatum nullum tumor habeat; quod ad reliquam victus rationem attinet; hujus infernam alvum deorsum purgare oportet medicamento, quod bilem ducit, & ubi sic purgatus fuerit, & febris dimittit, & tumor sedatur, & sanus evadit. Medicamentum vero dare oportet, ad vires hominis respiciendo, prout robore validus fuerit.

Cæterum de perforationis, ac terebrationis usu, ubi ea necessitas ingruat, ut necesse sit hominem perforare, sic statuendum est. Si ab initio adsumptam curationem administras, non oportet statim os ad membranam perforare, ac excindere. Non enim conducit membranam ossē denudatam esse, ad multum tempus male afflictam; sed postremum, ubi madore ac corrumpi, ac putrescere ipsam periculum est. Est & aliud periculum si statim ossē ad membranam perforato, ipsum auferas, ne in ipso opere membranam per terebellum vulneres. Verum terebrantem oportet, ubi jam valde parum abest ut os sit perforatum, & os jam movetur; a terebratione desistere, & sinere ut os sua sponte discedat. Nam in ossē perforato, & a perforatione relicto, nihil mali accedere poterit. Tenuē enim jam id, quod restat, fit. Reliqua vero curare oportet, prout ulceri conducere visum fuerit. Terebrantem autem frequenter eximere terebellum oportet, caliditatis ossis gratia, & in frigidam aquam immergere. Calefcens enim ex circumductione terebellum, etiam os excalefaciens, ac resiccans adurit, & majus os perforationem ambiens discedere facit, quam alias discessurum fuisset. Si vero etiam statim volueris usque ad membranam perforare, & postea os auferre,

ferre, eodem modo frequenter eximere terebellum oportet, & in frigidam aquam demergere. At si non ab initio curationem adsumpseris, sed ab alio traditam susceperis, ita ut posterior tarde ad curationem devenias; terebello exsculpto statim os ad membranam perforare, ac ex scindere, oportet, & exempto sæpe terebello speculartum alias, tum per admotum specillum, circumcirca ipsius terebelli viam. Nam multo citius perforatur os, si suppuratum jam ac transpuratum perforaveris, & sæpe contingit, ut non profundum os sit, tum alias, tum si ea capitis parte fuerit vulnus, qua tenuius magis quam crassum os ipsum existit. Quare cavere oportet, ut in terebelli admotione ne fallaris, verum qua parte crassissimum os esse visum fuerit, in eam semper terebellum admotum adigito, ita ut frequenter consideres, ac commoveas os, & ejicere coneris. Postquam autem abstuleris, reliqua, velut ulceri conferre visum fuerit, curato.

---

## HIPPOCRATIS DE OFFICINA CHIRURGI.

---

### P R Æ F A T I O.

*ET* si GALENUS obscurius inter genuinos recepit, facile tamen ex ipso libri sapore dignoscas Hippocratis esse. Brevis, gravis, & in rebus simplicibus minime imperitus, se ad minima quaque Princip. Art. Med. Tom. I. F f



*dimittit, & de loco, de modo standi, & sedendi, qui chirurgus competat aut medico, curiosissima dat præcepta. Neque mala sunt, quæ subjungit de delegationibus.*

**A**UT similia, aut dissimilia, a principio, a maximis, a facillimis, ab his quæ undique penitus cognoscuntur: quæ & videre, & tangere, & audire licet: quæ & visu, & tactu, & auditu, & naribus, & lingua, & intelligentia sentire licet: quæ & quibus cognoscuntur, omnibus cognoscere licet. Quæ vero ad chirurgiæ officinam: ægrotans, æger, ministri, instrumenta, lumen: ubi, quomodo: quot, quomodo, quando: corpus, vasa commoda: tempus, modus, locus: agens aut sedens, aut stans, moderate ad seipsum, ad id quod tractatur, ad splendorem lucis.

Lucis igitur species duæ sunt, altera communis, altera artificialis. Communis, in nobis non est. Artificialis, etiam in nobis est. Utriusque vero duplices usus sunt, aut ad lucem, aut sub lucem. Sub lucem & modicus usus est, & moderatio manifesta. Ad lucem vero, ex præsentibus, ex conferentibus luminibus ad splendorem convertere oportet id, quod tractatur, exceptis his quæ aut latere oportet, aut videre turpe est; ita ut id, quod tractatur, ex adverso sit luci; qui vero tractat, ex adverso ejus quod tractatur, verumtamen ut ne tenebras inducat. Sic enim & qui agit videre poterit, & quod tractatur non videtur.

Ad seipsum vero, si quidem sedeat, pedes secundum rectitudinem sursum versus e directo ad genua sint, distantia autem parva in consistendo

intercedat. Genua autem superiora sint inguinibus modice distantia; pro commoda cubiti positione, ac appositione. Vestitus expedite, distincte, æqualiter, similiter; cubitis; humeris. Ad id vero quod tractatur; ultra & prope; & sursum ac deorsum, & hac aut illac, aut in medio. Ultra quidem & prope termini sunt cubitorum gibbi, ita ut in anteriorem partem non excedant genua; in posteriorem costas. Sursum vero; ut non supra mammæ summæ manus habeat. Deorsum; ut non inferius quam ut ubi pectus & genua habet; summæ manus angulares ad brachia figuret; & in medio quidem hoc modo se habet. Hac vero aut illac; ut non extra sedem; sed pro ratione conversionis & corpus; & operantem corporis partem producat. Si vero stet; utrisque pedibus ex æquo insistere satis est. Agere vero oportet ita ut altero pede inscendat, non eo qui est ad manum agentem; genu ad inguen sublato; velut in sede: sed & alii termini iidem sunt. At qui tractatur; reliqua corporis partem tractanti inserviat; aut stans; aut sedens; aut decumbens, quo quamfacillime ita velut figuram habens perseveret; servans subflexionem; subfidentiam; eversionem; declivitatem. Sic quæ debet servatur & figura; & forma ejus qui tractatur; in exhibitione; in tractatione; in habitu postea sequente.

Ungues neque præminere oportet, neque deficere. Digitorum vertices ad usum exercere; digitis quidem summis pleraque; indice ad magnum admoto. Tota vero manu præposita; ambabus autem adversis. Digitum extendere cogit magnum quiddam in medio digitorum positum; & oppositum facere magnum digitum indici. Morbum autem esse manifestum est; per quem etiam lædunt



tur hi quibus ex nativitate, & educatione, assuevit magnus digitus ab aliis contineri. Opera omnia exercere oportet utrisque seorsim agendo, & ambabus simul. Similes enim sunt, ambabus conjectando bene, pulchre, cito, non laboriose, concinne, expedito.

Instrumenta quidem, & quando, & qualiter dicetur. Ubi oportet, ut ne quid impediat opus, neque impedimento sit inter accipiendum circa operantem corporis partem. Si vero alius det, paulo prius paratus sit, & faciat ubi jusseris. Qui vero circa ægrotantem sunt, id quod tractatur, exhibeant prout visum fuerit. Reliquum autem corpus detineant, ut totum quiescat, tacentes, & præfecto obedientes.

Deligationis species duæ sunt, quæ facta est, & quæ adhuc fit. Quæ adhuc fit, cito, non laboriose, expedito, concinna. Cito quidem, perficiendo opera. Non laboriose, facile agendo. Expeditio vero ad omnia parata est. Concinnitas autem jucunda adspectu est. Ex quibus vero exercitationibus hæc contingant, dictum est. Quæ facta est, bene, pulchre. Pulchre quidem, simpliciter, distincte: aut similia ac æqualia, æqualiter, ac similiter; aut inæqualia, ac dissimilia, inæqualiter, ac dissimiliter. Species vero hæ sunt, simplex, rotunda in orbem, ascia, sima, oculus, rhombus, & semisecta; ita ut species congrua sit speciei & affectioni ejus, quod deligatur. Ejus vero quod bene deligatur, duæ sunt species, roboris quidem, aut compressione, aut copia linteolorum, & partim quidem ipsa deligatio sanat, partim curantibus inservit. Ad hæc igitur lex hæc est. In his autem maxima deligationis vis est.

Compressio quidem, ut incumbentia non abs-

cedant, neque penitus innitantur, sed sint quidem firmata, non autem coacta, & minus quidem extrema, & minimo vero media. Nexus & filum procedant non deorsum, sed sursum, in exhibitione, & præparatione, & deligatione, & habitu postea sequente. Initia non super ulcus injicere oportet, sed hinc aut illinc facere nexum. Nexum vero neque in semita, neque in opere, neque illic ubi inane est, ut ne in vanum jaceat. Nexum autem, & filum, mollia, non magna. Hoc tamen probe nosse convenit, quod omnis deligatio ad declivia, & acuminata fugit, velut in capite ad partem supernam, in tibia ad infernam.

Deligare oportet dextras partes in sinistras, & sinistras in dextras, excepto capite. Hoc vero secundum rectitudinem. Verum contraria ex duobus initiis. Si vero ex uno, ad id quod simile est, ad subtilitatem, velut est media pars capitis, & si quid aliud hujusmodi. Quæ vero moventur, velut articuli, qua quidem parte inflectuntur, quamminimis ac expeditissimis linteis obvolvere oportet, velut poplitem; qua vero circumtenduntur, expansis, ac latis, velut est patella. Circumdare quoque insuper oportet, comprehensionis quidem gratia eorum, quæ circa hæc sunt, appensionis vero universi deligamenti, in quiescentibus & depressioribus corporis partibus, qualis est & supra, & infra genu. Convenit autem in humero quidem circumductio circum alteram alam; in inguine vero circum alteram lateris mollitudinem; in tibia supra suram; & quibuscumque sursum contingit fuga, his inferne appensio convenit; quibus autem deorsum, vice versa. Quibus vero non est, velut in capite, his in æqualissima parte comprehensiones facere.



oportet, & minime obliquo deligamento uti. Nam stabilissimum postremum circumdatum vel maxime vagabunda continet. Quibuscumque autem neque comprehensio, neque appensio linteorum commode se habet; his per fila appensiones facere convenit, ex injectione, aut confusione. Deligamenta sint pura, levia, mollia, tenuia. Obvolvere vero oportet ambabus simul, aut utrisque seorsim exercere. Conveniente autem deligatione uti, conjectura ad latitudinem, ac crassitudinem partium facta.

Obvolutionis capita dura, æqualia, distincta sint. In quibus autem futurum est ut decidant, ea pejora sunt, quam si cito decidant. Quædam vero sunt ejusmodi, ut neque comprimere, neque decidere oporteat. Quæ vero spectat deligatio, aut subligatio, aut ambo, hæc sunt. Subligatio quidem in causa est, ut aut disparata adtrahantur, aut expansa contrahantur, aut contracta diducantur, aut distorta dirigantur, aut vice versa. Preparare autem oportet lintea levia, tenuia, mollia, pura, lata, non confuta, neque extuberantias habentia, & sana, ut extensionem ferant, & paulo præstantiora, non sicca, sed succo imbuta singulis affectionibus familiari, ad ea quidem quæ disparata abscefferunt, ita ut sublimia sedem quidem contingant, non tamen comprimant.

Initium autem sumere oportet ex sana parte, & ad ulcus desinere, quo id quidem, quod subest, exoletur, aliud autem non amplius colligatur. Deligare autem oportet recta quidem in rectum; obliqua vero oblique, in figura doloris exsorte, in qua neque constrictio, neque discessio contingat: ex qua ubi translatio fit ad apprehensionem, aut positionem, non transmutent,

sed similia habeant hæc, musculos, venas, nervos, ossa, & bene posita, & bene detenta. Appensa vero aut posita esse convenit in figura doloris exorte, quæ est secundum naturam. In quibus vero discesserint, vice versa. At quibus expansa sunt, contrahere oportet, quod ad alia quidem adtinet eodem modo; ex multo vero temporis spatium interposito contractionem facere oportet, & sensim progressu facto compressionem, primum minime, deinde magis, ita ut terminus quod maxime facta sit, mutuus contactus fiat. Quibus vero contracta sunt, diducere: cum inflammatione quidem vice versa; sine hac autem, præparatione quidem ejusmodi, deligatione vero contraria. Distorta vero dirigere oportet, quod ad alia quidem adtinet, eodem modo. Verum quæ quidem abierunt, ea reducere oportet subligatione, agglutinatione, appensione. Contraria vero contrario modo.

Spleniorum longitudines, latitudines, crassitudines, multitudines est Longitudo, quanta est deligatio. Latitudo, quatuor aut trium digitorum. Crassitudo, ut triplices aut quadruplices sint. Multitudo, ut dum circumdantur, non excedant, neque deficient. Quibus vero ad directionem, in longitudinem circumdando, latitudinem ac crassitudinem defectu conjectare oportet, ita ut non acervatim expleamus.

At vero linteorum subligationes duæ sunt: prima ex loco læso ad supernas partes definit; altera ex loco læso ad infernas. Juxta locum adfectum maxime comprimere oportet; minime extremas partes; reliqua vero pro ratione. Deligatio autem multam sani loci partem occupet.

Deligamentorum multitudo, longitudo, latitudo. Multitudo quidem, ut ne superetur a loco



læso, neque per ferulas illisio fiat, neque pondus, neque circumcirca inclinatio, neque effeminatio deligamenti contingat. Longitudo vero & latitudo, trium aut quatuor, aut quinque, aut sex cubitorum quidem longitudo, digitorum autem latitudo. Et affulcimenti circumductiones tot sint, ut ne comprimant. Mollia vero, & non crassa sint hæc omnia, pro longitudine, & latitudine, ac crassitudine partis adfectæ.

Ferulæ porro sint leves, æquales, juxta extremitates simæ, hinc atque illinc paulo minores deligatione, crassissimæ autem ea parte qua exstat fractura. Quæcumque vero partes incurvæ sunt, & excarnes, in his quæ præminent cavendæ sunt, velut circa digitos & malleolos, aut positione, aut brevitate. Affulcimentis autem fulcire, ac firmare oportet, non comprimere primum.

Ceratum molle & leve, & purum sit. In aqua spectatur caliditas, multitudo. Caliditas, ut supra suam ipsius manum medicus adfundat. Multitudo, ad laxandum quidem & adtenuandum, plurima optima est. Verum ad incarnandum, ac moliendum, moderata. Moderatio autem in perfusione ea est, quod dum adhuc adtollitur pars, priusquam concidat desistere oportet. Primum enim adtollitur. Postea vero adtenuatur.

Positio sit mollis, æqualis, sursum vergens, in eminentibus corporis partibus, velut calcaneo, coxa, ut neque refrangatur, neque evertatur. Canalem toti potius cruri, quam dimidio adhibere oportet. Ad adfectionem tamen respicere oportet: & reliqua quæ lædere solent manifesta sunt. Exhibitio vero, & distentio, & restitutio, & reliqua secundum naturam fiant. Natura in operibus est. Operis actione quid

illa velit, conjectandum est. Ad hæc autem ex quiescente, ex communi, ex consuetudine. Ex quiescente quidem ac remisso, rectitudines considerare oportet, velut in manus figura. Ex communi vero, extensionem & inflexionem, veluti figura cubiti ad brachium, quæ prope ad angularem accedit. Ex consuetudine, quod non alias figuras magis ferre possunt, velut crura extensionem. In hac enim figura plurimum tempus facillime durarint, nulla facta immutatione. In immutatione vero ex distentione, similia hæc habet, ad habitum aut positionem, musculos, venas, nervos, ossa, & bene posita, & bene detenta.

Distentio fit maxime circa maxima, & crassissima, ac æqualia, & ubi ambo ossa læsa sunt. Secundo loco ubi subjectum, minime ubi supernum. Si vero magis moderato fiat, detrimentum affert, pueris exceptis. Oportet autem ipsa paululum acclivia habere. Directionis exemplum, æquivocum, conjugatum, simile; sanum.

Defricatio potest solvere, ligare, incarnare, minuere. Dura, ligare. Mollis, solvere. Multa, minuere. Moderata, crassescere. Deligare vero oportet, primum ut is qui deligatur dicat, maxime se compressum esse circa læsam partem, minime circa extremas; & firmatum se esse, non compressum, copia linteorum, non robore; & hac die, ac nocte paulo magis, post tridie minus, tertia laxa. Reperiatur autem post tridie in extremis partibus tumor mollis. Tertia vero die deligatum solutum gracilius sit, atque hoc per omnes deligationes. Secunda vero deligatione, an juste deligatum apparuerit, discernere oportet. Hinc autem magis & pluribus comprimatur. Tertia adhuc magis, itemque



pluribus. Septima vero a prima deligatione soluta, inveniantur gracilia ossa, ac depressa. At vero in ferulas deligata, si gracilia, & pruritus expertia, & sine ulcere fuerint, sinere oportet usque ad dies viginti a læsione. Si vero quid suspectum sit, solvere in medio tempore, & ferulas tertio quoque die firmare. Appensio, positio, deligatio ut in eodem statu sint, custodire oportet.

Figurarum summa hæc est, consuetudines, naturæ singulorum membrorum, species ex currendo, ambulando, stando, decumbendo, ex opere, ex remittendo: Nam usus corroborat, otium autem colliquat: aut compressione, aut copia linteorum. Quæcumque vero effuso sanguine sugillationes, aut contusiones, aut vulsiones, aut tumores inflammationis expertes ex vulnere oboriuntur, ad supernam partem plurimum, ad infernam etiam parum deligare oportet, ita ut manum, aut crus, non habeat in declive, & initium supra vulnus ponat, ac maxime firmet, minime extremas partes, medio modo medias, ultimam partem ad supernas corporis partes distribuendo, deligatione, compressione. Sed & hæc, copia magis quam robore. Maxime autem his lintea tenuia, levia, mollia, pura, lata, sana debentur, utpote sine ferulis; & uberiore perfusione uti oportet.

At vero elapsiones, aut luxationes aut tortiones, aut distantiae disparatæ, aut avulsiones, aut abruptiones, aut distortionem, veluti mutilationes ad alteram partem vergentes, unde quidem excesserunt, remittendo deligare oportet; quo vero excesserunt, intendendo deligamentum, ut ad contraria vergant deligata, etiam priusquam fuerint deligata, paulo magis quam ut ex æquo

sint, & deligamentis, & spleniis, & appensionibus, & figuris, extensione, defrictione, directione: & hic etiam uberiore perfusione. Cæterum imminutiones multam sanam partem occupando deligare oportet, ut ex influxione, qua colliquata plusquam sua sponte imminuta sunt, alia deligatione permutata, ad augmentum declinent, & carnum efformationem faciant. Melius autem est, ut & superna pars simul deligetur, velut tibiæ, & femorum, & alterum crus cum sano crure, quo similis sit, & similiter quiescat, & similiter alimentum excludant, & suscipiant. Linteorum vero copia, non compressione utendum est, remittendo primum id quod maxime opus habet, & utendo defrictione incarnante, & perfusione absque ferulis.

Fulcimenta porro, ac stabilimenta adhibere oportet, veluti pectori, costis, capiti, & aliis quæ ejusmodi sunt, partim pulsum gratia, ut ne concutiantur, partim etiam distantiarum disparatarum gratia, circa juncturas in ossibus capitis, quo firmentur. Et in tussibus, aut sternutationibus, aut alio motu, qualia sunt circa thoracem & caput stabilimenta. Horum omnium eadem sunt deligationis moderationes. Qua enim parte læsiones sunt, maxime comprimendum est. Supponere igitur oportet lanam mollem, affectioni convenientem; deligare vero non amplius comprimendo, ut ne pulsus concutiantur; neque amplius quam ut distantium juncturarum extremitates mutuo se contingant. Neque ut tusses & sternutationes fiant, sed ut prohibeantur, stabilimentum adhibeatur, quo neque cogatur quid, neque concutiat.



---

# HIPPOCRATIS

## LIBER APHORISMORUM.

---

### P R Æ F A T I O.

*AB* omni tempore pro genuino HIPPOCRATIS opere, in senio viri summi nato, & maturiori habiti sunt. Non potest tamen a viro veri cupido dissimulari, negligenter hoc opus admodum & ab auctore esse editum, & a posteris traditum, ut alii aphorismi bis repetantur, alii aliis non obscure contradicant. Deinde optima esse, quæ ad signa morborum acutorum & eventus spectant, alia physiologica multo deteriora, videntur etiam falsa, ut quæ de maris & feminae in utero situ, de signis conceptus & fecunditatis, de abortu ex venæ sectione dicuntur. Demum octodecim quidem spurii aphorismi in nonnullis editionibus in peculiarem sectionem rejiciuntur: intercedunt tamen non pauci alii non melioris auctoritatis, passim per septem sectiones dispersi. Alii fidem & venerationem posteriorum merentur. Non licuit tamen nobis vera a falsis separare. In universum VII. sunt sectiones, quarum Prima potissimum de sanorum hominum victu agit: altera de victu egrotorum: tertia de ætatibus & anni temporibus, morbisque congruis;

quarta • purgatione & signis & præfagiis morborum: quinta de miliebris: SEXTA & SEPTIMA iterum de signis & præfagiis suntis ex lotio, ex dejectionibus. Verum aliena plurima in quaque sectione intercurrunt.

## S E C T I O I.

**V**ITA brevis, ars longa, tempus præceptum, experimentum periculosum, iudicium difficile. Oportet autem non solum se ipsum exhibere, quæ decent facientem, sed etiam ægrotum, & præsentem, & quæ externa sunt.

II. In perturbationibus alvi, & vomitibus sponte fientibus, si quidem qualia purgari oportet, purgentur, confert, & leniter ferunt. Sin minus, vice versa. Sic & vasorum evacuatio, si quidem talis fuit, qualis fieri debet, confert, & bene ferunt. Sin minus, vice versa. Inspicere itaque oportet regionem, & tempus, & ætatem, & morbos, in quibus convenit, aut non.

III. In exercitantibus boni habitus ad summum progressi periculosi sunt, si in extremo fuerint. Non enim manere possunt in eodem, neque quiescere. Quum vero non quiescant, non amplius in melius augescere possunt. Reliquum est igitur, ut in deterius. Ob has igitur causas bonam habitudinem non tarde solvere confert, quo corpus rursum renutritionis principium summat. Neque vero collapsiones ad extremum ducere oportet, periculosum enim est. Sed qualis natura est ejus, qui perferre debet, ad hoc ducere convenit. Similiter autem & evacuationes ad extremum ducentes, periculosæ sunt, & rursus renutritiones in extremo existentes, periculosæ sunt.



IV. Tenuēs , & exacti victus & in longis semper adfectionibus , & in acutis , ubi non expedit , periculosi sunt , & rursus victus ad extremam tenuitatem progressi , difficiles sunt. Et repletiones ad extremum progressæ difficiles sunt.

V. In tenui victu delinquentes ægrotantes , magis læduntur. Omne enim delictum , quod committi poterit , magis magnum committitur in tenui , quam in paulo pleniore victu. Quapropter etiam in sanis periculosus est valde tenuis , & constitutus , ac exactus victus. Quoniam delicta gravius ferunt. Ob hoc igitur tenuis , & exactus victus periculosus est magis , quam paulo plenior ,

VI. Ad extremos morbos , exactæ extremæ curationes , optimæ sunt.

VII. Ubi igitur peracutus est morbus , statim etiam extremos labores habet , & extreme tenuissimo victu uti necesse est. Ubi non , sed pleniore victu uti licet , intantum subdescendendum est , inquantum morbus extremis mollior fuerit.

VIII. Quum in vigore fuerit morbus , tunc tenuissimo victu uti necesse est.

IX. Simul autem conjectare oportet , an æger ex victu durare possit ad morbi vigorem , & utrum ille prius defecturus sit , & ex victu durare non possit , aut morbum prius deficere spes sit , ac frangi.

X. Quibus igitur statim vigor est , his statim tenuis victus exhibendus est. Quibus vero vigor posterius , his ad illud , & paulo ante illud tempus subtrahendus est. Antea vero mitius æger victu tractandus est , quod durare possit.

XI. In exacerbationis subtrahere victum oportet. Nam apponere noxa. Ex quibus per circuitus exacerbationes fiunt , in exacerbationibus subtrahere oportet.

XII. Exacerbationes, & constitutiones indicabunt, morbi, & tempora anni, & circuituum inter se collata incrementa, siue quotidie, siue alternis diebus, siue per amplius temporis intervallum fiant. Sed & ex apparentibus indicia fiunt, velut in pleuriticis, si sputum statim appareat incipiente morbo, ipsum abbreviat: si vero posterius appareat, producit. Et urinae & alvi egestionem, & sudores apparentes indicant & ægre, & facile judicandos, & breves & longos morbos.

XIII. Senes facillime jejunium ferunt. Deinde ætate consistentes. Minime adollescentes, omnium vero minime pueri, & inter hos ipsos, qui ipsi se ipsis alacriores fuerint.

XIV. Qui crescunt, plurimum habent innatum calorem. Plurimo igitur opus habent alimento; sin minus, corpus consumitur. Senibus autem modicus est calor; quapropter paucis alimentis opus habent; a multis enim extinguuntur. Ob hanc etiam causam febres senibus non similiter acutæ fiunt. Frigidum est enim ipsorum corpus.

XV. Ventres hyeme, & vere natura calidissimi sunt, & somni longissimi. Quapropter in his temporibus alimenta plura exhibenda sunt. Nam innatum calorem ampliolem tunc habent, alimento igitur ampliore egent. Signum sunt ætates, & athletæ.

XVI. Victus humidus omnibus febricitantibus conferunt. Maxime vero pueris, & aliis ita ali adfuetis.

XVII. Et quibus semel, aut bis, & plus, aut minus, & ex parte exhibere oportet, considerandum est, Dandum vero etiam aliquid est tempori, & regioni, & ætati, & consuetudini.



XVIII. Æstate, & autumnno cibos difficillime ferunt, hyeme facillime, deinde vere.

XIX. His, qui in circuitibus exacerbantur, nihil dare oportet, neque cogere, sed auferre de appositionibus ante iudicationes.

XX. Quæ judicantur, & judicata sunt integre, neque movere oportet, neque novare, neque medicamentis, neque aliis irritamentis, sed finire.

XXI. Quæ ducere oportet, quo maxime repunt, eo ducere oportet per convenientes locos.

XXII. Concocta medicamentis aggredi oportet, & movere, non cruda, neque in principiis, si non turgeant. Plurima vero non turgent.

XXIII. Quæ prodeunt, non multitudine æstimare oportet, sed quamdiu prodeant, qualia oportet, & facile æger ferat. Et ubi opus est, usque ad animi deliquium ducere oportet, & hoc facere, si sufficiat æger.

XXIV. In acutis adfectionibus raro etiam in principiis medicamentis uti oportet, atque hoc facere, deligenti prius æstimatione facta.

XXV. Si qualia oportet purgari, purgentur, confert, & facile ferunt. Contraria vero difficulter.

## S E C T I O II.

I. **I**N quo morbo somnus laborem facit, mortale. Si vero somnus profit, non lethale.

II. Ubi somnus delirium sedat, bonum est.

III. Somnus, vigilia, utraque modum excessu, malum.

IV. Non satietas, non fames, neque aliud quidquam bonum est, quod naturæ modum excedit.

V. Laf-

V. Lassitudines spontaneæ denunciant morbos.

VI. Quicumque aliqua corporis parte dolentes, plerumque dolores non sentiunt, his mens ægrotat.

VII. Quæ multo tempore adtenuantur corpora, lente reficere oportet. Quæ vero brevi, brevi.

VIII. Si ex morbo cibum capiens quis non fiat validus, significat, quod corpus uberiore alimento utitur; si vero cibum non accipiente hoc contingat, nosse oportet, quod evacuatione opus habet.

IX. Corpora quocumque quis purgare voluerit, fluida facere oportet.

X. Non pura corpora quanto plus nutries, tanto magis lædes.

XI. Facilius est repleri potu, quam cibo.

XII. Quæ relinquuntur in morbis potest iudicationem, recidivam faciunt.

XIII. Quibuscumque iudicatio fit, his nox gravis ante exacerbationem. Quæ vero sequitur, plerumque tolerabilior est.

XIV. In alvî fluxionibus mutationes egestionum profunt, si non ad pravas mutantur.

XV. Ubi fauces ægrotant, aut tubercula in corpore nascuntur, excretiones considerare oportet. Si enim biliosæ fuerint, corpus simul ægrotat. Si vero similes sanis fiant, tutum est corpus nutrire.

XVI. Ubi fames, non oportet laborare.

XVII. Ubi cibus præter naturam copiosior ingressus fuerit, morbum facit. Ostendit autem sanatio.

XVIII. Eorum, quæ acervatim, & velociter nutriunt, veloces etiam egestionem fiunt.

XIX. Acutorum morborum non omnino tutæ

*Princip. Art. Med. Tom. I. G g*



sunt prædictiones neque mortis, neque sanitatis.

XX. Quibus dum juvenes sunt, ventres humidi sunt, his senescentibus resiccantur. Quibus vero dum juvenes sunt, ventres sicci sunt, his senescentibus humectantur.

XXI. Famem vini potus solvit.

XXII. Quicumque morbi ex repletionem fiunt, evacuatio sanat. Et quicumque ex evacuatione, repletio. Et aliorum contrarietas.

XXIII. Acuti morbi in quatuordecim diebus judicantur.

XXIV. Septimæ quarta index est. Alterius hebdomadæ octava principium est. Consideranda vero est undecima. Hæc enim quarta est secundæ hebdomadæ. Consideranda rursus decima septima. Ipsa enim est quarta quidem a decima quarta, septima vero ab undecima.

XXV. Æstivæ quartanæ plerumque sunt breves. Autumnales vero longæ, & maxime, quæ ad hyemem pertingunt.

XXVI. Febrem in convulsione fieri melius est, quam convulsionem in febre.

XXVII. His quæ non secundum rationem levant, non oportet credere, neque valde time-<sup>re</sup> ea, quæ prava fiunt præter rationem. Pleraque enim ex talibus inconstantia sunt, & non valde permanere, neque morari solent.

XXVIII. Febricitantium non omnino leviter, permanere, & nihil minui corpus, aut etiam magis quam pro ratione colliquari, malum est. Illud enim morbi longitudinem, hoc vero debilitatem significat.

XXIX. Incipientibus morbis si quid movendum videtur, move; vigentibus vero, quietem agere melius est.

XXX. Circa principia, & fines omnia debiliora

sunt. Circa vigores vero fortiora.

XXXI. Ex ægritudine bene cibum accipienti, nihil augescere corpus, malum est.

XXXII. Plerumque omnes male habentes, ab initio cibum bene capientes, & nihil augescerentes, ad finem rursus cibos fastidiunt. At ab initio quidem valde cibum averfantes, postea vero bene cibum capientes, melius liberantur.

XXXIII. In omni morbo valere mente, & bene se habere ad ea, quæ exhibentur, bonum; contrarium vero malum.

XXXIV. In morbis minus periclitantur, quorum naturæ, & ætati, & habitui, & tempori morbus magis affinis fuerit, quam hi, quibus non affinis in aliquo horum existit.

XXXV. In omni morbo partes circa umbilicum, & pectinem crassitudinem habere, melius est. At vehemens tenuitas, & eliquatio, prava est. Periculosa vero talis est etiam ad infernas purgationes.

XXXVI. Sana habentes corpora, dum medicamentis purgantur, cito exsolvuntur. Itemque qui pravo cibo utuntur.

XXXVII. Qui bene habent corpore, eos operosum est medicamentis purgare.

XXXVIII. Paulo deterior & potus, & cibus, verum jucundior, melioribus quidem, sed injucundioribus præferendus est.

XXXIX. Senes juvenibus plerumque minus ægrotant. Quicumque vero ipsis fiunt morbi diuturni, ut plurimum commoriuntur.

XL. Raucedines, & gravedines in valde senibus non concoquuntur.

XLI. Qui exsolvuntur sæpe, & fortiter, absque manifesta causâ, derepente moriuntur.

XLII. Siderationem fortem quidem solvere,



impossibile est ; debilem vero, non facile.

XLIII. Ex his, qui strangulantur, & submerguntur, nondum autem mortui sunt, non reconvalescunt, quibus spuma circa os fuerit.

XLIV. Crassi admodum secundum naturam magis cito moriuntur, quam graciles.

XLV. Juvenibus comitialibus liberationem faciunt mutationes, maxime ætatis, & regionum, & victuum.

XLVI. Duobus doloribus simul fientibus, non secundum eundem locum, vehementior obscurat alterum.

XLVII. Circa generationem puris, dolores, & febres magis contingunt, quam facto jam ipso.

XLVIII. In corporis motu, quum inceperit dolere, quiescere statim lassitudinem eximit.

XLIX. Adfueti consuetos labores ferre, etiam si fuerint debiles, aut senes, non adfuetis fortibus, ac juvenibus facilius ferunt.

L. Ex multo tempore consueta, etiam si deteriora fuerint, inconsuetis minus molestare solent. Oportet igitur etiam ad inconsueta transmutationem facere.

LI. Multum, & repente evacuare, aut reple-re, aut calefacere, aut frigefacere, aut omnino quomodocumque corpus movere periculosum est. Et omnis multitudo naturæ contraria est. Quod vero paulatim fit, tutum est tum alias, tum si ex altero ad alterum transitus fit.

LII. Omnia secundum rationem facienti, si non secundum rationem fiant, non transire oportet ad aliud, manente eo, quod visum est ab initio.

LIII. Quicumque ventres humidos habent, dum quidem juvenes sunt, melius degunt, quam hi, qui siccos habent. Verum ad senectutem de-

terius degunt. Resiccantur enim plerumque senescentibus.

LIV. In corporis magnitudine juventutem quidem degere, liberale est, & non indecorum. Senectutem vero degere, inutile, & deterius parvitate.

### SECTIO III.

I. **M**utationes temporum maxime pariunt morbos, & in temporibus magnæ mutationes frigoris, aut caloris, & reliqua juxta rationem hoc modo.

II. Naturarum aliæ quidem ad æstatem, aliæ vero ad hyemem bene, aut male se habent.

III. Morborum alii ad alia tempora bene, aut male se habent; & ætates quædam ad tempora, & regiones, & victus.

IV. In temporibus, quum eadem die modo calor, modo frigus fit, autumnales morbos expectare oportet.

V. Austri auditum gravantes, caliginosi, caput gravantes, torpidi, dissolventes. Quum hic prævaluerit, talia in morbis patiuntur. Si vero Aquilo fuerit, tussis, fauces, alvi duræ, urinæ difficultates, horrores, dolores costarum, pectoris. Quum hic dominatur, talia in morbis expectare oportet.

VI. Quum æstas fit veri similis, sudores in febribus multos expectare oportet.

VII. In siccitatibus febres acutæ fiunt; & si quidem annus amplius talis fuerit, qualem constitutionem fecerit, plerumque tales etiam morbos expectare oportet.

VIII. In constantibus temporibus, si tempestive tempestiva reddantur, morbi constantes,



& judicatu facillimi fiunt. In inconstantibus autem, inconstantes, & qui difficulter judicantur.

IX. In autumno morbi acutissimi, & omnino mortiferi. Ver autem saluberrimum, & minime lethale.

X. Autumnus tabidis malus.

XI. De temporibus, si quidem hyems sicca, & aquilonaris fuerit, ver autem pluviosum, & australe; necesse est, æstate febres acutas, & lippitudines, & dysenterias fieri, maxime mulieribus, & viris natura humidioribus.

XII. Si vero hyems australis, & pluviosa, ac clemens fiat, ver autem siccum, & aquilonare; mulieres quidem, quibus partus ad ver instat, ex omni occasione abortiunt. Quæ vero pariunt, impotentes, ac morbosos pueros pariunt, ita ut aut statim pereant, aut tenues, ac morbofi vivant. Aliis autem dysenterix, & lippitudines siccæ fiunt. Senioribus vero defluxiones brevi perimentes.

XIII. Si vero æstas sicca fiat, & aquilonaris, autumnus autem pluviosus, & australis; capitis dolores ad hyemem fiunt, & tussés, & raucedines, ac gravedines, quibusdam etiam tabes.

XIV. Si vero aquilonaris, & aquarum exfors autumnus fuerit, his quidem, qui humidas naturas habent, & mulieribus commodus erit. Reliquis vero fient lippitudines siccæ, & febres acutæ, & gravedines, Quibusdam vero etiam atræ biles.

XV. Ex anni vero constitutionibus, in summa siccitates pluviosis salubriores sunt, & minus lethales.

XVI. Morbi in pluviosis quidem plerumque fiunt, febres longæ, & alvi fluxiones, & pu-

tredines, & comitiales, & fiderationes, & anginæ. In siccitatibus vero tabes, lippitudines, arthritides, urinæ stillicidia, & dysenterix.

XVII. Quotidianæ vero constitutiones, æquilonares quidem corpora compingunt, & robusta, & ad motum idonea, & bene colorata, & melius audientia faciunt, & ventres resiccant, & oculos mordent, & si circa thoracem aliquis dolor prius est, magis adfligunt. Australes autem corpora dissolvunt, & humectant, & gravem auditum, ac capitis gravitatem, & vertigines faciunt. In oculis autem, & corporibus ægrum motum, & ventres humectant.

XVIII. Secundum tempora vere quidem, & prima æstate, pueri, & qui his ætate cohærent, optime degunt, & maxime sani sunt. Æstate vero, & autumno aliquamdiu, senes. Reliquo autumno, & hyeme, mediam ætatem habentes.

XIX. Morbi omnes quidem in omnibus temporibus fiunt. Quidam tamen magis in quibusdam ipforum & fiunt, & exacerbantur.

XX. Vere infanix, & atræ biles, & comitiales, & sanguinis fluxiones, & anginæ & gravedines, & raucedines, & tusses, & lepræ, & impetigines, & vitiligines, & pustulæ ulcerosæ plurimæ, & tubercula, & morbus articularis.

XXI. Æstate vero, & quidam ex his, & febres continuæ, & ardentes, & tertianæ plurimæ, & quartanæ, & vomitus, & alvi profluvia, & lippitudines, & aurium dolores, & oris exulcerationes, & pudendorum putredines, & papulæ fudorosæ.

XXII. Autumno autem & ex æstivis multi, & febres quartanæ, & erroneæ, & splenes, & hydropes, & tabes, & urinæ stillicidia, & in-



testinorum levitates, & dysenteriaë, & coxendices, & anginaë, & anhelationes, & volvuli, & comitiales, & infaniaë, & atræ biles.

XXIII Hyeme vero pleuritides, peripneumoniæ, gravedines, raucedines, tusses, dolores pectorum, laterum, ac lumborum, capitis dolores, vertigines, syderationes.

XXIV. In ætatibus autem talia contingunt. Parvis, ac recens natis pueris fervida oris ulcera, vomitus, tusses, vigiliæ, timores, umbilici inflammationes, aurium humiditates.

XXV. Ad dentitionem vero accedentibus gingivarum pruritus, febres, convulsiones, alvi profluvia, & maxime ubi dentes caninos producunt, tum crassissimis pueris, tum his, qui duros ventres habent.

XXVI. Senioribus autem fientibus tonsillæ, verticuli in occipitio intro luxationes, anhelationes, calculorum generationes, lumbrici rotundi, ascarides, verrucæ, tumores glandularum circa aures oblongi, satyriasmî appellati, strumæ, & alia tubercula, maxime vero prædicta.

XXVII. Adhuc vero seniores, & ad pubertatem accedentibus pleraque ex his, & febres diuturnæ magis, & ex naribus sanguinis fluxiones.

XXVIII. Plurimæ vero affectiones pueris judicantur partim in quadraginta diebus, partim in septem mensibus, partim in septem annis, partim ad pubertatem accedentibus. Quæ vero permanferint pueris affectiones, & non exsolutæ fuerint circa pubertatem, aut femellis circa mensium eruptiones, diuturnæ fieri solent.

XXIX. Juvenibus autem sanguinis spuitio-

nes, tabes, febres acutæ, comitiales, & alii morbi, maxime vero prædicti.

XXX. His vero, qui hanc ætatem exceſſerunt, anhelationes, pleuritides, peripneumoniæ, lethargi, phrenitides, febres ardentes, alvi profluvia diuturna, bilis furſum, ac deorſum effuſiones, dyſenterix, inteſtinorum levitates, hæmorrhoides.

XXXI. Senibus autem ſpirandi difficultates, & defluxiones cum tuſſi, urinæ ſtillicidia, urinæ difficultates, articulorum dolores, nephritides, vertigines, ſiderationes, mali habitus, pruritus totius corporis, vigiliæ, alvi, oculorum, & narium humiditates, viſus hebetudines, glaucedines, auditus gravitates.

## SECTIO IV.

I. **P**Rægnantes medicamentis purgare oportet, ſi turget humor, quarto menſe, & uſque ad ſeptimum. Minus vero has. Juniores autem, & ſeniores fetus vereri oportet.

II. In medicamentorum uſu, talia ex corpore ducere oportet, qualia etiam ſponte prodeuntia commoda ſunt. Contrario autem modo prodeuntia, ſedare.

III. Si qualia oportet purgari, purgentur, confert, & facile ferunt. Contraria vero difficulter.

IV Medicamentis purgare oportet æſtate quidem, ſuperiores magis; hyeme vero inferiores.

V. Sub canem, & ante canem, operoſæ ſunt medicamentorum purgationes.

VI. Graciles, & facile vomentes, furſum purgare oportet, vitantes hyemem.



VII. Difficulter vomentes, & moderate carnosos, deorsum, vitantes ætatem.

VII. Tabescentes autem, vitantes superiores.

IX. Atrabiliarios vero plenius inferiores Eadem ratione contraria apponens.

V. Purgare oportet in valde acutis, si humor turget, eadem die. Morari enim in talibus malum est.

XI. Quibus tormina, & circa umbilicum dolores, & lumborum dolor, qui neque a medicamento, neque alias solvitur, in hydropem siccum firmatur.

XII. Quibus alvi intestinorum levitate adfecti, eos hyeme sursum purgare malum est.

XIII. Ad veratrum, his, qui non facile sursum purgantur, ante potionem corpora humectare oportet ampliore cibo, ac quiete.

XIV. Ubi biberit quis veratrum, ad motus quidem corporum magis ducere oportet, ad somnos autem, & quietem minus. Declarat autem navigatio, quod motus corpora turbat.

XV. Ubi volueris magis ducere veratrum, corpus moveto. Ubi vero sistere, somnum facito, & ne moveto.

XVI. Veratrum periculosum est sanas carnes habentibus. Convulsionem enim inducit.

XVII. Sine febre existenti cibi fastidium, & oris ventriculi morsus, & vertigo, & os amarescens, medicamento sursum purgante opus habere significat.

XVIII. Dolores supra septum transversum, qui purgatione opus habent, sursum versus purgatione indigere significant; qui vero infra, deorsum.

XIX. Qui in medicamentorum potionibus, dum purgantur, non sitiunt, non cessant prius, quam sitierint.

XX. Non febrientibus si fiat tormen, & genuum gravitas, & lumborum dolor, deorsum medicamento purgante opus habere significat.

XXI. Egestionēs alvi nigræ, velut sanguis niger, sua sponte prodeuntes, & cum febre, & sine febre, pessimæ sunt, & quanto plures fuerint peiores colores, tanto magis malum est. Cum medicamento vero melius, & quanto plures fuerint colores, non malum est.

XXII. Quibuscumque, morbis incipientibus, si atra bilis, aut deorsum prodierit, lethale est.

XXIII. Quibuscumque ex morbis acutis, aut ex diuturnis, aut ex vulneribus, aut alias adtenuatis, atra bilis, siue qualis sanguis niger subierit, postridie moriuntur.

XXIV. Dysenteria, si ab atra bile inceperit, lethalis est.

XXV. Sanguis sursum quidem qualiscumque fuerit, malus est, deorsum vero bona sunt nigra subeuntia.

XXVI. Si a dysenteria occupato, veluti carnes subierint, lethale est.

XXVII. Quibus in febribus sanguinis multitudo erumpit undecumque, his in refectionibus alvi humectantur.

XXVIII. Quibus biliosæ sunt egestionēs, surditate sente cessant. Et quibus surditas, biliosis egestionibus sentibus cessat.

XXIX. Quibus in febribus sexta die rigores sunt, difficulter judicant.

XXX. Quibus exacerbationes sunt, quacumque tandem hora febris dimiserit, si postridie eadem, qua antea hora corripuerit, difficulter judicant.

XXXI. Delasitis in febribus ad articu-



los, & circa maxillas maxime, abscessus fiunt.

XXXII. Quibuscumque resurgentibus ex morbis, si quid doluerit, isthic abscessus fiunt.

XXXIII. Sed & si ante morbum quid doluerit, isthic morbus incumbit.

XXXIV. Si a febre occupato, tumore non existente in faucibus, suffocatio derepente contingat, lethale est.

XXXV. Si a febre occupato, collum repente obversum fuerit, & vix deglutire poterit, tumore non existente, lethale est.

XXXVI. Sudores febricitanti si inceperint, boni sunt tertia die, & quinta, & septima, & nona, & undecima, & decima quarta, & decima septima, & vigesima prima, & vigesima septima, & trigesima prima, & trigesima quarta. Hi enim sudores morbos judicant. Qui vero non sic fiunt, dolorem significant, & longitudinem morbi, & recidivas.

XXXVII. Frigidi sudores cum acuta quidem febre fientes, mortem significant; cum mitiore vero, morbi longitudinem.

XXXVIII. Et ubi in corpore sudor est, illic morbum esse declarat.

XXXIX. Et ubi in corpore frigiditas, aut caliditas, isthic morbus est.

XL. Et ubi in toto corpore mutationes, & si corpus perfrigeretur, aut rursus calefiat, aut color alius ex alio fiat, longitudinem morbi significat.

XLI. Sudor multus ex somno, citra manifestam causam fiens, corpus multo alimento uti significat. Si vero cibum non capienti hoc fiat, significat, quod evacuatione opus habet.

XLII. Sudor multus frigidus, aut calidus

semper fluens; frigidus majorem, calidus minorem morbum significat.

XLIII. Febres quæcumque non intermittentes per tertiam fortiores fiunt, magis periculosæ sunt. Quocumque vero modo intermiserint, quod sine periculo sint, significant.

XLIV. Quibus febres longæ, his tubercula ad articulos, aut dolores fiunt.

XLV. Quibus tubercula ad articulos, aut dolores ex febribus longis fiunt, hi pluribus cibis utuntur.

XLVI. Si rigor incidat febre non intermittente, ægroto jam debili, lethale est.

XLVII. Excreationes in febribus non intermittentibus, lividæ, & cruentæ, & graveolentes, & biliosæ, omnes malæ sunt. At probe fecedentes, bonæ, & per alvi egestionem, & per urinas. Si vero non aliquid ex conducentibus excernatur, per hos locos, malum est.

XLVIII. In non intermittentibus febribus, si externæ quidem partes frigidæ fuerint, internæ vero ardeant, ac sitim habeant, lethale est.

XLIX. In febre non intermittente, si labium, aut palpebra, aut supercilium, aut oculus, aut nasus distorqueatur, aut non videat, aut non audiat, æger jam debilis existens, quicquid horum fiat, propinqua mors est.

L. Ubi in febre non intermittente difficultas spirandi, & delirium fit, lethale est.

LI. In febribus abscessus, qui non solvuntur ad primas judicationes, longitudinem morbi significant.

LII. Quicumque in febribus, aut aliis ægri-tudinibus ex voluntate lachrymantur, nihil absurdum est. Qui vero non ex voluntate, absurdum.



LIII. Quibus circa dentes in febribus viscosa adhærent, his fortiores febres fiunt.

LIV. Quibus plerumque tussis sicca, parum irritantes, in febribus ardentibus, hi non ita valde siticulosi sunt.

LV. Ex glandularum tumoribus febres omnes malæ sunt, exceptis diariis.

LVI. Febricitanti sudor oboriens, febre non remittente, malum. Moram enim trahit morbus, & multam humiditatem significat.

LVII. A convulsione, aut distentione nervorum vexato, febris accedens, morbum solvit.

LVIII. A febre ardente occupato, rigore accedente, solutio, fit.

LIX. Tertianæ exacta in septem circuitibus ad summum judicatur.

LX. Quibus in febribus aures obsurduerunt, his sanguis e naribus effusus, aut alvus exturbata, morbum solvit.

LXI. Febrientem si non in diebus imparibus febris dimiserit, recidivare solet.

LXII. Quibus in febribus morbus regius fit ante septimum diem, malum.

LXIII. Quibus in febribus quotidie rigores fiunt, quotidie febres solvuntur.

LXIV. Quibus in febribus morbus regius septima, aut nona, aut decima quarta accedit, bonum, si non præcordium dextrum durum fiat; sin minus, non bonum.

LXV. In febribus circa ventrem æstus vehemens, & cordis, sive oris ventriculi morsus, malum.

LXVI. In febribus acutis convulsiones, & circa viscera dolores fortes, malum.

LXVII. In febribus, ex somnis timores, aut convulsiones, malum.

LXVIII. In febribus spiritus offendens, malum. Convulsionem enim significat.

LXIX. Quibus urinæ crassæ, grumosæ, paucæ, non sine febribus, ubi copia ex his successit, tenuis prodest. Tales autem maxime prodeunt his, quibus ab initio, aut brevi subsidientiam habent.

LXX. Quibus in febribus urinæ conturbatæ, velut jumenti, his capitis dolores aut adfunt, aut aderunt.

LXXI. Quibus septima die morbi judicantur, his nubeculam habet urina, quarta die rubram, & alia secundum rationem.

LXXII. Quibus urinæ pellucidæ, albæ, malæ. Maxime autem in phreniticis comparent.

LXXIII. Quibus præcordia elevata, permittantia, lumborum dolore accedente, his alvi humectantur, si non flatus erumpant, aut urinæ copia prodeat. In febribus autem hæc.

LXXIV. Quibus spes est abscessum fore ad articulos, eos liberat ab abscessu urina multa, & crassa, & alba prodiens, qualis in febribus laboriosis quarta die quibusdam fieri incipit. Si vero etiam ex naribus sanguis eruperit, brevi admodum solvitur.

LXXV. Si quis sanguinem, aut pus mingat, renem, aut vesicæ ulcerationem significat.

LXXVI. Quibus in urina crassa existente, carunculæ parvæ, aut veluti pili simul exeunt, his de renibus excernuntur.

LXXVII. Quibus in urina crassa existente, furfuracea quædam simul minguntur, his vesica scabie adfecta est.

LXXVIII. Qui sua sponte sanguinem mingunt, his in renibus venæ ruptionem significat.



LXXIX. Quibus in urina arenosa subsidunt, his vesica calculo laborat.

LXXX. Si quis sanguinem mingat, & grumos, & urinæ stillicidium habeat, & dolor incidat in imum ventrem, & ani, ac scroti interapedinem; partes circa vesicam adfectæ sunt.

LXXXI. Si quis sanguinem, & pus mingat, & squamas, & odor gravis sit; vesicæ exulcerationem significat.

LXXXII. Quibus in urinaria fistula tuberculum nascitur, his suppuratione facta, & eruptione, solutio fit.

LXXXIII. Mictio noctu multa fiens, medicam alvi egestionem significat.

## SECTIO V.

I. **C**onvulsio ex veratro lethalis est.

II. Ex vulnere convulsio lethalis est.

III. Sanguine multo effuso, convulsio; aut singultus accedens, malum.

IV. Ex superflua purgatione convulsio, aut singultus accedens, malum.

V. Si quis ebrius derepente voce privetur, convulsus moritur, si non febris corripuerit, aut ubi ad horam, qua crapulæ solvuntur, pervenit, loquatur.

VI. Quicumque a distentione antrorsum ac retrorsum corripiuntur, in quatuor diebus pereunt. Si vero has effugerint, sani fiunt.

VII. Quibuscumque morbi comitiales ante pubertatem fiunt, transmutationem habent. Quibuscumque vero viginti quinque annos natis fiunt, his plerumque commoriuntur.

VIII. Quibuscumque pleuritici fientes, in qua-

quatuordecim diebus non repurgantur, his ad suppurationem transitio fit.

IX. Tabes maxime fit ætatibus ab anno decimo octavo usque ad trigésimum quintum.

X. Quicumque anginam effugiunt, his ad pulmonem vertitur, & in septem diebus moriuntur. Si vero has effugerint, suppurati fiunt.

XI. Qui tabe infestantur, si sputum quodcumque tussiendo rejecerint, grave olet, dum prunis injicitur, & capilli de capite defluunt, lethale est.

XII. Quibuscumque tabe laborantibus capilli de capite defluerint, hi alvi profluvio accedente moriuntur.

XIII. Quicumque sanguinem spumofum spunt, his ex pulmoneeductio fit.

XIV. A tabe occupato, alvi profluvium accedens, lethale est.

XV. Quicumque ex pleuritide suppurati fiunt, si in quadraginta diebus repurgati fuerint ab ea die, qua ruptio facta fuerit, liberantur. Si vero non, ad tabem transeunt.

XVI. Calida frequenter ea utentibus, has noxas inducit, carniū effeminationem, nervorum impotentiam, mentis torporem, sanguinis eruptiones, animi deliquia. Hæc quibus mors.

XVII. Frigida vero convulsiones, antrorsum, ac retrorsum distentiones, nigrores, rigores febriles.

XVIII. Frigida inimica ossibus, dentibus, nervis, cerebro, spinali medullæ. Calida vero grata.

XIX. Quæcumque perfrigerata sunt, excalescere oportet, præterquam a quibus sanguis erumpit, aut erupturus est.

XX. Ulceribus frigida mordax, cutem obdu-

*Princip. Art. Med. Tom. I. H h*



rat, dolorem non suppurantem facit, nigrefacit, rigores febriles inducit, convulsiones, distentiones.

XXI. Quandoque vero in distentione sine ulcere, juveni carnosio, ætate media, frigida multæ adfusio caloris revocationem facit. Calor autem hæc solvit.

XXII. Calida suppuratoria est, non in omni ulcere, maximum signum ad securitatem, cutim mollit, adtenuat, dolores eximit, rigores, convulsiones, distentiones mitigat, capitis gravitatem solvit. Plurimum autem confert ad ossium fracturas maxime denudatas. Ex his autem maxime his, qui in capite ulcera habent, & his, quæ a frigidityte moriuntur, aut ulcerantur, & herpetibus exedentibus, sedi, pudendo, utero, vesicæ. His calida grata est, & judicans. Frigida vero inimica, & occidens.

XXIII. In his frigida uti oportet, unde sanguis erumpit, aut erupturus est, non super ipsas partes, sed circa ipsas, unde fluit. Et quæcumque inflammationes, aut flammei ardores ad ruborem, & subcruentum colorem ex novo sanguine tendunt, ad eas ipsas, nam veteres nigrefacit; & ad sacrum ignem non exulceratum, nam exulceratum, lædit.

XXIV. Frigida, velut nix, glacies, pectori inimica sunt, tussés movent, & sanguinis eruptiones, ac defluxiones inducunt.

XXV. Tumores in articulis, & dolores absque ulcere, & podagricas adfectiones, & convulsiones: horum plurima frigida multa adfusa levat, & adtenuat, & dolorem solvit. Torpor enim dolorem solvit.

XXVI. Aqua, quæ cito calefcit, & cito perfrigeratur, levissima est.

XXVII. Quibus bibendi appetentiæ noctu valde sitientibus, obdormierint, bonum est.

XXVIII. Menfes ducit aromatum suffitus. Multis autem modis etiam ad alia commodus esset, si non capitis gravitatem induceret.

XXIX. Prægnantes medicamentis purgare oportet, si turget humor, quarto mense, & usque ad septimum. Minus vero has. Juniores vero, & seniores fetus vereri oportet.

XXX. Mulierem uterum gerentem ab aliquo acuto morbo corripì, lethale est.

XXXI. Mulier uterum gerens secta vena abortit, & magis, si major fuerit fetus.

XXXII. Mulieri sanguinem vomenti, mensibus erumpentibus, solutio fit.

XXXIII. Mulieri mensibus deficientibus, sanguinem ex naribus fluere, bonum est.

XXXIV. Mulieri uterum gestanti, si alvus multum fluxerit, periculum est, ut abortiat.

XXXV. Mulieri, quæ ab uteri strangulationibus vexatur, aut difficulter parit, sternutatio accedens, bonum.

XXXVI. Mulieri menfes decolores, & non eodem tempore semper fientes, purgatione opus esse, significant.

XXXVII. Mulieri uterum gestanti, si mammae repente graciles fiant, abortit.

XXXVIII. Mulieri uterum gestanti si altera mamma gracilis fiat, gemellos gestans alterum abortit. Et si quidem dextera gracilis fiat, masculinum; si vero sinistra, femellam.

XXXIX. Si mulier, quæ neque prægnans est, neque peperit, lac habet, menfes ipsius defecerunt.

XL. Mulieribus quibuscumque ad mammas sanguis colligitur, infaniam significat.



XLI. Mulierem si velis cognoscere, an prægnans sit, ubi dormire volet, aquam mulsam bibendam dato. Et si quidem tormen habuerit circa ventrem, prægnans est; si vero non, prægnans non est.

XLII. Mulier prægnans si quidem masculum gestat, bene colorata est. Si vero femellam, male colorata.

XLIII. Si mulieri prægnanti ignis facer in utero fiat, lethale est.

XLIV. Quæcumque præter naturam tenues existentes, uterum gestant, abortiunt, priusquam crassescant.

XLV. Quæcumque vero moderate corpus habentes, abortiunt bimestres, & trimestres, sine causa manifesta, his uteri acetabula mucosæ plena sunt; & non possunt fetum continere prægravitate, sed abrumpitur.

XLVI. Quæcumque præter naturam crassæ existentes, non concipiunt in utero, his omentum osculum uteri comprimit, & priusquam attenuentur, non concipiunt.

XLVII. Si uterus, in coxam incumbens, suppuratus fuerit, necesse est curationem ex medicamentis per linamenta ipsi adhibere.

XLVIII. Fetus masculi quidem in dextris, feminæ vero in sinistris magis.

XLIX. Ut secundæ excidant, sternutatorio indito, nares, & os apprehendito.

L. Mulieri menses si cohibere voles, cucurbitam quammaximam ad mammas appone.

LI. Quæcumque uterum gestant, his osculum uterorum clausum est.

LII. Mulieri uterum gestanti, si multum lac ex mammis fluat, debilem fetum significat. Si vero solidæ fuerint mammæ, saniolem fetum significant.

LIII. Quæ corrupturæ sunt fetus, his mammae graciles fiunt. Si vero rursus duræ fiant, dolor erit aut in mammis, aut in coxis, aut in oculis, aut in genibus, & non corrumpunt.

LIV. Quibus os uterorum durum est, his necesse est osculum uterorum clausum esse.

LV. Quæcumque in utero habentes, a febribus corripuntur, & fortiter adtenuantur sine manifesta occasione, difficulter pariunt, & periculose, aut abortum facientes periclitantur.

LVI. In fluxu muliebri convulsio, & animi deliquium si accedat, malum est.

LVII. Mensibus pluribus prodeuntibus morbi fiunt, & non prodeuntibus, ab utero morbi contingunt.

LVIII. Ex intestino recto, & utero inflammato, urinæ stillicidium accedit, & ex renibus suppuratis urinæ stillicidium accedit. Verum ex hepate inflammato singultus accedit.

LIX. Si mulier in ventre non concipit, velis autem scire, an conceptura sit, vestimentis circumtectam ex infernis suffito. Et si quidem odor per corpus tibi procedere videatur ad nares, & ad os, scito, quod ipsa non propter se ipsam infecunda est.

LX. Si mulieri uterum gestanti purgationes prodeunt, impossibile est fetum sanum esse.

LXI. Si mulieri purgationes non prodeunt, neque horrore, neque febre accedente, verum cibi fastidia ipsi accidunt; hanc in ventre habere, existimato.

LXII. Quæcumque frigidos, ac densos uteros habent, non concipiunt, & quæcumque humidos habent uteros, non concipiunt. Extinguitur enim in ipsis genitura. Et quæcumque ficos magis, & adustos. Præ inopia enim ali-



menti corrumpitur semen. Quæcumque vero ex utrisque temperamentum habent, moderatum, tales fecundæ fiunt.

LXIII. Similiter autem in masculis. Aut enim propter corporis raritatem spiritus extra fertur, ut semen non deducat, aut propter densitatem humor non procedit foras, aut propter frigiditatem non concalescit, ut ad hunc locum congregetur, aut propter tarditatem hoc idem contingit.

LXIV. Lac dare caput dolentibus, malum. Malum etiam febricitantibus, & quibus præcordia elevata permurmurantia, & siticulosis. Malum, & quibus biliosæ alvi egestionem in febribus acutis sunt, & quibus sanguinis multi egestio facta est. Convenit autem exhibere tabescentibus, non valde multum febrientibus, & in febribus longis, debilibus, nullo ex prædictis signis præsentem, sed præter rationem consumptis.

LXV. Quibustumores in ulceribus apparent, non valde convelluntur, neque insaniunt. His autem derepente dissipatis retrorsum quidem convulsiones, & distentiones fiunt, antrorsum vero insaniam, lateris dolores acuti, aut suppuratio, aut dysenteria, si rubicundi magis fuerint tumores.

LXVI. Si in vulneribus fortibus, ac pravis tumor non appareat, magnum malum.

LXVII. Tumores laxi, boni; crudi, mali.

LXVIII. Dolenti posteriorem capitis partem, vena recta in fronte secta prodest.

LXIX. Rigores incipiunt, mulieribus quidem ex lumbis magis, & per dorsum ad caput; verum & viris magis posteriore corporis parte quam anteriore, velut ex cubitis, ac femoribus. Sed & cutis rara est. Indicat autem pilus.

LXX. Qui a quartanis corripuntur, non ita valde a convulsionibus corripuntur. Si vero prius corripiantur, & quartana insuper accedat, cessant.

LXXI. Quibus cutis circumtenditur arida, ac dura, hi sine sudore moriuntur. Quibus vero laxa, ac rara, cum sudore moriuntur.

LXXII. Morbo regio laborantes, non ita valde flatuosi sunt.

## SECTIO VI.

I. **I**N diuturnis intestinorum levitatibus, ructus accidus accedens, qui prius non erat, signum bonum.

II. Quibus nares natura humidiores, & genitura humidior, morbosius fani sunt; quibus vero vice versa, salubrius.

III. In longis intestinorum levitatibus, cibi fastidium, malum; & cum febre, pejus.

IV. Ulcera circumglabra maligna sunt.

V. Dolores in lateribus, & in pectoribus, & in aliis partibus an multum differunt, considerandum est.

VI. Renum adfectiones, & quæ circa vesicam consistunt, operose sanantur in senibus.

VII. Dolores circa ventrem fientes, sublimés quidem leves sunt, non autem sublimes, fortiores.

VIII. Hydropicis fientia ulcera in corpore, non facile sanantur.

IX. Latæ pustulæ non valde pruriginosæ sunt.

X. Caput dolenti, & circumdolenti, pus, aut aqua, aut sanguis fluens per nares, aut os, aut aures, solvit morbum.

XI. Atrabiliariis, & Phreniticis, hæmorrhoides



des accedentes , bonum.

XII. Hæmorrhoidas sananti diuturnas , si non una servata fuerit , periculum est hydropem , aut tabem accedere.

XIII. A singultu detento sternutationes , solvunt singultum.

XIV. Ab hydrope detento , ubi aqua in venis ad ventrem confluit , solutio fit.

XV. A profluvio alvi longo correpto , vomitus sponte accedens , solvit alvi profluvium.

XVI. A pleuritide , aut peripneumonia occupato , alvi profluvium accedens , malum.

XVII. Lippientem alvi profluvio corripere , bonum.

XVIII. Vesicam dissectam habenti , aut cerebrum , aut cor , aut septum transversum , aut tenue aliquod intestinum , aut ventriculum , aut hepar , lethale est.

XIX. Ubi dissectum fuerit os , aut cartilago , aut nervus , aut genæ pars tenuis , aut præputium , neque augefcit , neque coalescit.

XX. Si in ventrem sanguis effusus fuerit præter naturam , necesse est suppurari.

XXI. In infanientibus , varicibus , aut hæmorrhoidibus accedentibus , infantiæ solutio fit.

XXII. Quicumque dolores ex dorso ad cubitos descendunt , venæ sectio solvit.

XXIII. Si timor , & tristitia multo tempore perseveret , atrabiliarium hoc signum est.

XXIV. Si ex intestinis tenuibus aliquod dissectum fuerit , non coalescit.

XXV. Ignem sacrum ab externis intro converti , non bonum ; ab internis vero extra , bonum.

XXVI. Quibus in febribus ardentibus tremores facti fuerint , mentis emotio solvit.

XXVII. Quicumque suppurati, aut hydro-pici secantur, aut uruntur, hi pure aut aqua acervata effluente, omnino moriuntur.

XXVIII. Eunuchi non laborant podagra, neque calvi fiunt.

XXIX. Mulier non laborat podagra, si non menses ipsi defecerint.

XXX. Puer non laborat podagra ante veneris usum.

XXXI. Oculorum dolores meri potus, aut balneum, aut fomentum, aut venæ sectio, aut medicamenti potio solvit.

XXXII. Balbi ab alvi profluvio longo maxime corripuntur.

XXXIII. Acidum ructum habentes, non ita valde pleuritici fiunt.

XXXIV. Quicumque calvi fiunt, his varices magnæ non fiunt. Quibuscumque vero calvis varices accedunt, hi rursus hirsuti fiunt.

XXXV. Hydropicis tussis accedens, malum.

XXXVI. Urinæ difficultatem solvit venæ sectio. Secare vero oportet internas.

XXXVII. Ab angina detento tumorem fieri foris in collo, bonum est.

XXXVIII. Quibuscumque occulti canceri fiunt, eos non curare melius est. Si enim curantur, citius moriuntur. Si vero non curentur, multum tempus perdurant.

XXXIX. Convulsio fit aut a repletionem, aut evacuationem. Sic autem & singultus.

XL. Quibuscumque citra præcordium dolores fiunt absque inflammatione, his febris accedens, dolorem solvit.

XLI. Quibuscumque suppuratum quid in corpore existens, significationem de se non præbet,



his propter puris, aut loci crassitudinem, sui significationem non exhibet.

XLII. Morbo regio laborantibus, hepar durum fieri malum est.

XLIII. Quicumque splenici a dysenteria corripuntur, his longa accedente dysenteria, aut hydrops accedit, aut intestinorum levitas, & pereunt.

XLIV. Quibuscumque ex urinæ stillicidio volvulus accedit, hi in septem diebus pereunt, si non febre accedente, urina fatis fluxerit.

XLV. Ulcera quaecumque annua fiunt, aut longiore tempore durant, necesse est, os abscedere, & cicatrices cavas fieri.

XLVI. Quicumque gibbosi ex anhelatione, aut tussi fiunt, ante pubertatem pereunt.

XLVII. Quibuscumque venæ sectio, aut medicamentum conducit, his vere venam secare, aut medicamentum purgans exhibere convenit.

XLVIII. Splenicis dysenteria accedens bonum.

XLIX. Quicumque podagrici morbi fiunt, hi sedata inflammatione, in quadraginta diebus restituuntur.

L. Quibus cerebrum dissectum fuerit, his necesse est febrem, & bilis vomitum accedere.

LI. Quibuscumque sanis derepente dolores fiunt in capite, & statim voce intercepta jacent, ac stertunt, in septem diebus pereunt, si non febris apprehendat.

LII. Considerare vero oportet etiam sub oculis apparitiones in somnis. Si enim albæ partis quid subapparuerit, non commissis palpebris, si id non ex alvi profluvio, aut medicamenti portione fuerit, malum signum, & valde lethale est.

LIII. Desipientiæ cum risu quidem fientes,

securiores sunt; cum studio vero serio, periculosiores.

LIV. In acutis adfectionibus, quæ cum febre fiunt, luctuosæ respirationes, malum.

LV. Podagricæ adfectiones vere, & autumno ut plurimum moventur.

LVI. Atrabiliariis morbis periculosi humorum a loco ad locum decubitus, aut siderationem corporis, aut convulsionem, aut insaniam, aut cæcitatem significant.

LVII. Siderationes vero maxime fiunt ætate a quadragesimo anno usque ad sexagesimum.

LVIII. Si omentum exciderit, necesse est putrefieri.

LIX. Quibuscumque a coxendicum morbo vexatis, coxa excidit, & rursus incidit, his mucii accedunt.

LX. Quibuscumque a coxendicum morbo diuturno vexatis, coxa excidit, his crus tabescit, & claudicant, si non ulti fuerint.

## SECTIO VII.

I. **I**N acutis morbis frigiditas extremarum partium, malum.

II. Ex ossæ ægrotante caro livida, malum.

III. Ex vomitu singultus, & oculi rubicundi, malum.

IV. Ex sudore horror, non bonum.

V. Ex infania dysenteria, aut hydrops, aut mentis emotio, bonum.

VI. In morbo diuturno cibi fastidium, & meracæ alvi egestionem, malum.

VII. Ex multo potu rigor, & delirium, malum.



VIII. Ex tuberculi intus ruptione exsolutio, vomitus, & animi deliquium fit.

IX. Ex sanguinis fluxu delirium, aut etiam convulsio, malum.

X. Ex volvulo vomitus, aut singultus, aut convulsio, aut delirium, malum.

XI. Ex pleuritide peripneumonia, malum.

XII. Ex peripneumonia phrenitis malum.

XIII. Ex ardoribus vehementibus convulsio, aut distentio, malum.

XIV. Ex plaga in caput stupor, aut delirium, malum.

XV. Ex sanguinis sputo puris sputum, malum.

XVI. Ex puris sputo tabes, & fluxus, malum. Postquam vero sputum supprimitur, moriuntur.

XVII. Ex hepatis inflammatione singultus, malum.

XVIII. Ex vigilia convulsio, aut delirium, malum.

XIX. Ex ossis denudatione ignis sacer.

XX. Ex igne sacro putrefactio, aut suppuratio.

XXI. Ex forti pulsu in ulceribus sanguinis eruptio.

XXII. Ex dolore diuturno partium circa ventrem, suppuratio.

XXIII. Ex meraca alvi egestionem dysenteria.

XXIV. Ex ossis dissectione delirium, si ad vacuum usque processerit.

XXV. Ex medicamenti potione convulsio, lethale.

XXVI. Ex dolore forti partium circa ventrem, frigiditas extremarum partium, malum.

XXVII. Mulieri uterum gerenti tenesmus accedens abortire facit.

XXVIII. Quodcumque os præfectum fuerit, aut nervus in corpore, neque augefcit, neque coalefcit.

XXIX. Si a pituita alba detento vehemens alvi profluvium accedat, folvit morbum.

XXX. Quibuscumque fpumofæ alvi egeftiones funt in alvi profluviis, his de capite pituita defluit.

XXXI. Quibuscumque febricitantibus, in urinis fubfidentia craffiores potentæ partes referentes funt, longum morbum significant.

XXXII. Quibus vero biliofæ fubfidentia, ab initio tenues, acutum morbum significant.

XXXIII. Quibuscumque difparatæ urinæ funt, his vehemens turbatio in corpore eft.

XXXIV. Quibus in urinis bullæ fuperftant, renum adfectiones significant, & morbum fore longum.

XXXV. Quibus pingue eft id quod fuperftant, & acervatum, his renum adfectiones, easque acutas fignificat.

XXXVI. Quibus vero jam nephriticis ex renibus adfectis prædicta figna accidunt, dolorefque circa mufculos fpinales funt, fi quidem circa externos locos fiant, etiam abfcelfus extrinsecus futuros exspecta. Si vero dolores magis circa internos locos fiant, etiam abfcelfus magis intus fore exspecta.

XXXVII. Quicumque fanguinem vomunt, fine febre quidem, falutare eft: verum cum febre, malum. Perfrigerantibus autem & adstringentibus curare oportet.

XXXVIII. Defluxiones in ventrem fupernum, in viginti diebus fuppurantur.



XXXIX. Si quis sanguinem mingat, & grumos, & urinæ stillicidium habeat, & dolor incidat in ani ac scroti intercapedinem, & imum ventrem ac pectinem, partes circa vesicam ægrota-re significat.

XL. Si lingua derepente impotens fiat, aut aliqua corporis pars siderata, atrabiliarium tale existit.

XLI. Si senioribus nimium purgatis singultus accedat, non bonum est.

XLII. Si febris non a bile habeat, aqua multa calida in caput adfusa, febris solutio fit.

XLIII. Mulier ambidextra non est.

XLIV. Quicumque suppurati uruntur, si quidem pus purum fluat & album, evadunt. Si vero subcruentum, & carnosum, ac graveolens, pereunt.

XLV. Quicumque hepar suppuratum uruntur, si quidem pus purum fluat, & album, superstites evadunt. In tunica enim pus his inest. Si vero velut amurca fluat, pereunt.

XLVI. In doloribus oculorum, ubi merum bibendum dedistit, & multa calida lavisti, venam fecato.

XLVII. Hydropicum si tussis vexet, desperatus est.

XLVIII. Urinæ stillicidium, urinæ difficultatem vini potus, & venæ sectio solvit. Secare vero oportet internas.

XLIX. Ab angina detento tumor, & rubor in pectore accedens, bonum. Foras enim vertitur morbus.

L. Quibuscumque corruptum fuerit cerebrum, in tribus diebus pereunt. Si vero has effugerint, sani fiunt.

LL. Sternutatio fit ex capite, percalescente ce-

rebbero, aut vacuo, quod est in capite perhumefcente. Aer enim, qui intus est, foras erumpit. Strepitum vero edit, quia transitus est ipsi per angustum.

LII. Quibuscumque hepar circumcirca dolet, his febris accedens solvit dolorem.

LIII. Quibuscumque sanguinem de venis auferre conducit, his venam secare convenit.

LIV. Quibus inter ventrem, & septum transversum pituita conclusa est, & dolorem exhibet, non habens exitum ad neutrum ventrem, his per venas ad vesicam conversa pituita, morbi solutio fit.

LV. Quibus hepar aqua repletum, ad omentum eruperit, his venter aqua impletur, & moriuntur.

LVI. Anxietatem, oscitationem, horrorem, vinum æquali mensura aquæ admixta potum solvit, & lac.

LVII. Quibus in urinaria fistula tubercula fiunt, his suppuratione facta, & eruptione, solvitur dolor.

LVIII. Quibus cerebrum concussum fuerit ex aliqua causa, eos statim voce privari necesse est.

LIX. Corporibus humiditas carnes habentibus, famem inducere oportet; fames enim corpora siccat.

LX. Ubi in toto corpore mutationes, & corpus perfrigeratur, & rursus calefcit, aut color alius ex alio mutatur, longitudinem morbi significat.

LXI. Sudor multus, calidus, aut frigidus semper fluens, humorem abducere oportere significat; forti quidem superne; debili vero inferne.

LXII. Febres non intermittentes, si per ter-



tiam fortiores fiant, periculosa sunt. Quocumque vero modo intermiserint, sine periculo esse significant.

LXIII. Quibus febres longæ sunt, his aut tubercula, aut ad articulos dolores fiunt.

LXIV. Quibus tubercula diutina, aut ad articulos dolores ex febribus fiunt, hi cibis plurimis utuntur.

LXV. Si quis febricitanti cibum det, quem sano exhibet, sano quidem robur, ægroto vero morbus est.

LXVI. Quæ per vesicam prodeunt, inspicere oportet, an qualia sanis prodeunt. Quæ igitur minime similia his sunt, ea morbosiora sunt. Quæ vero similia sanis, ea minime morbosa.

LXVII. Et quibus alvi egestiones, si stare permiseris, & non moveris; subsistunt veluti ramenta; si paucæ fuerint, modicus morbus est; si multæ, multus. His confert subpurgare alvum. Si vero non purgata alvo, sorbitiones dederis, lædes, & quanto plures dederis, magis lædes.

LXVIII. Quibuscumque cruda deorsum secedunt, ex atra bile sunt; si plura, copiosiore; si pauciora, pauciore.

LXIX. Excreationes in febribus non intermittentibus lividæ, & cruentæ, & graveolentes, & biliosæ, omnes malæ sunt. At probe secedentes, bonæ, & per alvum, & per vesicam; & ubi sane quid secedens constiterit non purgatum, malum.

LXX. Corpora quocumque quis purgare voluerit, fluida facere oportet. Et si quidem sursum, sistere alvum. Si vero deorsum, humectare.

LXXI. Somnus , vigilia , utraque modum excedentia , morbus.

LXXII. In non intermittentibus febribus , si externæ quidem partes frigidæ fuerint , internæ vero ardeant , & febris habeat , lethale est.

LXXIII. In febre non intermittente , si labium ; aut nasus , aut oculus aut supercilium distorqueatur , aut non videat , aut non audiat æger jam debilis existens ; quicquid horum fiat , propinqua mors est.

LXXIV. Ex pituita alba hydrops accedit.

LXXV. Ab alvi profluvio dysenteria.

LXXVI. A dysenteria intestinorum levitas accedit.

LXXVII. Ex corruptione , abscessus ossis.

LXXVIII. Ex sanguinis vomitu tabes , & puris purgatio sursum. Ex tabe fluxus ex capite. Ex fluxu alvi profluvium , ex alvi profluvio suppressio purgationis sursum versus ; ex suppressione mors.

LXXIX. Qualia etiam sint in vesicæ , ac alvi egestionibus , inspicere oportet , & in his , quæ per carnes excernuntur , & sicubi alibi a natura recedat corpus : si parum , parvus est morbus ; si multum , multus. Si vero valde multus sit recessus , lethale hoc est.

LXXX. Quicumque supra quadraginta annos phrenitici fiunt , non ita valde sani fiunt. Minus enim periclitantur , quorum naturæ , & ætati morbus adfinis fuerit.

LXXXI. Quibuscumque in ægritudinibus oculi ex voluntate lachrimantur , bonum. Quibus vero citra voluntatem , malum.

LXXXII. Quibus in febribus quartanis sanguis ex naribus fluxerit , malum est.



LXXXIII. Sudores in diebus judicatoriis fientes, vehementes, & veloces, periculosi sunt, qui expelluntur ex fronte velut guttæ, & aquæ salientes, & frigidi valde, ac multi. Necessè est enim talem sudorem prodire cum violentia, & doloris excessu, ac expressione diuturna.

LXXXIV. Ex morbo diuturno etiam alvi defluxus, malum.

LXXXV. Quæcumque non sanant medicamenta, ea ferrum sanat. Quæ ferrum non sanat, ea ignis sanat. Quæ ignis non sanat, ea incurabilia putare oportet.

## FINIS TOMI PRIMII.

---

### ERRATA.

Pag. 1. l. 1. pro *genere* lege *genuino*.

Pag. 89. Præf. l. 1. pro *genuinos* lege *genuino*.

- - - l. 9. post epidemicorum dele Comma.

Pag. 110. Præf. l. 7. T A S O lege T H A S O.

Pag. 282. Præf. l. 5. pro *cautellis* lege *cautelis*.

- - - ibid. l. 10. pro *cornærum* lege *cornearum*.

















